















DS  
735  
.A2  
T4  
v.72  
函史下編卷之十五

明旰郡鄧元錫輯

樂律考

太史公曰。余每讀虞書。至於君臣相敕。維是幾康。而  
股肱不良。萬事墮壞。未嘗不流涕也。成王作頌。推已  
懲艾。悲彼家難。可不謂戰戰恐懼。善守善終哉。君子  
不爲約則脩德。滿則棄禮。佚能思初。安能惟始。沐浴  
膏澤。咏歌勤苦。非大德誰能如斯。傳曰。治定功成。禮  
樂乃興。海內人道益深。而德益至。所樂者益異。滿而  
不損。則溢盈而不持。則傾。凡作樂者。所以節樂。君子



以謙退爲禮。以損減爲樂。樂其如此也。

史記

夫音樂之

所繇來遠矣。本於太乙。行於陰陽。陰陽變化。一下一上。合而成章。渾渾沌沌。離則復合。合則復離。是謂天常。天地旋輪。終則復始。極則復反。莫不咸當。日月星辰。或疾或徐。四時迭興。或暑或寒。錯代不同。以盡其行。而百化興焉。萬物循生。一盛一衰。文武倫經。一清一濁。陰陽調和。流克其聲。蟄蟲始作。震之以雷霆。一死一生。一償一起。所常無窮。而一不可待也。是故萌芽始震。凝沍以形。有形則有聲。其聲能短能長。能柔能剛。變化齊一。不主故常。在谷滿谷。在阡滿阡。聲相



應而生變。變成方而生音。此樂之原也。

張樾批本說聲音却先說

太乙陰陽又說日月星辰四時又說萬物方說入聲音文字舒徐浩博意義淵微透露氣象跌宕精明兼

總經子

古昔聖人合德天地並明日月冲陰和陽遂

性而反之命三綱正九疇叙天下太平萬物安寧皆化于上乃調之以自然之命合之以蕩平之心根之以優柔平中之德比音而樂之以宣八風論五常正五情奏之以人徵之以天一之於禮義統之以太和而樂其可興也興樂有具必節嗜慾嗜慾不溺樂乃可務故樂有其適非適人之情也使人平好惡而反人道之正也夫人有血氣心知之性而無哀樂喜怒



之常。應感而動。然後心術形焉。是以志微噍殺之音作。而民思憂。啍諧慢易繁文簡節之音作。而民康樂。粗厲猛起奮末廣賁之音作。而民剛毅。麤直勁正莊誠之音作。而民肅敬。寬裕肉好順成和動之音作。而民慈愛。流辟邪散狄成滌濫之音作。而民淫亂。是故先王以爲州異國殊情習不同。博采風俗。協比聲律。稽之度數。制之禮義。合生氣之和。導五常之行。以補短移化。助流政教。天子躬於明堂臨觀焉。而立之學等。廣其節奏。省其文采。以繩德厚。律小大之稱。比終始之序。以象事行。使覲踈貴賤長幼男女之理。皆形



見於樂。使萬民咸蕩滌邪穢。斟酌飽蒲。以飾厥性。使  
之剛氣不怒。柔氣不懾。四暢交於中。而發作於外。皆  
安其位。而不相奪焉。及其調和諧合。鳥獸盡感。而况  
懷五常。含好惡。自然之理也。昔庖羲氏之王天下也。  
作樂曰扶來。亦曰立本。炎帝之時。多風雨。而陽氣畜  
積。萬物解散。故士達作五絃之瑟。采陰氣以定群生。  
其樂曰扶持。亦曰下謀。黃帝知天地識之別。令伶倫  
作律。從有以至未有。以得細若氣。微若聲。因神而存  
之。取竹嶰谿之谷。定黃鐘之宮。以爲律本。又鑄十二  
鐘。以和五聲八音。而施英韶命之曰大卷。亦曰雲門。



言其德如雲出能卷聚也。帝顓頊生自若水。處於空桑。乃登爲帝。

德惟天合。八風時行。其音熙熙。淒淒。翼翼。帝命飛龍。

效之。作八風之音。命之曰承雲。亦曰六莖。言根莖備少昊。

樂曰大淵。言深帝嚳樂曰六英。言英華茂陶唐氏之始。陰雨。

滯伏而湛積。水壅不行。民氣鬱闕。節骨瑟縮而不達。

作爲大咸以宣導之。命之曰大章。大章。章之也。舜紹。

堯治。命夔典樂。于時六府脩。三事和。因九功之叙。而。

作歌。播之爲九成。以明德象功。其命典樂之官曰。命。

汝敎冑子。直而溫。寬而栗。剛而無虐。簡而無傲。詩言。

志。歌永言。聲依永。律和聲。八音克諧。無相奪倫。神人。



以和夔旣在位。諧於其職。其述職之詞曰。戛擊鳴球。  
登相琴瑟以詠。祖考來格。虞賓在位。群后德讓。下管  
鼗鼓。合止祝敔。間之笙鏞。而鳥獸蹌舞。蓋簫韶儿成。  
而鳳凰儀焉。曰於。予擊石拊石。百獸率舞。庶尹允諧。  
孔子歎之曰。樂則韶舞。自生民以來。韶爲盛。於世爲  
上古。於德爲廣淵。於時爲紹堯致治。在位以揖遜。時  
乎人乎。固韶其獨兼矣。李子觀之曰。德至矣哉。如天  
之無不覆也。如地之無不載也。雖甚盛德。蔑以加此  
矣。禹勤勞天下。作夏籥以象功。夏者大也。禹敷土治  
水。而大中國也。湯率諸侯伐桀。若時雨降。適時大旱。



虔精致禱。黔首被澤。樂曰大濩。濩者澤也。言湯克寬  
仁。救其邪暴。護之也。至周武王。成文之德。克商而有  
天下。作樂曰大武。其金奏。外傳以爲肆夏。樊遏渠。呂  
叔王曰。肆夏時邁也。樊遏。執競也。渠。思文也。其武舞  
記以爲始而北出也。再成而滅商也。三成而南也。四  
成而南國是疆也。五成而分周公左。召公右。六成復  
綴以崇天子也。夾振而四伐。盛威於中國也。分夾而  
進。事蚤濟也。總于山立。久次於綴。待諸侯之至也。發  
揚蹈厲之已蚤。太公之志也。武亂皆坐。周召之治也。  
孔子曰。武未盡善。嫌其以征誅革命。終不若三后德。



讓之爲懿也。樂以象成。而主於崇德。夫德則何可爲。

僞也。

張氏此上歷叙古樂而韶武獨經孔子論列故詩言之又秦漢以來二樂猶存又篇首太史公

獨揭虞周之樂。

瞻前顧後天然融貫

其後周公相成王四征弗庭六服

承德歸宗周也。於是播樂以安禮。本禮以節樂。而睦

頌聲興。於是以六詩四始備六代之樂。兼三王之事。

而太師以六律六同以合陰陽之聲。陽聲六曰黃鐘。

太簇。姑洗。蕤賓。夷則。無射。爲六律。陰聲亦六曰大呂。

應鐘。南呂。林鐘。仲呂。夾鐘。爲六同。皆文之以五聲曰

宮。商。角。徵。羽。皆播之以八音曰金石絲竹匏土革木。

皆被之以六詩。曰風雅頌爲三經。賦比興爲三緯。而



樂成

吳徵曰六律六同以合陰陽之聲天地自然之理也蓋日月所會在天爲十二舍在地爲十二

辰而律同生焉故曰陰陽之合也陽道常饒故其律順而左旋陰道常乏故其律逆而右轉無非應乎日月之會而爲天地自然之合也六律屬陽六呂屬陰以陰之同乎陽故謂之同所以合陰陽之聲總而言之則十二律也十二律各具五聲數多而濁者大少而清者細大不踰宮細不踰羽徵之聲清於角角之聲清於商惟五聲相比而成文故曰文之以五聲然五聲寓於八音金石土爲陰陰逆推其所始是以先金石而後土匏竹木爲陽陽順序其所生是以先匏竹而後木革絲居陰陽之正是以先革而後絲故曰皆播之以八音周官大司樂本虞胄子之教燮理之於性情

而約以六德曰中和祗庸孝友以樂舞教國子曰雲門大卷大咸大韶大夏大濩大武乃分樂而序之以祭以饗以祀乃奏黃鐘歌大呂舞雲門以祀天神乃



奏大簇歌應鍾舞咸池以祭地祇。乃奏姑洗歌南呂舞大韶以祀四望。乃奏蕤賓歌函鍾舞大夏以祭山川。乃奏夷則歌小呂舞大濩以享先妣。乃奏無射歌夾鍾舞大武以享先祖。樂尊者享尊祀。樂古者享元祀。尊天而親人也。凡六樂者。一變而致羽物。及川澤之示。再變而致羸物。及山林之示。三變而致鱗物。及丘陵之示。四變而致毛物。及墳衍之示。五變而致介物。及土示。六變而致象物。及天神。聲樂和於此。神物應於彼。誠感而神應也。故樂。圜鍾爲宮。黃鍾爲角。大簇爲徵。姑洗爲羽。鼙鼓。鼙鼗。孤竹之管。雲和之琴瑟。



雲門之舞。冬。日。至於。地上。之。圜丘。奏之。樂六變。則天  
神皆降。可得而禮矣。凡樂。函鍾爲宮。大簇爲角。姑洗  
爲徵。南呂爲羽。靈鼓。靈鼗。孫竹之管。空桑之琴瑟。咸  
池之舞。夏。日。至於。澤中。之。方丘。奏之。樂八變。則地示  
皆出。可得而禮矣。凡樂。黃鍾爲宮。大呂爲角。大簇爲  
徵。應鍾爲羽。路鼓。路鼗。陰竹之管。龍門之琴瑟。九德  
之歌。九韶之舞。於宗廟之中。奏之。樂九變。則人鬼可  
得而禮矣。故樂幽可以格鬼神。明可以。和邦國。近可  
以合饗食。遠可以諧萬民。敷美教化。極之可鼓舞。靈  
動。俾畢作咸奮也。而大師旅。太師執同律吹之。以聽。



聲而占其吉凶。故王者制事立法。物度軌則。壹於六律。六律爲萬事根本焉。同聲相從。物之自然。何足怪哉。書曰。律曆天所以通五行八正之氣。天所以成熟萬物也。廣莫風居北方。廣莫者。言陽氣在下。陰莫陽廣大也。故曰廣莫。東至於虛。虛者能實能虛。言陽氣冬則宛藏於虛。日冬至則一陰下藏。一陽上舒。故曰虛東。至於須女。言萬物變動其所。陰陽氣未相離。尚相如胥也。故曰須女。十一月也。律中黃鍾。黃鍾者。陽氣踵黃泉而萌也。若其種之也。於十二子爲子。子者滋也。言萬物滋於下也。於十母爲壬癸。壬之言



仔也。言陽氣任養萬物於下也。癸之爲言揆也。言萬物可揆度也。故曰癸。東至牽牛。牽牛者。言陽氣牽引萬物出之也。牛者。冒也。言地雖凍。能冒而生也。牛者。耕植種萬物者也。東至於建星。建星者。建諸生也。律中大呂。其於十二子爲丑。丑者。紐也。言陽氣伏在下未上。萬物厄紐未敢出也。條風居東北。主出萬物。言條治萬物而出之。故曰條。南至箕。箕者。言萬物根棋於此也。正月也。律中泰簇。泰簇者。言萬物簇生也。其於十二子爲寅。寅言萬物始生蟄然也。故曰寅。南至尾。言萬物始生如尾也。南至心。言萬物始生。



有華心。南至於房。房言萬物門戶也。至於門則出矣。  
明庶風居東方。明庶者。明庶物盡出也。二月也。律中  
夾鍾。夾者言陰陽相夾厠也。於十二子爲卯。卯之言  
茂也。於十母爲甲乙。甲者言萬物剖符甲而出也。乙  
者言萬物之生軋軋也。南至於氐。氐言萬物皆至也。  
南至於亢。亢者言萬物亢見也。南至于角。角者萬物  
皆有枝格如角也。三月也。律中姑洗。姑洗者言萬物  
鮮生於十二子爲辰。辰言萬物之娠也。清明風居東  
南維。主吹萬物而西之軫。軫者萬物益大軫軫然也。  
西至于翼。翼言萬物皆有羽翼也。四月也。律中仲呂。



言萬物中克大盡旅。助而西行。其於十二子爲巳。巳者言陽氣之已盡也。西至于七星。陽數成於七也。西至于張。張言萬物皆張。西至于注。注言萬物之始衰。陽氣下注也。五月也。律中蕤賓。蕤賓言陰氣幼少。蕤痿而陽不用事。曰蕤賓也。景風。景者大也。言陽氣長養而大且竟也。於十二子爲午。陰陽交曰午。其於十母爲丙丁。丙者言陽道著明。丁者言萬物之丁壯也。西至弧。弧言萬物吳音弧落且就死也。西至于狼。狼者言萬物可度量而斷之也。涼風居西南維。主地。涼者陰氣行而沈奪萬物氣也。六呂也。律中林鐘。林鐘者



言萬物引而止氣林林然其於十二子爲未未者言萬物皆成有滋味也北至于罰罰言萬物氣奪可代也北至于參言萬物可參故參七月也律中夷則言陽氣退以平而陰氣賊萬物也其於十二子爲申申者言陰用事申賊萬物也故曰申北至于濁濁者觸也言萬物皆觸死也故曰濁北至於留留言陽氣稽留也八月也律中南呂南呂者言陽氣之旅入藏也其於十二子爲酉酉者老而飽也言老而留也閭闔風居西方閭者倡也闔者藏也言陽氣道萬物闔黃泉也於十母爲庚辛庚者言陽氣庚萬物故曰庚辛



者言萬物之辛生。故曰辛也。北至於胃。胃者言陽就藏。皆胃胃也。北至于婁。婁者呼萬物且內之也。北至于奎。奎者主毒螫殺萬物也。九月也。律中無射。無射者。陰氣盛用事無厭射。而陽氣入無餘也。其於十二子爲戌。戌言萬物盡滅。故曰戌。而黃鐘爲律元。不周風居西北。言陽氣不交合。主殺生也。東至于東壁。東壁者東辟也。主辟生氣而東之。至於營室。營室者主營胎陽氣而產之。東至于危。危墜也。言陽氣之危墜。故曰危。十月也。律中應鐘。應鐘者。陽氣之應不用事也。其於十二子爲亥。亥者該也。言陽氣藏於下。故該。



也。蓋冬至廣莫風距冬至五九四十五日條風至。爲

條風艮也。條風四十五日而明庶風至。明庶震風也。

爲明庶風四十五日而清明風至。清明巽風也。爲

清明風四十五日而景風至。景離風也。爲景風四

十五日涼風至。涼風坤風也。爲涼風四十五日閭闔

風至。閭闔風兌風也。爲閭闔風四十五日而不周風

至。不周風乾風也。爲不周風四十五日廣莫風至。廣

莫風坎風也。爲復還於冬至爲黃鐘之宮。其數九九

八十一以爲宮。三分去一以下生。三分益一以上生。

以下生者倍其實。三其法。如黃鐘九寸。倍之則爲十

八。三其法。則十八爲二六。



故下生林

以上生者四其實三其法

如林鍾六寸四之爲二十四三

鍾長六寸

其法則二十四爲三八上生太簇長八寸

上九商八羽七角六宮五徵九

置一而九三之以爲法實如法得長一寸凡得九寸

命曰黃鍾之宮故曰音始於宮窮於角數始於一成

於三終於十氣始於冬至周而復生神生於無形成

於有形然後數形而成聲故曰神使氣氣就形形理

如顛有可顛或未形而未顛或同形而同顛顛而可

斑類而可識聖人知天地識之別從有以至未有以

得細於聲微於氣因神而存之雖妙必効情核其羣

道者明矣非其聖心以乘聰明孰能存天地之神而



威形之情。或神者。物受之而不能知。及其去來。故聖人畏而欲存之。神之亦存其欲存之者。故莫貴焉。故樂者樂也。以存神爲樂也。自上古建律運歷。造日度言。可據而度也。合符節。通道德。即從斯之謂也。前漢志曰。夫作樂者。所以和五聲。諧八音。湯滌人之邪穢。全其正性。而移風易俗也。商之言章也。物成熟可章度也。通典曰。商。金也。以角。觸也。物觸地而出。戴芒角。物堅強成就而名。也。宮。中也。居中央。暢四維。倡和發生。爲四聲綱也。通典日。土無不容。取徵。祉也。物盛大而繁。祉也。羽。宇也。物宮室安容之象。聚藏宇覆之也。夫聲中於宮。觸於角。祉於徵。章於商。



宇於羽。故四聲爲宮紀也。八音。土曰埴。匏曰笙。皮曰鼓。竹曰管。絲曰絃。石曰磬。金曰鐘。木曰柷。五聲和。八音諧而樂成。五聲協五行五事五常。則角爲木爲仁。爲視。商爲金爲義爲聽。徵爲火爲禮爲言。羽爲水爲智爲貌。宮爲土爲信爲思。以君臣民事物言。則宮爲君。商爲臣。角爲民。徵爲事。羽爲物。五者不亂。則無怙。濫之音矣。宮亂則荒。其君驕。商亂則陂。其臣壞。角亂則憂。其民怨。徵亂則哀。其事勤。羽亂則危。其財匱。而五聲之本。生於黃鐘之宮。九寸爲宮。或損或益。以定商角徵羽。九六相生。陰陽之應也。昔者黃帝使伶倫



自大夏之西。崑崙之陰。取嶰谷之竹。生而竅厚均者。斷兩節間而吹之。以爲黃鐘之宮。制十二筩以聽鳳。人鳴其雄。鳴六。雌鳴亦六。比黃鐘之宮。而皆可以生之。是爲律本。其時至治。天地之氣合以生風。天地之風氣正。而十二律定。黃鐘黃者中之色。君之服也。鐘者種也。天之中數五。一三在上。七九在下。五君律。五爲聲上宮。五聲莫大焉。地之中數六。二四在上。八十在下。六臣律。律有形有色。色上黃。五色莫盛焉。故陽氣施種於黃泉。萌產萬物爲六氣元。以黃色名元氣。謂之黃鐘。律者著宮聲也。宮以九唱六。變動不居。周流六虛。始於子。在十



一月間以大呂。呂旅也。言陰大旅。助黃鐘宣氣而牙  
物也。位於丑。在十二月。以生太簇。簇者奏也。言陽氣  
大奏地而達物也。位於寅。在正月。間以夾鍾。言陰夾  
太簇宣四方之氣。而出種物也。位於卯。在二月。以生  
姑洗。洗潔濯也。言陽氣洗物而姑潔之也。位於辰。在  
三月。間以中呂。中呂。言微陰始起。未成著於其中。旅  
助姑洗。而宣氣暢物也。位於巳。在四月。以生蕤賓。蕤  
繼也。賓。道也。言陽始導陰氣。使繼養物也。位於午。在  
五月。間以林鐘。林君也。言陰氣受任助蕤賓。君主種  
物。使長茂也。位於未。在六月。以生夷則。則。法也。言陽



氣正法度而使陰氣夷當傷之物也。在於申爲七月間以南呂南任也。言陰氣旅助夷則任成萬物也。在於酉爲八月終以無射射。厭也。言陽氣寃物而使陰氣畢剥落之終而復始無厭已也。在於戌爲九月間以應鐘言陰氣應無射該藏萬物而雜陽閔種也。位於亥爲十月三統者天施地化人事之紀也。十一月乾之初九陽氣伏於下始著爲一一生二二生三三生萬物萬物萌動鐘於太陰故黃鐘爲天統三三如九故黃鐘之律長九寸而宮音調因而九之九九八十一而黃鐘之數立焉。九者所以究極中和爲萬物



元也。易曰。立天之道。曰陰與陽。六月。坤之初六。陰氣受任於太陽。繼養化柔萬物。長茂之於未。令種剛强大。故林鍾爲地統。律長六寸。六者。所以含陽之施。茂之於六合之內。令剛柔有體也。故曰。立地之道。曰柔與剛。正月。乾之九三。萬物畢通。簇出於寅。人奉而成之。仁以養之。義以成之。令事物各得其理焉。寅。木也。爲仁。其聲商也。爲義。故太簇爲人統。律長八寸。象八卦。伏羲氏所以順天地。通神明。顓萬物之情者也。立人之道。曰仁與義。在天成象。在地成形。后以裁成天地之道。輔相天地之宜。以左右民。此三律之謂矣。是



爲三統三統易數也。易曰參天兩地而倚數。天數始於一。終於二十有五。其義紀之以三。故置一得三。又二十五分之六。凡二十五置終天之數。得八十一。以天地五位之合。終於十者乘之。爲八百一十分。應歷一統千五百三十九歲之章數。黃鐘之實也。歷十九歲爲

章八十一章爲一統。繇此之義。起十二律之周。徑地之數。始

二。終於三十。其義紀之以兩。故置一得二。凡三十置終地之數。得六十。以地中數六乘之。爲三百六十分。當期之日。爲林鐘之實。人者。繼天順地。序氣成物。統八卦。調八風。理八政。正八節。諧八音。舞八佾。監八方。



被八荒以終天地之功。故八八六十四。其義極天下之變。天兼地。人則天。以天地五位之合。終於十者乘之。爲六百四十分。以應六十四卦。大簇之實也。三統相通。故黃鐘林鐘太簇律長皆全寸而無餘分。天中數五。地中數六。六爲音。五爲聲。周流於六虛。虛者。効律陰陽登降運行。列爲十二。而律呂和矣。其黃鐘子爲天正。林鐘丑地之衝爲地正。太簇寅爲人正。三正正始之道也。地正適始。紐於陽。東北丑。易曰。東北畚朋。乃終有慶。答應之道也。及黃鍾爲宮。則太簇姑洗林鐘南呂。皆以其正聲應之。無有忽微不復與也。



律爲役者。同心一統之義也。非黃鐘而他律。惟當其  
月自宮者。則其和應之。而律有空積。忽微不得其正。  
此黃鐘至尊無與並也。太極元氣規始於二。生二。二  
生三。故函三爲一。極中也。元始也。行於十二辰。始動  
於子。參之以丑。得三。又參之於寅。得九。又參之於卯。  
得二十七。又參之於辰。得八十一。又參之於巳。得二  
百四十三。又參之於午。得七百二十九。又參之於未。  
得二千一百八十七。又參之於申。得六千五百六十  
一。又參之於酉。得萬九千六百八十三。又參之於戌。  
得五萬九千四十九。又參之於亥。得十七萬七千一



百四十七。是爲黃鐘之實。

張批前云黃鐘之實自本律言此云黃鐘之實自所

生衆律言

此陰陽合德。氣鐘於子。化生萬物者也。故孽萌

於子。紐牙於丑。引達於寅。昌萌於卯。振美於辰。巳盛

於巳。罍布於午。昧夢於未。申堅於申。畱孰於酉。畢入

於戌。該闕於亥。出甲於甲。奮軋於乙。明炳於丙。大盛

於丁。豐楙於戊。理紀於巳。歛更於庚。悉新於辛。懷任

於壬。陳揆於癸。故陰陽之施化。萬物之終始。既類旅

於律呂。又經歷於日辰。而變化之情可見矣。王衡杓

建。天之綱也。日月初躔。星之紀也。綱紀之交。以和會

造設。合樂用焉。律呂唱和。以育生成化。歌奏用焉。周



禮太師掌六律六同以合陰陽之聲而典同掌其和  
和言合也。本氣於朔辰於建合而生也。黃鐘子氣十  
一月建焉而辰在星紀。星紀丑也。大呂丑氣十二月  
建焉而辰在玄枵。玄枵子也。故黃鐘於大呂合也。太  
簇寅氣正月建焉而辰在娵訾。娵訾亥也。應鐘亥氣  
十月建焉而辰在析木。析木寅也。故太簇於應鐘合  
也。姑洗辰氣三月建焉而辰在大梁。大梁酉也。南呂  
酉氣八月建焉而辰在壽星。壽星辰也。故姑洗於南  
呂合也。蕤賓午氣五月建焉而辰在鶉首。鶉首未也。  
林鐘未氣六月建焉而辰在鶉火。鶉火午也。故蕤賓



於函鐘合也。夷則申氣。七月建焉。而辰在鶉尾。鶉尾  
巳也。仲呂巳氣。四月建焉。而辰在實沈。實沈申也。故  
夷則於小呂合也。無射戌氣。九月建焉。而辰在太火。  
太火卯也。夾鐘卯氣。二月建焉。而辰在降婁。降婁戌  
也。故無射於夾鐘合也。天行見於建。而日月所會輯  
於辰。辰與建交錯貿處。如表裏然。爲天地之至和。物  
從主成焉。律同之配合象之。倡合以爲均。而入音克  
諧。故音聲之道與天地通也。指顧取象。然後陰陽萬  
物靡不條鬯而該成。以成之數。忖該之積。如法爲一  
寸。則黃鐘之長也。天統九、十、數八、十一、主十一月。參分損一。隔八而



下生林鍾之初六地統六寸數五十四至六月參分林鍾益一。隔

八而上生太簇之九二人統八寸數七十二至正月參分太簇損

一。隔八而下生南呂之六二五寸三分數四十八至八月參分南

呂益一。隔八而上生姑洗之九三七寸一分數六十四至三月參

分姑洗損一。隔八而下生應鍾之六二四寸六分數四十二至五月參

分應鍾益一。隔八而上生蕤賓之九四六寸二分

八釐數五十七至五月參分蕤賓益一。隔八而上生大呂之六

四八寸三分七釐六毫數七十六至十二月參分大呂益一。隔八而下生

夷則之九五五寸五分五釐一毫數五十一至七月參分夷則損一。隔

八而上生夾鍾之六五七寸四分三釐七毫三絲數六十八至二月參分



夾鐘益一。隔八而下生無射之上九。四寸八分八釐

十五主參分無射損一。隔八而上生仲呂之上六。六寸

九月五分八釐三毫四絲。極不生而一終矣。同位者象夫

六忽數六十主四月妻。異位者象子母。所謂律得妻而呂生子也。黃鐘左

旋八八爲位。以調五聲。九九八十一以爲宮。三分去

一。五十四以爲徵。三分益一。七十二以爲商。三分去

一。四十八以爲羽。三分益一。六十四以爲角。宮生徵。

徵生商。商生羽。羽生角。五聲調焉。而黃鐘以爲均。凡

聽宮。如牛鳴窅中。凡聽徵。如負猪豕覺而駭。凡聽商。

如離群羊。凡聽羽。如鳴鳥在樹。凡聽角。如雉登木以



鳴職在太樂太常掌之。度者分寸尺丈引也。所以度  
長短也。本起於黃鐘之長。以子穀秬黍中者一黍之  
廣度之。九十分黃鐘之長。一爲一分。十分爲寸。十寸  
爲尺。十尺爲丈。十丈爲引。而五度審矣。其法用銅高  
一丈。廣二寸。長一丈。而分寸尺丈存焉。用竹爲引。高  
一分。廣六分。長十丈。其方法矩。高廣之數。陰陽之象  
也。分者。自三微而成者。可分別也。寸者。忖也。尺者。  
也。菱音丈者。張也。引者。信也。夫度別於分。忖於寸。菱  
於尺。張於丈。信於引。引者。張信天下者也。秋官掌之。  
量者。龠合升斗斛也。所以量多少也。本起於黃鐘之



龠用度數審其容。以子穀秬黍中者。千有二百實其龠。以井水準其槩。合龠爲合。十合爲升。十升爲斗。十斗爲斛。而五量嘉矣。其法用銅方尺。而圜其外。旁有廐焉。其上爲斛。其下爲斗。左耳爲升。右耳爲合。龠其狀似爵。以縻爵祿。上三下二。參天兩地。圜而函方。左一右二。陰陽之象也。其圜象規。其重二鈞。備萬物之數。合萬有一千五百二十。聲中黃鐘。始於黃鐘而反復焉。君制鼙之象也。龠者黃鐘律之實也。躍微動氣而生物也。合者。合龠之量也。升者。登合之量也。斗者。聚升之量也。斛者。角斗。平多少之量也。故量躍於龠。



合於合。登於升。聚於斗。角於斛。地官掌之。權衡者。衡  
平。權重。衡所以任權。而均物。平輕重也。權者。銖兩斤  
鈞石也。本起於黃鐘之重。龠容千二百黍。重十二銖。  
兩之爲兩。二十四銖爲兩。十六兩爲斤。三十斤爲鈞。  
四鈞爲石。付爲十八。易十有八變之象也。五權之制。  
以義立。其小大與輕重爲宜。圜而環之。令肉倍好。周  
旋無端。終而復始。無窮已也。銖者。物繇忽微始。至成  
著可殊異也。兩者。兩黃鐘律之重也。二十四銖成兩。  
二十四氣成歲之象也。斤者。明也。三百八十四銖。易  
二篇之爻數也。十六兩成斤者。四時乘四方之象也。



鈞者均也。陽施陰化。皆得其成就均平也。權與物均。重萬一千五百二十銖。萬物之數也。四百八十兩者。六旬行八節之象也。三十斤成鈞者。一月之象也。石者大也。始於銖。兩於兩。明於斤。均於鈞。終於石。物終石大也。權與物鈞而生衡。衡運生規。規圓生矩。矩方生繩。繩直生準。準正則平衡。而鈞權矣。是爲五則。規矩相須。陰陽位序。圜方乃成。準者所以睽平取正。繩者上下端直。經緯四通也。準繩連體。衡權合德。百工繇焉。以定法式。輔弼執玉。以翼天子。詩曰。尹氏太師。爲周之氏。秉國之鈞。四方是維。咸有五象。其道一也。



太陰者北方北伏也。陽氣伏於下。於時爲冬。冬終也。物終藏。乃可稱。水潤下。知者謀。謀者重。故爲權也。太陽者南方。南任也。陽氣任養物。於時爲夏。夏假也。物假大。乃宜平。火炎上。禮者齊。齊者平。故爲衡也。少陰者西方。西遷也。陰氣遷落萬物。於時爲秋。秋犖也。物犖歛。乃成熟。金從革。改更也。義者成。成者方。故爲矩。少陽者東方。東動也。陽氣動物於中。於時爲春。春者蠢也。物蠢生。乃動運。木曲直。仁者生。生者圓。故爲規也。中央者。陰陽之內。六合之間。經緯通達。乃能端直。於時爲四季。土稼穡蕃息。信者誠。誠者直。故爲繩。五



則揆物厥灋有品各順其方而應其行司空掌之而均之起於數數者一十百千萬所以筭數事物順性命之理也數始於一而三之三三積之歷十二辰之數十有七萬七千一百四十七而五數備矣其筭法用竹徑一分長六寸二百七十一枚而成六觚爲一握徑象乾律黃鐘之一而長象坤呂林鐘之長其數以易大衍之五十其用四十有九成陽六爻得周流六虛之象也夫推歷生律制規矩準繩權衡嘉量探赜索隱鈎深致遠莫不用焉度長短者不失毫釐量多少者不失圭撮權輕重者不失忒絃紀於一協於



十長於百。大於千。衍於萬。法在筭術。宣於天下。小學  
是則。太史掌之。凡律度量用銅者。同也。所以同天下  
齊風俗也。銅爲物至精。不爲燥溼寒暑變其節。不爲  
風雨暴露改其形。介然有常。似於士君子之行。故用  
焉。律之候氣也。有法律之大驗。法爲室三重。戶閉釁  
塗。必密。周布緹縵室中。以木爲按。每律各一管。內庫  
外高。從其方位。厝管其上。以葭莖灰抑其內端。按厝  
而候之。氣至者灰去。其爲氣所動。其灰散。爲人及風  
所動者。其灰聚。候律者謹諸此。故聲生於日者也。律  
生於辰者也。律以和聲。是故。天子嘗以冬夏至日。御



前殿合八能之士

通八音者

陳八音聽樂均度晷景候律

權土灰效陰陽冬至陽氣應則樂均清景長極黃鐘

通土灰輕而衡仰夏至陰氣應則樂均濁景短極蕤

賓通土灰重而衡低進退於先後五日之中八能各

以其候聞太史令封上效則和否則占於布管均之

於候氣方周之隆播樂以宣化法歸于周而晷頌聲

典治道虧缺淫過凶慢之音作而上末之禁日豔彌

濫然而雅頌所承浹肌膚而藏骨髓者經千載尚猶

不絕至春秋時陳公子完奔齊韶樂存焉故孔子適

齊而聞韶也其時先王之守官猶能審音知樂而通



知其意。景王時將鑄無射。王爲之大林。伶州鳩曰。臣  
之守官弗及也。臣聞之。琴瑟尚宮。鐘尚羽。石尚角。匏

竹尚利制。

韋昭曰。以調利爲制。無所尚也。

大不踰宮。細不過羽。夫宮

音之主也。第以及羽。聖人保樂而愛財。財以備器。樂  
以殖財。故樂器重者從細。輕者從大。是以金尚羽。石  
尚角。瓦絲尚宮。匏竹尚議。革木一聲。夫政象樂。樂從  
和。和從平。聲以龠樂。樂以平聲。金石以動之。絲竹以  
行之。詩以道之歌。以詠之。匏以宣之。瓦以贊之。革木  
以節之。聲應相保。曰和。細大不踰。曰平。如是而鑄之。  
金磨之石。繫之絲木。越之匏竹。節之鼓而行之。以遂



八風。於是乎氣無滯陰。亦無散陽。陰陽序次。風雨時至。嘉生繁祉。人民和利。物備而樂成。此樂之正也。今細過其主妨於正。用物過度妨於財。正害財。匱妨於樂。細抑大陵。不容於耳。非穌也。聽聲越遠。非平也。妨正。匱財。聲不和平。非宗官之所司也。夫有和平之聲。斯有蕃殖之財。於是乎道之以中德。詠之以中音。德音不愆。以合神人。神是以寧。民是以聽。若夫匱財用。罷民力。以逞淫心。聽之不和。比之不度。無益於教。而離民怒神。非臣之所聞也。王不聽。卒鑄大鐘。鐘成。伶州鳩退。告人曰。王其以心疾死乎。夫樂天子之職也。



夫音。樂之輿也。鐘音之器也。天子省風以作樂。繩以鐘之。輿以行之。小者不窳。大者不櫛。則和於物。物和則嘉成。今鐘櫛矣。王心弗堪。能無疾乎。已。王崩而鐘不和。伶州鳩之言曰。律所以立均出度也。古之神瞽考中聲而量之。以制儀度。律均鐘。百官軌儀。紀之以三。平之以六。成於十二。天之道也。夫六。天地之合。黃中之色也。故黃鐘所以宣養六氣九德也。繇是第之。二曰太簇。所以金奏。贊陽出滯也。三曰姑洗。所以脩絜百物。考神納賓也。四曰蕤賓。所以安靜神人。獻酬交酢也。五曰夷則。所以詠歌九則。平民無貳也。六曰



無射所以宣布哲人之令德。示民軌儀也。爲之六間。

以揚沉伏而黜散越。元間大呂。助宣物也。二間夾鐘。

出四隙之細也。

常昭曰。四時之間氣。

三間中呂。宣中氣也。四間

林鐘。和展百事。俾莫不任肅純恪也。五間南呂。贊陽

秀也。

苗未實曰秀。

六間應鐘。均利器用。俾應復也。

應禮律復常

律

呂不易。無姦物也。細鈞有鐘。無鐃。昭其大也。大鈞有

鐃。無鐘。甚大無鐃。鳴其細也。大昭小鳴。和之道也。龠

平則久。久固則純。純明則終。終復則樂。所以成政也。

故先王貴之。

伶州鳩又言。昔武王伐殷。歲在鶉火。月在天駟。日在析木之津。辰在斗柄。星在

天龜。星與日辰之位。皆在北維。顓頊之所建也。帝嚳受之。我姬氏出自天龜。及析木者。有建星及牽牛焉。



則我皇妣大姜之姪伯陵之後逢公之所馮神也。之所在則我有周之分野也。月之所在辰馬農祥也。我太祖后稷之所經緯也。王欲合是五位三所而用之。自鷄及駟七列也。南北之揆七同也。凡神人以數合之。以聲昭之。數合聲和。然後可同也。故以七同其數。而以律龡其聲。於是乎有七律。王以二月癸亥夜陳。未畢而雨。以夷則之上宮畢之當辰。辰在戌上。故長夷則之上宮名之曰羽。所以蕃屏民則也。以黃鐘之下宮布戎于牧之野。故謂之厲。所以厲六師也。以太簇之下宮布令于商。昭顯文德。底紂之多臯。故謂之宣。所以宣三王之德也。反及羸內。以無射之上宮布憲。施舍於百姓。故謂之羸亂。所以優柔容民也。

單穆公之言樂曰。夫樂不過以聽耳。而美不過以觀目。若聽樂而震。觀美而眩。患莫甚焉。夫耳目心之樞機也。故必聽和而視正。聽和則聰。視正則明。聰則言聽。明則德昭。聽言昭德。則思慮純固。以爲憲令而布。



諸民正之以度量。樂之至也。口內味而耳內聲。聲味  
生氣。氣在口爲言。在目爲明。若視聽不和。而有以震  
眩。則不精。不精則氣佚。氣佚則不和。於是乎有狂悖  
之言。有眩惑之明。有轉易之聽。有過慝之度。其何能  
樂。其後王官失業。雅頌論倫。參錯失次。孔子自衛反  
魯。徧歷諸國。采其風。考正諸故老。銓定而論次之。然  
後樂正。雅頌各得其所。然是時。桑間濮上。鄭衛宋趙  
之聲並出。內致疾損壽。外亂政傷民。巧僞從飾之。以  
熒亂富貴之耳目。庶人以罔利。列國以相間。故秦穆  
遺戎而繇余去。齊人餽魯而孔子行。當是時。魏文侯



最爲好古。而謂子夏曰。寡人聽古樂。則惟恐卧。聞鄭  
衛之聲。則忘倦。蓋樂淫久矣。子夏辯之曰。今夫古樂  
進旅退旅。和正以廣。弦匏笙簧。合守拊鼓。始奏以文。  
復亂以武。治亂以和。訊疾以雅。君子於是語。於是道  
古。修身及家。平均天下。此古樂之發也。今夫新樂。進  
俯退俯。姦聲以濫。溺而不止。及優侏儒。優雜子女。不  
知父子。樂終不可以語。不可以道古。此新樂之發也。  
君所問者樂也。所好者音也。夫樂與音相近而不同。  
文侯曰。敢問如何。子夏對曰。夫古者天地順而四時  
當。民有德而五穀昌。疾疢不作而無妖祥。此之謂大



當然後聖人作爲父子君臣以爲之紀綱。紀綱旣正。天下大定。然後正六律。和五聲。絃歌詩頌。此之謂德音。德音之謂樂。詩曰。莫其德音。其德克明。克明克類。克長克君。王此大邦。克順克比。比於文王。其德靡悔。旣受帝祉。施于孫子。此之謂也。今君之所好者。其溺音與。文侯曰。敢問溺音。何從出也。子夏對曰。鄭音好濫。淫志。宋音燕女溺志。衛音趨促數煩志。齊音騫辟驕志。四者皆淫於色而害於德。是以祭祀不用也。詩曰。肅雍和鳴。先祖是聽。夫肅肅敬也。雍雍和也。夫敬以和。何事不行。爲人君者。謹其所好惡而已矣。君好



之則臣爲之上行之則民從之詩曰。牖民孔易。此之謂也。然終已莫反。秦并天下。六代樂韶武尚存。改大武曰五行。改周房中樂曰壽人。而始皇不說也。至二世惟溺音以爲娛。丞相李斯曰。放棄詩書。極意聲色。祖伊所以懼也。輕積細過。恣心長夜。殷紂所以亡也。願上戒之。趙高曰。五帝三王。樂各殊名。示不相襲。自朝廷下至人民。得以合歡喜。通慤懃。非此則和說不通。解澤不流。亦各一世之化。用度世爲樂耳。何必攀山之騷耳。而後行遠乎。二世曰善。益耽縱而國亡。漢興。樂家有制氏。以雅樂聲律世世。官太樂。但能紀其



鏗鏘鼓舞。而不能言其義。高祖時。叔孫通因秦樂人制宗廟樂。大祝迎神于廟門。奏嘉至。猶古降神樂也。皇帝入廟門。奏永至。以爲行節。猶古采齊肆夏也。乾豆上。奏登歌。獨上歌。不以筦弦亂人聲。欲在位者徧聞。猶古清廟之樂也。登歌再終。下奏休成之樂。美神既饗也。皇帝就廟東廂坐定。奏永安。美禮已成也。四年。作武德舞。象天下樂。已行武德。以除暴亂。六年。作文始舞。文始舞。本舜韶舞。更其名。示不相襲。彰治已定也。又作昭容禮容樂。昭容。古昭夏也。主出武德舞。禮容主出文始舞。五行舞。舞無樂。近至尊。不敢以樂也。



出用樂。明舞不失節。能以樂終也。大抵因秦舊而帝王之遺音。因間存焉。已。又有房中樂。高祖唐山夫人所製。樂其所生。禮不忘其本。高祖樂楚聲。故房中樂楚聲也。初高祖既定天下。行還歸。過沛。留置酒沛宮。悉召故人父老子弟縱酒。發沛中兒得百二十人。教之歌。酒酣。帝擊筑自爲歌。歌曰。大風起兮雲飛揚。威加海內兮歸故鄉。安得猛士兮守四方。令兒皆和習之。帝乃自起舞。慷慨傷懷。泣數行下。謂沛父兄曰。遊子悲故鄉。吾雖都關中。萬歲後。吾魂魄猶樂思沛。且朕自沛公以誅暴逆。遂有天下。其以沛爲朕湯沐。



邑。復其民。世世無有所與。沛父兄諸母故人。日樂飲。極驪道。舊故爲笑樂。十餘日乃去。沛父兄願留。已復留止。張飲三日。乃後去。蓋其樂也。孝惠時。以沛宮爲原廟。皆令歌兒曹習吹以相和。常以百二十人爲負。而使樂府令夏侯寬備簫管。更名房中樂曰安世。當是時。高帝廟奏武德文始四時五行之舞。其四時舞者。孝文作。明示天下之安和者也。而孝景時。采武德舞爲昭德。尊爲太宗廟樂云。武帝定郊祀之禮。立樂府。采詩夜誦之。有趙代秦楚之謳。以侍中李延年爲協律都尉。雜舉司馬相如等數十人。造爲詩賦。畧論



律呂以合八音之調。作十九章之歌。以正月上辛用事。甘泉園丘。常以昏時夜祠。至明乃終。使童男女七十人俱歌。春歌青陽。夏歌朱明。秋歌西皞。冬歌玄冥。通一經之士。不能獨知其辭。集會五經家論習之。乃能通知其意。多爾雅之文。其安世房中歌十章。其詩曰。大孝備矣。休德昭清。高張四縣。懸樂充宮廷。芬樹羽林。雲景杳冥。言所樹羽葆之盛金支秀華。樂飾庶旄翠旌。一章七始華始。樂蕭倡和聲。神來宴娛。許其反庶幾是聽。粥粥敬懼貌音送細人。情忽乘青玄。熙事備成。清思眇眇。經緯冥冥。二章我定歷數。人告其心。敕身齊



戒施教申申乃立祖廟敬明尊親大矣孝熙四極爰

轅臻章八句三王侯秉德其鄰翼翼顯明昭式清明鬯暢

矣皇帝孝德竟全大功撫安四極四章七句海內有姦紛

亂東北詔撫成師武臣承德行樂交逆劉敞曰逆迎也言師行和

樂遠邇皆迎簫勺簫舜樂勺周樂群慝肅為濟哉蓋定燕國五章八句

大海蕩蕩水所歸高賢愉愉民所懷大山崔百卉殖

民何貴貴有德六章六句安其所樂終產樂終產世繼緒

飛龍秋秋飛貌游上天高賢愉樂民人七章八句豐草萋女

羅施善何如誰能回大莫大成教德長莫長被無極

八章八句雷震震電耀耀明德鄉治本約要治本約澤弘



大加被寵咸相保德施大世曼壽九章十句都荔遂芳宵

衆桂華師古曰都長薜荔俱有芬芳桂華之形宵孝

奏天儀若日月光乘玄四龍回馳北行羽旄殷盛芬

哉芒芒廣遠孝道隨世我署文章署分部也十章十句馮馮翼翼

承天之則吾易場久遠燭明四極慈惠所愛美若休

德杳杳冥冥克綽永福綽延長也章首有桂華二字古篇名或前章篇名誤在此

十一章八句磴磴崇積即即克實師象山則嗚呼孝哉案撫戎

國蠻夷竭歡象來致福象諱也兼臨是愛終無兵革章首

有美芳二字亦篇名或下章篇名十二章八句嘉薦芳矣告靈饗矣靈告既

饗德音孔臧惟德之臧建侯之常承保天休令問不



忘。

十三章  
八句

皇皇鴻明。蕩侯休德。嘉承天和。伊樂厥福。

在樂不荒。惟民之則。浚則師德。下民咸殖。令問在舊。

孔容翼翼。

十四章  
十句

孔容之常。承帝之明。下民之樂。子

孫保光。承順溫良。受帝之光。嘉薦令芳。壽考不忘。

十五章

章八句

承帝明德。師象山則。雲施稱民。永受厥福。

十六章  
四句

承容之常。承帝之明。下民安樂。受福無疆。

十七章  
四句

其郊祀歌十九章詩曰。練時日。侯有望。炳

人說

營蕭

延四方。九重開。靈之旂。垂惠恩。鴻祐休。靈之車。結玄

雲。駕飛龍。羽旄紛。靈之下。若風馬。左倉龍。右白虎。靈

之來。神哉沛。先以雨。般裔裔。靈之至。慶陰陰。相放



震澹心靈已坐五音飭虞至旦承靈億牲蘭栗粢

盛香尊桂酒賓八鄉以水漬桂靈安留吟青黃徧觀

此眺瑶堂衆嫔音互並綽奇麗顏如荼兆逐靡師古

民逐觀被華文厠霧縠曳阿錫佩珠王如淳曰阿細

荷靡也師古曰霧縠言輕細若霧俠嘉夜茝蘭芳澹安容與舒戲嘉觴此

神之帝臨中壇四方承宇繩繩意變備得其所清和

六合制數以五海內安寧興文匿偃武后土富媪母

昭明三光穆穆優游嘉服上黃此后土青陽開動根

菱以遂膏潤并愛跂行畢逮霆聲發榮嚴處頃傾

聽枯槁復產乃成厥命衆庶熙熙施及夭胎群生嘒



堪甚惟春之祺祀青帝朱明盛長。男敷與萬物。桐生茂

豫靡有所謂。劉放曰。桐。幼樵也。楊子云。桐子之命。敷華就實。既阜既昌。

登成甫田。百鬼迪進。寧廣大建祀。肅雍不忘。神若宥

之傳世無疆。祀赤帝西顓沆胡浪反。碭蕩。秋氣肅殺。含秀

垂穎。續舊不廢。姦偽不萌。祇孽伏息。喁辟越遠。四貉

咸服。既畏茲威。惟慕純德。附而不驕。正心翊翊。祀白帝

玄冥陵陰。蟄蟲蓋藏。少草木零落。抵冬。降霜。易亂除

邪。革正異俗。兆民反本。抱素懷樸。條理信義。望禮五

嶽。籍歛之時。掩収嘉穀。祀黑帝惟泰元尊。媪神蕃釐。祀

經緯天地。作成四時。精建日月。星辰度理。陰陽五行。



周而復始。雲風雷電降甘露。雨百姓蕃滋。咸循厥緒。

繼統共恭勤。順皇之德。鸞路龍鱗。罔不胥許乙。餘嘉

邊列陳。庶幾宴享。滅除凶災。烈騰八荒。鐘鼓笙竽。雲

舞翔翔。招搖靈旗。九夷賓將。祀黃其後帝得神馬。渥

洼水中。伐大宛。得千里馬。作蒲稍太一天馬之歌。行

幸雍。獲白麟。幸東海。獲白鴈。次赤蛟象載之歌。祀汾

陰。得寶鼎。壇上有景光。天報靈星。齊房芝生。甘泉作

天門。景星華燁燁。諸歌類次成什。而天子勒兵朔方

邊。待單于塞下。作鼓吹饒歌爲軍樂。諸巡狩福應之

事不序。郊廟亦多所譌闕。故弗著。方歌天馬時。侍中



黯進曰。王者作樂。上以承宗廟。下以化兆民。今陛下  
得馬。詩以爲歌。薦之於宗廟。先帝百姓。豈能知其音  
耶。帝默然不樂而罷。是時河間獻王好古學。以爲治  
道非禮樂不成。獻所集雅樂。天子下太樂存肄之。歲  
時以備數。然不常御。常御及郊廟樂。非雅聲。雅聲以  
存肄。故施於後世。猶得有所祖述。神爵五鳳之間。天  
下殷富。又數有嘉應。帝頗作歌詩。欲興協律之事。丞  
相魏相奏。知音善鼓雅琴者。渤海趙定。梁龔。德之倫。  
皆召見待詔。於雅樂終莫能宣明。元帝多材藝。善琴。  
又被疾不親政。畱好音樂。時時吹調箏。自度曲。分判



節度窮極要眇。聿置鞀鼓殿下。天子自臨軒。饋銅九以。攄鼓聲中。嚴鼓之節。後宮及左右習知音者。莫能爲。然所好獨溺音。是時卽頓丘京房好鐘律。知音聲得六十律相生之法。以爲上生下。皆三生二。下生上。皆三生四。陽下生陰。陰上生陽。起於黃鐘。終於仲呂。而十二律畢矣。中呂上生執始。執始下生去滅。上下相生。終於南呂。而六十律畢矣。十二律之變。至於六十。猶八卦之變。至於六十四也。宓犧作易。紀陽氣之初。以爲律法。冬至之聲。以黃鐘爲宮。大簇爲商。姑洗爲角。林鐘爲徵。南呂爲羽。應鐘爲變宮。蕤賓爲變



徵此聲氣之元五音之正也。故各統一曰。餘以次運  
行。當日者各自爲宮而商徵以類從焉。而六律十二  
管迭相爲宮之法。大具以六十律分曆之日。黃鐘自  
冬至始。及冬至而復。而陰陽寒燠風雨之占生焉。於  
以簡攝羣音。考其高下。無不昭合。書曰。律和聲。此之  
謂也。房以爲竹聲。不可以刊度。故作準以定之。準狀  
如瑟。長丈而十有三絃。隱間九尺。以應黃鐘之律九  
寸。中央一絃。下畫分寸。以爲六十律清濁之節。其術  
施行於史官。候部用之。截管爲律。用臨以考聲。列以  
驗氣。會房刺而罷。成帝時。謁者常山王禹。世受河間



樂禹弟子宋畢

于軾反

等上書言之天子下大夫博士

平當等考試當以爲漢承秦滅道之後賴先帝聖德博受兼聽脩廢官立太學而河間獻王聘求幽隱脩興雅樂以助化時大儒公孫弘董仲舒等皆以爲音中正雅立之大樂春秋鄉射作於學官而希濶不講故自公卿大夫觀聽者但聞鏗鏘不曉其意而欲以風諭衆庶其道無繇是以行之百有餘年德化迄今不成今畢等守習孤學大指歸於興助教化衰微之學興廢在人宜領屬雅樂以繼絕表微孔子曰人能弘道非道弘人河間區區小國藩臣以好學脩古能



有所存。民到于今稱之。况於聖主廣祓之資。脩起舊文。放鄭近雅。述而不作。信而好古。於以風示海內。揚名後世。誠非小功小美也。事下公卿。以爲久遠難分。明當議復寢。是時鄭聲尤甚。黃門名倡富顯於世。貴戚定陵富平外戚之家。淫侈過度。自哀帝爲定陶王時。疾惡之。又性不好音。及卽位。詔曰。惟世俗奢汰。文巧而鄭衛之聲興焉。夫奢則不遜。而國貧。文巧則趨末。倍本者衆。鄭衛之聲興。則淫辟之化流。而欲黎庶敦朴家給。猶濁其源而求其流之清也。豈不難哉。孔子不云乎。放鄭聲。鄭聲淫。其罷樂府官。郊廟樂及古



兵法武樂在經。非鄭衛之樂者。條奏別屬他官。丞相  
光。大司空武。奏樂府凡八百二十九人。其三百八十  
八人不可罷。可領屬太樂。其四百四十一人。不應經  
爲鄭衛之聲。皆可罷。然百姓漸漬日久。溺之又不爲  
制雅樂。以相變。豪富吏民。湛沔自若也。光武旣平隴  
蜀。得公孫述瞽師。及郊廟樂器。而法物稍具。乃增廣  
郊祀樂。奏青陽朱明西顙玄冥舞雲翹育命以祀天。  
祀北郊及明堂亦如之。迎時氣五郊各以其時用詩  
歌所宜。春夏舞雲翹。秋冬舞育命。季夏兼之。永明初。  
用博士曹充言。興禮樂而東平王蒼總公卿上議言。



樂所以象功彰德也。古宗廟各奏其本廟之樂。以崇厥美。光武皇帝受命中興。宇內治平。方外震疊。脩建三雍。肅穆典祀。功德至盛。宜饗有廟樂。於是采文始五行武德爲大武之舞。爲世祖皇帝廟樂。又采百官詩頌爲登歌樂。詔改大樂官曰大予樂官。樂四品。一曰大予樂。郊廟上陵諸食舉用之。二曰雅頌樂。辟雍饗射祀六宗社稷用之。三曰黃門鼓吹樂。天子宴群臣用之。四曰短簫鐃樂。軍中用之。章帝時。太尉熹奏孝明皇帝功德茂盛。宜上尊號曰顯宗。立廟樂。東平王蒼言。昔太宗廟樂曰昭德之舞。世宗廟樂曰盛德



之舞。祫食高廟。昭德盛德之舞。不迺與高廟同樂。今孝明皇帝謙德不廟。卽世祖廟藏于樂。無所施用。宜統於大武之舞。如自立廟。當更作廟樂如制。奏可。自是漢諸帝皆不別廟。不別樂。統於武舞焉。建初中。太尉防言。聖人作樂。所以宣氣致和。導順陰陽也。臣愚以爲可因歲首。發大簇之律。奏雅頌之音。以迎和氣。於是始行十二月迎氣之樂。當漢時。去古未遠。樂器與聲猶存。故史漢律書獨詳具。而儒者蔡邕張衡。於音樂特精。漢斛銘文曰。律嘉量方尺。圍其外。循四角。之其徑當四寸有奇。庀旁。不滿九釐五毫。尺四寸有奇。霽百六



十二寸。方尺，霽百寸，圍其外，每旁約十五寸，庇其旁約五寸。深尺。積一千六百

有二十寸。容十斗。一寸霽百六十二寸，容一斗，積十寸，容一千六百二十寸，為容十斗。

邕銅餽銘曰：餽，黃鐘之宮，長九寸，空圍九分，容柜黍

一千二百粒，稱重十二銖，兩之為一合，三分損益，轉

生十一律。而後世言黃鐘圍徑之數多祖焉。蔡元定曰：嘉量

方尺，所以起數也。漢斛容十斗，實二千，餽計一百六

十二萬分，為一千六百二十寸。又曰：嘉量之法，合餽

為令，十合為升，十升為斗，十斗為石，一石積一千六

百二十寸，為分者一百六十二萬，一斗積一百六十

二寸，為分者十六萬二千，一升積十六寸二分，為分

者一萬六千二百，一合積一寸六分二釐，為分者一

千六百二十，則黃鐘之餽，為八百二分，明矣。空圍八

百一十分，則長累九十黍，廣容一千二百黍矣。蓋十

其廣之分，以為長，十一其長，自東京更董卓之亂，諸

之分，以為廣，自然之數也。



樂器燔燬播蕩無復存者。漢雅樂郎杜夔精識樂事。洞該七始八音之奧。入魏總領樂事。時左延年等妙善鄭聲。惟夔好古存正。古樂以存。工鑄罇鐘。其清濁不法。輒駁令改作。工訴其清濁任意。武帝命將所鑄鐘錯雜更試。扣聲品律。一無謬爽。乃知夔爲精。晉太始中。中書監荀勗造新律。云與古器合。惟散騎侍郎阮咸心譏其聲已高。高比哀思。不合於中和。非典國之音。殆古今尺長短所致也。其後勗樂施用。而始平田夫耕於野。得古銅尺。歲久欲腐。勗以較已所治。果長四分有奇。始服咸之精。而莫能厝意焉。時勗較太樂以爲後



漢至魏尺長於古四分有餘乃部著作郎劉恭依周禮文制尺所謂古尺也依古尺更鑄銅律呂以調聲韻以量古器尺寸無爽又汲郡盜發六國魏襄王冢得古周時王律及鐘聲較之法同勗銘其尺曰晉泰始十年中書考古器按較今尺長四分其較古法七品一曰姑洗王律二曰小呂王律三曰西京銅望臬四曰金錯望臬五曰銅斛六曰古錢七曰建武銅尺姑洗微強西京望臬微弱其餘與此尺同時人以爲切密信而有徵自是樂益殘亡梁武思弘古道詔博惟阮咸議焉

求學術通明者陳所見寃於樂而莫知其解帝素善鐘律詳舊事遂自定郊禋宗廟及三朝之樂以武舞爲大壯舞文舞爲大觀舞取諸易郊明堂燎瘞奏禋雅取諸禮皇帝出入奏皇雅皇太子出入奏胤雅取錫爾胤取諸詩王公出入奏寅雅取諸書上壽奏介雅永



食舉奏需雅徹饌奏雍雅牲出入奏牲雅大祭祀降  
神及送迎奏誠雅百官出入奏俊雅皆雜取五經家  
言以命之而樂章有粲其文

辭並沈  
約撰

其後帝既篤信

佛法制善哉大樂大勸等樂十篇用讚佛道又有法  
樂梵唄皆童子倚歌而和設無遮大會則爲之用耄  
荒於理梁遂以亡陳敗元嘉中所用齊樂盡以韶爲  
名而後主心賞胡戎樂沈於酒耽習之遣宮女習北  
方簫鼓自爲度曲酒酣輒奏之以爲歡於清樂中造  
黃栗留無愁曲及王樹後庭花等曲音韻窈窕極於  
哀思歌詞綺艷極於輕靡男女相與唱和莫不隕涕



出行遊於馬上奏之。樂往哀來。陳竟以亡。元魏孝文  
垂心古雅。正音聲。自爲歌詩。和上下。被管絃。宣之太  
常。高允又奏樂府歌辭。陳王業及祖宗德美。以風北  
樂。始近於理。隋開皇初。詔太常卿牛弘。國子祭酒辛  
彥之。國子博士何妥等。議正樂。積歲不時定。帝恚曰。  
我受天命七年。樂府猶歌前代功德。庸設官何爲。命  
侍御史李諤引弘等下。欲罪之。諤曰。斯事體大。不可  
速成。武王克殷。至周公相成王。始制禮作樂。蓋其難  
也。乃得解。於是沛公鄭譯得龜茲人白薜祗婆法。老  
尋樂府鐘石律呂。皆有宮商角徵羽。變宮變徵之七。



聲以爲律有七音。音立一調。成七調。十二律合八十  
四調。旋轉相交。合而樂和。邳公蘇威子夔議欲累黍  
立分。以定正律呂。帝素不悅學。又褊急無其本。卿弘  
領其事。寬而於音律不深解。而何妥以舊學爲儒者  
所衆推。耻不逮譯等。欲沮壞其事。於是說者各異朋  
立。黨以相非。而是非混淆。或請令侯樂成擇善者而  
後從。妥恐樂成卽善惡易見。請大合樂。廷試之。且逢  
上意言黃鐘人君之象。法當用黃鐘一宮。不假餘律。  
如假餘律。旋生是君臣更相爲也。因先奏黃鐘之調。  
帝大悅。曰。洋洋和雅。甚與我會。班賜妥等及諸脩樂



官有差。而譯等議絀不用。九年。平陳。獲宋齊舊樂。及樂工。議者以爲乃中原承傳雅樂之舊。雖舊俗冶化。而大體猶古。詔太常置清商署。領之。於是竒章公牛弘。又請依古正五聲六律旋宮之法。每宮一調。迎氣奏五調。縵樂用七調。祭祀施用各依聲律。尊卑爲次。帝猶先入受言。絀旋宮之議。而終隋之世。樂惟奏黃鐘一宮。餘聲律不復通已。舊工老死。或有能爲蕤賓一宮者。於饗祀展之。竟無覺者。而新樂候氣輒不驗。或初入月氣。卽應。或至中下旬始應。灰飛或三五日輒盡。或終月不盡。帝以問弘。弘對曰。灰飛半出。爲和。



氣全出爲猛氣。吹不能出爲衰氣。和氣應者其政平。猛氣應者其臣縱。衰氣應者其君暴。帝駁之曰。臣縱君暴。政不平。非月別而歲有異也。今十二月律於一歲中。應各不同。於事應何當。弘不能對。時樂工有萬寶常者。妙達鐘律。嘗方食。與人論聲樂。因前取食器及他物。以箸扣之。品其高下。宮商畢備。諧於絲竹。文帝召見之。時鄭譯方定樂。帝問何如。對曰。樂聲哀非雅正之音。不可用也。命造諸樂器。於是以水尺起律。調樂器。其聲率下於譯調二律。并撰六樂譜。論八音旋相爲宮之法。改絲移柱之變。爲八十四調。百四十



四律而變化極於千有八聲。時周禮旋宮之義久亡。自漢魏知音者鮮能通之。見寶常創其事。初皆怪哂。及是寶常應手成曲。無所疑滯。而皆依於雅正。莫不嗟異。於是損益樂器甚衆。然其聲雅淡。不爲時好。太常善聲者衆。其排擠之。樂竟不行。而省其私。未嘗不歎息。以爲有神解也。其後新樂成。寶常聽之。泫然泣。或問之曰。聲淫厲而哀。天下不久盡矣。時四海初定。人皆不謂然。已乃卒驗。煬帝將之江都。樂工王令言子當從行。於戶外彈胡琵琶。令言方卧室中。聞之蹶然起。變於色。急呼其子曰。此曲何自興。對曰。頃有之。



令言歔歔流涕曰。必無從行此曲。宮聲往而不反者。

君也。竟煬帝弑而隋亡。

寶常後貧困餒且死。取所著書焚之曰。用此何爲。見者於

火中僅探得數卷云。

初隋樂成。旣施用弘等恐衆論疵詆之。乃

上言。樂議易淆。請盡銷毀前代金石。以息異議。而古

器間存者。益復湮。豈不痛哉。煬帝矜奢耽淫曲。御史

大夫裴蘊逢帝意。擇周齊梁陳樂工子弟。及知聲者

數百人進之。倡優雜操。絃管哀淫。巧奏彌濫。蓋樂壞

極矣。唐初沿隋舊。武德九年。始詔太常少卿祖孝孫

考正雅樂。孝孫故從陳山陽太守毛爽受京房律法。

協律郎張文收。故從梁沈重所得。劉宋太史錢樂之



所推衍房法。法大備。於是依古法。斷竹爲十二律。吹調之而和。隋初惟用黃鐘一宮。擊止七鐘。五鐘設而不擊。至是叩五鐘咸應。而十二鐘乃畢用。用布管飛灰。順月皆驗。蓋一律生五音。十二律爲六十音。因而六之。爲三百六十音。當一歲之日。又祖詵重依淮南本數。因京房舊術求之。三百六十律。各因其月律而爲一部。以律數爲母。以一中氣所有日爲子。以母命子。隨所多少分直一歲。以配七音。而旋相爲宮之法復著。其法因五音生二變。因變徵爲正徵。變宮爲清宮。七音起黃鐘。終南呂。迭爲綱紀。黃鐘之律管長九寸。王於中宮。土半之。四寸五分。與清宮合。五音之首也。加以二變。循環無間。故一宮二商三角四徵。



宮調皆正宮也。正宮聲之下無復濁音。故五音以宮爲尊。十二商調調有下聲一。謂宮也。十二角下調調有下聲二。宮商也。十二徵調調有下聲三。宮商角也。十二羽調調有下聲四。宮商角徵也。十二變調居角音之後。正徵之前。十一變宮調在羽音之後。清宮之前。雅樂成謂無聲。本宮遞相用。惟樂章則隨律定。均合以笙磬節以鐘鼓。已文收鑄銅律三百六十。銅斛二。銅秤二。銅甌十四。銅秤一。斛左右耳與鬻肉皆方。積十而登。以至於斛。與古玉尺斗皆藏於大樂署中。於是合考隋氏所傳南北之樂。梁陳之音多吳楚。周齊之音雜胡夷。乃考古音作大唐雅樂。準十二月各順其律。相爲宮而制樂。曰十有二和。曰和者以大樂與天地同和。治世之音安以樂。其政和也。合之三十二曲。八十有四調。饗園丘以黃鍾爲宮。祀方澤以林



鍾爲宮。祭宗廟以太簇爲宮。郊迎五氣及朝饗則各以其月之律爲宮。祀天神奏元和。地祇奏順和。宗廟奏永和。郊社宗廟登歌奏肅和。皇帝臨軒奏太和。王公出入奏舒和。皇帝食舉飲酒奏休和。受朝奏正和。皇太子軒懸出入奏承和。元日冬至禮會登歌奏昭和。郊廟俎入奏雍和。皇帝祭饗酌酒祝嘏奏壽和。而郊廟祭享有代康凱安之舞。時旋宮之義久亡。世莫能知。而一朝復古。自孝孫始。亦固天以啓一代之樂也。其後協律郎張文收復採三禮增損其樂章。然一循孝孫所制之音。

文收復採三禮更加釐革依周禮祭昊天上帝以圜鐘爲宮等禮爲



角太簇爲徵姑洗爲羽奏元和之舞若封泰山同用  
此樂皇地祇方丘以函鐘爲宮大簇爲角姑洗爲徵  
南呂爲羽奏順和之舞禪梁甫同用此樂禘祫宗廟  
以黃鐘爲宮大呂爲角大簇爲徵應鐘爲羽奏永和  
之舞五郊日月星辰及類上帝黃鐘爲宮奏元和之  
曲大祈大報以黃鐘太簇姑洗蕤賓夷則無射等調  
奏元和順和永和之舞明堂雩以黃鐘爲宮奏元和  
之曲神州社稷籍田以太簇爲宮兩師以姑洗爲宮  
山川以蕤賓爲宮並奏順和之曲臨軒出入奏舒和  
之樂並以姑洗爲宮饗先妣以夷則爲宮奏永和之  
曲大饗讌會奏姑洗蕤賓二調皇帝食畢以月律爲  
宮並奏休和之曲皇帝郊廟出入奏太和之曲臨軒  
出入奏舒和之曲皇帝大射奏騶虞之曲並以姑洗  
爲宮皇太子奏狸首一曲皇太子軒懸姑洗爲宮奏  
永和之曲凡奏黃鐘歌大呂奏太簇歌應鐘奏姑洗  
歌南呂奏蕤賓歌林鐘奏夷則歌中呂奏無射歌夾  
鐘凡黃鐘蕤賓爲宮其樂九變大呂林鐘爲宮其樂  
八變太簇夷則爲宮其樂七變夾鐘南呂爲宮其樂  
六變姑洗無射爲宮其樂五變仲呂應鐘爲宮其樂  
四變天子十二終上公九終侯伯七終子男五卿六



大夫四士三。然樂成。天子躬臨考觀。謂侍臣曰。禮樂後樂歌大備。

者。聖人緣物以設教耳。治之隆替。豈繇於此。僕射杜淹曰。齊之將亡。作伴侶曲。陳之將亡。作玉樹後庭花曲。當是時。聞其音者。皆泣下。所謂亡國之音。哀以思也。齊陳以亡。何謂治亂不在樂乎。帝曰。樂聲所感。因人心生。將亡之政。其民苦。故聞樂而悲。非樂能使悲也。今三曲具存。試爲公奏之。公豈悲哉。魏徵曰。樂誠在人和。不在聲音也。文收請得以次重正餘樂。帝不許。曰。朕聞人和則樂和。隋末卷亂。雖改律而樂不和。誠百姓安而金石諧矣。語近本。而先王風化天下之



其以淪廢不復興。方太宗爲秦王時，破劉武周，作舞

隊象功名秦王破陳樂，名七德舞。

以武有七德而名。

始帝生

於慶善宮，及即位，宴從臣，其中賞賜吏民，比漢沛宛

帝歡甚，賦詩。居郎呂才被之管絃，名功成慶善樂。

後沿用爲文舞，名九功舞。帝追念七德舞爲功烈所

自起，每宴樂用之，謂侍臣曰：斯舞雖發揚蹈厲，與文

德殊科，然功業繇之不可忘也。封德彝曰：陛下以聖

武戡大難，何文德足抵乎？帝矍然曰：朕雖以武功興

在位，然實以文德綏之，謂文不如武過矣。時魏鄭公

徵，念欲帝偃武脩文，見舞七德，輒頷首不視，舞九功



輒審諦觀之。高宗幸九成。置酒。時破陣樂寢不作者久。常安石曰。禮。天子親撝干戚。以舞先祖之樂。今破陣樂久廢。群下無所稱述。非所以宣盛烈。發孝思也。令復奏。帝歎曰。不見此樂久矣。追思王業勤勞若此。安可忘武功耶。群臣稱萬歲。遇饗燕。奏慶善破陣二樂。天子必避席坐。者皆興。武后毀唐太廟。七德九功之舞皆不用。唯名存。中宗昏德。湛胡樂爲淫。酣弘文。學士武平一爲上言。樂天之和。禮地之序。禮配地。樂應天。故音動於心。形於物。而哀樂之變。應之樂正。則風化正。樂邪。則政教邪。此先王之所以達廢興也。伏



見樂有胡部。被之聲律。此所謂鞞任侏離之音也。先  
主斥遠之。陳之外門。聊以備四夷之觀。昭服遠之致。  
非美之也。比日益以流宕。異曲新聲。哀思沉溺。始自  
王公達于閭巷。妖伎胡人。街童市子。或言妃主情貌。  
或列王公名質。豔歌劇舞。號曰合生。趣數騫僻。殆亡  
國之音也。夫禮慊而不進。卽銷樂流而不反。則放臣  
願屏流僻。以崇肅雍。夫兩儀承慶。陛下受朝聽政之  
所也。比大饗。而以倡優嫫狎。虧汙其間。隳邦國之典。  
臣竊惑之不納。而帝殞於弑。玄宗爲平王時。賜第隆  
慶坊。坊南地忽水流。溢變爲池。及卽位。以爲祥。作龍



池樂已。又作聖壽樂。作小破陳樂。作光聖樂。以象功。  
於是分樂爲二部。堂下立奏爲立部伎。堂上坐奏爲  
坐部伎。太常閱坐部不可教者。隸立部。立部又不可  
教者。隸雅樂。薄雅樂至於此。其後帝寢有惑。志於仙。  
河西節度使楊敬忠。製霓裳羽衣十二曲。上之。而道  
士司馬承禎。承詔製玄真大羅紫清上聖諸道曲。皆  
隸太常。初。隋有法曲。蓋絃鼗遺製。出胡中。傳以爲自  
秦漢而來。曰秦漢子。帝酷愛之。選坐部子弟三百人。  
教之梨園。號皇帝梨園子弟。聲曲誤。帝輒覺。親正之。  
又命宮女數百人。居宜春北院。習焉。羯鼓。本戎羯樂。



其音惟太簇一均聲。噍殺特異。帝甚好之。以爲是八音之領袖。諸樂不足方也。天寶初。遂升胡部樂於堂上。而皆以涼伊甘等州爲名。於是道法曲與胡部新聲合作。而安祿山竟反。涼甘伊州皆陷於吐蕃。故夫奇濫之樂不可邇。而帝者必審慎所好也。自是代有作。而無慮皆新聲。唐世天子廟各有樂舞。各有名。獻祖廟曰光大之舞。懿祖曰長發之舞。太祖曰大政。世祖曰大成。高祖曰大明。太宗曰崇德。高宗曰鈞天。中宗曰太和。睿宗曰景雲。玄宗曰大運。肅宗曰惟新。代宗曰保大。德宗曰文明。順宗曰大順。憲宗曰象德。穆宗曰和寧。敬宗曰太鈞。文宗曰文成。大樂官祖孝孫張武宗曰大定。昭宗曰咸寧之舞云。文叔而下。天下莫能以聲欺者。稱裴知古。衛道弼曹。



紹夔之倫。

摠章中潤州得王磬十二以獻張文叔扣其一曰是晉某歲閏月造者得月故當十

三今闕其一於黃鐘東九尺掘必得焉下州求之如言而得裴知古武太后朝以知音直太常路逢乘馬者聞其聲竊云此人當墜馬好事者隨觀之行未半里馬驚墮殆死常觀人迎婦聞婦珮玉聲曰此婦人不利姑是日姑疾亡其知音皆此類也道弼紹夔皆爲太樂令享北郊監享御史怒道夔欲以樂不和爲之罪雜鍾扣聲使紹夔聞名之無誤者乃反歎伏又洛陽有僧房中磬自鳴以爲怪懼而成疾求術士百方禁之不已紹夔問疾僧以告俄擊齊鍾磬復鳴紹夔笑曰明日設盛饌當與除之僧不甚信然冀其或効乃具饌待紹夔食訖出懷中錯鑪磨磬數處聲遂絕問其所以曰此磬與鍾合律故擊彼此應耳僧大喜疾愈

周世宗時有司設元正儀宿懸于殿廷帝臨觀

有懸而不作者問樂工莫能對歎以爲樂陵遲至於

此也以問樞密使王朴朴爲帝言樂作於人心而聲



假於物聲氣和而能以及感乎人心一本故也所假之物大小有數而九者其成數也是以黃帝吹九十一之管得黃鐘之聲以爲樂端半之爲清聲倍之爲濁聲三分其一損益之爲相生之聲蓋十有二變而復於黃鐘之宮黃鐘者聲之總數也故十二律迭相爲均均有七調播之於八音著之於歌頌而樂成自周而上率繇斯道自秦而下旋宮法廢所存者黃鐘之宮一調而已十二律中惟用七聲餘五調曰啞鐘不用故也唐太宗明於知人志復古道用祖孝孫張文收考正雅樂而旋宮之八十四調復完在懸之器方



無啞者。於三五同功。安史之亂。樂器與工十不存一。逮黃巢之亂。而盡集。官酌詳終莫能知。時有太常博士殷盈孫。按考工記之文。鑄鐘十二。編鐘二百四十。處士蕭承訓。校石磬定之。今在懸者是已。狀雖鐘磬。實無相應之和。梁唐晉漢享國不遠。未遑斯及。十二鑄鐘。不考聲律。循環擊之而已。黃鐘一宮之調。亦不和備。餘八十四調。泯滅盡矣。於是世宗命中書舍人竇儼與朴詳定。乃依周法。以秬黍定尺度。長九寸。虛徑三分。爲黃鐘之管。與見在黃鐘之聲應。以上下相生之法推之。以爲十二管。吹用不便。倣古法作律準。



十三絃依柱以定聲

其法宮聲長九尺張絃爲黃鐘

鐘第三絃八尺設柱爲太簇第十絃五尺三寸四分設柱爲南呂第五絃七尺一寸三分設柱爲姑洗第十二絃四尺七寸五分設柱爲應鐘第七絃六尺三寸三分設柱爲蕤賓第二絃八尺四寸四分設柱爲大呂第九絃五尺六寸三分設柱爲夷則第四絃七尺五寸一分設柱爲夾鍾第十二絃五尺一分設柱爲無射第六絃六尺六寸八分設柱爲中呂第十三絃四尺五寸設柱爲黃鍾之清聲十二聲中旋用七聲爲均發其均主之聲歸于本音

之律七聲迭應而不亂乃成其調

十二律旋相生而

各爲均均有七調聲有十二均合八十四調而樂之歌奏畢繇焉具奏言旋宮之聲久絕迨唐初乃有之而與禮經文相違今不敢遵用具詮定如上而臣淺學獨力未能宣究望集多聞知樂律者上本古典下



順法故較次其得失。詔尚書省集百官詳議。尚書昭等言。朴新法音律和諧。不相凌奪。可施用。從之。宋祖受命。廷臣議以爲朴所定雅樂聲已高一比於哀思。於中和不合。天子以爲然。詔判太常和峴詳定峴上言。聖王作樂。先立尺寸爲律呂。而三分損益。上下之以相生。取合真音。以尺寸長短。非書可傳。故累秬黍爲之準。後代試之。或不符合。惟西京銅墾臬古法所存。卽今司天臺影表銅臬下石尺是也。今朴所定尺比較短於石尺四分。聲樂之高蓋繇於此。况影表上測天行。獨不可以準繩樂律乎。帝乃令依古法造尺。



及黃鐘之管較其聲果下於朴所定管一律又內出  
上黨羊頭山秬黍累尺較之亦適相符下尚書省集  
議衆莫能難繇是更造十二律管而雅音以和蓋又  
一代始造貞元合而樂和也於是峴上言古以禪讓  
得天下者奏先文舞以征誅得天下者奏先武舞陛  
下以推讓受成命請改文德舞爲玄德升聞之舞以  
神武平海內請改武功舞爲天下大定之舞而命樂  
曰大安本禮治世之音安以樂而名也大饗天曰高  
安祀地曰靜安宗廟曰理安天地宗廟登歌曰嘉安  
皇帝臨軒曰隆安王公出入曰正安皇帝食舉曰和



安皇帝受朝皇后入宮曰順安皇太子軒懸出入曰  
良安元正冬至朝會曰永安郊廟俎豆入曰豐安祭  
享獻酌祝嘏曰禧安祭文宣王武成王用永安耕籍  
先農用靜安宗廟僖祖宮奏大善之舞順祖宮奏大  
寧之舞翼祖宮奏大順之舞宣祖室奏  
太慶而於時有瑞木成文有馴象自至白鳥白雀之  
舞

祥竝依漢天馬赤鴈之作播之管絃爲詩歌太宗時  
直集賢院和嶸言周易有化成天下之辭漢史有威  
加海內之歌請殿庭文舞爲化成天下之舞武舞爲  
威加海內之舞而天子好音至道初增琴七絃爲九  
絃曰九奏克諧而不亂也增阮四絃爲五絃曰五材



並用而不悖也。而太常阮均被之十二律旋宮相生具圖獻。帝嘉之。遷職咸平中。太常言樂工濫冒。關於審音。卽祭饗止奏黃鐘一調。未嘗隨月轉律。於是詔翰林學士李宗諤等科條律呂樂器諸名數爲編。曰樂纂。且更樂工試補法式。若肄習程課下之。用習工於樂。明年天子御崇政殿。張宮懸。按試召宰相親王臨觀。宗諤執樂譜立侍。先以鐘磬按律準。次合登歌。次鐘磬塤箎琴瑟笙簫各爲偶。合奏。次箏琴筑參合奏。乃後以擊鐃鐘倡六變九變爲朝會上壽之樂。及文武之舞畢。精習帝喜甚。賜賚有加。自是樂府有倫。



大中祥符中。天子得天書。改酌獻。昊天上帝樂。曰豐安。皇地祇樂。曰禪安。飲福。曰禧安。別製天書樂章。曰階安。瑞安。靈文。諸曲行焉。景祐初。天下久平。仁宗垂意於禮樂之事。而判太常燕肅言。樂金石不調。願考脩。乃命直史館宋祁。集賢校理李照及肅等。典其事。照以爲王朴律準。視古樂高五律。視禁坊胡部樂高二律。是冬興夏令。春召秋氣。蓋五代樂壞。久而朴以其意創脩。不合古法而然也。用之本朝。卒以短祚。其編鐘鐃。鐘無大小。輕重厚薄。長短之差。又銅錫不精。聲韻失度。大陵小抑。非罷也。臣請依神瞽律法。鑄編



鐘一虞。樂當可和。詔於錫慶院鑄之。照復請下潞州求上黨羊頭山柅黍以定廣容。下懷州取河內葭莩灰以候氣。從之。鐘成聲猶高。更用太府布帛尺爲法。乃下於太常樂四律。於是以十二管之法鑄銅爲龠。合升斗以爲量。率六百三十黍爲龠。爲黃鐘之容。合三倍於龠。升十二倍於合。斗十倍於升。已又以鑄鐘之容。差大。更增六龠爲合。十合爲升。十升爲斗。命曰樂斗。已言太常鐘磬十六枚爲一虞。而四清聲承沿不擊。蓋十二律聲已備。餘四清聲則鄭衛之樂也。請編懸止留十二中聲。去四清聲。則哀思邪僻之聲無。



自而生。於是廢四清聲不用而自造八音之器。各十二種而樂成。時翰林侍讀學士馮元奉詔討論駁之。曰前聖制樂取法非一。故有十三管之和十九管之巢三十六簧之箏。二十五弦之瑟。十三弦之箏。九弦七絃之琴。十六枚之鐘。聲義各有當。寧有一之於十二數者。且鐘磬八音之首。春秋號樂總言金奏。詩頌稱美實依磬聲。絲竹以下受之於均。未易輕改。且古者既以十二律配一鐘。又設黃鐘至夾鐘四清聲。附正聲之次。原本其意。殆爲夷則至應鐘四宮而設也。五音宮爲君。商爲臣。角爲民。徵爲事。羽爲物。不相凌。



謂之正迭。凌謂之慢。百王所不易也。聲重濁者爲尊。輕清者爲卑。卑不可加尊。古今所同也。故列聲之尊卑。事與物不與焉。何則。事爲君治。物爲君用。不能尊於君也。惟君臣民三者。上下有分。不得相踰越。故四清聲之設。正爲臣民相避。明尊卑也。今若止用十二鐘。旋相考擊。至夷則而下。四管爲宮之時。臣民相越。上下交戾。則凌犯之音必作矣。其鐘磬十六。本周漢諸儒之說。及唐典所載。欲損爲十二。惟照獨見。請如舊制。便帝以爲樂。難以偏辭奪。今權用十二枚爲一格。且詔有能考四鐘協調清濁者。令有司以聞。天子



親製郊廟樂章二十一曲。擬頌告神明。詔宰臣呂夷

簡等分造樂章。參施群祀。作景祐樂髓新經。凡六篇。

賜群臣焉。

一、釋十二均。二、明五聲所主事。三、辯音聲。四、圖律呂相生。并所用陰陽數配。五、譜十

二、管之長短。六、明歷代度量衡。皆本之陰陽。配於四時。連之日辰。通之韞竺。演之壬式。遁甲之法。授樂府考聲焉。又詔有史館。初纂大樂圖。記載諸攷。金鑪石之法。歷世八音。諸器異同之狀。新舊律管之差。與新樂并。既而大臣言。照所定樂律率以意。於古法無據。

比舊樂下三律。其所製器。如煉白石爲磬。範中金作鍾。皆詭異。非經祖宗考大樂行之七十年。國家康寧。而一旦廢不用。非情理所安。况所改者。不必愈於舊乎。於是右司諫韓琦爲帝言。自燕肅倡議而來。言人



人殊後之人又復從而非之竊以爲莫若窮作樂之  
原爲致治之本使政平令簡民物熙洽則治古之極  
樂不可以象羈求者也且西北二陲邊備久弛宜先  
以爲務乃罷新樂詔太常仍和峴舊樂用焉然帝念  
欲興雅頌文太平雖格群議中噤噤未厭也後十有  
五年爲皇祐二年將有事于明堂帝御紫宸殿閱雅  
樂自宮架登歌燕侑之奏徧作之下詔言朕聞古者  
作樂以薦上帝配祖考創造紹述三五之盛不相襲  
沿必世登太康聲文乃定朕幸承三聖之業蒙丕平  
之運念樂經久廢嘉與學者研覃定焉比加訪採終



未有知聲律通經之人。諸所改更未適厥中。中書門下其集兩制及太常禮官以天地五方神州日月宗廟社稷祭饗所用登歌宮縣審聲定律。諸於中和使經久可用。以發揚祖宗之功德。朕何敢憚改焉。於是中書門下集兩制太常置局於秘閣詳定。而國子監直講胡瑗前。潁東推官阮逸。益州進士房庶皆驛召預議。議者安所習爲至當。而競用相非。瑗之議曰。按歷代律呂之制。黃鐘之管長九十黍之廣。積方九寸。此度之所起也。容千二百黍。積八百一十分。此量之所起也。重十有二銖。此權衡之所起也。度量權衡既



皆出於黃鐘之龠則黃鐘之龠圍徑容受四者之法  
交相讐而實可得也。今驗黃鐘律管每長一分內實  
十三黍又三分黍之一則圍中容九分九分者九方  
分也。世儒執守孤法不能貫知權量之法因謂圍九  
分者取空圍圓長九分耳。以圍九分之誤遂有徑三  
分之說。若從徑三圍九之法則黃鐘之管止容九百  
黍積止六百有十分半。如此則黃鐘之聲無從正。權  
量之法無從生。周之嘉量漢之銅斛皆不合矣。蓋始  
以九分爲九方分破徑三分之說而所定律一取之  
秬黍又不知變律之法見仲呂反生不及黃鐘之數。



乃損增林鐘以下諸律圖徑。以就黃鐘清聲。而十二律之聲。皆不當其位。反不如和峴舊樂之爲條理也。於是阮逸等言。新樂所造鐘磬。本馮元其分方定律。又出於胡瑗。而臣所執周禮嘉量聲中黃鐘之說。及國語鈞鐘絃準之制。皆抑而不用。竊考隋書志有云。尋漢志黍尺。或不容千二百黍。其容千二百黍。則於長九寸不合。是斑志所云。歷代樂與符合者鮮矣。臣所爲獨執嘉量爲本者。以其方尺深尺。則度可見也。其容一鬴。則量可見也。其重鈞。則衡可見也。聲中黃鐘之宮。則律可見也。律度量衡合。則於制管中聲。其



合也必矣。故漢蔡邕深於音樂，獨傳銅龠，以積成嘉量。於古今爲允，而逸等以上黨，秬黍大者累尺，小者實龠，已自戾於本法。用以再累成尺，與元初所製尺又復互異。學士丁度等詳定言，漢志審度之法，歷世祖襲著之，定令然。而歲有豐儉，地有肥磽，就今一歲之中，一境之內，取黍較驗，亦復不齊。蓋天之生物，理難均一。古人立法，用存大槩云爾。故前代制樂，必求古雅之器較焉。竊惟周漢二代享年永久，賢聖制作，宜可取則，而爲隋氏銷毀金石，典正之物，無復存者。今獨大泉錯刀貨布貨泉尚存，今取四物，首足肉好。



長廣分寸。於正史合者。用以參較。宜斛尺可定。

漢志唐典

大泉五十。重十二銖。徑一寸二分。錯刀。環如大錢形。如刀身二寸。貨布。重二十五銖。長二寸五分。廣一寸。首長八分。有奇。廣八分。足較長八分。間廣二分。圓好。徑二分半。貨泉。重五銖。徑一寸。有詔命諸

家各作鐘律以獻。而時論互異。處士徐復笑之曰。聖

人寓器以聲。不先求其聲。而更其器。其可用乎。於是

知諫院李允言。樂之爲道。廣大微妙。非知音入神未

易輕語。西漢去聖尚近。制氏世典大樂。亦已直紀其

鏗鏘。而莫詳其義。况今又千餘年。而欲遠求三代之

音。通明述作之事。不亦難乎。國家制樂數年。繁費甚

廣。務爲異說。欲以改爲。雖命兩府大臣監議。未能裁



定請以新成鐘磬與祖宗舊樂參較取其諧和近雅者合用之。於是帝御紫宸殿奏太常新樂召輔臣省府館閣臨觀而瑗逸等皆進官。初李照以王朴所作樂音高其新樂律下太常歌工病歌不成聲。私賂工使減其銅齊聲稍調而歌乃可。協照按試魯莫之覺也。又朴所制編鐘皆側垂。照瑗皆非之。將給銅更鑄於銅齊中得古編鐘一。不知何代作而有銘。銘曰。粵朕皇祖寶龢鐘。粵萬斯年子子孫孫永寶。叩其聲與朴鐘夷則清聲合而形側垂如朴製工不敢毀藏之。太常已瑗等改鑄正其紐使下垂。叩之聲舛鬱而不



揚其鑄鐘又長甬而震掉著作郎劉羲叟謂人曰此其聲於周景王無射鐘無異上其有憂乎嘉祐元年元日帝御大慶殿受朝前夕設仗衛大雨雪宮懸架折帝大驚於禁中徒跣露禱因遂感暴疾得風眩云元豐初太常楊傑疏大樂之失言臣聞金聲春容失之則重石聲溫潤失之則輕土聲函胡失之則下竹聲清越失之則高絲聲纖微失之則細革聲隆大失之則洪匏聲叢聚失之則長木聲無餘失之則短惟人乃天地中和之氣而有中和之聲故八音律呂皆以人聲爲度書曰詩言志歌永言今歌者或詠一言



而濫及數律。或章句已闕而樂音未終。是歌非永言也。請節煩聲。以一聲歌一言。且詩言人志。詠以爲歌。而五聲從之。是曰依永。律呂協焉。是曰和聲。所謂依人聲而制樂器。以寫之。樂本效人。非人效樂也。今祭祀樂章。竝隨月律。以詠依聲。聲不依詠。以聲和律。律不和聲。非古也。昔虞樂九成。以簫爲主。商樂和平。惟磬爰依。周樂合奏。以金爲首。則知鍾簫磬者。衆樂之所宗也。天子之樂。八鍾磬簫。乃倍之。而十六斯遵。何義哉。且十二者。律之本聲。而四者。應聲也。本聲重大。爲君父。應聲輕清。爲臣子。故四清聲曰子聲。今四清



聲廢不用是有本而無應也。八音亦何從而諧哉。今巢和笙管十九。以十二管發律呂之本聲。以七管爲應聲。用之久而聲宜可和。書曰八音克諧。無相奪倫。則樂奏一聲。而諸器各以其聲應之。然後和。今琴瑟塤箎笛簫箏筑奏一聲。而搏鐘特鐘編鐘連三聲並應。聲煩而衆音爲之掩抑。是奪倫也。於是天子異其意。詔秘書監劉几。禮侍郎范鎮與傑等詳定。傑於樂本無心解。而論議浮之。乃奏言。王朴所鑄鐘已厚。聲疾而短聞。請銷毀。太常以爲太樂所典。乃法度舊器。不當毀。製新樂成。得參較失。得詔許。借朴鐘爲清聲。



不聽。鑿已命輔臣行按試。先一夕。傑上言。朴鐘已弊。壞不諧。請銷之。樂工不平。夕藏之。厥明。輔臣至。出以叩音韻如新。傑大慙沮。時進士房慶自言。嘗得古本。漢志云。度起於黃鍾。以子穀秬黍中一黍之起。積一千二百黍之廣。度之九十分。黃鍾之長一爲一分。今本脫起積一千二百黍八字。則知前世累黍爲尺。以製律。是律生於尺。非尺起於黃鍾也。且漢志一爲一分者。蓋九十分之一。非一黍爲一分。當以秬黍中者千二百實黍管中。得九十分。爲黃鍾之長九寸加一以爲尺。則律可定也。衆莫之信。而直秘閣范鎮獨是。



之以爲衆論所不及。欲求一稔二米。和氣所生。黍以定律。而劉几議以爲律主於人聲。不以尺度求合。古今異時。聲亦隨變。必以古器調金聲。猶以古冠服被今之人。容體豈有稱哉。儒者亶泥古形名度數。而不知清濁剛柔輕重之用。隨時也。於聲與器。必不合矣。凡定樂云。主聲然大都郎李照之舊。獨加四清聲。奏之。無能加於其舊。詔以樂成。加賜鎮几等有差。鎮辭謝曰。此劉几樂也。臣何與焉。及提舉崇福宮。欲造樂獻之。自以嫌於干進。先請老。旣得謝。乃請太府銅爲之。逾年始成。比李照樂下一律。有奇。上之。於是天子



親臨觀奏焉。賜詔褒美。下太常。太常言。鎮樂自其一家學。難施用。而制樂如舊。大都宋世爲鐘律之學者。非心洞玄解。而馳騁於論議。故莫能有定云。始鎮於司馬溫國公光立朝。大節如一人。相厚善。至論樂。各往復諍。不相協。及鎮鑄周鬴。漢斛成。欲招光至。潁昌就觀光。答之書言樂之要眇。存乎聲音。其失之甚易。其求之甚難。自漢以來。儒者以其智臆度古法。牽於文義。拘於名數。較竹管之短長。計黍粒之多寡。競無形之域。訟無證之廷。非后夔復生。莫之能決。非光所及也。彼周鬴出於考工。旣非經見。是非固不可辯知。



如漢斛者。則劉歆佐王莽所爲。就令尚存。非必可法者哉。謝不赴。蓋樂難言如此。至崇寧中大奸柄國。欲張樂以爲名。而天子有惑意於仙。蜀剽負卒魏漢津。甞及事范鎮。見其制作。粗通其一斑。因託言遊蜀。得師事唐僊人李良。授鼎樂之法。而極詆後世累黍之謬。本大禹聲律身度之言。請帝中指中寸爲寸。以度律。語具異。教考中會。端州上古樂鐘。驗竅制。乃宋成公時鐘也。而天子起端王在位。於是御崇政殿合樂。御大慶殿受朝賀。會有數鶴從東北來。度廣庭翔鳴。帝大喜。下詔言。得隱逸之士於草萊之賤。獲英莖之



罷於受命之邦。朕將以薦郊廟。和萬邦。其名樂曰大  
晟。其後明堂成。議布政調燮。而蔡攸方提舉大晟府。  
不欲它人得與議。有田爲者善琵琶。無行。乃奏爲大  
晟府典樂。聲管高下任其意。以器大者爲太聲。小者  
爲少聲。而不依於律。無何。金人汴。凡大樂軒架。拜景  
鐘九鼎皆亡。方宋之隆。周元公惇頤之論樂曰。古者  
聖王制禮法。脩教化。三綱正。九疇叙。百姓太和。萬物  
咸若。乃作樂以宣八風之氣。以平天下之情。故樂聲  
淡而不傷。和而不滯。淡則慾心平。和則躁心釋。優游  
平中。德之盛也。天下化中。治之至也。是謂道配天地。



古之極也。後世禮法不脩。政刑苛刻。縱欲敗度。下民困苦。謂古樂不足聽也。代變新聲。妖淫愁怨。導欲增悲。而不能止。蓋有賊君棄父。輕生敗倫。而不可禁者矣。嗚呼。樂者古以平心。今以助欲。古以宣化。今以長怨。不復古禮。不變今樂。而欲致治者遠矣。程正公願以律爲自然之數。樂必律以考聲。管以候氣。以天地人之氣爲準。非秬黍之比。張明公載以爲聲音之道。通於物感。蠶吐絲而商絃絕。金氣盛而木氣衰。此自然之符也。今人求古樂已深。始以爲不可知。不知有可知之理。惟德器深厚者能之。諸皆窮本達變而深。



得其奧要。淳熙中建陽蔡元定於樂律有冥契著書  
二卷。曰律呂新書。其上卷以漢志斛銘文定長九寸。  
空圖九分。積八百一十分。爲黃鐘第一。以淮南子漢  
前志本黃鐘之律。以三歷十二辰積之。得一十七萬  
七千一百四十七。爲黃鐘之實第二。以黃鐘三分爲  
損益。定生十一律第三。次十二律之實四。次變律五。  
次律生五聲圖六。次變聲七。次八十四聲圖八。次六  
十調圖九。於是候氣審度。嘉量權衡次焉。爲十三篇。  
其下卷述前史書志經傳疏注。呂氏春秋淮南子。下  
至歷代侖尺欵識。用以明造律和聲。均調候氣制器。



之事爲律呂證辯者甚具其說曰。天地之數始於一。終於十。一三五七九爲陽。九者陽之成也。二四六八十爲陰。十者陰之成也。黃鐘者。陽聲之始。陽氣之動。是聲氣之元也。聲氣之元不可得而見。及截竹爲管。吹之聲和。候之氣應。而後數始形焉。均其長得九寸。審其圍得九分。積其實得八百一十分。是爲律本。度量權衡。於是而受法。以三分損益。歷十二辰。而十一律繇是生焉。其實函焉。黃鐘九寸。以三歷十二辰。在子寅辰午申戌六陽辰。爲寸分釐毫絲之數。在亥酉未巳卯丑六陰辰。爲寸分釐毫絲之法。法皆用九。故



九絲爲毫。九毫爲釐。九釐爲分。九分爲寸。爲黃鐘。積其實爲一十七萬七千一百四十七。以三約之。爲絲者五萬九千。〇〇四十九。以二十七約之。爲釐者六千五百六十一。以二百四十三約之。爲分者七百二十九。以二千一百八十七約之。爲寸者八十一。以一萬九千六百八十三約之。爲寸者九。繇是三分損益。以生十一律焉。六陽辰皆下生。六陰辰皆上生。其上生歷十二辰者。皆黃鐘之全數。其下生陰數。陰數以倍者。三分本律而損其一。陽數以四者。三分本律而增其一也。六陽辰當位。六陰辰則居其衝。林鐘南呂。



應鐘其三呂在陰則無所增損。大呂夾鐘仲呂三呂在陽則倍其數。方與十二月之氣應。陰不當陽。自然之理也。而黃鐘之數九。九八十一。爲五聲之本。三分損一。以下生徵。徵三分益一。以上生商。商三分損一。以下生羽。羽三分益一。以上生角。角聲之數六十四。以三分之不盡一筭。而數不可行。故五聲宮與商。商與角。徵與羽。相去各一律。而音節和。角與徵。羽與宮。相去乃二律。而音節遠。故角徵之間。近徵收一聲。比徵少下。曰變徵。羽宮之間。近宮收一聲。少高於宮。曰變宮。古謂之和繆。故變聲非正不爲調。然如是而後



和。夫律呂之數。往而不返者也。故黃鐘不復爲他律。後所用七聲。皆正律。無空積忽微。自林鐘而下。則有半聲。自蕤賓而下。則有變律。皆有空積忽微。而不得其正。故黃鐘一均。所謂純粹中之純粹者也。其十二律。則旋相爲宮。各具有七聲。合之爲八十四聲。宮商角徵羽聲各十二。凡六十聲爲正調。其變宮變徵二。十四聲不爲調。故六十調一十二律也。十二律一黃鐘也。黃鐘生十二律。十二律生五聲。二變聲各爲綱紀。以成六十調。皆黃鐘損益之變也。宮商角三十六調。老陽也。其徵羽二十四調。老陰也。調成而陰陽備。



也。故日辰之數。繇天五地六錯綜而生。律呂之數。繇黃鐘九寸損益而成。二者不同。而日有六甲。辰有五子。爲六十日。樂有六律五聲。爲六十調。若合符節。陰陽對待。理數之自然。豈顧強哉。夫陽生於復。陰生於姤。如環無端。而律呂之數。三分損益。終不復始。何也。曰。易以道陰陽。而律不書陰。故也。易者。盡天下之變。善與惡。無不備。律者。致中和之用。止於至善者也。以聲言之。大而雷霆。細至蟻螻。無非聲也。易備之矣。樂雖有十二律六十調。實惟寫黃鐘之一聲。其聲中聲。其氣中氣。其在人。則喜怒哀樂未發之中。已發而中。



節者也。故樂者。聖人所以一天人。贊化育之道也。其  
大。都本太史公。細若氣微。若聲。聖人因神而存之。雖  
妙。必效之言。以黃鐘爲聲。氣之元。班固所謂吹以攷  
聲。列以候氣。天地之風氣正。而十二律定者也。夫律  
長。則聲濁。而氣先至。律短。則聲清。而氣後至。極長。極  
短。則不成聲。而氣不時至。今欲求聲之中。而莫適爲  
準。則莫若多截竹。以擬黃鐘之管。或極其短。或極其  
長。長短之內。每差一分。以爲一管。皆卽以其長權爲  
九寸。而度其圍徑。如黃鐘之法。而更迭以吹。則中聲  
可得。淺深具列。則中氣可驗。苟聲和氣應。則黃鐘之



爲黃鐘者信矣。黃鐘者信。則十一律與度量權衡可

從而定也。朱文公熹讀其書以爲明白而淵深。縝密

而通暢。鑿鑿可見之行也。其後文公攷訂禮書。定鐘

律詩樂樂制樂舞等篇。而鐘律篇大率本元定所著

而互演之。稱明遂矣。篇分七條。一日十二律陰陽辰位相生次第。二日十二律寸分

聲相損益先後之次。五日變宮變徵二變相生之

法。六日十二律正變倍生之法。七日旋宮八十四聲

六十調之圖。其後篇明五聲十二律之義。而律寸舊

法若新法詳焉。而卒託之空言。時乎八乎。固難乎其兼矣。

高皇帝寅恭郊社宗廟之祀。御製圜丘方澤分祀樂



章後定合祀更撰合祀樂章。禮成歌九章已病音樂之未復古也。詔尚書同尚書凱與協律郎謙定雅

樂而學士漁為樂章著令。凡祀有樂樂四等曰九奏

園丘方澤祈穀大饗

曰八奏

神祇壇太歲壇先農高禩

曰七奏

朝日夕月太社稷歷代帝

王廟曰六奏

宗廟時祭袷帝社稷

樂有歌有舞歌堂上舞堂下

舞皆八佾佾有文有武其樂曰中和韶樂曰堂下樂

曰丹陛樂曰侑食樂曰大樂其雅樂備八音五聲十

二律九奏萬舞之節俗樂有百戲隊舞謳歌之承應

祭祀用雅樂太常領之協律郎司樂考協之凡樂淫

聲過聲凶聲慢聲若舞失節者皆有糾禁而朝會



燕享兼俗樂祇應奉鸞司掌之。郊廟皆奏中和韶樂。圜丘迎神奏中和奠

帛奏肅和進俎奏徵和初獻奏壽和亞獻奏豫和終獻奏寧和撤饌奏雍和送神奏安和望燎奏時和宗廟迎神奏中和初獻奏壽和亞獻奏豫和終獻奏熙和撤饌奏雍和還宮奏安和皆初獻舞武功亞終獻舞文德大燕享奏堂下之樂一奏炎精開運之曲二奏皇風之曲平定天下之舞樂章曰清海宇三奏春皇明之曲撫安四夷之舞樂章仍俗樂府名四奏大道傳之曲車書會同之舞樂章曰泰階平五奏振皇綱之曲六奏金陵七奏長楊八奏芳醴皆百戲承應九奏駕六龍之曲隊舞承應焉食舉奏侑食樂一曰上萬壽奏平定天下之舞二曰仰天恩奏撫安四夷之舞三曰感地德奏車書會同之舞四曰民樂生奏表正萬邦之舞武舞五曰感皇恩奏天命有德之舞六奏慶豐年七奏集禎應八奏永皇圖九奏樂太平小宴樂一曰本太初二曰仰大明三曰民初生四曰品物亨五曰御六龍六曰泰階平七奏君德成八奏聖道行九奏樂清寧而天子陛座還宮百官行禮始皆有樂曰升陛大樂樂章皆近質無爾雅之辭始



上厝前代樂章用諛詞爲容悅也。甚乃猥鄙。令更撰以進。樂成。謂侍臣曰。禮以導敬。樂以宣和不敬不和。何以爲治。古樂廢久矣。新聲代變。至元而雜以北裔胡戎之聲。甚者飭古先帝王若祀典神祇爲舞隊。悖褻已甚。殊非所以導中和崇治體也。今所製樂於音律諧協有和平廣大之意。自今諸一切流俗喧曉淫褻之樂悉屏。蓋天大一統而樂道以昌。自是歷世遵用。太常肄常習舊而已。無能紹明之者。方定樂時。

上陳樂器於庭。召學士朱升等考定。

上親拊磬。命升辯五音對忤。旨怒。欲法之。起居汪熊



音辨下細  
二  
鼎從容前論解

上曰。升自謂審音。乃不辯宮徵何也。鼎頓首曰。辯石音難。蓋自古而來。唐虞惟后夔爲能和此。書曰。於予擊石拊石。百獸率舞。詩曰。既和且平。依我磬聲。蓋其難也。

上曰。卽如是。任豎儒治樂。樂何繇和。鼎具言樂之和繇人所致。人君能致中和。則萬物和而樂音和矣。

上爲霽威。升旣出。謝鼎曰。非君吾幾殆。自宋淳熙來。言律者益互異。沙隨程迥申房庶宜春歐陽之秀業。

已闢三分損益爲非自然。至國朝李欽授文利實。



始。祖。呂。氏。春。秋。三。寸。九。分。爲。黃。鐘。日。含。少。之。文。辯。黃。鐘。九。寸。之。誤。以。太。極。陰。陽。五。行。繇。一。生。二。繇。少。及。多。見。黃。鐘。數。少。爲。極。清。辯。宮。聲。極。濁。之。誤。以。左。右。對。待。各。得。百。二。十。九。分。辯。三。分。損。益。上。生。下。生。至。仲。呂。而。窮。之。誤。其。法。繇。十。一。月。黃。鐘。三。寸。九。分。至。十。二。月。大。呂。則。增。六。分。繇。大。呂。至。太。簇。夾。鐘。始。洗。仲。呂。蕤。賓。皆。各。增。九。分。繇。五。月。蕤。賓。至。六。月。林。鐘。亦。減。六。分。繇。林。鐘。至。夷。則。南。呂。無。射。應。鐘。以。復。於。黃。鐘。皆。各。減。九。分。而。適。合。三。寸。九。分。之。數。繇。此。而。如。環。無。端。焉。以。相。生。其。說。曰。陽。數。始。於。一。成。於。三。終。於。九。故。律。之。爲。數。三。



九盡之矣。黃鐘一陽初升。氣微數少。故其管三寸九分。三寸乃陽數之少。九分乃陽數之成。以三涵九。故黃鐘之宮。命之曰涵少。此其證也。十一律皆從以生。而增減亦皆以九分。惟黃鐘之於大呂。蕤賓之於林鐘。其增減視他律特異者。大呂當五陰之盛。一陽始生。則陽雖進而尚弱。林鐘當五陽之盛。一陰始生。則陽雖退而尚強。其增減宜僅得三分之二也。律管長短。一本陰陽升降之氣。所謂律歷同道者也。作律呂元聲書二篇。范副使輅等信其說。從受學。楊學士廉愛其書。以爲天授。而王尚書廷相韓尚書邦奇皆大



儒通解音律皆不謂然。以爲樂律音調之承傳在中  
原。依古往而來。非他方及知。非可以臆見卜度決也。  
廷相駁之書言。古人制爲五音。非徒然無所本也。官  
本喉。商本齒。角本牙。徵本舌。羽本唇。故凡人呼而出  
聲。不論歌唱言說。必自宮而徵。而角。而商。而羽。角者。  
氣平之聲。音之中也。故宮音始而濁。羽音極而清。落  
而收於角。清濁平焉。此聲氣自然之妙。非人力強而  
能者。今日黃鐘宮爲清越之音。不知其音出于喉乎。  
出于唇乎。惟以宮爲清。則黃鐘之管九寸重濁而不  
合。故有黃鐘三寸九分之說。嗚呼。其大謬矣。夫上古



鐘律之調簡矣。而不求備也。故周禮三鍾十二律。皆足考擊。若必欲盡五音之調。非加以十二子聲不可。何也。清之分數少也。故古之編鐘編磬。有一架二十四枚之設。蓋通正聲子聲並擊之也。晉宋以來。十二律之外。止加四清聲。以補其不及。故作徵調。終不能成。何也。清之分數少也。聲之道。順而易。逆而難者也。故濁之役清也。常有餘。清之役濁也。常不足。故備清濁之調。非子律不可。今日取聲不用半律。是不用子律矣。卽徵羽之調。終不可成。令平公欲聽清商。雖師曠。何自而擊之。謂子律可廢乎哉。夫正變二十四律。



則五音各五之調畧備。必如京房六十調之說。則清律極短。其聲焦殺。而不成調。雖有其名。初無實用。蔡氏不深致思。亦信其說而衍之。况後學哉。或曰。然則十二律還相爲宮。果何謂乎。曰。此非六十調之謂也。凡調以一律爲主。其餘律皆比而和之。始終出入不離首律。故曰。旋相爲宮。言各律旋各自爲首也。如黃鐘爲主律。則必以林鍾爲徵。太簇爲商。南呂爲羽。姑洗爲角。其音以次而平。若以他律雜之。元非相次之管。必至清濁凌犯而後已。繇是言之。一律主一調。合正與子而二十四調生焉。雖缺其一音而調亦足考。



矣。故自周至漢至唐至宋。雅俗樂流傳于世者。大抵  
宮調獨多。而商角次之。其徵羽二調。止三之一。此足  
以見聲音之道。濁者常有餘。清者常不足。而京房氏  
所謂六十調者。論說雖矣。而實無所用也。後學不察。  
而傳衍之。謬矣。且以爲李氏之說。既不達五音之清  
濁。又不及作樂之節度。其論律呂樂職樂器聲容之  
考證。皆長樂陳氏樂書之緒餘。豈閩人無喉中之音。  
故遂以唇舌不正之音。而杜撰定之與。其詆之如此。  
大都黃鐘冲氣無所不在。而十二律之損益。皆從出  
其中。如君無不統。如天無不覆也。故九寸爲之宮。諸



少涵焉。豈極清哉。故君子慎變古也。韓司馬邦奇博  
極群書。研律呂之學。至瘍發背。瘡劇不知也。苦心精  
思。悟若天啓。於是作志樂。以爲律生聲。鐘生律。馬遷  
著之。而律經聲緯之。遞變體十。用九之明。示未及也。  
圖九分積八百一十分。斑固著之。而管圓分方。旋宮  
衆轉。乘除規圓之圖。未及也。六十調八十四聲。蔡元  
定著之。而起調則例。及正變全半子倍之交用。調均  
首末長短相生之互見。未及也。六變八變九變之用。  
周禮載之。而以黃鐘祀天神。以蕤賓祭地祇。以太簇  
享人鬼。一造化之自然矣。而黃鐘一均於朝廷宮闈。



宴饗備布焉。又周禮之所未載者。蓋其精也。久之。楊忠愍繼盛爲郎。時從受樂。三月而得其數。則請曰。樂體於理。而用於聲。有器而後有聲。有聲而後理。可從。奇也。理而無器。如聲何。乃構桐竹絲漆手製管吹之。而和製琴瑟簫笙塤箎奏之。而又和合奏之。若一復於韓曰。技有進於是者乎。韓喜曰。居。吾語汝。吾欲制十二律之管。管各備五音七聲而成調也。子豈有意乎。繼盛退。凝思廢食。寢者三日夜。夢大舜坐堂上。以金鍾使考之。曰。此黃鐘也。醒而汗流浹背。恍若有悟。起簫燈。趣制管。迨明而成者六。已皆成。韓撫膺高。麗。



喜曰。得之矣。始吾志樂成。九鶴飛舞於廷者久之。應  
其在子耶。然太常肄常習舊。朝議未遑復禮變樂。

之事無及之者。

唐太史順之。稱編云。大史院景表尺。乃元郭守敬所造。今欽天監表尺是也。

守敬精於律曆。決非苟作。比市尺止得八寸強。嘗取黑黍揀其中者。千有二百。暴乾之。秤重五錢者。以九十粒橫累之。命爲九寸。與表尺果合。又截竹爲管。長同九寸。其竅上下均容一千二百黍者。吹之。其聲與今之最下一聲合。意爲黃鐘之聲。崔文敏銑曰。器數名物。必也秦漢。

之詁乎。殘編遺韻。彼猶及見其音塵。今無從質也。不  
形於韻。不發於音。烏取乎辯博相高哉。又曰。今中原  
化而夷者。未之能革。則俗樂其尤也。隋在朝者。溺於  
淫放。萬寶常處怡而心一。故聞樂而知其亂。予北人。



諳俗樂。初入翰林。夕竝西苑行。聞南有笛聲。煩促而哀。予愀然動意。未旬日。

孝皇崩。國事大變。樂記曰。凡音之起。繇人心生也。

人心之動。物使之然也。感於物而動。故形於聲。聲相應。故生變。變成方。謂之音。比音而樂之。及于戚羽旄。謂之樂。樂者。音之所繇。王也。其本在人心之感於物也。是故其哀心感者。其聲噍以殺。其樂心感者。其聲嘽以緩。其喜心感者。其聲發以散。其怒心感者。其聲粗以厲。其敬心感者。其聲直以廉。其愛心感者。其聲和以柔。六者。非性也。感於物而后動。是故先王慎所



以感之者人生而靜天之性也感於物而動性之欲也。物至知知然後好惡形焉。好惡無節於內。知誘於外。不能反躬天理滅矣。夫物之感人無窮而人之好惡無節則是物至而人化物也。人化物也者滅天理而窮人欲者也是故先王本之情性稽之度數制之禮義合生氣之和道五常之行使之陽而不散陰而不密剛氣不怒柔氣不懾四暢交於中而發作於外皆安其位而不相奪也。然後立之學等廣其節奏省其文采以繩德厚律小大之稱比終始之序以象事行。使親疏貴賤長幼男女之理皆形見於樂故曰樂。



觀其深矣。土敝則草木不長。水煩則魚鼈不大。氣衰則生物不遂。世亂則禮慝而樂淫。是故其聲哀而不莊。樂而不安。慢易以犯節。流湎以忘本。廣則容姦。狹則思欲。感條暢之氣。滅平和之德。是以君子賤之也。凡姦聲感人而逆氣應之。逆氣成象而淫樂興焉。正聲感人而順氣應之。順氣成象而和樂興焉。是故君子反情以和其志。比類以成其行。姦聲亂而不留。聰明淫樂慝禮。不接心術。情慢邪辟之氣。不設於身體。使耳目鼻口心志百體皆繇順正以行其義。然後發以聲音。文以琴瑟。動以干戚。飾以羽旄。從以簫管。奮



至德之光。動四氣之和。以著萬物之理。是故清明象天。廣大象地。終始象四時。周旋象風雨。五色成文而不亂。八風從律而不姦。百度得數而有常。小大相成。終始相生。倡和清濁。迭相爲經。故樂行而倫清。耳目聰明。血氣和平。移風易俗。天下皆寧。故曰樂者樂也。君子樂得其道。小人樂得其欲。以道制欲。則樂而不亂。以欲忘道。則惑而不樂。是故君子反情以和其志。廣樂以成其教。樂行而民鄉方。可以觀德矣。德者性之端也。樂者德之華也。金石絲竹。樂之器也。詩言其志也。歌詠其聲也。舞動其容也。三者本乎心。然後樂



罷從之。是故情深而文明，氣盛而化神，和順積中而  
英華發外。唯樂不可以爲僞樂者，心之動也。聲者樂  
之象也。文采節奏，聲之飾也。君子動其本，樂其象，然  
後治其飾。是故先鼓以警戒，三步以見方，再始以著  
往，復亂以飾歸。奮疾而不拔，極幽而不隱，獨樂其志，  
不厭其道，備舉其道，不私其欲。是以情見而義立，樂  
終而德尊。君子以好善，小人以聽過。故曰：生民之道，  
樂爲大焉。君子曰：禮樂不可斯須去身，致樂以治心，  
則易直子諒之心油然而生矣。易直子諒之心生，則樂  
樂則安，安則久，久則天天，天則神，天則不言而信，神則



不怒而威。致樂以治心者也。致禮以治躬則莊敬。莊敬則嚴威。心中斯須不和不樂。而鄙詐之心入之矣。貌斯須不莊不敬。而慢易之心入之矣。樂動於內者也。禮動於外者也。故禮主其減。樂主其盈。禮減而進。以進爲文。樂盈而反。以反爲文。禮減而不進則銷。樂盈而不反則放。故禮有報而樂有反。禮得其報則樂樂得其反則安。禮之報。樂之反。其義一也。昔者子貢問於師乙曰。賜聞聲歌各有所宜。如賜者宜何歌也。師乙曰。乙賤工也。何足以問所宜。請誦所聞。而吾子自執焉。寬而靜。柔而正者。宜歌頌。廣大而靜。疏通而



信者宜歌大雅。恭儉而好禮者宜歌小雅。正直而靜  
廉而謙者宜歌風。肆直而慈愛者宜歌商。溫良而能  
斷者宜歌齊。夫歌者直已而陳德也。動已而天地應  
焉。四時和焉。星辰理焉。萬物育焉。歌太史公曰。夫上

古明王舉樂者。非以娛心目。快意恣欲。將欲爲治也。  
正教者皆始於音。音正而行正。故音樂者所以動盪  
血脉。流通精神。而和正心也。故宮動脾。而和正聖。商  
動肺。而和正義。角動肝。而和正仁。徵動心。而和正禮。  
羽動腎。而和正智。故樂所以內輔正心。而外異貴賤  
也。上以事宗廟。下以變化烝庶也。琴長八尺一寸。正




度也。絃大者爲宮而居中央。君也。商張右傍。其餘小相次。不失其序。而君臣之位正矣。琴故聞宮音。使人惻隱而愛人。聞徵音。使人樂善而好施。聞羽音。使人整齊而好禮。故君子不可湏臾離禮。湏臾離禮。則暴慢之行窮外。不可湏臾離樂。湏臾離樂。則奸邪之行窮內。故古者天子諸侯。鐘磬未嘗離於庭。卿大夫琴瑟未嘗離於前。所以養行義而防淫泆也。夫淫泆生於無禮。故聖王使人耳聞雅頌之音。目視歲儀之禮。足行恭敬之容。口言仁義之道。故君子終日言而邪辟無繇入也。












































史下編卷之十六

明旴郡鄧元錫著

財賄考

老子曰。致治之極。民各甘其食。美其服。樂其俗。隣國相望。鷄犬之聲相聞。民至老死不相往來。今挽此爲務。三變而帝道可舉。則無爲譽錢幣矣。乃夏殷周之盛。農工商交易之路通。而侯國並建。制田疆井。務民於農桑。民男子力耕稼。納賦稅以事上。工女織作。安寧則長庠序。以禮義防於利。國有變災。禹始以厯山之金鑄幣以贖民之金。鑄幣以贖民於汜。湯以莊山之金鑄幣以贖民



之無糧賣子者。而周官司市。歲凶則市無征而作布。

故粟米布帛。生民之大本。而泉布權輕重。通有無均

多少。救一時之急。適其變也。虞夏之際。幣爲三品。曰

黃。曰白。曰赤。或錢。或布。錢長二寸五分或刀。錢如刀長二寸或龜貝。

周官金玉錫石之地。設井鑛人之官。爲厲禁以守。若

以時取之。則物其地圖而授之。巡其禁令。太公立九

府園法。黃金方寸而重一斤。錢園函方。外圓而內孔方輕重

以銖。布帛幅廣二尺二寸。長四丈爲匹。故貨寶於金。

利於刀。流於泉。布於布。束於帛。已太公退。又行之於

齊。齊地瀉滷。人民寡。又勸其女功。通魚鹽。人物歸之。



襴至而輻輳。故齊冠帶衣履天下。比齊中衰。管子修其法。設輕重九府。用九合一匡。桓公霸焉。景王患錢輕。將更鑄大錢。單穆公曰。古者天降災戾。於是量資幣。權輕重以賑民。民患輕。則爲之作重幣以行之。於是乎有母權子而行。民皆得焉。若患重。則多作輕幣以行之。亦不患重。於是乎有子權母而行。小大利之。今王廢輕而作重。民失其資。能無匱乎。若匱。王用將有所乏。乏則將厚取於民。民不給。將有遠志。是離民也。且夫備有未至而設之者。有至而後救之者。可先而不備。謂之怠。可後而先之。謂之召災。周固羸也。天



未厭禍而又離民以佐災。無乃不可乎。且絕民用以實王府。猶塞川原而爲潢汚也。其竭也無日矣。若用離而財重。災至而備亡。其若之何。王弗聽。卒鑄大錢。

張挺曰。此段叙虞夏周之錢幣。中間帶布帛說。意以錢爲主。而金銀諸幣爲之佐。布帛粟米爲之本。叙錢內又有二意。卅人一節。言出銅之地。厲禁必設。景王節言作錢之制。輕重必中。後面叙漢唐宋處俱此脉絡。秦兼天下。幣二等。黃金爲上幣。銅錢文曰半兩。重

如其文爲下幣。而珠玉龜貝銀錫之屬。爲器飾寶藏。不爲幣。然各隨時而輕重無常。漢興爲秦錢重難用。更令民鑄筴錢。以黃金一斤爲一金。其制祿以穀粟。以萬石千石百石爲差。不以金。亦猶古意。文皇帝恭



儉致理。務農恤下。而是時莢錢益多輕。乃更鑄四銖錢。文半兩。而除盜鑄之令。令天下得公鑄錢。敢以鉛鐵爲他巧者黥。梁傳賈誼爲帝言。夫事有召禍而法有起姦。鑄錢之情。非殺禱爲巧。則不可得贏。而殺之甚微。爲利甚厚。今令細民人操造幣之勢。各隱屏而鑄作。因欲禁其厚利微姦。雖黥罪日報。勢固不止。又民用錢。郡縣或輕或重。而法錢不立。吏急而壹之乎。則大爲煩苛。縱而弗呵乎。則市肆異用。錢文大亂。苟非其術。何鄉而可哉。今上收銅勿令布。則民不鑄錢。黥罪不積。僞錢不蕃。民不相疑。采銅鑄作者。反於耕



作畢歸於上。上挾銅積以御輕重。錢輕則以術歛之。重則以術散之。以臨萬貨。以調盈虛。以收音羨。官富實。而未民困矣。賈山亦言錢者。亾用器也。而可以易富。賈。富賈人主之操柄也。令民爲之。是與人主共操柄。不可長也。禁之便。而天子意終欲捐利以予民。不禁也。於是吳王卽山鑄錢。富埒於天子。後卒叛逆。幸臣通從鑄錢。富過王者。而吳鄧錢布天下。蟲錯爲帝言。珠玉金銀。饑不可食。寒不可衣。然而衆賈之者。上用之故也。其爲物輕微易藏。在於把握。可以周四海。而無饑寒之患。此令臣輕背其主。民易去其鄉。盜賊



有所勸而亾逃者得輕資也。粟米布帛生於地。長於時。聚於力。非可一日成也。數不之重。中人弗勝。不爲奸邪所利。一日不得則饑寒至。故明君賚五穀而賤金玉。論幣端較然甚明。然是時井田廢壞。所云粟爲賞罰。開入粟鬻爵贖罪之端。適爲奸富資。而後世郡縣天下爲一家。四方萬里之粟。輸輓轉漕。餉京師實邊。商賈往來。窮塞絕徼。逐末者益廣。百官萬用。非金錢不行。俗靡然視三代大變。欲賚粟無繇也。武帝時天子有事於四夷。又工作繁而用侈。至出御府金錢贍不足。而民治鑄累萬金。不以佐公家之急。於是天



子與公卿議更錢造幣以贍用。而摧浮淫兼并之徒。自孝文更造四銖錢。歲久寢少。建元來縣官往往多。即山而鑄錢。民間亦盜鑄雲起。不可勝數。錢益多而輕。而是時禁苑有白鹿。少府多銀錫。於是有司言古者皮幣。諸侯以聘享。而金有三等。黃金爲上。白金爲中。赤金爲下。金半兩錢法重四銖。而姦或盜磨錢裏以取鎔。鎔音浴。銅屑也。錢益輕薄而物賈遠方用幣煩費不省。請以白鹿皮方尺。緣以藻繢爲皮幣。直四十萬。王侯宗室朝覲聘享必以皮幣薦璧。乃得行。帝以問大農。農異。異對曰。王侯朝賀。倉壁直數千。而其薦乃反四



十萬本。本不相稱。天子不說用他。過誅異。然皮薦本古皮幣而名。以操勢徼利。而物無當於用。獨爲觀。非自然之符。故終乚不行。又造銀錫爲白金。以爲天用。莫如龍。地用莫如馬。人用莫如龜。故白金三品。一曰白選。重八兩。圍之。其文龍。直三千。二曰重差。差小方之。其文馬。直五百。三曰復小。攄之。其文龜。直三百。令縣官銷半兩錢。更鑄三銖錢。文如其重。盜鑄諸金錢。罪皆死。而吏民盜鑄者。不可勝數。重刑用終。莫能勝也。已白金稍賤。民不實用。縣官以令禁之。無益。終廢不行。而郡國多姦鑄錢。錢多輕。公卿請令京師鑄官。



赤側錢名一當五賦官用。非赤側不得行。用不便。又廢。

於是悉禁郡國無鑄錢。上林三官專鼓鑄。而合天下非三官錢不得行。諸郡國前所鑄錢皆廢銷之。輸其銅三官。於是錢盜鑄者計其費曾不能相當。惟真工大姦乃爲之。而有司言三銖錢輕。易姦詐。請鑄五銖錢。重周郭。其下合不可磨取鎔焉。於是五銖錢輕重最適。以故行。而榆莢四銖八銖赤仄之類皆廢。元帝時。貢禹爲上言。古者不以金錢爲幣。專意於農穀。今漢家鑄錢。及諸鐵官。皆置吏卒徒。攻山取銅鐵。一歲功十萬人。以上中農食七人計之。是七十萬人常受



其饑也。鑿地數百尺。銷陰氣之精。地藏空虛。不能含  
氣出雲。斬伐林木。亡有時禁。水旱之災。未必不繇此  
也。自五銖錢起已來七十餘年。民坐盜鑄錢被刑者。  
衆。而富人積錢滿室。猶亡厭足。商賈求利。東西南北。  
各用智巧。冀十二之利。而不出租稅。農人重困。故民  
棄本逐末。雖賜之田。猶賤賣以賈。窮則起爲盜賊。何  
者。末利深而惑於錢也。疾其末者。絕其本。宜罷採珠  
王金銀鑄錢之官。亡復以爲幣。勿販賣除租銖之律。  
租稅祿賜。皆以布帛穀。使百姓一意於農桑。便而議  
者。以爲交易待錢而後通。布帛非可以尺分寸裂而



用之。禹議雖志於古而近本。然膠而難行。五莛變漢

制。以周錢子母相權。於是造大錢。徑一寸二分造契

刀。錯刀。

契刀環如大錢。身形如刀。長二寸。文曰契刀。直五百。錯刀以黃金錯其文曰刀。直五千。

與五銖錢。凡四品。並行。已篡漢。以書劉字有金刀。乃

罷錯刀契刀及五銖錢。而更作金銀龜貝錢布之品。

黃金重一斤。直錢萬。朱提銀重八兩。爲一流。直一千

五百八十。它銀一流。直千。是爲銀貨二品。元龜距冉

長尺二寸。直二千一百六十。爲大貝十朋。公龜九寸。

直五百。爲壯貝十朋。侯龜七寸以上。直三百。爲么貝

十朋。子龜五寸以上。直百。爲小貝十朋。是爲龜寶四

品。大貝四寸八分以上。二枚爲一朋。直二百一十六

壯貝三寸六分以上。二枚爲一朋。直五十。么貝二寸

四分以上。二枚爲一朋。直三十。小貝一寸二分。以上。二

枚爲一朋。直十。不盈寸二分。漏度。不得爲朋。率枚直

錢三。是爲貝貨五品。大布。次布。第布。壯布。中布。差布。



厚布、紵布、云布、小布、長寸五分、重十五銖、文曰、小布一百、自小布以上、各依長一分、相重一銖、文各爲其布名、直各加一百、上至大布、長二寸四分、重一兩而直千錢矣、是爲布貨十品、鑄作錢布、皆用銅、殺以鉛、錫、文質周郭、放漢五銖錢云、凡五物六名二十八品、行之而民便

安。五銖錢私市買如故。於是詔敢挾五銖錢者爲惑衆。按四裔而貨貝憤亂。終莫之能行。於是農商失業。食貨俱廢。自公卿大夫至庶人。用錢禁抵罪者。不可勝數也。莽又數以其意改作。而貨布所繇無常。民莫知所守。陷刑辟甚衆。愁苦而公孫述在蜀。廢五銖錢。置鐵官鑄鐵錢。民亦怨嗟之。爲之語曰。黃牛白腹。五銖當復。及莽述卒受誅。而漢復建武初復五銖而百



姓便安。桓帝時。天下大抵用不足。而民困。有上書請改鑄大錢者。下四府群僚。及太學博士議上。太學生劉陶議。以爲當今之憂。不在貨寡。在平民饑。是以先王觀象育物。敬授民時。使男不連畝。女不下機。誠以民可百年無貨。不可一朝有饑。故食者有國之所實。百姓之至賢也。比年以來。良苗盡於螟蝗。杼柚空於求取。所急朝夕之食。所患米鹽之務。豈謂錢之厚薄。銖兩之輕重哉。議者不達農殖之本。多言治鑄之便。欲因緣行詐。以賈國利。造鑄之姦。於是乎生。此猶養魚沸鼎之中。棲鳥烈火之上。雖以陰陽爲炭。萬物爲銅。



役不食之民。使不饑之士。猶不足無厭之求也。蓋萬人鑄之一人奪之。然且不給。况令一人鑄而萬人奪之乎。欲阜民財。在止力役。禁爭奪。國可不勞而足也。事得寢。魏文帝時。罷五銖錢。使百姓以穀帛爲市。巧僞者。競濡穀以徵利。作薄絹市之。雖嚴刑莫禁。而五銖復行。則知上世淳質。務民於耕桑粟帛。而以其餘粟餘布。通有無爲市。不外求而適足。固其極盛。中古通工來商。宿賈行貨。以典禮佐費。則九府圜法。固嗣功於龜貝。而莫之能易也。桓玄輔政。議欲廢錢。用穀帛。孔琳之曰。漢範八政。貨爲食次。豈不以交易之所資。爲用至要乎。若使百姓用力於爲錢。繇是妨爲生之業。禁之可也。今農自務。



穀工自務器各隸其業何嘗相妨故聖王制無用之  
貨以通有用之財既無毀敗之費又省運致之苦此  
錢所以嗣功龜貝歷代不廢者也穀帛本充於衣食  
今分以爲貨則致損甚多又勞毀於商販之手耗棄  
於割截之用此司馬芝以爲用錢非待豐國亦以省  
刑也揀今用錢之處不爲貧用穀之處不爲富語曰  
利不百不易業况又錢便於穀也沈約評之曰九棘  
播于農皇十朋興于上代昔醇人未漓情嗜疎寡奉  
生贍已事有異同一夫躬耕則餘餐委室疋婦務織  
則兼衣被體雖貿遷之道適用濟乏龜貝之益爲功  
甚輕及事有訛變姦弊大起昏作役苦故穡人去而  
商末業所流非復始造之意也於是競收罕至之  
珍遠蓄未名之貨明珠翠羽無足而馳彩斲文犀飛  
不待翼天下蕩蕩咸以棄本事未豐衍則同多珍之  
貨飢凶又減田家之蓄錢雖盈天不療飢於堯年只  
或如山無救渴於湯代其爲疵病亦已深矣固宜一  
罷錢貨專用穀帛使人知役生之路非此莫繇夫千  
匹爲貨事難於懷璧萬斛爲市未易於越鄉斯可  
未伎自禁遊食必反而事改一朝廢而莫用交易所  
寄朝夕無待先官削華止僞還醇返古抵璧幽峯



珠清壑驅一代之人。反耕桑之路。蕩滌園囿。洪銷鑄無遺。立制垂統。求傳於後。桓玄知其始而不覺其終。琳之覩其末而不統其本。豈慮有開塞。將一往之談乎。宋元嘉中鑄四銖錢。輪郭

形制俱倣古五銖。不爲盜鑄者所利。而頗剪鑿以取銅。江夏王義恭建議。請鑄大錢。一當兩。以坊之。右僕射何尚之曰。不可。泉貝之興。以估貨爲本。貨數少則幣重。數多則物重。多少雖異。於濟用一也。豈當以一當兩崇虛價哉。若今制遂行。富人之貨自倍。貧者彌困。懼非所以使之鈞也。不聽。竟鑄之。已不便乃罷。其後荇葉鷺眼。紕繆。諸所鑄者。錢形式薄小。輪郭不成。而盜鑄者雲起。祿以鉛錫。又剪鑿古錢。取其銅。重刑



不能禁。齊奉朝請孔鯢言鑄錢之弊。在於輕重屢更。重錢患於難用。難用之弊小。輕錢在於盜鑄。盜鑄之禍深。夫人所以盜鑄而嚴法不禁者。繇上之鑄錢惜銅而愛工也。惜銅愛工。務輕而數多。故工省而易成。然工省易成。則盜鑄者利之。而患乃始此矣。自漢鑄五銖。至宋文帝四百餘年。制度有廢興。而五銖不變者。以輕重得貨之宜也。重之則不行。輕之則滋弊。今宜置錢府鼓鑄。輕重一準五銖。而官錢細小者畢銷之。五銖既布。然後嚴斷剪鑿破小。缺無周郭者。令無得行。於以利貧良之民。塞姦富之路。利甚博也。梁初



惟京師及三吳荆鄭江襄梁益用錢。餘州郡雜用穀帛。交廣全通金銀。武帝初鑄錢肉好周郭。文曰五銖。普通中更鐵錢而私鑄騰起。所在鐵錢如丘山。貨滯不行。隋初患錢品輕重不等。更鑄五銖如漢。而錢幣始一。已大猾私鑄。而錢更濫惡甚。乃剪鐵葉裁皮糊紙爲之。苟用相欺。繇此觀之。始未嘗不重利權勤國力。無愛銅惜工。坊僞濫以幅利。而未乃薄濫也。元魏任城王澄。堯尚書。言臣聞君子行禮。不求變俗。因所宜而順之。太和五銖。繇自孝文皇帝。誠不易之式。雖利於京邑。而徐揚兗鄭各便其土之錢。貿鬻不用也。



本律所爲禁者。謂鵞眼緣鑿繆缺之錢耳。今諸土所  
行非制所限。而禁之失法意矣。又河北州鎮既無新  
造五銖。舊者又斷使不行。專以單絲之縑。疎縷之布。  
狹幅促度。不中式者。裂爲尺寸。以濟有無。徒勤杼軸  
之勞。不救饑寒之苦。非子恤黎元。利用便民之道也。  
夫錢之爲名。欲俗行如泉流而止。非可壅塞。請太和  
五銖。及諸古錢。方俗所便者。無大小聽得通行。賢賤  
之差。自依鄉價。惟盜鑄不法。及毀大爲小者。禁庶百  
貨行而公私無壅。詔從之。而河北諸州舊少錢。猶以  
他物交易如故。故政主便民而已矣。唐興金銀錫鐵



之治凡百八十有六所。武德初鑄開通元寶錢。徑八分。重二銖。積十錢。重一兩。千錢重六十四兩。約筭易而輕重得中。以故行。置錢監於洛汭。幽益等諸州鼓鑄之。賜秦王齊王各三鑪。右僕射裴寂二鑪。歐陽詢書八分。合隸體爲文。盜鑄者死。乃後盜鑄起而錢惡。顯慶中詔所在官取惡錢三。罰好錢一以收之。而姦不爲息。乾封改鑄以抑之。開元初中書侍郎張九齡請倣漢文帝除私鑄禁以便民。下百僚議錄事。叅軍劉秩本漢賈生言。條疏其不可者五。且以爲鑄錢而用不贍者在銅。賢銅賤之繇在採用者多。夫銅以爲兵不如鐵。以爲器不如漆。何爲而



不禁。誠重銅禁。則銅不它用。銅不它用。則賤而鼓鑄之用給。又銅不布。則盜鑄者無因。盜鑄無因。則公錢不破。公錢不破。則錢日增而刑平。是一舉而四美具也。人惟富則不可以賞勸。亦惟貧則不能以威禁。若許私鑄。則貧者不能爲益。貧而役於富。富者益富。而刑賞皆無所措也。於是嚴惡錢之禁。敕錢重二銖四分。以上乃得行。丞相璟請出太府錢二萬緡。以平估買百姓不售之物充官用。庶良錢流布人間。其後敕太府及郡縣出粟數十萬石。歛人間惡錢。送太府銷毀更鑄如式。乾元中有司以甲兵未息。諸給用費奢。



奏鑄乾元重寶一。當開通元寶十。鑄稜錢一。當元寶五十。已不便而罷。而開通錢復行。自虞夏三品之幣興。而黃白赤金。世爲天下幣。漢而後。佛老象教盛行於域中。寺若觀。縻黃金者億億。計而天下刻鏤織作。鍾冶爲冠服衣履什物者。又不可勝原。故黃金日銷。而赤金乃大行。已亦漸賤。固其理也。大曆貞元中。嚴天下用銅器之禁。周顯德中。世宗以縣官久不鑄錢。而民間銷錢爲器皿。及佛像者衆。乃立監鑄錢。諸民間銅器佛像畢輸官。給直銷以爲錢。宋初產金之冶。監五。銀冶監三。塲五十一。產銅塲三十五。鐵監四。冶



十二鉛場三十六錫場九水銀場四朱砂場三銅錢  
文曰宋元通寶輕重一準唐開通可久行凡諸州輕  
小惡錢及鐵鑄錢成禁限一月送官違限者罪私鑄  
者棄市而銅鐵闌出境外及諸番罪有差當是時銅  
錢有四監饒州曰永平池州曰永豐江州曰廣寧建  
州曰豐國而京師昇鄂杭州南安軍各有監而廣南  
安南平聽權用舊錢如川蜀因其故勿擾桂陽上銀  
課天子曰古者不鬻難得之貨後代賦及山澤上加  
侵削下益剝敝深疚于朕心縱未能捐金於山亦豈  
忍奪人之利桂陽監歲所輸銀課其減以利民轉運



副使張諤言川峽故乏銅。諸所用鐵錢十直銅錢一。後彌益賤。請市夷人銅斤給鐵錢千。可以大獲銅鑄錢。而令民輸官府錢者。卽乏錢毋得輸鐵錢。聽輸銀絹以充。候銅錢多乃輸錢。從之。而轉運使聶何及判官范祥謬言民願輸錢。則以月俸所得錢昂取直市之民。民益苦乏錢。或發古冢毀佛像取銅坐罪者甚衆。知益州辛仲甫論糺之。而祥詠等皆坐免。三司度支判許申建議。請以藥化鐵與銅雜鑄錢。徑重如錢。銅三分有奇。鐵六分有奇。錢成費省而利倍。詔聽之。然銅雜鉛錫。卽液流速而易成。雜以鐵。液流澁難就。



初申自詭月鑄錢可萬緡。已僅得萬錢。以坐斥太宗時。用紀元鑄錢。曰太平通寶。淳化改鑄。又親書淳化元寶。作真行草三體成文。後每更鑄。皆曰元寶。而各以其紀年冠之。然輕重率準開通。慶曆中。西事棘而軍乏需。陝西都運使張奎。知永興軍范雍。請鑄大銅錢。與小錢兼行。大錢一當小錢十。奎徙河東。又請因晉州積鐵。鑄大錢於晉澤二州。亦以一當十。佐關中軍。未幾罷。而陝右復采儀州銅。置博濟監。鑄大錢。已又敕江南鑄之。而江池饒儀等州。又敕鑄小錢。悉輦致關中。歟。州錢雜行。以故盜鑄者衆。而錢文大亂。物



價淆貿不可得知。公私患之。知并州鄭戡請河東鑄鐵錢三當銅錢。一行之一年。又以三當一。或以五當一。而并丹亦鑄鐵錢。易並邊銅錢。於是三司使葉清臣與學士張方平等議。以爲關中用大錢之所以弊者。本縣官取利太厚。致姦人盜鑄而用輕也。比年來皆虛高物估。以徼什一之利。始增直於下。終取償於上。縣官雖有折當之虛名。乃受虧損之實害。揀弊不先自損。則法未易行。請江南儀商等州大銅錢一當小錢三。小鐵錢若河東小鐵錢。皆以三當一。而罷官所置爐。使自是姦人稍無利。而濫錢多。卒未能絕也。



其後罷商州所鑄青黃銅錢。又令陝西大銅鐵錢皆以一當二。盜鑄衰止。而折二錢太行。然兵民艱于資用。多咨怨。先是當十錢行。中書舍人丁度言。漢之五銖。唐之開通。及國朝通寶。輕重大小。最爲得衷。以故行。歷代改更。法始未嘗不詳具。尋卽改鑄。雖復繩以峻法。而終已不行也。今禁旅戍邊。月給百錢。得大錢裁十。不可畸零行使。舊錢不出。新錢愈輕。邊芻糧之價必增矣。臣知湖州時。有抵茶禁者。人受十錢。輒立斃。代受鞭背刑。官京西時。盜殺人罪死。計所盜弊衣。直不能數百錢。利惑之也。况盜鑄之利重。其何以禁。



之已竟不行熙寧初。王安石持議言錢不足而用之。非銅禁之不嚴。以鼓鑄者少而不給也。請弛民間鑄錢之禁。而邊關無譏。於是京西淮南兩浙江西荆湖諸路各置監鑄錢。江西湖南額課十五萬緡。餘路十萬緡有差。已諸務無慮務增額以爲功。而所鑄錢銅錫雜而脆惡易毀。又私鑄龐雜。元豐末。西師起而邊圉卽徐州置寶豐監。歲鑄折二錢二十萬。緡輸之邊。而所行青苗免役諸法。無慮皆徵錢。民無從得錢而錢荒於是判應天府。張方平具疏言。夫鑄錢禁銅之法舊矣。令敕具載。所以握天下利權。無令倒置也。自



熙寧新敕除前禁邊關海舶重車飽載沿邊州軍每貫徇收稅錢一二而止錢本中國貨寶舉以與四夷共之曾不限隔又自弛銅禁民間銷鑄十錢得精銅一兩造作器用獲利五倍如此則雖逐州置鑪每鑪增額亦猶畎澮之入而以供尾間之泄也豈有足哉且公私發歛其則不遠百官群吏三軍之俸給夏秋糴買穀帛坑冶塲監之本價錢之所發也屋廬正稅茶鹽酒酤之課若今率錢募役青苗入息之法錢之所歛也民間貨布一仰於官錢官錢之出少而賦錢之入多即錢將安出而公私上下並若之矣元祐初



始罷免役青苗錢之法。申錢幣間出之禁。而諸鑄錢監新置者。皆罷熙豐間銅鐵錢並行。銅錢千易鐵錢千五百。後鐵錢寢輕。乃命公私給納貿易。並專用鐵錢。而官帑銅錢。運致之內郡。已不便。乃通行如故。及蔡京當國。用陝西轉運副許天啓議。鑄當十大錢。每貫重十有四觔七兩。赤側烏背。以御書聖宋通寶爲文。募民間私鑄丁作。出爲縣官使。并其家設營居之。用倣古招天下亡命。卽山鑄銅之意。而所鑄錢。於陝西行鐵錢地分鼓鑄。於諸路行銅地分使用。絕私鑄之患。又用河東運判洪中孚言。二虜益市中國鐵錢。



爲兵器。器犀利。若錐以鉛錫則脆。不爲虜所利。宜改鑄夾錫鐵錢行之。每緡銅八斤。黑錫半之。白錫三之一。而夾錫錢一。折銅錢二。直本輕。不與銅錢等。而法必欲其重。乃嚴擅易擡減之令。凡貿易不受夾錫錢。聽告糾細。民蒙其患。而私鑄者競起。又立搜索告捕之法。嚴官司漏逸之罪。人下騷然。知蘇州章傑言。盜鑄宜準淮東囊橐強盜之法。藉家予告者。而居停鄰保。金坐大觀。星變肆赦。有司上盜鑄待罪者姓名。乃至十數萬人。民慘毒。而宋南孝宗時。舒蘄守臣以鑄錢增羨遷官。而民擾理宗時。楮幣興。積錢有禁。而民



離。監察御史陳求魯言。議者以楮便於運轉。而訾圜  
法爲無用。申積錢之禁。至嗾盜賊以窺人之閫與。峻  
刑法以發人之窖藏。然臣竊思國之大患。在於錢之  
荒。而不在於錢之積也。今藩舶巨艘若山嶽。駕風浪。  
商販於中國。皆浮靡無用之異物。而洩於外夷者。乃  
國家富貴之操柄也。錢之不耗於海舶無幾矣。京城  
之銷金。衢信之鑰器。醒泉之樂具。臨川隆興之銅工。  
錢之不壞於器物者無幾矣。今京邑鎔銷濫靡之器  
飾。公行於市而莫之禁。香藥象牙犀角之類。可珍玩  
者。又上下交重之。乃專急於民之積錢。不已遠乎。



惟陛下昭示儉德。化自上始。斥靡費之物。賤難得之貨。使風行俗易。此端本澄原之道。始唐憲宗時。商賈至京師。委錢諸路。進奏院及諸軍使家。而輕裝趨四方。合券取償。命曰飛錢。而京兆尹裴武猶恐行久滋僞。難質易。請禁之。便宋置便錢務。許商人錢左藏庫。而飛諸州錢償之。猶之券質錢也。其後蜀人患鐵錢重。不便齎資。私爲券貿易。謂之交子。每一交爲錢一緡。以三年爲界而換之。六十五年爲二十二界。後貲衰不能償所負。蜀以多訟。四川轉運使薛田議以爲廢之。則貿易不通。聽之。則爭訟滋起。請官爲交子。務



提衡之。私造者禁。而交楮始屬官。於是置益州交子務。以方寸之紙。飛錢致遠。官權其出入而爲之限禁。然非積錢爲本。固不能以自行也。其後舊交子二十二界將易。而後界給用已多。詔更造二十五界者百二十五萬。以償前二十五界之數。交子有兩界自此始。又後用兵。湟廓西寧。藉其法。給糴買召募之用。多至數百萬緡。較天聖一界逾二十倍。更界之歲。又以新加舊。而交價愈增。大觀中。不蓄本錢。而增造無藝。交子賤不行。至引一緡。僅當錢十數。而法大病。紹興初。大軍屯婺州。有司請椿辦合用錢。而陸載錢重難。



致則請造關子付州將。召商入中以給軍。商人執關子。詰推貨務請錢。願得茶鹽香藥雜貨者聽。於是州縣以關子充糴本。未免抑配。而推貨務又止以日輸三分之一償之。得錢艱滯。道路嗟怨矣。其後金以錢少用不給。造交鈔與錢並用以七年爲限。納官以舊易新。諸路官置庫受之。貫取工墨錢十五文。實始以楮爲錢。南宋倣之。造會子行之。諸合發官錢。並充會子。輸左藏庫。有一貫二貫三貫五貫十貫凡五等。曰大鈔一伯二伯三伯五伯七伯五等。曰小。勅行止於兩浙。後通行於淮西湖北京西。除鹽本質錢外。它用率以楮。糴本以楮。官俸給以楮。軍士支



犒州郡支應亦以楮。諸路不通舟載者。上俟錢許用楮。沿沅州軍錢楮參半用。民間典賣田宅馬牛舟車率如之。願全支受者聽。而卽楮爲錢佐國用矣。時參政沈位爲上言。用會子必官。常有錢百萬。緡稱提之乃得行。蓋會子價減。卽以錢提收貯之。候闕乃復出。故行也。苟造楮多。而收換畱難。無以示民信。恐不必行。高宗深然之。其後僞造者多。而昏爛者不收。果折閱不行。賈似道作銀關。一準十八界會子之三。廢十七界會子不用。而楮益賤。物益賤。國大耗弊。元主中國造交鈔。造中統元寶鈔。以十計者四等。以百計者三等。以貫計者二等。行



久而物重鈔輕。桑哥建議更造至元鈔行之。自一貫至五十

文凡十有一等每一貫文視中統鈔五貫文。

而刑曹擬贓罪滿至元鈔二

百貫者死。下廷議翰林學士承旨趙孟頫上議曰始

造中統鈔時以銀爲本虛實相權以爲用。及今二十

年輕重相去數十倍。今改造至元後二十年。至元鈔

必復如中統折閱矣。若計貫抵法疑太重。枋議者以

沮格面諍之。孟頫曰奉詔與議故不敢不盡言。今中

統鈔虛故改至元。謂至元終無虛時耶。公不揆於理。

而欲以勢相陵壓。何也。其人慚而止。已吏部尚書儆

哲篤請更造至正交鈔。以鈔一貫權銅錢千文。鈔爲



母錢爲子。下廷議祭酒呂思誠曰。本錢鈔之相爲用者。以虛換實。以實權虛也。今歷代錢與至正中統至元鈔交鈔分而爲五。小民將藏其實而棄其虛。鈔用折閱。國何利乎。弊哲篤曰。至元鈔多僞。故更之爾。思誠曰。至元鈔非僞。人爲僞爾。不能革人心而變法何益。且至元鈔僞。人猶識之。交鈔人未之識。僞將滋多。弊哲篤曰。錢鈔兼行也。則何如。思誠曰。不可行也。夫錢之於鈔。輕重不倫。豈有以故紙爲母而立銅爲之子者。不聽。卒定更鈔之令。無何。物價騰踴逾十倍。及兵興。所在以物貨相貿易。公私所積鈔皆不行。而國



用大屈。至有料鈔十錠。易斗粟而不可得者。洪武初。  
置寶源局於應天。鑄大中通寶錢。與歷代錢兼行。已  
敕戶部及各行省。鑄洪武通寶。當十。當五。當三。折三。若  
小錢。凡五等。當十錢重一兩。當五重五錢。當三折二。  
重如其當之數。而小錢重一錢。嚴私鑄之禁。八年。

詔中書省造大明寶鈔。取桑穰爲料。制方高一尺。濶六  
寸許。色青黑。外爲龍文。闌橫題其額曰。大明通行寶  
鈔。闌中爲三方。上方爲篆文。中圖錢貫狀。下方具奏  
淮行使。及僞造告捕之法。上鈔一貫。折銅錢千文。銀  
一兩。自五百文遞而降。至百文而止。凡六等。而各希



政司設寶源局鑄小錢通之。尋罷設無常。永樂中以鈔法不通。令諸有以金銀錢物相貿易者。以奸惡論。告捕者。以所易金銀充賞。鈔昏爛許入行用。庫換易。收工墨直蓋。國家欲以寶鈔統天下利權。而銅錢佐爲使通行之制。甚設而鈔易昏爛難久藏。雖有倒換之令。然收受艱難。終廢不行也。成化中。南京鎮守言鈔法圯不行。遣御史鄭瑄往按之。衆以謂非起大徵申著令。法不可得行也。瑄念著令已峻。非法意往獨捕一二市豪以獻。曰。市人聞令下。皆震懼。今鈔法通矣。事遂已。今天下自京師達四方。無慮用白銀寶。



源局所鑄通寶錢與土代錢乃間行。國家經賦亦  
惟獨收花文銀。匪直事習民安已也。五金惟黃金爲  
上。幣物至精不變。白金次之。赤金又次之。故幣有三  
品。乃物理之自然。豈智計哉。今釋金錢不用而欲以  
絁穰工墨之力。善昏爛不可復之物爲上幣。以權金  
錢。固宜其不能行也。近議者欲以銀爲上幣。鈔爲中  
幣。錢爲下幣。鈔若錢以上幣。權之。每銀一分直錢十  
文。鈔新製者。貫直錢土文。中折者直三。昏爛直一。甚  
者以鹽法阻壞。欲更重鈔法。幾以盡餘鹽之利。而重  
鈔必峻刑。且逆自然之理。而鈔終不可得重。久必折



開始之直千錢者終至於不直一文而止也。鈔既折閱而昏爛卽當更造乃設官置局諸工墨費顧鉅浩不訾於利權何當哉。故夫申三品泉布之法弛用銀之禁制其操柄毋愛銅惜工以爲天下先豈非因自然之理順勢乘便而道之所符哉。萬曆初。

上從科臣議行天下省直一體開局鼓鑄與在所舊錢兼行務便民毋擾且嚴私鑄之禁降錢式每錢一百文重拾有叁兩每文重錢有叁分必輪郭周正字文明潔以銅質厚卽易爲全美也。蓋倣古不愛銅惜工之意使私鑄者無利不禁而自止諸省故行錢地未



論卽素非行錢地。亦鼓舞稱便。以鑄白金而用之。易耗而難復。銷白金而行之。易淆而難精。固不如錢行之爲便也。方開鑄。初許借官帑銀。於州縣收買黃銅鼓鑄。其紅銅焊點成黃而用之。而吏責民輸銅。銷器毀成。不盡給其直。責銅急而銅價騰躍。非產銅地苦之尤甚。則是未得錢之利而已。被銅之害也。弊一及。旣開局工作之費。物料之需。諸翻砂看火提鑪之人。剝眼穿條薰色之匠。與夫焊銅質成錢模之工。又多費而不訾。然可諉曰。不愛銅而惜工。比錢始流。民樂奉令。則銅已告乏。鼓鑄不給。而錢曾莫之繼也。是患



不在於錢之不行。而在於錢之不繼。不在於錢之不繼。而在於銅之不廣。銅不廣。錢不繼。而欲其如流泉焉。行地而不窮者否也。弊二。無何而私錢盛行。濫惡滿市。耳目眩瞀。而民無所措手足矣。夫是低錢也。質輕銅假。字文磨糊。乃民間私鑄。非前代若我

朝制錢也。而私鑄之法。明峻而不申聽。其兼使收買之科。偷悞而不立重。以畱難。則是不患於真錢之不行。而患於僞錢之錯行。僞錢錯行。而欲真錢通行而不壅者否也。弊三。及既行使。諸解京貢賦之入。固必精良白金而可矣。即藩省祿給。存畱鹽稅薪俸工食。



之類。又輒以錢不便行而不收。所爲張示告誥。責之必行。罪其不行者。非先之賣菜之傭。則責之荷擔之子也。雖設行鋪。名爲倒換。實恣留難。見錢之出。而不見其入。則是壅抑之於上。而責其必行於下。勒收受於彼。而不開倒換於此也。而誰與行之。民愚相扇。閉匿觀望。而姦豪右族。依托城社者。又從而簧鼓之。以濟其不便之私。一日而下令。三日而閉匿。不三四日而中沮矣。夫錢寶於金。利於刀。而取法於泉。泉者。來有源而流不竭者也。語曰。卽山鑄銅。誠原本初議。於國家產銅之處。開局鼓鑄。特設風憲。大臣監督之。以開



其源而灌輸之各省。各省具如今部司議。省府縣諸課程之征。贖之鍰。舉錢之收受。上而朝廷資于之。典宗室之祿。百官之俸。皆準銀錢兼收。又立行戶。令以自金倒換而稱提之。則歛於上。而復散於下。收於此。而提引之於彼。如泉之赴壑。轉注而不窮。而又嚴低錢行使之禁。峻防之。廢銅收之入于官。而諸用銀貝之地。遵

詔書。自從其故。而不強其所不便。庶四弊去而錢法其有行乎。抑未也。錢幣雖通。要務民於農桑爲其本。

古者盛時。山澤之利。舉捐以予民。設官司。掌平秩之



令。而周禮無鹽官。豈鹽醴出涉海。冬官司空佐王富  
邦國屬之。與今不可考矣。而天官鹽人掌鹽之政令。  
獨其祭祀賓客膳羞之鹽。以爲天官屬。非利之也。降  
而伯世。齊桓公問管仲。何以爲國。管子曰。海王之國。  
謹正其鹽筴。十口之家。十人食鹽。百口之家。百人食  
鹽。萬乘之國。終月率男女之所食。下萬鍾。偶筴之商。  
月人三十錢。萬乘之國。爲錢三千萬。使君施令。計其  
鍾釜而給之。則百倍歸於上。人無以避。今鐵官之數。  
曰。一文必有一鍼。一刀。若其事立。耕者必有一耒。一  
耜。一鉋。若其事立。行商服賈。連輶輦者。必有一斤。一



雖一鑿若其事立不爾而成事者天下無有。今鍼之重加三十鍼。一人之籍也。刀之重加大五六三十五刀。一人之籍也。耜鐵之重加七。三耜之鐵一人之籍也。餘輕重准此。則舉臂勝事無不服籍者。此王資也。於是齊有渠展之鹽。乃代芻薪煮海水爲鹽。征而積之。十月始征。至于正月成萬鍾。乃下令曰。孟春既至。農事且起。大夫無興工作。北海之衆無聚庸而煮鹽。如此則坐長十倍。梁趙宋衛濮陽盡饋食之國。無鹽則病。而守圉之國用鹽獨甚。使糴之得成金萬斤。其論鐵以爲斷山木。鼓山鐵。發徒隸而作之。則逃亾而



不守。發民則下疾怨。而內敗。故善者與民量其重。計其贏。民得其十。君得其三。又雜之以輕重。守之以高下。則民疾作爲上。使故鹽鐵立而齊以富強。漢承秦法。鹽鐵之利。二十倍於古。而元符中。天子用兵四夷。兵連不解。縣官大空。於是東郭咸陽孔僅言。山海天地之藏。宜皆屬少府。陛下不私屬大農。以佐賦而浮食奇民。欲擅管山海之貨。致富羨。役利細民。其沮事之議。不可勝聽。宜置鹽鐵官。募民因官器作。鬻鹽官爲牢盆。敢私鬻鹽者。鈇右趾。沒其器物。其郡國不出鐵者。署小鐵官。即故鐵鑄之使。僅咸陽乘傳舉行之。



已博士徐偃行風俗。令膠東魯國民得鼓鑄鹽鐵。還徙爲太常丞。御史大夫湯劾偃矯制害法。偃以誅。故法必用而行。昭帝時。賢良文學對策。言民苦鹽鐵。均輸而桑弘羊反覆難。以爲往者豪強之家。得管山海之利。鼓鑄煮鹽。家聚或乃至千餘人。大抵盡流放之人也。去鄉里。棄墳墓。依倚大家相與聚。深山窮澤之中。成姦僞之業。大不便。夫家人有寶器。然且押而藏之。况天地之四海乎。先帝收鹽鐵之利。佐百姓之急。奉軍旅之費。此所爲制四夷安邊足用之本。不可廢也。異時鹽鐵。未籠布衣有胸。邴人君有吳王。專其



饒以成私威。而逆節萌作。今從縱人於權。利罷鹽鐵。以資強暴。強禦日以不制。姦形成矣。賢良文學。引古義爭。以爲往民得占租鼓鑄煮鹽。時鹽與五穀同價。鐵器和利。而中用鐵。工父子戮力鼓鑄爲善器。農事急。輓運行阡陌間。民得以財貨五穀相與爲市。或新弊相易。或時有貴賤。各得其所欲。今官總其原。一其賈。器多堅礮。善惡無擇。又多爲大器。不適於民用。割草不痛。吏數不在。則器難得。家人不能多儲。不給於用。則棄膏腴之田。而遠市田器。又鹽價益貴。貧民有木耕手耨。而淡食以從務者矣。又鐵冶之處。大抵皆



依山川近鐵炭。其勢咸遠而作劇。郡中卒踐更者多不堪。責取庸代。縣邑或以戶口賦鐵。而賤其直。良家以道次發。僦運爲煩費。鐵官賈器不售。或頗賦與民。卒徒作不中程時。命民助之。發徵無限。更繇以劇。爲百姓所患苦。言甚痛而爲弘羊所細。鹽鐵持不罷。弘羊誅乃罷。尋復置。已罷行無常。其後設官置冶鼓鑄。鐵利無幾。不設獨鹽禁。乃遂與古今相終始矣。建安初。關中百姓遭董卓之亂。流入荆襄者十餘萬家。聞本土安寧。皆企踵思歸。而無以自榮。於是衛覬議以爲鹽者國家大寶。以罷亂放散。宜如舊。置使者領之。



益市犂牛。百姓自歸者畢給之。勸耕積粟。以豐殖關內。計之大者也。魏武如其言而流人盡還。境內豐實。元魏時。御史中尉甄琛言。周禮山林川澤有虞衡之官。爲之厲禁。令取之以時。毋戕賊使失性而已。未有爲民父母。富有群生。吝其鹽鹽而權之者也。今立官障護鹽池而收其利。爲父權子。豈不痛哉。宜弛其禁。與民庶共。而彭城王元勰言。聖王歛山海之貨。以寬田疇之賦。收關市之稅。以助自一之征。取彼與此。所以資天地之產。惠天地之民。非爲身也。鹽池之禁。爲日已久。而積散之。佐軍國之用。寬農民之急。如舊便。



明帝從琛議罷禁而豪舉爭擅之。於是尋復置。唐初稍弛其禁。開元中。拾遺劉彤具表言。臣聞漢武之世外討戎夷。內興工役。費十倍於今。而用沛其有餘者。何也。古取之山澤。公利厚而人歸於農。今取諸貧人公利薄。而人去其業也。故先王之法。山澤有職。虞衡有官。輕重歛發有術。故能使人專於農。而用饒於國。今誠役農餘之人。收山海之利。而寬徭薄歛。息窮苦之眦。所謂損有餘而益不足。帝王之道也。於是詔將作大匠。姜師度與諸道按察使。簡括海內鹽鐵之課。而鹽池十八井六百四十。及幽州大同橫野軍諸鹽。



屯皆隸於度支。

蒲州安邑解縣有池五。總曰兩池。歲得鹽萬斛。供京師。鹽州五原有烏池。

自池瓦池細項池靈州有溫泉池兩井池長尾池五泉池紅朶池回樂池弘靜池會州有河池三州皆輸米以代鹽。安北都護府有胡落。歲得鹽萬四千斛。給振武天德。黔州有井四十一。成州。隴州井各一。果閭開通井百二十三。山南西院領之。邛眉嘉有井十三。劍南西川院領之。梓遂綿合昌渝瀘資營陵簡有井四百六十一。劍南東川院領之。皆隨月督課。幽州大同橫野軍有鹽屯。每屯有丁有兵。歲得鹽二千八百斛。下者千五百斛。貢海州。歲免租。為鹽二萬斛。以輸司農。青楚滄海棣杭蘇等州以鹽價市輕貨。輸司農。

乾元初。鹽鐵使第五琦初變鹽法。就山海井近利之

地。置鹽院。籍游民。崇鹽者為亭戶。免雜徭。煮鹽盜鬻

者。論罪已盡。權天下鹽。建中初。軍國用大困。賦稅不

足以供億。自許鄭之西。皆食海西鹽。度支主之。汴蔡



之東皆食海東鹽。劉晏主之。於是晏上監法輕重之  
宜。以爲官多則民擾。宜但於出監之鄉。因舊監爲置  
吏。置亭戶收監。轉鬻於商。任其所之。其去監鄉遠者。  
轉官監於所在貯之。商絕監貴則減價以糶。曰常平  
監。官獲其利而民不知貴。又以監生於霖潦則鹵薄。  
生旱暵則土溜墳。隨時爲令。倣古勸農法。遣使者巡  
視曉導。而諸道故有權監錢。商舟所過。復有稅錢。晏  
悉奏罷之。商民均利。晏始至。監利歲裁四十萬緡。至  
大曆末。至六百餘萬緡。居天下賦稅之半。國用仰給。  
其後繼者。爭尅急而監鐵。使李錡盛貢獻以固寵。朝



廷大臣皆厚賂。利積於私室。而國用益耗屈矣。憲宗之計淮西也。度支使皇甫鏞請益川劔山南西道鹽估以佐興峻盜鬻之罰。罪至死。穆宗時戶部侍郎張平叔議權鹽鮮利。請官自賣鹽以富國。下公卿議。兵部侍郎韓愈條析其不便。曰。平叔請令州縣差人自糶官鹽。獲倍利以上。臣計今所在百姓富少貧多。除城郭外。有見錢糶鹽者。十無二三。多用雜物及米穀貿易。監商規利。無物不取。或從賒升斗。俟時熟填還。用此濟彼。兩利俱便。今吏自糶。不得見錢。恐失陷官物。必不敢糶。百姓貧者。無從得鹽而食矣。求利未得。



歛怨已多。恐坐失常課也。平叔又請鄉村去州縣遠者。令所繇將監就糴糶。毋令闕監。臣以爲鄉村遠者。或三家五家。山居谷處。而人吏將監家至戶到。多將則糴買不盡。少則得錢無幾。商人自負斗擔與百姓賈平價而上。不過剩得一二錢而足。所繇依官。必索供應。所利至少。爲弊至多。平叔又言所在及農隙時。召車牛搬鹽輸都倉。毋闕者。州縣和雇車牛。必須差配。無情願者。而百姓將車詣官。勢必齊集。始得載鹽。院監請受。又須輪次。實爲畱難。輸納之時。人事又別。百凡和顧。其弊皆然。故百姓寧爲私家載物取錢五



文不爲官家載物取十文錢也。不和顧則鹽無從載。和顧則害及蒸黎。此殆不可。平叔又言。今百姓貧虛。舉債逋稅。顆粒無餘。若官自糶鹽。一家五口。食鹽率不過十錢。隨日而輸。必且無舉債逃亡之患。臣以爲百姓困弊。所繇多端。不皆爲鹽。以平叔所約計之。賤於舊時。日較一錢。月較僅三十錢。五口之家。爲利幾何。豈此便能免舉債逋稅之患。殆非事實。臣以爲百姓困弊。惟不以事擾之。自然漸復。不在變法也。平叔又言。長吏有不親公事。聽所繇浮辭云。當界無人糶鹽。請差清強巡察官。簡責所在實戶。據口團保。給一



年鹽令四季輸納其口多糴少及鹽價遲者觀察使而下罪貶有差平叔本請官自糴鹽以寬百姓令其蘇息而乃令責實戶口團保給鹽所謂擾而困之非前意也百姓貧家食鹽至少或有淡食動經旬月若計日給鹽依時徵價辦與不辦並湏納錢卽欲淡食度生亦且不得遲違條件罪譴嚴峻官吏畏罪必加淫刑臣恐百姓流亡轉死此又不可之大者也至限商人鹽納官後不許於諸軍諸使覓職掌把錢提店看守莊礎以求影庇而富商大賈或行財賄邀截誼訴者嚴加緝獲令所在決殺臣以爲鹽商納權爲官



糶鹽子父相承。坐受厚利。比諸百姓。實則較優。今奪其常業。又禁其爲生。不知何罪。窮蹙至此。若果行此。驚動遠近。富商大賈。收重寶入反側之地矣。且夫宰相者。所以臨察百司。考殿最者也。而以爲事體至重。須宰相克使。刺史縣令。職在分憂。不問治行。而獨以鹽利多少。升黜之。皆大不便。事得寢。而前此立蠶鹽食鹽等名色。分五等戶。崇俵散抑配之矣。宋興藝祖知百姓疾苦。五代之政。詔書屢下。弛鹽禁於河北。實鹽價於海濱。諸顆鹽末鹽鹽鹽。畢聽州縣給賣。歲課所入。申尙書省。而轉運使操其贏。佐一路之費。而峻



開入煮鹺若蠶鹽入城市之禁

縣兩池以戶民爲畦

夫馬蠲其他役每歲自三月一日墾時四月始種八月乃罷宮稟給之安邑池每戶歲種鹽千席解池減二十席募兵百人目爲護寶都以巡邏之以給本州及三京東京之齊兗曹濮單鄆州廣濟軍京西之滑鄭陳潁汝許孟州陝西之河中府陝虢州慶成軍河東之晉絳慈隰州淮南之宿臺州河北之懷州及檀州諸縣之在河南者未鹽煮海則楚州鹽城監歲煮四十一萬七千餘石通州豐利監四十八萬九千餘石泰州海陵監如臯倉小海塲六十五萬六千餘石給本州及淮南之廬和舒蘄黃州無爲軍江南之北寧州宜洪袁吉筠江池太平饒信歙撫州湖廣德臨江軍兩浙之常潤湖睦州荆之江陵府安復潭鼎鄂岳衡木州漢陽軍海州板滿惠澤潞要三塲歲煮四十七萬七千餘石漣水軍口海塲十一萬五千餘石以給本州軍及京東之徐州淮南之光壽濠泗州兩浙之杭蘇湖常潤州江陰軍密州濤洛塲歲煮三萬二千餘石以給本州及沂濰州杭州塲歲煮七萬七千餘石明州昌國東四監三十萬一千餘石秀州塲



二十萬八千餘石、温州天富南北監、密纓永嘉二場  
七萬四千餘石、台州黃巖監、一萬五千餘石、以給本  
州及越處衢婺州福州長清場、歲煮五百一萬五千  
斤、以給福建路、廣州東莞靜安等十三場、歲煮二萬  
四千餘石、以給本州及封康英韶端潮連賀恩新惠  
梅循南雄州兩路之昭桂州江南之南安軍廉州白  
石石康二場、歲煮一百五十萬斤、以給本州及容化  
蒙龔藤象宜忻邕潯貴濱梧橫南儀鬱林州及高竇  
春雷融瓊羣萬安州各煮、以給本州無定額、犬率煮  
海有亭戶鹽丁、鬻於官、或折租稅、亦有役軍士定課  
煮者、又有濱州塲、歲煮二萬一千餘石、以給本州及  
隸勅州雜支并京東之青淄齊州煮井者、益州路則  
陵井監及二十八井、歲煮一百十四萬五千餘斤、綿  
州二十四萬餘斤、邛州九井二百五十萬斤、眉州一  
井一萬餘斤、簡州十九井二千七萬斤、嘉州十五井  
五萬九千餘斤、雅州一井一千六百餘斤、漢州一井  
五百餘斤、梓州路則梓州一百四十八井三百六十  
六萬餘斤、資州九十四井六十四萬二千餘斤、遂州  
三十五井四十一萬六千餘斤、果州四十三井十四  
萬六千餘斤、曾州三十八井二十二萬九千餘斤、昌



州入井四萬餘斤瀘州涪井監及五井七十八萬三千餘斤富順監二十四井一百一十七萬三千餘斤利州路則閬州一百二十九井六十一萬餘斤夔州路則夔州永安監十一萬七千餘斤忠州五井五十一萬三千餘斤達州三井十九萬餘斤萬州五井二十萬九千餘斤黔州四井二十六萬七千斤開州一井二十萬四千斤雲安軍雲安監及一井八十一萬四千餘斤大寧監一井一百九十五萬餘斤以各給本路監則官掌井則聽民幹鬻如數輸課聽往旁境販賣唯不得出用峽煮鹵者并州永利監歲煮十二萬五千餘石以給本州及忻代石風憲遼澤潞麟府州威勝寄嵐夾山平定寧化保德軍許商人販賣如川峽之制凡顆末鹽皆以五斤爲斗顆鹽賣價每斤自四十四至三十四錢有三等末鹽賣價每斤自四十七至八錢有二十五等至道末賣顆鹽錢七十二萬八千餘貫末鹽二百六十三萬三千餘貫凡禁權之地官立標識候望以曉民其顆鹽通商之地京西則蔡襄鄧隨唐金房均郾州光化信陽軍陝西則京北鳳翔府同華耀乾商涇原邠寧儀渭鄜坊丹延環慶秦隴鳳階成州保安鎮戎軍及澶州諸縣之在河北



者。未鹽通商之地。京東則登萊州。河北則大名真定府。貝冀相衛。荆洛深趙。滄磁德博。棣祁定保。瀛莫雄。霸州德清。通利永靜乾寧定。遠保定廣信安肅永定軍。末鹽出於海。役竈戶烹

熬煎煉而鹽成。諸近海皆然。周官所謂散鹽也。顆鹽出於池。惟解州有之。疏畦墾決水其中。得南風水化而鹽熟。歲多霖雨。風不南則課虧。周官所謂鹽鹽也。雍熙中。李文靖沆爲真州發運。諸漕運轉輸至者。空船回。聽載鹽散之江浙湖廣諸路。於是諸路鹽溢溢。運舟利而民力寬。公私兼利。咸平中。度支使梁鼎言。陝西沿邊食解鹽。請勿通商。官自鬻。於爲利數倍。判官許士衡爭之。不能得。詔以鼎爲制置使。而命內殿。



崇班杜承睿副之。承睿行閱視爲帝言。往鄜延環慶儀渭等州。禁青鹽。令商人入芻粟。運解鹽於邊。其直於青鹽不遠。是以民安於法。而蕃部青鹽欲售無從也。今官運解鹽。欲與內地同價。邊民必冒法罔入蕃界。販青鹽以徼利。而居者亦樂其價廉。與之爲市。是助寇盜而結民怨也。鼎以煩擾不售。得譴罷。祥符中。轉運使張象中言。解州兩池所貯鹽。計直二千一百餘萬貫。度尚有遺利。宜可增。帝憮然曰。地利阜矣。過求羨。將有時而闕。抑不許。而官鹽闌入私鬻。法已重。詔屢優寬。至是。敕犯止配流。先是。官鬻鹽而三京二



十八州軍。咸困於輦輸。淮南自通泰。楚運真州。行江浙荆湖。而綱吏舟卒。雜沙土鹽惡不可食。吏卒坐鞭笞。徒配相繼。而終莫能止。陝兩池及淮南積鹽多無屋貯。獨露積至生。合抱木其上。而數莫可較。天聖中翰林學士盛度。御史中丞王隨。畫通商五利以上。略言方禁商時。伐木造船。兵民輦運。不勝其疲勞。一通商其弊悉去。一利也。陸運既差。帖頭又役車戶。貧人懼役連歲逋逃。今悉罷。逋逃隨復。二利也。船運有沉溺之患。綱吏侵盜。雜以泥沙硝石。其味苦惡。民食之生重腿之疾。今得食真鹽。三利也。錢幣國之大用。欲



使通流富家多藏錢不出民用益蹙今商人歲出緡  
錢賣鹽裨助經費四利也又歲省鹽官兵卒畦夫傭  
作之給利不可較矣於是詔罷官自鬻聽人入金錢  
京師權貨務而以江淮若兩池鹽給之一歲中增課  
十五萬故貨待商而通世未有官與民爲市而民不  
受其害者也其後西師起募商人輸芻粟塞下增其  
直予券趨京師權貨務受錢已又置折中倉聽商人  
以金銀若輸粟輸他貨於京師入中者優其直予券  
以在所鹽給償繇是羽毛筋角膠漆木石鐵炭之類  
畢入中而猾商貪吏表裏爲姦至入椽木二估錢千



而費給償鹽不可勝計也。後世召商中鹽始於此。自開寶來。河北鹽聽商貿易收其筭。上封者請禁權以收遺利。諫官余靖言。臣嘗痛燕薊之地。陷入契丹。幾百年而民無南顧心者。大率契丹之法簡易。鹽麴俱賤。科役不煩。故也。昔太祖推恩河朔。故許通商。今權之價必騰躍。民懷怨懟。悔將何及。議遂寢。慶曆中。三司使王拱辰復請權。令具未下。學士張方平入見曰。外間籍籍言河北再榷鹽何也。帝貽愕曰。今始榷耳。何謂再。方平曰。昔周世宗重鹽禁。犯輒處死。後北伐契丹。河北父老遮道泣訴。願以鹽課均兩稅。中輸錢



而弛禁。世宗惻然許之。制兩稅鹽錢是也。今兩稅鹽如故而鹽禁復行。非再權而何。且未權時。契丹常以青鹽闌入邊盜賣。今權之。卽鹽貴而虜鹽必益售。是爲我歛怨而獨以爲虜利也。禁之則邊隙必自此開矣。帝悟。立手詔罷行。河朔父老得詔皆感泣。勒石置北京城南。集僧道禱祠報上恩。會河決運艱。增江淮兩浙荆湖六路五十一州軍糴鹽直。斤五錢。兩浙轉運使沈立。李肅之上言。本路鹽課緡錢。歲增七十九萬。而嘉祐三年。纔及五十三萬。乃一歲中。私販坐罪者至三千餘人。弊在於官估高而私販轉熾也。然國



課爲益虧。誠優恤亭戶。使不至困窮。休息漕卒。使有以爲生。防制倉場官吏。使不爲掊歛。如是而裁官估。罷鹽綱。令舖戶衙前。得詣場取鹽。則鹽善而賈平。人不肯冒禁私售。官課必滋益矣。因集鹽策二十卷。以進。其言亭戶困乏尤甚。帝嘉納然。自皇祐來。屢下詔。給亭戶官本。皆以實錢。其額外鹽。給粟帛。歲逋久不能輸者蠲之。諸所爲存恤者甚厚。而有司莫行。時運鹽既雜惡。官估復高。百姓利食私鹽。而並海民以魚鹽爲榮。工用省而利厚。繇是盜販者衆。捕急則聚爲盜。虔汀州不產鹽。民多盜販。廣南鹽以射利。歲秋冬。



田事畢。恒萃數十百爲群。行剽爲盜賊。捕不能得。則赦其罪。招之浸淫。滋多。制置使蔡挺令民自首。納私藏兵械。給巡捕吏卒。又損糶價。盜以浸減。而歲課視舊額倍增。熙寧中。抗秀溫。台明五州私販衆熾。議者欲損鹽價。以與民相安。石以爲獨宜制置亭戶。及嚴督私販。察拌和。而鹽法自舉。毋事改制。於是命盧秉專提舉鹽事。部十竈爲甲。而鬻鹽地亦什伍其民。以相譏。又峻盜販者罪。雖止杖決。輒科同妻子遷五百里。又益兵防捕之時。杭越湖三州格其法不行。劾虧課逮治。安石爲帝言。捕鹽法急。所謂刑以止刑也。而



乘催償鹽益急。有母無聊。至殺其子者。所配流至萬二千餘人。詔劾乘罪狀。以安石庇而免。以增課轉資。當是時。天下鹽皆官權。而自鬻倣桑弘羊遺智。名一利權。而知滄州趙瞻在河北。章惇郊亶在湖南。蹇周輔張士澄在江淮。皆峻剥民。增額課用顯。元祐初。坐培克謾誕。並落職。紹聖中。諸言利峻法之臣復用。而三司使章惇言。河北與陝西皆邊。而河北鹽獨無權。乃祖宗一時誤恩。請遣使案視。尚書蘇軾議以爲陝西之鹽。與京東河北不同。解池廣袤不過數十里。既不可捐以予民。而官亦易以籠取。青鹽至自虜中。有



可禁止之道。故法行。然猶城門之外。公食青鹽。自若也。今東北循海皆鹽。欲籠而取之。其爲弊與淮南兩浙無異矣。臣在餘杭時。見兩浙民以鹽得罪者。歲至萬七千人。而姦莫能勝。盜販者以兵仗護送。率數百人爲輩。吏士不敢近。其山谷之民。貧懦者。節口弁日有數月而淡食者矣。今東北之人。悍於淮浙。平居椎剽之姦。常甲他路。而一旦權鹽。此其禍未易涯也。繇此言之。祖宗以來。獨不權河北鹽。適事之宜。何名誤恩哉。且權鹽雖有故事。要爲非王政也。陝西淮浙。旣未能罷。又欲使京東河北效之。此猶患風痺。人曰。吾



左臂病矣。右臂何爲。獨完而劇以酒色伐之可乎。議不用而權鹽遂爲河北患。已蔡京廢轉般倉之法。欲囊括四方錢。盡入中都。以爲羨。乃置諸路提舉官。令商人先赴場輸錢請引。赴產鹽郡受鹽。先至者增支以示勸。而請鹽者少。乃申扇搖之合嚴。避免沮壞之。誅李輒比較。務峻督。以取盈。於是東南鹽利特厚。禁罔益酷。被罪者滋衆。而西北解池。天產美利。與糞壤俱積矣。京爲法大都。常使見行之法。速售以罔民。法纔通輒復更其制。未受鹽者更予鈔。鈔未給更爲貼輸錢。又數十日輒復變其無貲更鈔輸錢者。前數十



萬券。一夕盡棄。有朝爲豪商。夕爲流丐。至赴水投繯而死者。而省大胥魏伯芻特見信。遷秩至通議大夫。徽猷閣待制矣。伯芻非有心計。惟私與交。引戶關通。凡商筭率剋留十之四。充羨貢。張虛數以惑人主。而京遂白帝言。朝廷所以開闢利權。馳走商賈。不煩號令。而億萬之錢輻輳並進。御府湏索。百司支費。歲用外沛然而有餘。則政和立法。頓絕弊源。公私兼利之明效也。乞宣付史館。以示富國裕民之政。制曰可。自唐始榷鹽。舉天下鹽利。歲纔四十萬緡。至大曆增六百餘萬緡。而宋元祐間。淮鹽與解池等鹽。歲四百萬



緡比唐世天下之賦已三之二。紹興末。泰州海寧一  
鹽支鹽三十餘萬席。爲錢六七百萬緡。則一州之數。  
過唐舉天下征權之數也。伊欲民安利而商阜通。何  
可得哉。國朝以鹽課給邊糧饗。而水旱凶荒亦時  
籍以振民。故天下筦權之利莫如鹽。制產鹽之地。設  
都轉運使司者六。兩浙兩淮福建山東河東長蘆鹽課提舉司者七。  
鹽東海北四川雲南黑鹽井口鹽井安寧鹽井五井而兩淮課三百萬。  
至與漕運米直等。次浙次長蘆次福建廣。又次河東。  
其歲辦有額課。歲終轉運若提舉司具所辦出給課  
如目上以待會。虧額者追理。其商販各照上所定行。



鹽地轉賣毋過界。合用引目。各運司以時請戶部。請內府印造給付。而諸所開中鹽量所在。米價高下。道里遠近。險易爲之則。召商納粟中。已給引詣場行支鹽如目。而嚴額外夾帶貨賣之誅。鹽出場。經批驗所依數驗掣。而所過官司辨驗放行。其引與鹽離者。同私鹽追斷。商所中者。鹽賣發已。卽所在退引還官。運司類進。僞造引者。斬而峻勢要。令家僕行商中鹽。及坐私鹽船隻之令。其竈丁。勘實以附近有丁產殷實人撥充。優雜泛繇。其犯笞杖斷決徒流遷徙。其刑罪止杖一百。仍煎鹽。諸法令詳具。而兩浙淮河兩歲遭



御史巡行提督之。又往往出風憲重臣。奉詔行天下

鹽以爲常。福建場以行無遠地。無鹽院。河東場以出

有專所。無運司。乃廣東兼之。僅置提舉司云。兩浙都轉鹽使

司一總分司四。嘉興 松江 寧紹 溫台其鹽

課司三十六其額辦歲課鹽二十二萬四千五十七

引二百斤有奇。兩淮都轉運使司分司三。泰州

淮安。通州其鹽課司三十其額辦歲課鹽三十

五萬二千五百七十六引一百斤有奇。福建都轉

運鹽使司一其鹽課司七其額辦歲課鹽一十萬四

千五百七十二引三百斤有奇。山東都轉運鹽使

司分司二。膠萊 濱洛其鹽課司十九其額辦歲

課鹽一十四萬三千三百八十七引一百五十斤

河東都轉運使司其鹽課司三其額辦歲課鹽六

千八百萬斤。長蘆都轉運使司分司二。青州

滄州其鹽課司二十三其額辦歲課鹽一十八萬八

百七引一百八十斤有奇。廣東鹽課提舉司其鹽

課司一。四其額辦歲課鹽四萬六千八百五十五引



一百斤有奇。○海北鹽課提舉司鹽課司十五其額辦歲課鹽二萬七千四十引二百斤零。○陝西鹽課

司二。○四川鹽課提舉司十五其額辦歲鹽課一百九十一萬九千五百七十斤有奇。○雲南鹽課提舉

司十六其額辦歲課鹽二十七萬二千一百三十七斤有奇又折綿布七百二十段後各改辦小引鹽准

廣東鹽運司如舊他增額至諭倍其山東鹽運司鹽所行地分濟南青州兗州東昌萊州

東平開封登州徐州邳州宿州○兩浙鹽運司鹽所行地分杭州紹興寧波台州

溫州蘇州衢州處州徽州嘉興湖州松江嚴州常州鎮江廣信金華廣德

○兩淮鹽運司鹽所行地分應天寧國太平楊州鳳陽廬州安慶池州淮安和州

南昌九江南康建昌贛州南安臨江撫州吉安袁州瑞州饒州武昌黃州

沔陽岳州夷陵荊州常德長沙澧州沅州衡州德安辰州安陸靖州襄陽

寶慶○廣東鹽課提舉司鹽行地分廣州肇慶惠州韶州南雄潮州德慶○海北鹽課提



舉司鹽行地分雷州 高州 廉州 鬱林 河州

○長蘆鹽運使司鹽所行地分順天 眞定 保定

順德 廣平 大名 永平 河間 隆慶 保安

彰德 衛輝 ○河東鹽運司鹽行地分西安 漢中

延安 鳳翔 懷慶 河南 汝寧 南

陽 平陽 潞州 澤州 沁州 遼州 洪武中鹽

運使呂本言舊額鹽輸官以四百斤爲一引官給工

本米一石又準米價低昂聽錢鈔兼支以資竈民然

其間有丁產少而鹽額多者未覈非均也臣謹與各

道分司即鹽場所屬地方驗丁產多寡地利有無官

田草蕩除額免科外他薪鹵所宜得量等分則較一

詳定而均平之便詔曰可宣德中施大惠於天下令

各運司提舉司查中鹽商若土民年遠事故無子孫



支給者行原籍官司每引給資本鈔二十錠優之蓋  
隱恤至於此而申中使官軍夾帶私鹽之誅正統初  
令竈丁逃移者鹽課司覈實停其徵又令淮浙貧竈  
有餘鹽官給米麥收之一小引給米麥二斗已給二石而客商守支  
年深不得鹽者聽以十分爲率支淮鹽四分其六兌  
於山東運司支給不願兌者聽守支而長蘆鹽運司  
商所分地不便貿易者聽於所在官司告驗給文憑  
改易諸爲通商計甚悉已弊孔乃稍稍日滋弘治初  
戶部言鹽法阻壞勅刑侍郎彭韶行兩淮清理韶念  
治安長利之道在厚下固本也具疏言天下小民無



慮皆窮苦而莫甚於竈戶。竈戶者。上所使煮海爲鹽。收博利者也。所當恤宜莫如之矣。臣行視海濱。目擊其苦。爲之涕下。破屋缺椽。不蔽風雨。脫粟糲飯。不得一飽。此居食之苦也。山蕩渺漫。人偷物踐。欲守無人。不守無薪。此積薪之苦也。曬淋之時。舉家登場。刮泥吸海。隆寒砭骨。亦必爲之。此淋漚之苦也。煎煮燒灼。蓬頭垢面。人形盡變。酷暑如湯。不敢暫離。此煮辦之苦也。寒暑陰晴。日有程課。煎辦不前。鞭撻隨至。此徵鹽之苦也。客商至場。無鹽抵償。備極逼辱。舉家憂惶。此賠鹽之苦也。逃亾則身口颯。不任茶則家計蕩盡。



所宜加意矜念。遇事寬恤。因爲繪煮海窮民。曬淋熬煎。貧戴折閱。若朋儕之苦。景物事情。爲圖詩以上。而章祭酒懋。覩鹽事利弊。代都御史具疏其五端。一曰存恤竈戶。以爲鹽之出產在地。而成用必資於人。濱海之民。以煎鹽爲業。採辦薪芻。朝夕烹煉。爲苦甚矣。其單丁老弱之家。煎辦不前。課入不敷。吏又以嚴刑峻督之。至鹽入官。雨水銷敗。又輒有追賠之患。此窮戶之尤可隱者也。其殷實戶。爲總催者。場蕩歸其兼并。鹽課爲其乾沒。煎煮旣多。私賣尤廣。凡諸竈丁。盡其家傭。分業蕩然。乞貸爲活。雖欲無逃。不可得已。合



行優恤。且照黃冊事例。遇竈戶缺。聽令析戶充役。照  
 丁辦課。以補竈籍逃絕之數。二曰輕減鹽糧。國初  
 命鹽司以掣下餘鹽。行諸縣關領。計口分給。民得鹽  
 以食。而納鈔以償。固其理也。後鹽司以無餘鹽。關給  
 而鹽鈔改爲鹽糧。市民猶得納鈔。至鄉民往往令輸  
 本色。或遠糴於外郡。費且十倍。爲困甚矣。乞依市民  
 例一體納鈔便。三曰申禁鹽窩。國家以邊地險遠。餉  
 餼乏而飛輓勞費也。乃命商輸粟邊倉。給引鹽以償  
 其費。商人喜得厚利。競赴之。而邊饒近。遇開中。則豪  
 勢家詭名請托。占窩轉賣。商人不藉手於彼。卽無繇



申納於此故費多而申鹽者日少。先朝雖有禁例而法玩不行。乞申嚴前例。有犯必誅。庶人知所警。其四五言鹽商挾私。鹽徒橫放之弊。以爲商受鹽於官有額也。於正數外。賄求場官。私加斤數以益之。至有得以倍蓰者矣。已運入江。又買私鹽而夾帶行之。所過關津。賂其吏。不照引截角。其截者十止一二。發賣訖。引不卽繳。往復數四。以前引影射而行。故私鹽行而正鹽愈壅。請勅巡鹽憲臣。嚴商人私載之禁。違者沒其貲。關津有容。令引不截角。及舊引影射。不舉覺者。罪如法。乃其間游手無賴之徒。什伍爲群。駕小



舟舟多置篙楫。載私鹽沿江上下而強賈之。卽不售。輒挺取其財。又伺間爲椎劫。已跳身疾掉。瞬息相失。不復可迹。失今不治。恐生他變。唐末之王仙芝黃巢。元末之張士誠。皆鹽徒。此尤宜深防者也。而其責在巡江時。

天子加意於國家盈縮之變。召閣學士計屯田茶馬之故。其悉已及鹽。大學士東陽言。主臣今鹽法壞盡矣。各邊名召商開中。而商實失利。類不肯中納。

上問何也。閣學士因極言皇親王府及內臣奏討之弊。上曰。奏討不過幾家。東陽對曰。奏討之內。又有夾帶。



討者。夾帶者十復有各年未盡支曰零鹽有剩堆積曰所鹽皆爲奏討後事端。因言。國初茶馬法行。有歐陽駙馬者爲夾販。

高祖大震怒曰。我纔一行法。乃卽欲首壞之耶。遂寘極典。此等事今皆不敢言。

上慨然曰。非不敢言。乃不肯言耳。於是下戶部查議。而部尙書文條鹽法積弊七事以上。一開中引鹽。二興販私鹽。三賤賣官鹽。四買補殘鹽。五夾帶私鹽。六越境賣鹽。七運司弛廢。當擇人主鹽。於是詔下。言鹽國用所須。近年欽賞數多。又內外勢要人奏討奏買。



存積常股。盤割私餘鹽。乃遂撓越支賣。夾帶私販。以致上損國課。下奪民財。此遵何義哉。其住支還官。自今各邊開中引鹽。及糴買糧草。執要並毋得求討窩占。巡撫糧儲官。毋阿徇受囑。違者聽巡按御史糾劾。居無何。上賓正德中。大放決而極。嘉靖初。

天子大察於百司。登耗利弊。每詔下。輒申

祖宗鹽法之政令。而諸公忠憂國之臣。梁尙書材。周中丞用。李戶部夢陽。霍詹事韜。張學士邦奇。東莞陳建。疏鹽法利害之變甚具。大都言。國家以鹵地授民。而歲課其鹽。亦猶以土田授民。而歲收其賦也。國



初峻竈丁私鹽之禁。而條例有夾帶者絞之科。誠執其文。則是耕民納租賦外。將餘粟貨賣者而絞也。其可乎。則知此法有深意。而行之者失也。夫兩淮鹽額。歲辦三十五萬引。有奇。後改辦小引七十萬有奇。然兩淮產鹽。除正額外。猶餘三百萬有奇也。今正額不得多取。餘鹽復不得私賣。則此三百萬鹽。將安所洩乎。兩淮行鹽地方。南盡湖廣。西達江西。東盡東海。地方數千里。人民億萬家。所仰食。獨七十萬引之鹽。亦何怪乎。私鹽橫溢。而鹽價踴貴也。國初竈丁既給鹵地。復給草蕩。免其家祿徭。所以利之者甚厚。而額



辦鹽引四百斤。給工本鈔二貫。時鈔一貫值錢千文。是鹽一引。竈丁得實利二千文也。資之者既厚。又歲課止七十萬。取之者甚薄。其餘鹽。卽以官鈔收之。下以厚竈戶。上以總利權。故餘鹽抵禁而可也。正統十三年。令每餘鹽二百觔。給米一石。較前事爲已削矣。然誠得米麥而給之。亦猶可言也。今官司徒挾此令。征鹽而米麥不復給。如是而猶峻賣餘鹽之禁。是使之必饑而死也。夫天時有生。地利有宜。人官有能。物曲有利。自然之數也。今因天地自然之利。賴小民煎煮之力。旣已辦正課矣。又禁使不得自食其舌力之



餘鹽豈情理可堪哉。於是貧弱逋逃四出。賒死其富室。負海憑險。多招亡命。廣占斥鹵。煎煮多而私賣廣。法固不足久禁也。故鹽禁愈嚴。貧竈愈多。而豪猾愈益橫。故曰行之者失也。且法愈嚴。則利愈大。民見利不見法。淮安頑民數千家。專販私鹽。良兵勁弩高檣大舶。千萬爲群。行則鳥飛。止則狼踞。官司熟視莫敢誰何之矣。此隙不弭。必貽大患。今淮安官軍受利而護之出境矣。山東官兵且就之丐鹽克食矣。形影旣見。榮可寒心。此鹽場竈戶鹽徒之利弊也。洪武中招商中鹽。每鹽一引。納銀八分。官之征至薄。商之獲至



厚。故鹽價平賤。民受其賜。永樂間。每鹽一引。輸邊粟二斗五升。商稅雖加。邊糧仰足。民猶利賴之也。已定歲七十二萬引。致鹽而七分爲常股。三分爲存積。常股者。商人中納給引。守支之鹽。存積者。積鹽在場。遇邊急缺。增價開中。越次放支之鹽也。於是常股守候至有數十年。老死而不得支。兄弟妻子代之支者矣。夫常股旣艱滯矣。而又發存積鹽以傾之。以居貨而罔利。亦烏在其爲王體乎。且自成化來。每引納銀叁錢伍分。今增至八錢五分矣。視洪武永樂間。增賈以十數倍。而權勢之府。占賣窩。經紀之包攬侵漁。衙門



之斗頭火耗不與焉。其輓輸芻粟也。又有管攢取索常例。刁蹬留難之弊。雖其既納而守候查盤。開領勘合者。費復不訾。蓋至于長蘆兩浙。兼配搭支。商人一身三路候守。每鹽一引用銀。既二兩有奇矣。法開中鹽引貳百五十觔。正數外。賄場官私加至三百餘觔。近納銀於官。聽買竈戶餘鹽。通五百五十觔。此皆貿易於官民而得之者也。嘉靖末年。梃克峻深之臣。復嚴夾帶割沒之令。觔罰銀一錢。歲上割沒課銀多至百萬兩。少裁六十萬兩。而間中之商人愈病。其行鹽之地。開中商力不能自致。則四方小賈買鹽引代行。



開中商先於北鹽院具冊。行淮揚按院。行給鹽運使司。總鹽數船數水程。若諸小商名。若經紀地主之目。送院以待會。以其貳下批驗所。類爲冊。送抽掣鹽院。抽掣之。而鹽院不以時掣視。待鹽舟積多至百餘艘。少者數十艘。乃掣視。故商益壅而不行。有守半年不得掣者。而鹽輕重不如冊。皆論輕以盜賣。論重以夾帶論。於是江運諸小商又病。且鹽歲春夏與十月爲旺相。餘月爲衰閉。卽其時。又復以晴雨爲生息之候。脫連兩旬月。沙灘崩塌。淋曬無地。煎熬無期。坐守耽延。吏急追併。而官竈兩困矣。此商人中納之利弊也。



國初 命鹽運司以掣下餘鹽下州縣分給人戶計

口食鹽而納鈔

洪武中口歲三斤納米四升永樂中口歲十有二斤鈔十貫二貫小口

半

之已鹽司無餘鹽關給而鹽鈔不蠲吏緣爲姦利已

命於兩稅中雜輸行鹽地方遠者數千里近者數百里水多灘石陸乃回遠勢不能待官鹽而後食不得不資比境有餘之鹽而近境之鹽直相倍蓰此何足與較矣而各鹽道督所在官司巡徼嚴切督以私鹽之令月有比較之科而吏緣爲奸民受其弊市豪大猾與巡徼者比而訟其販之時獲一二貧弱肩負易米度日法所不禁之夫以避責夫產鹽之地官旣驗



鹽給引徵之矣。所過徵之。行鹽之地又徵之。斯遵何過也。始給鹽而徵之鈔也。猶曰是鹽直也。今鹽不復給。而鈔復不蠲。人之稱斯賦也。其謂之何。斯遵何義也。天下一家也。權鹽而利之。古以爲猶父權子病之矣。况於食鹽。必責食其遠而價重者。不聽食其近而價輕者。又遵何過也。往鹽所自出者賤。家戶給足。今運鹽諸小商。買引掣放之。畱難。費什倍於昔。所從出益貴。價不得不騰。價騰躍。民不得不受其弊。山谷貧弊之民。有數月無鹽。以爲常。此四方食鹽人戶之弊也。永樂中。下輸粟於邊。之令富商大賈於三邊。自出



財力自招遊民自墾荒田自藝菽粟自築墩臺自立  
保伍田日就熟年穀屢豐蓋至天順成化間其肅寧  
憂粟石直銀二錢而邊以大裕成化中戶尚書葉淇  
言法商人輸粟二斗五升支鹽一引是以銀伍分得  
鹽一引也於爲利已泰請更其法課輸銀於運司銀  
四錢一分支鹽一引文銀貳錢可得粟一石是鹽一  
引得粟二石也以一引之鹽致八倍之獲於國利而  
銀納運司道近而便安是上下交利之道奏可於是  
商人引鹽悉輸銀於運司類解戶部鹽銀歲驟增至  
百萬餘兩然淇淮人意獨爲淮商地而輸粟於邊之



法既廢。西北商亦徙家於淮。以便鹽。於是撤業自歸。  
田作坐廢。墩臺坐頽。保伍坐圯。遊民日散。邊地爲墟。  
戎虜入而邊以大困。今千里沃壤。莽然蕪蕪。米石直  
銀伍兩。而邊儲枵然。此又安邊足用之長策大弊而  
不可復者也。夫鹽者。利之宗。而害之藪也。誠專利則  
弊生。未有利專於上。而能以靖弊者也。誠壅利則害  
作。未有利壅於下。而能以祛害者也。漢董子有言。皇  
皇求仁義。惟恐不足者。卿大夫之事也。皇皇求財利。  
常恐困之者。庶人之事也。故曰。伐冰之家。不畜牛羊。  
言不與民爭利也。今縉紳逢掖。率貴利賤義。而務細



小。往往詭托賈豎。販引占窩。逐汗辱之利。開納之歲。  
內外權豪。陰以其間。託撫臣爲之所。而撫臣者。率視  
執尊卑大小爲聽之之差。名曰買窩。則不出閩閩而  
引獲六錢之息矣。積而千引。則六百金矣。萬引則六  
千金矣。游手游俠之人。不移跬步而坐致千金之獲。  
其權家勢要。外戚中官。又相與鼓扇。堅請固乞。必獲  
而後已。商人輸價。守支數十年不得者。一旦扼其腕。  
譴呵而奪之。憲臣與轉運等官。且交通以互市。故法  
有所撓。而欲豪右之無侵漁。不可得也。有司通賄。而  
欲民之無私鬻。不可得也。二者不革。而欲鹽法之無



沮壞。上下不交。受其弊。不可得也。國初設轉運。以  
來。掌差監察御史。分開鹽課。宣德中。始令於淮。提督  
軍衛巡捕私鹽。後歲每一差。駐節揚州。正統景泰間。  
兼巡河道。任益專。而查盤清理。糾治興革。文武官吏。  
一聽其條約。非如始命專巡私鹽要束而已也。此於  
鹽甚重。然而御史者。以法治。而所與奉法者。則在運  
使提舉等官矣。今其官。非闕茸不職者。不除拜。是歐  
之汙穢之地。而求其潔也。雖日使巡按御史而督之。  
糾之。然且不治。人情無不有欲。道之以潔。然且慮汙。  
况道之以汙。將何所不至乎。劉晏有言。官多則民擾。



亦且勞事。事之勞也如絲然。緼之多手。理之無緒。而亂之也。今法鹽官遍天下。而所在嚴分。禁之禁如敵國外戎。誘致譏察。如迹奸宄。不欲舉纖芥之利。饒之民。而邊關行省。設官立署。費以千萬計。是勞之之道也。今治之。莫若簡事而省官。誠獨於諸產鹽設運司之地。簡風憲重臣一人。付便宜之權。畧倣漢桑弘羊。唐劉晏。本朝周文襄故事。令其綆墜剔蠹。濬源決流。而久之任。則官尊重。既不可屈阻。而鹽運提舉等。悉選補廉吏。自餘鹽官悉罷。而今三邊提督都御史兼勸農使。召鹽商耕塞下。入粟如異時。則鹽課邊儲。交



爲接濟。邊方腹裏兩都御史。如左右手。通其轉移。商於邊中粟。已卽給引赴場。循常股。以差次。聽竈戶驗引支發。寄請比託者。雖細必糾。多支濫給者。雖貴必刑。其竈戶餘鹽。聽商與平易。官聽其獄訟。而時制其縮贏。曠然沛恩。弛所在驗詰之令。解分地之禁。中國一家。恣聽其所往。唯嚴通夷之禁。則上之開中盡歸之商賈。下之場蕩盡歸之竈戶。莫利於私售。而私販之害絕。人得量力中納。而富商大賈。未繇操利權。國家得鹽利自饒。而不必峻制曲防以擾之。竈丁得煎鹽自給。而不必更免差繇以擾之。鹽可通賣。人無



爭奪豪舉專利之弊。不禁而自息。山陝射利之民。不驅而漸歸。邊境漸實。邊儲漸充。巡邏稱掣之官。不必設鹽。徒意外之患。不必虞利。源既均利。澤四溥。冗官冗費。蕩然一除。如此而利不興。國不足。芻餉供億。有不給。未之有也。智者不鑿其此之謂乎。抑鹽利雖博。未利也。鹽雖通。要之務民於農田爲之本。

茶故未有稅。唐德宗時。戶部侍郎趙贊議稅茶爲常平錢本。已從。張滂請諸出茶州縣及要路十稅一。而所得錢。別貯豫水旱之備。蓋稅茶始此。此其說未始不以急民。豫荒備爲辭。然卽遇水旱。固未嘗以茶錢



拯贍也。王播爲鹽鐵使，增天下茶稅，率百錢增五十。及爲相，置榷茶使自領之。後播誅，民不哀。宋於江陵、淮南官爲場，置吏以榷茶，倣鹽法，具令民私蓄商盜販皆有禁，而令已苛煩。在江南則宣歙、江、池、饒、信、洪、撫、筠、袁、十州，廣德、興、國、臨、江、建、昌、南、康、五軍兩浙則蘇、杭、明、越、婺、處、溫、台、湖、常、衢、睦、十二州，荆湖則江、陵、府、潭、澧、鼎、鄂、岳、歸、峽、七州，荆門軍、福建則建、劍、二州，歲輸租折稅送六榷貨務，鬻之置榷茶務。江、陵、府於真、海、荆、州，漢、陽無爲軍。凡六務在淮南，則蘄、黃、舒、廬、光、壽六州官自爲場，置吏總之曰山場。十有三州軍采茶，民皆隸焉，曰園戶。歲課作茶輪租，餘官爲市之，先受錢而後入茶。曰本錢，又民歲輸茶折歲賦者，曰折稅。茶民有茶者，售於官，官給其日用，日食茶。凡民茶折稅外，匿不送官及私販鬻者，沒入之，計直論罪。園戶輒敗毀茶樹者，計所產論罪。後乃稍寬商賈貿易，入錢若金帛，京師權貨務以射六務，十三場茶給茶券，隨所射與之，至道



未鬻茶錢至二百八十  
五萬餘貫。後益稍增。

雍熙用兵。令商入芻粟塞下。

酌地遠近爲之直。給之交引以茶償。而塞下急兵食。  
欲廣儲峙。不愛虛估入中者。以虛錢得實利。人競趨  
焉。後虛估益高。茶益賤。入實錢金帛益寡。而入中者。  
非盡行商。多土人。既不知茶利厚薄。急售錢得券。則  
轉鬻之商。若京師交引鋪。茶商及交引鋪得收蓄貨。  
易以射利。券以滯積。雖二三年茶不足償。而入中者。  
以利薄不復趨邊。以頓乏。茶法日大壞。三司使丁謂  
歎以謂邊糴纔五十萬。而東南三百六十餘萬茶利。  
盡歸之豪商大賈也。天聖初。三司使李諮言。淮南十



三茶場。歲課五十萬緡。天禧五年。纔二十三萬緡。券直錢十萬鬻之。售五萬五千。爲實錢僅十三萬緡。除九萬緡爲本錢。歲入息僅三萬餘緡。而官吏廩給雜費不與焉。虛數雖多。實利殊寡。請罷十三場本錢爲定中估。使商與園戶自交相易。而官收其息。如舒州羅源場。茶斤鬻錢五十有六。官不復給本。但使商輸息錢三十有一。而聽其所指地分。得給券通行爲左驗。以防私售。謂之貼射。若歲課不盡官市之如舊。其商人入芻粟塞下者。度地里遠近。卽實糧量增直給券。徑至權貨務。立償以緡錢。不給茶。大率使茶與邊



糴各以實錢出納。絕虛佑之弊。豪商大賈不能爲重。  
輕而煩費頓省。已論者言邊糴償見錢。恐府藏不繼。  
詔遣官行視諮等條新舊法。歲入課上二府。兩府大  
臣言計新法所省及增收。歲爲錢六百五十萬。異時  
邊儲不給。今多者四年。少者有二年之蓄。而東南茶  
亦無滯積之患。推行新法。功緒已見。蓋積年侵蠹之  
源。一朝閉塞。商賈利於復故。欲有動撙。而論者不察。  
助爲之說也。詔有司榜諭。論者猶不已。竟罷行。景祐  
中。葉清臣疏言。山澤之產。天所資以惠民者也。封園  
置吏。隨處立筦。已非天佑黎元之意。旣奪其資。又一



切官爲之禁。而黥流日報。豈不過甚也哉。卽令有厚利重資。能佐國用。聖仁隱恤。猶將矜赦。況度支爲費甚大。權易所收甚薄。而剝剝園戶。以奉商使。朝廷有聚歛之名。宜豐滋虐濫之罰。爲國者亦何利於此。建國以來。法用數改。皆商吏協計。倒持利權。幸在更張。倍求其羨。臣竊嘗較茶利所入。以景祐元年爲率。除本錢外。實收息錢五十九萬餘緡。又天下所售食茶。并本息歲課。亦祇及三十四萬緡。而茶商見通行六十五州軍。所收稅錢已及五十七萬緡。若令天下通商。抵收稅錢。利自數倍。諸權務山塲。及食茶之利。盡



可寵取。又况不費度支之奉。不置權易之官。不興輦  
運之勞。不濫徒黥之辟。臣竊意生民之弊。有時而窮。  
而盛德之事。俟聖不惑也。議復卻不用。嘉祐中。權茶  
法益弊。園戶困於征取。陷罪矣。破產逃匿者。歲有著  
作佐。即何鬲。三班奉職王嘉麟。皆上書請罷。給茶本  
錢。縱園戶貿易。而收稅所在。征筭歸權。貨務償。邊糴  
之費。可以疏利源。寬民力。時富韓竝相。下三司議行  
之。弛舊禁。通商。歲收租錢三十三萬八千有奇。與諸  
路本錢悉儲以給邊。於是天子下詔言。自茶禁行。民  
被誅求之困。官受濫惡之入。私藏盜販者繁。而刑辟



滋有。是以百十年。江湖幅員數千里。爲陷窳以害吾民也。朕甚悼之。官遣使就問。皆歡然願弛權。而歲以率輸官。其著令。弗復更。然議者籍籍言。往茶戶摘山者。受錢於官。今困於輸錢。錢不時入。則刑隨之。商賈利薄。敗鬻者少。經費日蹙。爲不便。掣奪之。然更制簡易。官坐收權利。而民便貿易。以無抵於罔禁也。可謂交利矣。熙寧中。制置條例司。始經畫買茶於秦鳳。熙河以博馬事有端。而王韶言。西人頗以善馬至邊。馬中國所利也。而虜所嗜。惟茶。今茶乏。無從互市。是坐而失利。詔起水陸各運茶赴河西市馬。而茶馬之令。



始於此已卽蜀諸州設官開塲歲增茶課四十萬知  
彭州呂陶言解州有鹽池民間煎者爲私鹽晉州有  
礬山民間煉者爲私礬固當今川蜀民茶園本兩稅  
地地不殖五穀惟宜茶茶額稅視和賦與解鹽晉礬  
異而抑爲禁地隨買隨賣取子錢十之三損治體大  
不便不報及李稷陸師受相繼爲提舉累增息至百  
萬侍御史劉摯言蜀產茶地不過數十州茶司盡權  
而市之有茶一本而市額至數十斤者又官所給錢  
多靡於牙儈名平市而實奪之園戶或逃或死猶及  
鄰伍欲伐茶則有禁欲增植則加課故蜀人以謂非



地產茶實產禍也。願選使者考茶法以蘇疲民。疏上不省。後蔡京說天子爲茶務。權茶大都如權鹽法而加以苛峻。歲以百萬輸京師。供天子私奉。倍息滋厚。取民愈酷。上戶各抑配以十數引。引賠十數千。民罷病極而國亾矣。建炎初。成都轉運判官趙開言財利當出於一。祖宗朝天下財計盡歸三司。諸道利源各歸漕計。故官省而事治。今所劾茶馬諸司宜並廢。以還漕司。則利害可參。無掣肘室碍之患。因指陳茶馬五害。其畧言。黎州買馬歲額僅二千一百餘匹。自置司權茶。增歲額四千。增



衣糧爲一害。嘉祐以銀絹傳馬。價有定則。今吏旁緩  
爲姦。以空券給夷人。不時歸之。怨恨必生。邊患萌起。  
爲二害。初置司榷茶。借本錢於運司。凡五十二萬緡。  
於常平二千萬緡。自熙寧至今幾六十年。舊所借未  
償一文。而歲借乃準初數不已。爲三害。榷茶初預  
茶戶本錢。已乃收稅。後於數外增和買。最後乃抑預  
俵錢。克和買。於是茶戶破產相繼。而官買歲增。不得  
不爲僞茶。以相抵謾。於是官茶日益濫惡。而私販公  
行。刑不能禁。爲四害。承平時蜀茶入秦者十八九。猶  
患積壓難售。今關隴焚蕩。而責之舊額。加以茶官吏



兵坐靡衣糧。米免科配州縣。爲五害。請依嘉祐故事。罷權茶買馬如故便。如謂權茶未可遽罷。亦宜歸之運司。減額以蘇茶戶。輕價以惠茶商。庶私販衰而盜賊從可弭也。詔擢開都大提舉川陝茶馬事。使推行之。於是開罷官買茶賣茶之法。給茶引聽茶商執引與茶戶相貿易。場官獨發引。秤茶封記驗放。他一無所預。而籍茶戶爲伍保。定茶舖姓名。互覺發。諸影帶若私販鬻者。凡茶觔春爲錢七十。夏五十。官觔稅二錢。若一錢五分。茶官以馬到京。實數及格爲推賞。馬道苑若至京苑者。黜降有差。比四年冬。茶引收息凡



百七十餘萬緡得國馬萬疋蜀用以饒

酒故無權酤周官萍氏掌幾酒謹酒察

之過酤與

彛酒者而漢興文皇帝詔戒爲酒醪以糜穀蓋戒沈  
湎而尚敦朴欲民之剛制于酒非因爲利也武帝天  
漢中實始權酒酤其後令民得以律古租賣酒升四  
錢王莽時羲和魯匡言山澤鹽鐵布帛五均賒貨皆  
幹在縣官惟酒酤未幹詩曰無酒酤我而論語曰沽  
酒市脯不食非相反也詩據承平之時酒酤在官和  
皆使人可相御也孔子當周衰亂酒酤在民薄惡而  
不可食故絕之今絕天下之酒無以行禮相養放而



亡限。則費財傷民。請法古。令官作酒。以二千五百石  
爲一均。率開一壚以賣。於是置命士督五均。六幹。郡  
數人。而用商賈子乘。傳行視之。百姓困病。莽猶下令  
言鹽食肴之將。酒百藥之長。嘉會之好。鐵器農之本。  
非編戶齊民所能家作。必卽於市。豪民富賈。用要貧  
弱。先聖知其然。故幹之也。所設幹爲設科條以禁防。  
犯者罪至死。豈不過甚也哉。嗚呼。誠大姦。卽六藝固  
可假而文如此也。建武初。盡弛其禁。而和順二帝時。  
禁酤之令每下。意庶幾古風。趙石勒制禁釀。無靡穀。  
陳盧荔以國用不足。奏立權酤之科。雖皆不足道。而



興亡之相去則遠矣。唐初無酒禁。乾元初。肅宗以廩食方屈。禁京師釀。廣德初。始勅天下州各量地大小。定酤酒戶月納稅。它公私釀咸禁。而德宗時。乃官自張肆市酒。收市利以助軍。斛三千。天下置肆。酤者千百五十錢。元和中。京兆奏權酒錢。請隨兩稅青苗錢。據貲均率已。又有權麴錢。蓋弊孔開而彌濫難窒矣。宋三京官造麴。聽民納直。諸州皆置務釀之。民歲輸課者聽釀。景德初。權務歲以羨錢上。詔計司定爲成式。諸所增額奏裁之。自今中外不得復議增。仁宗時。詔酒稅務雖羨。溢勿增。毋得抑配人戶。苛阻商旅。求



美餘以希賞已用議者言天下酒課月比歲增無藝極非古者禁群飲教節儉之義詔鄉村毋增置酒場熙寧中三司請承買酒麴坊場率千錢稅五十儲之以祿吏而諸群舊不釀酒者許以公使錢釀之崇寧初令監酒務添酤錢上邑升五文次三文以贍學而政和宜和之際額每復增加建炎中張浚用趙開言蜀民已困惟榷酤尚有遺利乃變法聽民以米麴起場自釀斛輸錢三十而課頓增乾道中知常德府劉邦翰言湖北民困酒坊之課額重雖貧者入市不捐萬錢不能舉吉凶之禮乞將課額隨民產均之民而



醕造酤賣。一聽民毋擾。便下勅令所議。以爲酒課均分民間。是兩稅外別稅也。他日漁利之臣。復權酒。而此稅不蠲。將重爲民病。不可事得寢而中抑買之令。其後溫州平陽縣言。縣故鄉村坊店二十五。宣和末。其二十一坊。並亾其處。而歲額千六百七十三貫。攤之民。其勢家倖免。浮細受害。卽窮山薪樵鬻雇之夫。抑配白納。如永嘉。至乃計畝爲酤稅。復過於正稅。無沈湎之失。而受敗缺之咎。幸上裁哀。則權酤之害。極此矣。古者盛時。山澤之利。舉捐以予民。而掌其平秩之令。逐末者衆。乃爲關市之法。以譏非利之也。周



官司關掌國貨之節。以聯門市。司貨賄之出入。掌其治禁。與其征廛。凡貨不出於關者。舉其貨。罰其人。所達貨賄。以節傳出之。諸稅入至薄。用供王之膳服。令無過適。而凶荒札罌。則關市無征。王食不舉。而素服不樂。司市掌市之治教政刑。度量禁令。以次叙分地。而經市。以陳肆辨物。而平市。以政令禁物靡而均市。以商賈阜貨而行市。以度量成賈。而徵儻。音賈以質劑結信而止訟。以賈民禁僞而除詐。以刑罰禁越而除盜。以泉府同貨而歛賒。諸皆因日中之市。聚民通貨。而設官以治以教。以禮義防於利。理財正辭。而禁民



爲非也。然終以爲近利之地。遠之毋觀遊。惟士師憐  
日刑殺。君欲免之。則親會其期而免之。故曰國君過  
市則刑人。赦言非是無過也。夫人世子有故過其國  
之市。命夫命婦有故過其都之市。亦出幕帘。蓋帷弛  
之。若以自罰。然防於利之至也。大市日昃而市。百族  
爲主。通往來也。朝市朝時而市。商賈爲主。便聚居也。夕  
市夕時而市。販夫販婦爲主。便營賣也。將入市。司市  
以其屬坐。思次介次。而胥執鞭守市門。肅法紀也。凡  
治市之道。亡者使有利者使阜。害者使無靡者使微。  
蓋起其價以微。抑其價以卻。而有無微阜之權。畢歸。



於上也有無微阜之權歸於上。而志滯好辟者。不得作矣。故市之爲教。止惡於微。起善於眇。以同民俗。於爲繫大也。至泉府之官。掌以市之征布。歛布之不售。貨之滯於民用者。以其價買之。物揭而書之。待不時而買者。各從其抵。從其地。治之。吏而予之。其吉凶大。故適空乏。莫能自致者。爲之期而賒之。至期而復之。其終窶且貧者。又從而貸之。以國服爲之息。國服者。俾服役於公。償所貸而止。蓋貸之財。而傭其力。保息之之道也。是先王之設市官也。以治市。非以爲市。其建泉府也。以息民。非舉息以病民也。至齊管仲相桓。



公通輕重之權。其言曰。歲有凶穰。故穀有貴賤。令有緩急。故物有輕重。人君不理。則商賈游於市。乘民之不給。百倍其本矣。故萬乘之國。必有萬金之賈。千乘之國。必有千金之賈。賈者。利有所并也。夫物多則賤。寡則貴。散則輕。聚則重。人君知其然。故視國之羨不足。而御其財物。穀賤。則以幣與食。布帛賤。則以幣與衣。視物之輕重。而御之以準。故貴賤可調。古之理財賦者。未有不通其術者也。不能散積聚。均羨不足。雖強本趨耕。乃使下相役耳。此其筴。蓋誠知時變之幹。而意主富國。去王事也遠矣。秦商鞅變法。務民大小。



僇力於本業。事末利者。舉以爲收。孥至始皇二世。尤疾之。謫戍邊者七科。吏有罪一。亡命二。贅壻三。與賈人有市籍。若嘗有市籍。若父母。若太父母有市籍者。而亡。蓋亶惡其逐末專利。而抑奪其利以爲利。去霸事又遠矣。漢興。接秦之弊。公私空匱。自天子不能具鈞駟。而將相或乘牛車。齊民無蓋藏。而不軌逐利之民。蓄積餘業。以稽市物。物踊騰。高祖乃令賈人不聽衣絲乘車。重租稅以困辱之。孝惠高后時。稍弛其禁。然市井之子孫。終不得仕宦爲吏。武帝時。兵革數興。作業劇而財匱。於是公卿言郡國頗被菑害。貧民無



產紫者募徙廣饒之地。陛下損膳省用。出禁錢以振元元。寬貸賦而民不齊出於南畝。商賈滋衆。多積貨以逐利。異時筭輜車。賈人緡錢皆有筭。後更之。今請筭如故。諸賈人未作。貰貸買居邑。稽諸物及商以取利者。雖無市籍。令各以其物自占。率緡錢四千而一筭。諸作有租及鑄。率緡錢四千一筭。非吏比者三。老北邊騎士輜車以一筭。商賈輜車二筭。船五丈以上一筭。匿不自占。占不悉。謫戍邊一歲。没入其緡錢。有能告者。以其半畀之。賈人有市籍者。及其家屬皆無得籍名田。以便農。敢犯令没入田。僮。是時富豪爭匿。



財。唯河南人卜式願輸家之半以助邊。丞相弘曰。此非人情。不軌之臣。不可以爲化而亂法。於是罷式歸田牧。而縣官倉府空。而式復持錢二十萬。予河南守給徙民。天子以爲式終長者。尊顯之以風百姓。而下緡錢之令。百姓終莫肯分財佐縣官。於是楊可告緡徧天下。而商賈中家以上。大抵皆遇告。乃分遣御史廷尉正監分曹卽治之。得民財物以億計。奴婢以千萬數。田大縣數百頃。小縣百餘頃。宅亦如之。於是商賈中家以上。大率破。民儉甘食好衣。不事畜藏之產。崇。而縣官用益饒矣。嗚呼。疾商賈滯居積厚。而國家



乃爲法以兼併之。庸何愈乎。已帝用桑弘羊筦天下鹽鐵。而弘羊請置大農丞數十人。分部主郡國。而郡縣各往往置均輸鹽鐵官。令遠方各以其物。如異時商賈所轉販者爲賦。而相灌輸。日均輸。置平準於京師都。受天下委輸。名工官。治車諸器。皆仰給大農。大農諸官。盡籠天下之貨物。貴卽賣之。賤則買之。如此富商大賈。無所牟大利。而反本。抑萬物不得騰踊而趨平。曰平準。天子以爲然。許之。時南越用兵。歲萬餘人。帝行幸所過。賞賜金錢巨萬計。皆取足大農。以均輸故。民不益賦。而用饒。會歲旱。零卜式。乃言曰。縣官



當食租衣稅而已。今弘羊令吏坐市。列販物求利。烹  
弘羊。天乃雨。孝昭卽位。郡國賢良文學言天下郡國  
均輸與齊民爭利。散敦厚之樸。成貪鄙之行。願罷之。  
以近本。退末。時弘羊官御史大夫。持不可。文學曰。有  
國有家者。不患寡而患不均。不患貧而患不安。故天  
子不言多少。諸侯不言利害。大夫不言得失。蓄仁義  
以風之。厲德行以尊之。是以近者親附。遠者說德。夫  
道人以德。則人歸厚。示人以利。則民俗薄。有國者。排  
困市井。窒塞利門。而民猶爲非。况上之爲利乎。傳曰。  
諸侯好利。則大夫倍。大夫鄙。則士貪。而庶人盜。是開



利孔爲民罪梯也。且古之賦稅於人也。因其所工。不求其拙。農人納其獲。工女效其織。古之均輸者。所以齊勞逸而便貢輸。非以爲利而賈物也。今郡國所輸。布非齊陶之繅。蜀漢之布也。亦民間之所爲耳。吏令民作布絮。與之爲市。恣留難行姦。農人重苦。紅女再稅。未見輸之均也。縣官猥發闔門擅市。則萬人並收。並收則物騰躍。擅市則吏容姦。而富商積貨儲物。以待急。姦吏收賤以取貴。未見準之平也。語甚痛辨。而丞相爲弘羊所持。不得難。竟罷議。夫爲民父母。行政而均輸。籠貨效尤。商賈子之所治。而徵市利也。豈不



甚哉。王莽篡位。藉周禮。開賒貸。張五均。設諸幹之文。云爲齊衆庶而抑兼并。於長安及五都。立五均官。皆置交易丞五人。錢府丞一人。工商能采金銅銀錫。登龜取貝及畜牧者。若嬪婦桑蠶織紉。工匠醫卜及它方技商販者。各自占所爲。於所在縣官。除其本。記其利。十以其一爲貢。敢有不自占。占不以實。盡沒入所采取。諸司市。常以四仲月。定所掌物上中下之價。各用爲市。平人買賣。五穀布帛綿絲衣物。周於人用。而不售者。均官簡實。從本價而取之。萬物卽貴過平。則以半價賣。人有欲祭祀器紀而缺於用者。錢府以所



人工商之貢賒之祭無過旬日。罷無過三月。或乏絕欲貸以治生者。聽授之。除其費。計所得受息。無過歲什一。是旣權其貨。又操其術。而因用取贏也。則悖驚極矣。建武初。莽所設苛政盡廢罷。而章帝時歲饑。國經用不足。尙書張材言宜可封錢藏不行。獨取布帛爲租。通天下之用。又鹽食之急。雖貴人必須官可自鬻。又交趾益州上計吏來市珍寶。宜置均輸官。收其利以富國。下尙書議。尙書暉曰。均輸之法。與賈販無異。鹽歸官鬻。則下民窮怨。布帛爲租。則吏多姦盜。非明主所宜行。唐武后時。有司條關市之稅。請不限工



商。但人行輒稅。鳳閣舍人崔融曰。國家所爲立關市之賦者。以市縱繁巧。關通末游。故從而征之也。今行者皆稅。本末同途。流迸齊人。擾亂俗化。天下諸津。舟航所聚。旁通巴漢。遠指閩越。控引河洛。兼包淮海。皆令納稅簡覆。以關津連絡而稽留之。加之以主者之索督。此規規小利而亂大政也。德宗初。頗以却貢獻弛贏利予天下。會兩河亂。而國用不給。拾遺陳京請借富商錢以佐費。帝以問度支。度支佑以軍方乏興。資廩裁數月。方內困。念計無從出。聞之喜。冀得數百萬緡已責也。對以爲可。詔以戶部侍郎趙贊代佑判



度支而行借錢之令。凡商蓄積錢帛粟麥諸貨皆借  
四之一。約兵罷償之。京兆少尹韋損。長安丞薛支。封  
櫃窖簡括。長安家若被盜。人不勝其困。百姓爲罷市。  
有自經死者。然總京師豪人富商。田宅奴婢之估。裁  
八十萬緡。市民相率遮宰相馬而哭。擁不得行。相盧  
杞疾驅而免。已又於諸道關津。各置吏閱商。稅商緡  
錢十稅二。竹木茶漆十稅一。已又爲除陌法。令公私  
給與。若貿易布帛什器香藥珍寶。若羊彘它百物。皆  
約錢爲率而筭緡。輸官錢者五十。乃得聽。給市牙印  
紙。人貿易畢。署記如目。而會之。隱錢百者沒二千。杖



六十。別責錢賞告緝者。其販鬻不繇官路。冀逃稅者。捕論之法。旣行。牙市多隱盜。縣官所入無幾。而怨讟大興。涇軍反。得藉爲口實。而天子幸奉天。宋興太祖知民所疾苦。詔天下橋園魚池水磴蓮藕鵞鴨薪炭牛骨等物。諸五代所征筭者並罷。而詔關津毋得苛留行旅。行旅所齎資。非貨幣當筭者。毋發篋搜。又詔榜商稅條。禁于務門。具曉知。毋擅增創收。淳化初。詔諸路轉運使。條部內州軍市征名品。量酌減以利細民。諸商旅貨幣外。其販夫販婦。瑣碎交易。勿復筭。又詔官和買物。非他所出產。毋抑配擾民。始唐貞元末。



以中官爲宮市使。置白塋數十百人。出市物。操故弊。衣絹尺寸分裂之。酬其直。又索進奉門戶及脚價錢。有齎物入市。而空手自歸者。宋懲其弊。以京朝官主市務。內侍副之。給實直。毋抑配。諸非急需物。毋一切收市。擾齊民。皇祐中。下詔言。三司歲下諸賂科買物。出倉猝。故物頓翔踊。其先期度所當賦。早諭戒。得爲備。若府庫有儲。勿收市。已國用寢廣。有請筭緡錢助經費者。拒不聽。一日內出蜀羅一端。爲卬朱所漬者數重。因詔天下稅務。毋輒汚壞商幣物。前後稅錢詔蠲者。不可勝數。諸隱悉至矣。熙寧初。王安石創制置。



三司條例司。議以爲天下財用所爲不足者。典領之官拘於弊法。內外不相知。盈虛不相補。而輕重歛散之權失也。今發運使實總江浙淮楊荆湖六路之賦入。而其職以制置茶鹽礬酒百稅課爲事。軍儲國用多所仰給。年豐可多致。而不能制其盈。年儉難供億。而不能節其縮。於是遠方輸以倍蓰。而中都鬻以半價。以徒爲商賈子之所利也。亦慎矣。今立均輸法。周知六路財賦之有無移用之。凡糴買稅歛上供之物。得徙貴就賤。用近易遠。而預知中都帑藏歲支是在之數。當供辦者蓄買以待。令稍收輕重歛散之權。而



制其有無於以均轉輸省勞費便於是出內藏錢五  
百萬石佐均輸費以發運使薛向領其事又以爲京  
師百貨所居獨多爲兼并者之所困以市無定價而  
貴賤相傾置市易務召京師諸行戶令自實所有若  
借他人貲產克抵當因用爲知務諸商貨滯不售者  
許至務投賣行人牙人平其值官市之願易官物者  
聽旣收市視知務所抵當物許請賒立限歸故直毋  
抑勒歲出息毋過二分其非行牙所需物民貧乏欲  
市於官而無質錢者官度其田宅若金帛爲抵而貸  
之與期責償半歲輸息十。一歲十二過期不輸者月



加錢四之一以謫之。諸折博收買皆以時估。毋求羨。此所謂仁能與智能取。可以爲天下之道也。於是出內藏錢百萬緡。京東市稅錢八十七萬緡。爲市易本。以戶部判官呂嘉問領其事。已又言宮中所宜索。或非民間用物。卽用物。或時缺少。價率以倍蓰爲諸行戶病。今立法計每歲官合用之物。合行戶衆出錢於官。預收之以待急。曰免行錢。歲中不用卽出賣。息毋過二分。而行戶免時急數倍之價。便時諫官御史爭言其不便。不聽。權開封府推官蘇軾具疏言商賈之事。曲折難行。其買也。或先期而予錢。其賣也。或後期。



而收直多方相濟委曲以通之此倍稱之息所繇獲也。今官爲市易必先張官置吏簿書廩祿爲費已厚非良不售非賄不行是以官買之價比民必貴及其賣也弊復如之商賈之利何緣而得朝廷不此之慮乃捐五百萬緡以予之此錢今出恐不可復縱使其間薄有所得而征商之額所損必多矣其後均輸法止不行而市易苛細官至自鬻蔬果凌雜米鹽所鬻物物輒踴貪賴子弟所賒貨多折閱不能償而導洛通汴司官請置堆垛場於泗州商貨至入官場官以船運至京輸筭已詔非導洛司船所載商貨許糾告



雖自請稅。猶如私載法。而商貨入門。市易司輒遮攔。赴務。名驗實。實盡勒買之。其巡攔諸役。月食錢。畢取盈於商。商憚避逃徙。而商稅果驟減已。又令諸不賈非充行戶。出免行錢者。毋得賈。於是細民負水鬻粥。貿諸日食。用物者亦無敢不赴官投行戶矣。元豐七年。帝手詔三司使言。聞市易司市物。頗害小民之業。衆乃謹何也。三司使曾布具對。言。呂嘉問多取息。以干賞。商旅所有者。盡收市。肆所無者。畢索。率賤市貴鬻。幾什一之利。是挾官府而商爲兼并也。相安石析其不然。乃令呂惠卿偕布同寃詰。布卽上行戶所訴。



狀并疏惠卿庇嘉問罔上爲姦欺。且言臣自立朝來。每聞德音。未嘗不欲以王道治天下。今市易之爲虐。已凜凜乎。唐季葉間。架除陌之事矣。嘉問近奉差官往湖南。販茶。陝西販鹽。兩浙販紗。皆未敢計息。彼其意欲以自解免。然以臣視之。竊獨慙憤。以謂如此政令。書之簡牘。不獨唐虞三代所無有。歷觀秦漢以來。衰亂之世。殆不若此。其甚也。疏上。與嘉問俱落職。補外。初。市易之建。實布本畫揣上意。疑遂急治。嘉問以自明。爲相安石所深恨。而惠卿與布方交。怨助擠之。故布嘉問並貶。而市易如故。元祐初。有司言市易本



無慮二百萬緡錢爲息二分。十有五年之間。子本當數十百倍。今僅復其本。而官俸廩十數年之費。乃在其外。上下相蒙。至於此。夫以朝廷而行市易。就使有獲。然且不可爲。况今所獲。曾不如所亡乎。詔罷市易法。而削前提舉官呂嘉問三秩。貶知淮陽軍。先是陝西轉運使李叅言。部內多戍卒。而糧饌不足。因令民自隱度麥粟之贏。先貸以錢。俟穀熟還官。號青苗錢。經數年。稟有餘積。安石大善之。於是條例司言。今天下貧富不均。兼并之家。乘凶荒之間。新陳不接之候。往往徼倍稱之息。故富益富。貧益貧。而國本日蹙。非



王事也。今諸路平廣惠倉穀積爲朽藏。必年凶出

糴而所及不過游手游食之民。請依陝西青苗錢例。

民願預借者給之。令出息二分。隨夏秋二稅以輸。其

願輸錢者聽。如遇災傷。許展至豐熟以償。不惟通一

路有無發歛。以收富人兼并之權。而貧人緩急獲濟。

得趨時以赴農。貸不異於民間。息不至於倍稱。便始

安石與惠卿議。令既具。出示條例。司官曰。此青苗法

也。有不便以告。勿疑。蘇轍曰。貸錢本以救民。然出納

之際。吏緣爲奸。雖峻法不能禁。息錢入民手。雖良民

不免妄用。及其納錢。卽富民不免踰限。如此則鞭箠



必用州縣之事日煩矣。唐劉晏掌國計。未嘗有所假貸而四方凶敗必先知之。蓋慮之也。今晏功可立。俟何必造此爲弊端乎。安石曰。君言固其理。當徐思之。繇是逾月不復言青苗。會京東轉運使王廣淵言。春農事興。民苦空乏。兼并之家。得乘急徼利。乞留本道錢帛五十萬貸之民。歲可獲息二十五萬。事與青苗法正。合於是詔諸路置提舉官推行之。提舉官務多散以爲功。民富者不願請。貧者乃欲得之。則令隨戶等高下分配。又令以十人爲甲。貧富相兼。而富者爲保首。戶高等給十五貫。次十貫。又次五貫。下一貫。名



抑兼并實官自貸錢舉二分之息。敕不願勿強。而官實第戶等抑配之也。其後貧者得錢。隨手輒盡。至其逋負。往往鞭撻取足。至伐桑爲薪。以易錢輸之。久且流亡。則攤保首賠納。於是提舉司言。兩浙累年災傷。丁口減耗。九年前逃絕戶已請青苗錢。合攤填見戶者。乞需豐歲理納。更有全甲戶絕。或止一二貧難。勢難督併者。幸上裁哀。蓋其時有鬻田宅妻女。償青苗者。困窳甚矣。元祐初。新法盡罷廢。而紹聖崇寧益循用。而至於亡。異哉乎。均輸之歛貨也。惡商賈之年大利。而人主自年利也。青苗之取息也。惡豪舉之取息。



病民。而人主自取息也。夫一市商若豪耳。以買物而取息。猶能以病民。人主張官置吏。而賈物若取息也。天下其孰能難之。是大亂之道也。且也成周之世。道行教明。而封井以守治也。彼其視國中廛里之氓。不啻於家人父子然。其視賒貸歛散也。不異於家人有無之相通也。故泉府之法行。後世迷離於其本。舉先王之大經大法。盡廢而獨欲遣一二使者。操倫文隻辭。以爲王政而行之。無惑乎奪民利。賈國怨。爲利孔罪梯也。漢相曰。必以獄市爲寄。謹無擾獄市。嗚呼。可與靖民矣。方漢宣帝時。用司農耿壽昌建白。增海租。



御史大夫蕭望之曰。故御史徐宮家東萊。爲臣言。往年加海租。魚不出。長老皆言。武帝時。縣官嘗自漁海。魚亦不出。後復弛與民。魚乃出。夫陰陽之感。物類相應。萬務盡然。壽昌習於商賈分銖之事。其深計遠慮。未足任。宜如故。帝不聽。而漁課始此。自晉南渡。令貨賣奴婢馬牛田宅。有文券者。率錢萬而輸。四百稅券之制。始於此。而津置賊曹一人。直水五人。諸荻炭魚鮓之類。十稅一以入官。齊東楊州刺史王敬則。以會稽邊湖海。人戶皆保陂塘利厚。宜稅錢以助興。而陂池之稅。始於此。唐德宗時。有間架之稅。屋二架爲間。



上間錢二千。中一千。下五百。吏入民間握筭。計其數  
爲稅。敢匿屋一間者。杖六十。告者賞。而間架之稅始  
於此。自宋中季。言礬課則劉熙古。深茶禁則樊若水。  
峻酒權則程能。變鹽令則楊允恭。至熙寧而王安石。  
呂惠卿。章惇之倫。立手實門攤稅院市賦力勝之法。  
古禁之尚疏者益密。南渡後創市舶通海貨諸窠名。  
甚衆。不可勝記也。大都歷代長國家務財利之臣。競  
用新巧以錮利剥民。已輒沿不廢。久益嚴峻。至元而  
利孔稅目密於數畧。而弊亦自是極矣。元史額外之  
課凡三十有二。自曆契本而下。曰河泊山場。曰草蕩。



審治日房地租日門攤日池塘卽蒲葦荻柴煤炭諸  
瑣細咸稅食羊屠牛池魚各稅下至魚苗牛羊皮張  
亦具稅諸山澤鹽茶商車船稅爲經賦不在是生民  
之利殆盡然適造厲階爲姦人資於國用固無當也  
張槌目前面茶鹽關市敷衍極多自魚課以下或  
數十句或數句色色信他本來是因物賦物手段

國朝府州縣有稅課司局河泊有所諸歲辦商稅漁課  
引繇契本有額而四川置茶馬司一陝西置茶馬司  
四諸關津要害置批驗茶引所歲遣行人齎榜於行  
茶所在懸示以肅禁每三歲遣官選調邊軍齎金牌  
信符差發附近邊簇以納馬而運茶於邊勞賞之歲



有常數。西番貢使許順帶茶。而有限禁。諸私茶之禁。甚具洪武中。命曹國公李景隆行西番。與結約定。

令實始製金牌信符。杜奸僞。而駙馬都尉歐陽倫使西域。以冒禁。卽賜死。不貸。法嚴而令行如此。倫奉命

巴茶私出境。貨鬻倚勢橫暴。令陝西布政司移文所屬。起車載茶。渡河州。倫家人有周保者。索車至五十輛。蘭縣河橋巡簡司吏。被捶不堪。以事聞。上怒。以布政司官不言。併倫俱賜死。保等皆伏誅。召河

橋吏嘉勞之。時曹國公還自西番。用茶五十餘萬斤。得馬一萬三千五百一十八匹。分給京衛騎士。蓋

虜人嗜乳酪。膈氣底滯。茶性通利。能滌盪勢所必資。而邊境得虜馬團操爲武衛。所謂以采山之利。而易

克廩之良。戎得茶不能爲我害。中國得馬足以爲我



利計之得者也。况夷背中國則不得茶。不得茶則病且死。以是羈縻之。賢於數萬師遠矣。矧於時以國重臣定茶法。彼其納馬。不曰易茶。而曰差發。如田有賦。如身有庸。示職貢無可逃。國酬以茶斤。不曰市馬。而曰勞賞。謂因其供貢。賚予之。中國之體統既尊。外夷之威稜自振。則又我

聖祖之睿謀英畧。度越前代之萬萬也。其天下茶貢。歲額止四千二十二斤。而福建二千三百五十斤。建寧所貢。有探春。先春。紫筍。及薦新等號。則福建茶貢。固甲於天下也。每貢入。必碾揉爲大小龍團進。



高皇帝以勞民力也。命罷造。照諸處獨採芽以進。復上  
供戶五百家。已聞有司督徵嚴切。復聽民自採進焉。  
其通商之法。商人詣在所買茶。已具數赴官輸錢千  
文給引。引照茶百斤。其畸零不及引者。納錢六百文  
給繇帖。繇帖照六十斤。量地定程以賣。而犯私販。與  
鹽法同罪。諸批驗截角退引。一準鹽法令以行。法以私茶  
出境者。斬。關隘不覺察者。處極刑。民間畜茶。不得過  
一月之用。茶戶私鬻者。籍其園入官。勅兵部遣人  
諭川陝守邊衛所。仍遣西僧住番一體申飭。成化中。批驗所不詳茶商姓  
名貫址。聽冒名給引。得傳相販賣。故退引累催不繳。  
為影射。茶出山時。不從公盤詰。批驗所又不加法。批



驗而夾帶者衆。又法商人詣批驗所買引。而所獨在  
應天常州杭州三府。於產茶地分。遠者數千里。近不  
下數百里。道苦遠多費。而姓名貫址易爲欺。於是用  
尚書恕言。聽茶商於產茶府州納課。已卽將姓名貫  
址買引照茶。年終該府州各將賣過引繇造冊。并收  
過紙鈔解部。仍具數關領。次年合用引繇各批驗所。  
遇茶商經過。照批驗。將引截角放行。有夾帶。送所在  
官司問理。年終具驗。過客商盤獲私茶。具冊申合于  
上司繳部。而坊私販之禁甚嚴。時四川江安縣茶戶  
言。本戶舊有茶八萬餘株。年深枯朽。戶丁多死。存



者皆給役於官。欲培植無力。積欠茶課至七千七百餘觔。郡縣責徵急。乞減免。并除雜役。得專辦茶課。

上曰。天產茶爲蜀民利。不獨爲公家。柰何乎盡之。旣責納課。復加他役。何也。悉免之。仍命部諸物產虛耗。課責宜從寬。永樂中。始遣御史巡陝西茶馬。正統末。停金牌信符。而馬漸不至。成化中。定差御史奉勅專理。正德中。都御史楊一清始頌言。國初金牌差發之爲功。奏請復舊焉。洪武中。誥天下所在池湖河泊。從古迄今。辦集課程。各在在有一定不易之所。其小溝小澗。及灌溉池。若民間自養魚鱗池。茶照地起科。



而奸豪顧搜求擾民。奪採魚鰕器。蹙之。民何以生。敕有司捕論。有司不理。奏梟令。而峻民舟行。勒經涉水。面錢之禁已。今天下稅課司局。諸客商貨賄。俱三十而稅一。赴司局投稅。訖聽平賈以賣。諸有稱官牙私牙。厲商賈者。徒化外不貸。而收免牙錢一分。其金銀鉛珠砂膽礬雄黃丹青綠毛纓碧甸子鍾乳粉棕毛水銀。俱起解本色。其餘魚茶酒醋硝鉛黑錫石膏商稅。竈課。俱折收金銀錢鈔輸。京師惟五穀農器書籍紙札不稅。酒課不設務。不定額。如異時已。榜諭各稅課司局。巡攔所辦。令計額課。逐日旬辦貯司局。



官按季攢收。而官攢侵欺。致巡攔賠納者罪。又勅戶部言。曩奸臣聚斂。稅天下物貨。及纖末之物。朕甚耻焉。自今凡軍民嫁娶。祭伏臘。追送儀物。及自織作染練布帛。及買已稅之物。若造作舟車。若細民擔挑蔬菜魚肉果實。非興販者。毋得稅。永樂初。申勅如章。宣德中。令南京至北京。沿上新河。歷徐淮。抵河西。務於商所輳集。立鈔關。遣御史及本部官收船料鈔。其隱匿及倚勢不納鈔者。船沒入官。惟運載食米薪芻。及輸官物者。免料。正統中。令天下有湖池。壅塞無從採捕。累民包納者。所在官申憲司。踏勘分豁。已



令府州縣諸稅課司局所收課鈔不及三萬貫者革  
罷。令所在有司帶辦。諸河泊所課鈔不及萬貫。油鰾  
黃白麻不及三千斤。翎毛不及十萬束者。俱革罷。其  
額課并附近河泊所管辦。無河泊所。令府州縣帶辦。  
景泰中。湖廣金沙洲。江西九江南直隸蘇杭。各設主  
事。筭舟船。而廣東雷廉平江等珠池。遣內臣起蠶戶  
採珠。供服御之用。其後各鈔關停御史不遣。遣部主  
事。而天下府州縣承沿異時稱茶課山稅池塘等稅。  
卽其地其山。或植或童。或墾或蕪。並均之里甲曰課  
程。而門攤則沿市門均攤之。其府州縣設巡攔所。巡



不在是。成化初。令京城九門。并都稅宣課司。及各處商課。俱錢鈔中半兼收。鈔一貫。折銅錢二文。已。敕九門監收錢鈔內臣。及各抽分廠。不許將不該抽分物貨。違例抽分。雖稅民兼承前代之猥。而。德意獨深矣。宣德中。布政使孫原貞言。商稅雖。國課所資。而黷昌不可以無禁。都邑輳集。如張家灣。宣課司攔稅。亦豈足過哉。惟巡攔徇私縱放者有之。容情納鈔者有之。其峻勒卸車。發篋搜簡。因而失所者。又多有之。而高估物貨。規多稅入。此其害非細。至盧溝橋復然。大明門又然。是一貨而數征之也。宜敕諸商貨。



但於所在抽稅。其經繇地方。不得闌阻。止於文明門  
宣課司查驗。應稅者稅之。便。嘉靖初。戶郎中曾瑛著  
論言。邦畿四方之極。億兆攸止。而車徒往來。停車弛  
擔。無小大畢稅。而後行。堂堂大都。下索小利。傷大  
體。且其司稅者。則中人。御史主事。爲每日進納。名監  
收實不得一。與稅多納少。所益幾何。宜悉罷。令閭人  
止關防出入。便。戶尚書梁材條議。言各鈔關出納官  
銀。或稱收之初。不盡入官。或藏貯處。私取肥已。或傾  
前時隱匿。或類解時那換。必互稽察。而後奸弊可除  
也。宜行巡按御史。於府州縣選委廉能佐貳官。日赴



廠爲之貳。立號簿二。立收料文票。於所在官司編號。用印鈐記收掌。一扇委官收。其權鈔以船梁丈尺濶狹定納料分兩輕重。自五尺以上至丈二尺乃權。以成尺爲度。權鈔訖。開收票付商。照收票登簿。將料銀封記完固。送所在府州縣庫收。積至千兩。傾煎成錠。季終差官類解。委官季代。部主事三歲代。於差滿前題請更替。至接管交代訖。乃聽行。乃國家坑冶之利。比前代不及十一二。洪武中。廣平吏王久道言。磁水臨水鎮地產鐵。元嘗置鐵冶。都提舉司轄河窩等八冶。爐丁萬五千戶。歲收鐵百餘萬斤。請復之。



上曰。朕聞治天下。當使無遺賢。不聞使天下無遺利也。且利不在官。則在民。民得其利。則利源博而有益於官。官專其利。則利源狹而必損於民。今各鐵冶數多。軍非乏而設之。是驅萬五千家陷之治中也。杖之。流海外。已。衛軍言河西陝西地舊產礦。今久銅。請復之。上曰。君子好義。以利民爲心。小人好利。以戕民爲務。故凡言利者。皆民賊也。往元時江西豐城民告官採金。經久地產竭。以貽患可戒。永樂中浙溫處閩建福嘗開場置官。令內臣主之。督以憲臣。已不償所費而罷。大都山澤之利有限。或暴發隨竭。或採取歲久而盡。



回其理也。近議者懼山場滲漏之微利。遺不逞資。而適用啓亂。議且築塞柵塹之矣。

張曰。國朝承百王之委。諸瑣屑不經之

稅未能盡革然

帝詔臣謨留心民瘼者。班班可紀。推類而蠲除之。則存乎後之人焉。○說弊處微婉。說利處顯著。注意處渾深。讀者當自得於言外。

大學傳曰。長國家而務財用者。必自小人矣。彼惟善之。小人之使爲國家。菑害並至。雖有善者。亦無如之何矣。此謂國不以利爲利。以義爲利也。太史公曰。予讀孟子書。至梁惠王問何以利吾國。未嘗不廢書而歎也。曰。嗟乎。利誠亂之始也。夫子罕言利。豈防其源

也。自天子至於庶人。好利之弊。何以異哉。語深痛至



矣。宋侍郎葉適言。今學士大夫平居道古。肯先王語  
仁義性命。特雅好爲美觀。一旦爲吏。簿書期會迫之  
前。而操切無經之術。日用之。恬不爲怪也。將生民困  
憊而國從之。則何益矣。今誠於朘削厲民之吏。痛懲  
不與。而致用惻怛愛民之士。修牧養之政。爲天生德。  
爲民元命。乃國家尚亦有利哉。


國史下編卷之十六終



西  
分  
糸

全  
三


















下  
十  
八

13



















25  
735  
A2  
T4  
274  
田史下編卷之十七

明肝郡鄧元錫著

刑法志

天下之生人爲賁。人之生。肖天地之德。懷五常之性。聰明精粹。有生之至靈者也。然而有血氣心知之欲。則必有喜怒愛惡之情。有喜怒愛惡之情。則相攻相取。相乃相劇。貪冒欺詐之術興。而攻奪相殺之禍且自此作矣。故有心此有知。有知此有欲。則知欲與生俱。罪自欲作。刑也者。以制欲平情。而遠於人禍者也。在昔至聖。躬明哲而體天道。然且兢業於人心之防。



不敢怠。舜禹之授受曰。人心惟危。其更相勅之辭曰。  
無若丹朱傲。惟慢遊是好。敖虐是作。罔晝夜頷頷。罔  
水行舟。朋淫于家。用殄厥世。諸皆囂訟。途用之極。比  
於刑者也。而推之爲上德戒。誠防乎其防。自訟艾如  
此。其至也。況於中庸之流。忿懣好樂。因感化物。而莫  
之能反者乎。故天以陽生萬物。止之以秋。聖人以仁  
育萬物。肅之以刑。人之生也。欲動情動。利害相攻。不  
止則賊賊無倫焉。故刑也者。聖人承天之道。知人之  
盡。所以防非訖欲。長利已患。制百姓于禮義之中。而  
因用弼教者也。故先之以敬讓。而民不爭。宥之以博



愛而民知德。導之以和睦而民知讓。播之以禮樂而民服化。然且象之以五虐之刑。使民知所警而勿之有犯焉。豈非御世之大德。法天之微權。禮樂政刑。所庸以四達而不悖者乎。其在易。屯蒙始開以飲食而有訟。訟者訟也。臨觀之盛。章電雷以噬嗑。噬者合也。訟之繇。有吉無眚者矣。其吉無眚者。其有孚惕中。復命而安貞者也。不克訟而歸。逋食舊者也。有凶不利而掇患者矣。其凶者。其健終者也。其不利者。險涉川者也。其掇患者。其下訟上者也。無訟之貴。中正之爲美。曰訟元吉。則聖人使民無訟之道也。其有間必噬。



之而後合。合而後亨。其傳曰。噬嗑而亨。其有間。必情  
僞微暖。爲變千狀。非中正明達果斷者。不能及也。其  
傳曰。剛柔分。動而明。雷電合而章。雖距尚德無訟之  
化已遠。而獄用之以爲利也。作事謀始。其見之蚤乎。  
明罰勅法。禁之豫也。折獄致刑。果之力也。明慎用刑  
而不留獄。則欽恤之至也。噬嗑之初曰。履較臧趾無  
咎。傳曰。小人不耻不仁。不畏不義。不見利不勸。不威  
不懲。小懲而大誡。此小人之福也。言止惡於初。其上  
曰。荷較滅耳凶。傳曰。善不積。不足以成名。惡不積。不  
足以滅身。小人以小善爲無益而弗爲也。以小惡爲



無傷而弗去也。故惡積而不可掩。罪大而不可解。則迷終之禍也。乃其乾肺金。矢乾肉。黃金之象於中正。拳拳焉。故先王之立禮也。則天之明。盡人之性也。其出禮而入於刑也。法天之威。致人之義也。刑罰威獄。類天之震曜殺戮。溫慈惠和。效天之生殖長育也。

張批

隨處呈露  
聖學血脉

聖人因天秩以制五禮。因天討而作五刑。

講信修睦。人之利也。故制禮以崇敬。爭奪相殺。人之患也。故作刑以明威。大刑用兵。次用斧鉞。中用刀鋸。又次用鑕鑿。薄刑鞭朴。大者陳諸原野。小者致之市朝。其所繇來尚矣。唐虞之世。至治之極。猶流其工。放



驩兜。竄三苗。殛鯀。而天下咸服。則五刑天用也。其象  
刑曰典。典。刑。天。刑。也。曰。典。刑。明。不。敢。用。非。典。也。曰。象。  
以。典。刑。縣。刑。象。示。人。俾。曉。著。勿。犯。刑。期。無。刑。也。其。有  
流。宥。五。刑。也。重。刑。殺。故。宥。鞭。官。刑。朴。教。刑。皆。未。麗。于  
刑。者。也。其。麗。于。刑。而。疑。若。未。麗。于。刑。又。各。得。以。輕。重  
贖。斯。刑。者。約。矣。惟。怙。終。無。赦。怙。有。恃。終。弗。悛。是。天。討  
之。所。不。赦。也。乃。青。災。郎。大。辜。赦。焉。肆。之。言。大。也。嗚。呼。  
斯。萬。世。刑。統。哉。乃。其。命。士。之。辭。曰。五。刑。有。服。五。服。三。  
就。五。流。有。宅。五。宅。三。居。而。臯。陶。之。贊。帝。德。曰。臨。下。以。  
簡。御。衆。以。寬。罰。勿。及。嗣。賞。延。于。世。宥。過。無。大。刑。故。無。



小罪疑惟輕。功疑惟重。與其殺不辜。寧失不經。好生之德。洽于民心。則刑罰之行。豈非聖人之竭誠盡慎。惟欽惟恤。用期於不犯者哉。傳曰。有虞之時。畫衣冠。異章服。而民不犯。則化之至也。湯鑒桀虐。而官刑儆于有位。曰。敢有怙舞于宮。酣歌于室。時謂巫風。敢有殉于貨色。怙于遊畋。時謂淫風。敢有侮聖言。逆忠直。遠耆德。比頑童。時謂亂風。惟茲三風十愆。卿士有一于其身。家必罷。邦君有一于其身。國必亾。臣下不匡。其刑墨。具訓于蒙士。其自言曰。凡我有邦。無從匪彛。無卽悖淫。各守爾典。以承天休。則知刑也者。防風制



愆。閑淫勅法。以襄之于彝典者也。制法之本也。周鑒  
殷虐。受爲無道。作炮烙之刑。以降災于萬姓。無辜顓  
天。穢德彰聞。因用覆國。於是崇明德慎罰之化。以洪  
厥治。其命康叔之辭曰。嗚呼。封。敬明乃罰。非眚。乃惟  
終。自作不典。式爾。有厥罪小。乃不可不殺。則猶刑故  
無小之道也。乃有大罪非終。乃惟眚災。適爾。旣道極  
厥辜。時乃不可殺。則猶宥過無大之德也。非眚惟終。  
則不悛。自作不典。則亂常。有厥罪小。謂法如是。終不  
底大罰。又有怙而亂常不悛也。如之何勿殺。其眚曰  
過誤。災曰無妄。是適爾而非終。又具伏厥辜。極之非



有怙也。如之何其殺其目。元惡大憝。曰殷罔不小大。好寇攘姦。究殺越人于貨。啓不畏死。夫殺越而莫畏。是曰元惡。民罔不憝。是曰大憝。如之何勿殺。其目不率大憂。曰矧惟不孝不友。子弗祗服厥父事。人傷厥考心。于父不能字厥子。乃疾厥子。于弟弗念天顯。乃弗克恭。厥兄。兄亦不念鞠子哀。大不友于弟。天惟與我民。彝大泯亂。斯彝罰所不赦也。如之何勿殺。夫王初克商。民未定于下地。外庶子正人。越小臣。乃別播敷造譽。俾民不念庸而懷君。是引惡也。殷頑讒殄。若火始炎。庶子正人。又從而膏之。其與王者幾矣。故繇



義率殺。乃其時受沉酗于酒。妹土化之。誥丁寧于酒。曰。厥或告曰。群飲。汝勿佚。盡執拘以歸于周。予其殺。夫紂荒腆于酒。淫佚用喪于威儀。天降喪亂矣。乃復興沉酗于酒。則大亂之道也。如之何勿殺。諸陳刑梟主。亂國重典之用。而一之於敬明。其曰有叙。時乃大明服。惟民其勅懋和。則明德之致也。曰若有疾。惟民其畢棄咎。則慘怛之愛也。曰若保赤子。惟民其康乂。有保無威。則弘恕之盡也。夫民離於罪矣。曰大明厥叙而服。不啻足矣。又若疾。若保赤子。斯與有忿疾心也乎哉。是敬明之盡也。且刑殺非他。天刑天殺之也。



靡直刑殺。卽劓刑。天劓天眚之也。而或以次汝心。則與以已而弗天。刑盡遜矣。而曰遜卽矜喜之心萌。詎有遜哉。故曰。勿庸以次汝封。曰予未有遜事。則慎罰之至也。故虞夏無刑。周誥詳刑。其時乎。其時乎。而秉天德以化民。其道一也。周官大司寇掌建邦之三典。以佐王刑邦國。一曰刑新國用輕典。二曰刑平國用中典。三曰刑亂國用重典。視國俗爲重輕。制御世之權。不顯之於法。此其大綱。以五刑糾萬民。一曰野刑。上農功而糾其力作。爲野治。二曰軍刑。上順命而糾其失守。爲軍律也。三曰鄉刑。鄉首善上德而糾孝。孝



德之元也。四曰官刑。上功能而糾職。職官之守也。五曰國刑。上愿而糾暴。國兆民所聚。風易澆難淳。故糾暴民歸之愿。爲紀法守也。亦不顯之法。彼司刑之所司者法也。非制法者也。而刑莫先於罷民。罷民者。民情於教。不昏作勞。如疲癯者然。是淫酗之所生。敖狠之所始。民俗所以日偷而不可反也。其害人也。泰而固未麗於刑也。刑之則已重。不刑則亂俗而傷化。故寘諸圜土而收教之。日夜施九職工事焉而役之。用其力以強其罷。書其罪于方版著之背。以耻其心。而冀其改。則教道存焉爾。蓋環而教之也。故圜土非



其獄之謂也。能改者復之。三年不齒。其不能改而出  
圜土者殺。則止惡於萌。坊俗於忽。王教之爲俗化慮  
至遠也。其有爭曲直而訟者。以兩造辯之。入束矢于  
朝。然後聽。蓋兩造而後是非形。橋誣變亂者有質。而  
是非有正也。世未有偏辭而可蔽訟者。故必兩造也。  
其有財訟地訟。當入獄者。以兩劑質之。入鈞金三日。  
乃致於朝而後聽。蓋財訟地訟。非可立判。必兩劑合  
而後有徵無辭也。世未有聽獄而不以傳別書契質  
劑者。故必兩劑也。亦禁訟之道也。禁之教之。使無訟  
也。其罷民之有罪過。未麗於法而害於州里者。桎梏



而坐諸嘉石。嘉石。外朝之坐石。不直。圜土也。役諸司空。不直。明刑施職也。坐以日斷。役以月計。各以其罪之輕重爲差。既役已。使州里任之。而後宥。弼教之道也。凡遠近惇獨老幼之有復於上。而其長弗達者。遽聽之。使民易其長。不聽。使上虐其下。使立肺石三日。而後士聽之。其辭直。則以復於上。而臯其長。達下情之至也。民壅於下而不達。國之大患始此矣。諸侯之有獄訟者。則以邦典定之。六典。所以爲邦國治也。卿大夫之有獄訟。則以邦法斷之。八法。所以爲官府守也。庶民之有獄訟。則以邦成弊之。八成。所以爲萬民



統也。此治獄訟之大凡也。小司寇聽萬民之獄訟。用情而訊之。至旬乃弊。以五聲聽訟求其情。一曰辭聽。謂辭枝辭淫若直也。二曰色聽。謂色怖色忤若定也。三曰氣聽。謂氣懾氣喘若氣壯也。四曰耳聽。五曰目聽。謂視聽直則端。不直則耗惑失常也。其制五刑也。必原父子之親。立君臣之義。以權之。意論輕重之量。慎測淺深之宜。以別之。悉其聰明。致其忠愛。以盡之。猶恐其未也。必三刺三宥三赦以求其衷。三刺者。一訊之群臣。再訊之群吏。三訊之萬民。所謂疑獄汜與衆共之者也。衆疑赦之矣。卽臯麗於罰。衆所宥。雖上



刑下服。舉與衆宥之。所刺。卽下刑上服。舉與衆刺之也。不顯之於法。惟用中於民。故曰國人刑殺之也。猶未也。司刺者。又得以不識過失遺忘而宥之。幼弱老旄。憊愚而赦之。至國有大獄。又得以親故賢能功貴勤賓八辟焉。麗邦法以議之。則其所求諸刑者。爲已悉矣。乃歲孟春。士師以木鐸徇于朝。以邦之五禁。書而懸之象魏。挾日而後歛。以左右刑罰。一曰宮禁。二曰官禁。三曰國禁。四曰野禁。五曰軍禁。國有事。則又爲五戒。以先後之。一曰誓。用之于軍旅。二曰誥。用之于會同。三曰禁。用之于田役。四曰糾。用之于國中。五



日憲用之于都鄙。斯曷非欲法令著揭。無使罪麗於民。欲民協中懷德。而郵無麗于法也哉。乃其鄉遂縣方之獄訟。則各以其士掌其治。聽其獄訟。察其辭。而辨之。異其死刑之皐。而要之。服念至三旬。而後上之。史以獄成告于大司寇。大司寇聽之。棘木之下。群士司刑者咸在。各麗于法。以審蔽之。大司寇以獄成告于王。王命三公參聽之。三公以獄成告于王。王三宥。然後司寇受中。而協日刑殺焉。闢重慎之至也。刑各于其鄉。遂縣都之市。肆之三日。示各與其衆棄之。於觀警。痛深歲孟冬。司寇命羣士計獄弊訟。登中于天。



府明刑殺一天也。三歲大比。司民登下萬民之苑生。以民數詔于司寇。司寇受之。歲孟冬。祀司民之日。獻民數于王。王拜受之。重民也。登于天府。天地之性。民爲貴也。秋主殺以成物。秋官明刑。以生道成民。故民數從秋官獻焉。曰主刑者。民之司命也。用可無愼乎。旣獻籍。司寇以鄉遂縣方民數之貳。頒之其士。使各掌其所治民。而時糾戒之。故民數刑獄之本也。民數具而生養有倫。姦慝有考。暴亂有禁。蓋本正而刑省矣。張批、先敘大小司寇、次叙士師羣士、文旣秩然有倫、而敘羣士處忽挿入司寇文、提司寇作主、挿入命羣士句、又帶言司民、轉入司寇、顧貯開合、渾融圖密、此下本土師之職、却脫去職名、渾淪鋪敘、作一拖



尾機軸  
變化

乃其峻邦國之防以詰姦慝則有之一曰邦  
汙謂刺國幾事二曰邦賊謂圖猶不軌三曰邦諜謂  
爲國內間四曰犯邦令謂不恭上命五曰撓邦令謂  
詐矯上命六曰爲邦盜謂竊國寶藏七曰爲邦朋謂  
比周罔上八曰爲邦誣謂惑俗誣民此八者大亂之  
所伏也故嚴之嚴之者重之也至王制於邦誣持重  
曰析言破律亂名改作執左道以亂政殺作淫聲異  
服奇枝奇器以疑衆殺行僞而堅言僞而辨學非而  
博順非而澤以疑衆殺假於鬼神時日卜筮以疑衆  
殺此四誅者不以聽蓋防之如此乎其防也至其懲



盜賊奸宄之法曰。凡盜賊軍鄉邑及家人殺之無罪。

謂人得而誅也。朝士職文其孥男子入于罪隸。女子入于

舂穀。威之至也。司厲職文殺其親者焚之。殺王之親者辜

之。罪不容於死也。殺人者。踣諸市三日。報虐以威也。

掌戮職文傷人見血而不以告者。攘獄者。過訟者。伺以告

而誅之。已亂之道也。禁殺戮職文凡囚上罪。梏桎而桎中

罪。桎梏下罪。桎。掌囚職文故文王明德慎罰之訓。具見於

周官。迨穆王耄荒。度晚自悼。悔傷五刑之僭。作呂刑

以明刑。咨嗟懇惻。哀敬審克。猶欽恤敬明之遺焉。豈

非聞祈招之後。悔心之所萌耶。其言曰。惟敬五刑。以



成三德。重弼德也。曰何擇非人。何敬非刑。何度非及。  
重任人也。曰惟克天德。自作元命。德刑一天也。乃其  
刑罰而贖也。不開利路。傷教道。貧卽死而富生乎。非  
然也。兩造備矣。五辭師聽之矣。如是而簡孚焉。正于  
五刑。天刑庸得貸乎。非罰所得贖。乃刑疑者有赦。赦  
無罰也。罰疑者亦赦。赦無罰也。有旨無簡者不聽。不  
聽無罰也。其罰者。其不簡者也。不簡者。謂刑與罪兩  
不相直也。刑與罪兩不相直。刑之則已重。貸之則已  
輕。故酌于輕重之中。而以罰。罰也者。制百姓于刑之  
中者也。且其贖也。皆閔實其罪。其比罪也。必無僭無



亂。惟察惟法。非齊惟齊。有倫有要。如是乎。其閔實也。  
不猶古之祥刑也歟哉。故仲尼錄之書。錄之者。重刑  
之道也。至春秋而刑辟大亂。鄭子產鑄刑書以示衆。  
晉叔向詒之書曰。始吾有虞於子。今則已矣。昔先王  
議事以制。不爲刑辟。懼民之有爭心也。猶不可禁禦。  
是故閑之以義。糾之以政。行之以禮。守之以信。奉之  
以仁。制爲祿位以勸其從。嚴斷刑罰以威其滯。猶懼  
其未也。故誨之以忠。聳之以行。教之以務。使之以和。  
臨之以敬。涖之以強。斷之以剛。猶求聖哲之上。明察  
之官。忠信之長。慈惠之師。民於是乎可任使也。而不



生禍亂。民知有辟。則不忌於上。並有爭心。以徵於書。而徵幸以成之。弗可爲矣。夏有亂政。而作禹刑。商有亂政。而作湯刑。周有亂政。而作九刑。三辟之興。皆叔世也。今吾子相鄭國。作封洫。立謗政。制參辟。鑄刑書。將以靖民。不亦難乎。詩曰。儀式刑文王之德。日靖四方。又曰。儀刑文王。萬邦作孚。如是何辟之有。民知爭端矣。將棄禮而徵於書。雖刀之末。將盡爭之。亂欲滋豐。賄賂亟行。終子之世。鄭其敗乎。盍聞之。國將亡。必多制。其此之謂乎。子產復之。書曰。若吾子之言。僑不能及子孫。吾以救世也。旣不承命。敢忘大惠。當



是時子產以救世主法。古縣刑象以勅法不廢。而叔  
向之語主任人。固其本務也。迨于戰國。務刑誅戰伐。  
以斬艾其民。秦文公有三族之辟。至衛鞅臨渭論囚。  
誅傷七百人。渭水盡赤。又增加肉刑。大辟有鑿顛抽  
脅鑊烹之刑。迨秦政益烈。毀先王之法。滅禮誼之官。  
而專任刑罰。重之以胡亥更法律。令有罪者。相坐收  
族。大臣蒙毅等戮於市。始皇子及十公主。託死於社  
也。而行督責益峻。刑者相半於道。死人積市。天下愁  
怨並起。而亡秦族矣。其大臣李斯。郎中令趙高。從諛  
爲峻深者。畢誅夷盡之。好殺者殃。謂天道不神明哉。



漢興高祖初入咸陽。爲三章之約。與天下更始。曰。父老苦秦苛法久矣。誹謗者族。偶語者棄市。吾當王關中。與父老約法三章耳。殺人者死。傷人及盜抵罪。餘悉除去秦法。民大悅。及天下已定。下詔言獄之疑者。吏或不敢決。有罪者久而不論。無罪者久繫不決。自今以來。縣道官獄疑。各讞所屬二千石官。二千石官以其罪名當報之。所不能決者。皆移廷尉。廷尉亦當報之。廷尉所不能決。謹具爲奏。傳所當比律令以聞。後令丞相何。依魏李悝所著法經六篇。據據秦法。宜於今者。益以三篇。作律九篇。然大辟尚有三族之誅。



具五刑。終襲秦故。孝惠時。制爵五大夫。吏六百石。以上及爲吏而上知名罪當械者。皆頌繫上造。及內外公孫耳孫罪當刑。當爲城旦舂者。皆耐爲鬼薪白粲。民年七十以上。若不滿十歲。有罪者皆完之。孝文帝卽位。詔丞相御史。法者治之正。所以禁暴而衛善人也。今犯法者已論。而使無罪之父母妻子同產坐之。及收朕甚弗取。其議丞相上議言。父母妻子同產相坐收。所以累其心。使重犯法。所繇來久矣。如故便。上曰。朕聞之法正則民慤。罪當則民從。且夫牧民而道之以善者。若也。旣不能道。又以不正之法罪之。是法



反害於民爲暴者也。朕未見其便宜孰計之。丞相乃謝言。陛下加大惠天下。使有罪者收。無罪不相坐。甚盛德。臣等愚不能及。於是除孥相坐法。二年。詔曰。古之治天下者。朝有進善之旌。誹謗之木。所以通治道而來諫者也。今法有誹謗妖言之罪。是使群臣不敢盡情而上。無繇聞過失也。其除之。民或詛祝上。又以相約而後相謾。吏以爲大逆。其有他言。吏又以爲誹謗。朕甚不取。自今犯此者。勿聽治。五年。齊太倉令淳于意有罪當刑。逮詔獄。繫長安。意無男。獨有五女子。行會逮。罵其女曰。生子不生男。緩急非有益也。其少



女緹縈自傷悲泣。廼隨其父至長安。上書曰。妾父爲吏。齊中皆稱其廉平。今坐法當刑。妾傷夫死者不可復生。刑者不可復屬。雖欲改過自新。其道亡繇也。妾願沒入爲官婢。以贖父刑罪。使得自新。書奏。天子憐悲其意。遂下令曰。制詔御史。蓋聞有虞氏之時。畫衣冠。異章服。以爲戮。而民弗犯。何治之至也。今法有肉刑。三而姦不止。其咎安在。非乃朕德之薄。而教不明與。吾甚自愧。故夫訓道不純。而愚民陷焉。詩曰。愷悌君子。民之父母。今人有過。教未施而刑已加焉。或欲改行爲善。而道亡繇至。朕甚憐之。夫刑至斷支體刻



肌膚終身不息何刑之痛而不德也。豈稱爲民父母之意哉。其除肉刑有以易之。及令罪人各以輕重。不  
亡逃有年而免。具爲令。丞相張蒼。御史大夫馮敬上  
議言。臣謹議請定律曰。諸當髡者。完爲城旦舂。當黥  
者。髡鉗爲城旦舂。當劓者。笞三百。當斬左止者。笞五  
百。當斬右止及殺人先自告。及吏坐受賕枉法守縣  
官財物而卽盜之。已論復有笞罪者。皆棄市。罪人獄  
已決。完爲城旦舂。滿三歲爲鬼薪白粲。鬼薪白粲一  
歲爲隸臣妾。隸臣妾一歲免爲庶人。隸臣妾滿二歲  
爲司寇。司寇一歲及作如司寇二歲皆免爲庶人。其



亡逃及有罪耐以上不用此令。臣昧死請制曰。可。自漢興。將相大臣有罪。踵秦故。輒械繫治。而梁傳賈誼爲上言。諸侯王三公。天子所改容而禮貌之者也。古天子所謂伯父伯舅也。而今與衆庶共笞。僞音罵黥劓髡刑。棄市之法。非所以令衆庶見也。夫卑賤者。習知尊貴者。一旦之可以加此也。非所以習天下也。非尊尊貴貴之化也。夫遇之有禮。則群臣自意。嬰以廉耻。則人矜節行。帝深納其言。自是遇臣下有體。大臣有罪。多自殺。不卽刑。當是時。帝躬玄默。爲德化。將相皆高帝時功臣。少文多質。懲惡亡秦之政。論議務依寬。



厚。耻言人過。破觚爲圓。斲雕爲樸。網漏於吞舟之魚。而吏治烝烝。不至於奸。黎民乂安。而釋之爲廷尉罪。疑者予民。刑罰大省。天下歲斷獄。裁四百有刑。錯之風焉。可謂和樂者乎。非盛德孰能與於此哉。先是帝嘗行出中渭橋。有一人從橋下出走。乘輿馬驚。騎捕之。屬廷尉。廷尉釋之。治問之曰。縣人也。聞蹕匿橋下。久以爲行已過。出見車騎。卽走耳。釋之。奏此人犯蹕。當罰金。帝怒曰。此人親驚吾馬。賴馬和柔。令它馬固不敗傷我乎。而廷尉乃當之罰金。釋之曰。法者天子所與天下公共也。今法如是。更重之。是法不信於民。



也。且方其時。上使使誅之。則已。今已下廷尉。廷尉天下之平也。平壹傾天下。用法皆爲之輕重。民安所措手足乎。帝良久曰。廷尉當是也。其後人有盜高廟座前玉環者。得之。下廷尉治。按盜宗廟服御物者。爲奏當棄市。帝大怒曰。人亡道。乃至盜先帝廟器。吾屬廷尉者。欲致之族。而君以法奏。非吾所以共承宗廟意也。釋之。免冠頓首曰。法如是足也。且罪等。然以逆順爲差。今盜宗廟器而族之。有如萬分一。愚民恥長陵一杯土。陛下且何以加其法乎。帝乃與太后言。報廷尉當是。蓋守正不阿意如此。景元年。詔曰。吏受所監。



臨以飲食免重受財物賤買貴賣論輕廷尉與丞相  
更議著令吏及諸有秩受其官屬所監所治所行所  
將其與飲食計償勿論他物若買故賤賣故貴皆坐  
臧爲盜中二年改苑刑磔曰棄市勿復磔卽今凌遲四年  
詔曰長老人所尊敬也鰥寡人所哀矜也其著令年  
八十以上八歲以下及孕者未乳師朱儒當鞫繫者  
頌繫之是時除肉刑而笞重名輕刑實殺之斬右趾  
者處斬左趾而下笞五百三百者率多死下詔曰加  
笞與重罪無異幸而不死不可以爲人其定律笞五  
百曰三百三百曰二百尚猶不全至中六年又下詔



加笞者。或至死而笞未畢。朕甚憐之。其減當三百曰二百。當二百曰一百。曰笞者。所以教之也。其定箠令。丞相劉舍。御史大夫衛綰。請笞者箠長五尺。其竹本大一寸。竹末薄半寸。皆平其節。當笞者。笞臂。毋得更人。畢一罪。乃更人。自是笞者得全。然死刑既重用。而生刑又

輕。民益易犯焉。至孝武之世。外事四夷。內盛耳目之好。徵發煩數。民窮犯法。姦軌不勝。於是酷吏尊用。張湯起小吏官。至御史大夫。承上指。舞文巧詆。以輔法。務鉏豪強。兼并。民不安其生。騷動。濟南都尉寧成。治如狼將羊。號稱乳虎。而義縱起群盜。以女兄幸王太后。以鷹隼爲治。破成家。碎之。閭閻奉以惡用。王溫舒酷



烈然諂善事有勢者有勢者犯如山弗治無勢者雖  
貴戚必侵辱姦猾窮治之盡糜爛獄中無出者其爪  
牙吏虎而冠於是吏民益輕犯法盜賊滋起攻城邑  
擅名號縛辱郡太守都尉天子至出繡衣使者持節  
督之然弗能禁也當是時上下相遁至於不振會上  
中自悔而靖然巫蠱之獄皇后太子俱不免而湯以  
懷詐面諛抵死縱棄市溫舒與兩婚家同時罪至族  
光祿徐自爲曰噫夫古有三族而溫舒罪至同時五  
族乎蓋快之也他酷吏亦無能自脫者豈可謂無天  
道哉當是時張湯趙禹更定律令作見知故縱監臨



部主之法急縱出之誅其後姦猾巧法轉相比況禁  
罔寢密律令凡三百五十九章大辟四百九條千八  
百八十二事死罪決事比萬三千四百七十二事文  
書盈於几閣典者不能徧觀郡國承用多舛駁或罪  
同而論異姦吏因緣爲市所欲活則傳生議所欲陷  
則予死比主者莫能宣明議者咸冤傷之宣帝自在  
閭閻知其然及卽位廷尉史路溫舒上書言臣聞秦  
有十失其一尚存治獄之吏是也今吏治上下相毆  
以刻爲明深者獲公名平者多後患故治獄之吏皆  
欲人死非憎人也自安之道在人之死人血流離於



市被刑之徒比肩而立。大辟之計。歲以萬數。此仁聖之所傷也。夫人情安則樂生。痛則思死。捶楚之求而不得。故囚人不勝痛。則飾辭以視之。吏治者利其然。則指導以明之。上奏畏郤。則鍛鍊而周内之。蓋奏當之成。雖使咎繇聽之。猶以爲死有餘辜。何則。成鍊者衆。而文致之罪明也。是以獄吏務爲深刻殘賊。而無極。俗語曰。畫地爲獄。誓不入。刻木爲吏。期不對。此皆疾吏之風。悲痛之辭也。故天下之患。莫甚於獄。敗法亂政。離親塞道。莫甚於治獄之吏。其一尚存。此之謂也。語旣深痛。於是天子下詔曰。間者吏用法巧。



文寢深。是朕之不德也。夫決獄不當。使有罪興邪。不辜蒙戮。父子悲恨。朕甚傷之。今遣廷尉史與郡鞫獄。而任輕祿薄。非稱也。其置廷平秩六百石。負四人。務平刑。稱朕意焉。於是選謁者于定國爲廷尉。求明寬慈恕之吏。黃霸等爲廷平。民自以不寃。每季秋請讞。時帝幸宣室。齊居而決事。獄刑號爲平矣。涿郡太守鄭昌上疏言。聖王置諫爭之臣者。非以崇德。防逸豫之生也。立法明刑者。非以爲治。救衰亂之起也。今明主躬垂明聽。雖不置廷平。獄將自正。若開後嗣。不若剛定律令。律令一定。愚民知所避。姦吏無所弄矣。今



不正其本而置廷平臣恐政衰聽怠則廷平將招權而爲亂首矣於是詔郡國律令可蠲除安百姓者條奏無苛文然昌議患律令繁多欲一刊定以救世可也乃釋人而顯之於法去古意彌遠矣令政衰聽怠豈律令獨無所措其姦乎地節四年詔曰父子夫婦之道天性也雖有禍患蒙死而存之誠愛結於心仁厚之至也自今子匿父母妻匿夫孫匿大父母皆勿坐其父母匿子夫匿婦大父母匿孫罪殊死皆上請廷尉當以聞已又詔郡國歲上繫囚以掠笞若瘦死者所坐名縣爵里丞相御史課殿最以聞元康四年



詔曰朕念夫耆老之人髮齒墮落血氣旣衰無逆亂之心今或罹于法執于囹圄不得終其年命朕甚憐之自今諸年八十非誣告殺傷人皆勿坐當是時西羌反軍乏典京兆尹敞請令諸有臯非盜受財殺人及犯法不得赦者以差次入穀隴西安定等八郡聽贖罪益致穀以備百姓之急便下有司馮翊蕭望之少府李彊議以爲民田陰陽之氣有仁義欲利之心在教化之所助堯禹在上不能去其欲利之心而能令其欲利不勝其好義也雖桀紂在上不能去民好義之心而能令其好義不勝其欲利也故堯桀之分



在於義利而已矣。道民不可不慎也。今欲令民量粟以贖罪。如此則富者得生。貧者獨死。是貧富異刑而法不一也。人情父兄囚執。聞出財得生活。爲子弟者將不顧死。亡之患。敗亂之行。以赴財利。求救親戚。一人得生。十人以喪。如此。伯夷之行壞。公綽之名滅。政教一傾。雖有周召之佐。恐不能復古。古者藏富於民。不足則取。有餘則予。詩云。爰及矜人。哀此鰥寡。上惠下也。又曰。雨我公田。遂及我私。下急上也。今有西邊之役。民失作業。雖戶賦口歛。以贍其困乏。古之通義。百姓莫以爲非。以死救生。恐未可也。陛下布德施教而



議者開利路以傷旣成之化。臣竊痛之。復下其議。以難敝。敝對曰。少府左馮翊所言。常人之所守耳。昔先帝征四夷。兵行三十餘年。百姓猶不加賦而軍用給。今羌虜一隅小夷。跳梁於山谷間。漢但令臯人出財。減罪以誅之。其名賢於煩擾良民。橫興賦歛相萬也。又諸盜及殺犯不道。百姓所疾苦也。皆不得贖。首匿見知縱所不當得爲之屬。議者或頗言其法可蠲除。今因興令贖。便明甚。何化之所亂。甫刑之罰小過。赦薄罪有金選之品。所從來久矣。何賊之所生。敝備臯衣二十餘年。聞罪人贖矣。未聞盜賊起也。竊憐涼州



帔寇方秋饒時民尚饑乏病死於道路。况至來春不早慮所以振救之策而引常經以難。恐後爲重責也。臣敞幸得備列卿。不敢不盡愚望之。疆復爭曰。先帝聖德賢良在任。作憲垂法。爲無窮之規。永惟邊竟之不贍。布令甲口。邊郡數被兵。離饑寒。夭絕天年父子相失。令天下共給其費。固爲軍旅卒暴之事也。聞天漢四年。嘗使死罪人入五十萬錢。減死罪一等。豪強吏民請奪假貸。至爲盜賊以贖罪。其後姦邪橫暴。群盜並起。至攻城邑。殺郡守。充滿山谷。吏不能禁。明詔遣繡衣使者。興兵擊之。誅者過半。然後衰止。愚以爲



此死罪贖之敗也。故曰不便時。丞相相。御史大夫吉。亦以爲无虜且破。轉輸畧足相給。遂不施敞議。孝元時。詔曰。夫律令所以抑暴扶弱。使斯民難犯而易避也。今律令煩多而不約。自典文者不能分明。而欲羅元元之不逮。豈刑中之意哉。其議律令可蠲除輕減者。條奏。於是詔省刑罰七十餘事。然其時有司無仲山甫將明之材。不能因時廣主恩。建明制爲一代之法。而徒鈎撫微細。毛舉數事以塞詔而已。成帝河平中。復詔曰。甫刑云五刑之屬三千。大辟之罰其屬二百。今大辟之刑千有餘條。律令餘萬言。竒請它比。曰



以益滋自明。習者不知所繇。欲以曉喻衆庶。不亦難乎。於以羅元元之民。天絕亾辜。豈不哀哉。其與中二千石二千石博士及明習律令者。議減死刑。及可蠲除約省者。令較然易知。條奏書不云乎。帷刑之恤哉。其審核務準古法。朕將盡心焉。班固志言。漢歷世二百餘載。考自宣昭元成哀平六世間。斷獄殊死。率歲千餘口。而一人耐罪。上至右趾。三倍有餘。古人有言曰。滿堂而飲酒。有一人鄉隅而悲泣。則一堂爲之不歡。王者於天下猶一堂之上也。故一人不得其平。爲之悽愴於心。今郡國被刑而死。歲以萬數。天下獄



二千有餘。所寃死者。多少相覆。歲不減千人。此和氣所以未洽也。原獄刑所以蕃若此者。禮教不立。刑法不明。民多貧窮。豪桀姦私。不輒得獄。豺不平之所致也。書曰。伯夷降典。折民惟刑。言制禮以止刑。猶隄之防溢水也。今隄防凌遲。禮制未立。死刑過制。生刑易犯。饑寒並至。窮斯濫濫。豪桀擅私。爲之囊橐。姦有所隱。則狃而寢廣。此刑之所以繁也。孔子曰。古之知法者。能省刑本也。今之知法者。不失罪末矣。又曰。古之聽獄者。求所以生之。今之聽獄者。求所以殺之。今之獄吏。上下相驅。以刻爲明。欲陷害人而死之。諺曰。鬻



棺者欲歲疫非其憎之以利在於人死也。今治獄亦猶此矣。且除肉刑。本欲以全民也。今去其鉗一。等刑而入於大辟。以死罔民。失本重矣。故死者歲以萬數。刑重之所致也。至穿窬之盜。忿怒傷人。男女淫泆。吏爲姦賊。若此之類。髡鉗之罰。又不足以有懲。故刑者歲十萬數。民旣不畏。又曾不耻。則刑輕之所生也。故桀之能更。公以殺伐爲威。亂名傷制。不可勝條。是以罔密而姦不塞。刑蕃而民愈慢。以世而未仁。百年而不勝殘。誠以禮樂闕而刑不止也。宜惟思清原正本之論。刪定律令。纂二百章。以應大辟。其餘罪於古當



生於今觸死者皆可募行肉刑及傷人與盜吏受賕枉法男女淫亂皆復古刑爲三千章諸詆欺文致微細之法悉與蠲除。如此則刑可畏而禁易避。吏難專殺。法無二門。輕重當罪。民命得全。合刑罰之中。殷天人之和。順稽古之制。成雍熙之化。於戲。咸康刑措風漸睦。頌咎繇。弼教德洽。好生豈緊律之省約而已乎。  
張批上引班固之言。立西漢刑法斷案。未將王莽居固未盡之意。點破六句。洽婉渾中。殊有遺味。  
攝翟義起兵討莽。爲莽所種滅。莽犍甚。求得亡外國者。家族備五毒誅夷之刑。劇於亡秦。世祖興除莽苛政。武帝所置詔獄二十六所。皆併省。下詔曰。頃獄多。



寃人用刑深刻。朕甚愍之。其與中二千石諸大夫博士議郎議省刑罰。三年詔曰。吏不滿六百石。至墨綬。長相有罪。先請。男子八十以上。十歲以下。及婦人從坐者。自非不道。詔所名捕。皆不得繫。當驗問者。卽就驗。女徒月出錢。得顧山歸家。十八年詔。邊郡盜殺五十斛。罪至死。開殘吏妄殺之路。其蠲除同之內郡。又制詔三公。方春東作。敬始謹微。動作從之。罪非殊死。且勿案。皆須麥秋。當是時。大中大夫梁統上疏言。臣竊觀元帝輕殊死刑三十四事。哀帝輕殊死刑八十一事。其四十二事。手殺人者減死一等。後爲常準。故



人輕犯法。吏易殺人。臣聞刑罰不苟。務輕。務其平也。君人之道。仁義爲主。仁者愛人。義者理務。愛人當爲除害。理務亦在去亂。高祖受命。約令定律。傳之後世。可常施行。文帝寬恩。遭時康平。省去肉刑。除相坐之法。他皆率繇舊章。不苟輕也。哀平繼體。卽位日淺。丞相王嘉。輕爲穿鑿。墮先帝舊約。成律百有餘事。不厭人心。謹表其尤害政者。傳奏如左。願宣詔有司。詳擇其中。下公卿議。光祿勳杜林上議言。古者明王。深識遠慮。動居其厚。不務多辟。周之五刑。不過三千大戮。初典詳覽失得。蠲除苛政。更立疎網。海內歡欣。人歸



寬德其後漸以滋章吹毛求疵。詆欺無忌。果桃李茹  
之饋。集以成賊。小事無妨於義。以爲大戮。故國無廉  
士。家罕全行。至法不能令。上下相遁。爲弊彌深。臣愚  
以爲如舊制。無翻移便。統復上言曰。臣之所奏。非曰  
嚴刑。經曰。爰制百姓于刑之衷。衷之言。不輕不重  
之謂也。自高祖至于孝宣。刑惟其衷。海內稱治。初元  
建平。更改輕刑。而盜賊寢起。繇此言之。輕刑之作。反  
生大慝。惠加姦宄。而害及良善也。事寢不報。明帝時。  
詔郡國死罪囚。減罪免笞。與妻子詣五原朔方占著。  
父母同產願從者。恣聽之。死者賜父其妻男一人復。



終其身。詔有司詳刑謹罰。明察單辭。又詔郡國中。都官死罪繫囚。減一等勿笞。屯朔方五原邊。大逆無道。殊死者。並募下讎室。亡命者贖。各有差。是時天子善法理。明於刑典。日晏坐朝。幽枉必達。斷獄得情。獄居前代十之二。然天性褊察。頗好以耳目撻發爲明。近臣尚書以下。常見提曳。於是廷臣悚栗。爭嚴切以避責。疾惡賊吏窮治。其椽史爲左證。周鍊之。楚王英以謀逆自殺。帝怒甚。竟其獄。獄所連逮。率陷入。吏無敢以情恕求者。會楚妖人顏忠王平。引隊鄉侯耿建。朗陵侯臧信。獲澤侯鄧鯉。曲成侯劉建。建等辭實未嘗



與忠平通侍御史寒朗當案獄以建等狀貌試物色忠平二人錯愕不能對朗心傷其冤乃上言建等無姦獨爲忠平所誣疑天下不辜多類此帝召朗入問曰卽如是忠平何故引之對曰忠平自知所犯不道多虛引冀以自明帝曰卽如是何不早奏而久繫四侯爲乎朗曰臣恐海內別有發其姦者故未敢時上帝怒罵曰吏持兩端促提下捶之左右方引去朗曰願一言而死小臣不敢欺獨傷枉濫殺人累上德耳帝曰誰與共爲章對曰臣獨作之帝曰何不與三府掾熟議對曰臣自知當族不敢多汙染人帝曰何故



當族對曰。臣考事一年。不能窮盡姦狀。反爲罪人訟  
寃。故知當族然。臣所以言者。誠冀陛下。一覺寤而已。  
臣見考囚任事者。咸其言妖惡大故。臣子宜同忿疾。  
今出之。不如失入。可無後責。是以考一連十。考十連  
百。利人死自安。又公卿朝會。陛下問以得失。皆長跽  
言舊制大逆禍及九族。陛下加恩。裁止其身。天下幸  
甚。及歸舍。口雖不言。往往仰屋竊歎。誠知其多寃也。  
顧無敢悟陛下爲言者。言盡於此。臣卽死無悔。帝意  
解。曰。置之。會大旱。明德皇后爲上言。楚獄濫所致。帝  
惻然悟。夜起徬徨待旦。卽幸洛陽獄。錄囚。理出千餘。



人天爲立雨。會稽太守尹興有時名。名著楚籍中。徵詣廷尉獄。郡曹掾陸續主簿梁宏勲從考。備五毒肌肉消爛。終無異辭。續母至京師覘之。獄事急。無緣與續聞。但作饋食付門卒進之。續見考辭色慷慨。惟見食對之泣。悲不自勝。使者怪問故。續曰。母來不得見。故泣耳。使者怒。以獄吏卒通內外。召案之。續曰。因食餉羹。識母所自調。故知來耳。使者曰。鈎食何自知。母調乎。續曰。母截肉未嘗不方。斷葱以寸爲度。是以知之。使者問謁舍。續母果來。陰嘉之。乃具上其事。天子愍興赦焉。時楚獄下。楚郡覆案。郡太守袁安始至。不



人府。先下獄案獄。理其無左驗者。條上請出之。府丞  
掾皆叩頭爭。以爲阿附反虜。法同罪。不可以身試也。

安曰。太守當爲天子廣恩。理冤抑。柰何顧身謀。坐視  
數千人冤不理乎。有不合者。太守自坐之。不相及也。

遂分別具奏上。帝感悟報許。諸以身守法。不阿意如

此。可以守官矣。

寒朗字伯奇。魯國薛人。  
安至司徒。謨具帝紀中。

章帝卽位。

尚書陳寵勸上改苛法。廣恩曰。臣聞先王之政。賞不

僭。刑不濫。與其不得已。寧僭無濫。往者斷獄嚴明。所

以威懲奸慝。奸慝旣平。必濟之以寬。陛下卽位。弘崇

晏溫。而有司執事。未悉奉承。用法猶尚深刻。斷獄者



急於榜格酷烈之痛執憲者。煩於詆欺放濫之交。因  
公行私。逞縱威福。夫爲政猶張琴瑟。大絃急者小絃  
絕。故子貢非臧孫之猛法。美鄭僑之仁政。陛下宜隆  
先王之道。蕩滌煩苛。輕薄箠楚。以濟群生。廣至德。上  
納寵言。詔曰。律云掠者。唯得榜笞立。又令丙箠長短  
有數。自往者大獄已來。考掠殊酷。鉗鑕之屬。慘苦無  
極。念其痛毒。怵然動心。書曰。鞭作官刑。豈云若此。宜  
及秋冬理獄。明爲其禁。又詔曰。書云。父不慈。子不祗。  
兄不友。弟不恭。不相及也。往者妖言大獄。所及廣遠。  
一人犯罪。禁至三屬。莫得垂纓仕宦王朝。如有賢才。



沒齒無用。朕甚憐之。非所謂與之更始也。諸以前妖  
惡禁錮者。皆蠲除之。明棄咎之路。但不得在宿衛而  
已。先是斷獄報重囚。常盡三冬之月。天子下詔言。春  
秋於春月。每書王者重三正。慎三微也。律十二月立  
春。不以報囚。月令冬至之後。有順陽助生之文。而無  
鞠獄斷刑之政。朕咨訪儒雅稽之典籍。以爲王者生  
殺宜順時氣。定律。無以十一月十二月報囚。會元和  
二年旱。議者以爲斷獄不盡三冬。故陰氣發泄。以致  
災旱。宜如故。便章下公卿議。尚書寵奏曰。夫冬至之  
節。陽氣始萌。天以爲正。周以爲春。十二月陽氣上通。



地以爲正。殷以爲春。十三月陽氣已至。天地已交。萬物皆出。蟄蟲始振。人以爲正。夏以爲春。三微成著。以通三統。周以天元。殷以地元。夏以人元。若以此時行刑。則殷周歲首。皆當流血。不合人心。不稽天意。諄之大者也。禮云。仲冬之月。身欲寧。事欲靜。若以降威怒。不可謂寧。若以行大刑。不可謂靜。議者咸曰。旱之所繇。咎在改律。臣以爲殷周斷獄。不以三微。而化致康平。無有災害。自元和以前。皆用三冬。而水旱之異。往往爲患。繇此言之。災害自爲它應。不以改律。帝納之。遂爲求制。寵爲廷尉。數議疑獄。親爲奏。每附經典。務



恕在寬奏當上。輒從。永元中。上書言。臣聞儀禮三百。威儀三千。故甫刑大辟三百。五刑之屬三千。禮之所去。刑之所取。失禮則入刑。相爲表裏者也。漢興以來。三百二年。憲令稍增。科條無限。律文有三家。其說各異。宜令三公平定律令。應經合義者。可使大辟二百。耐罪贖二千八百。合三千之文。它條法溢於甫刑者。悉刪除之。刑與禮相應。以易萬人視聽。致刑措之美。傳之無窮。會寵罷事寢。其後寵子忠復爲尚書。自以世典刑辟。用務於寬。詳倣先廷尉意。奏上三十二條。爲決事比。以省請讞之弊。又上除蠶室刑。解贓吏三。



世禁錮。狂易殺人得減等。母子兄弟相代死。聽赦所

代者皆施行。

寵沛國浚人咸曾孫

永平中。竇憲出擊匈奴。騎都

尉秦彭爲副。在別屯。以法殺將。固欲自擅。疾之。劾彭

擅殺請誅。下公卿平議。奉車都尉郭躬明法律。召與

議。議者請如固劾。躬議曰。法。彭得斬將。彭無罪。廷難

之曰。軍征諸較尉。一統於督。彭無斧鉞。何得專誅。躬

對曰。較尉統於督。不得專者。謂在行間也。別將則專

軍。軍成敗呼吸不容間。必先聞則後時。且漢制。檠戟

卽斧鉞。彭不合罪。必罪彭。是使後別將繫不得自展。

衄師之道也。帝乃從躬議。有兄弟共殺人者。罪未有



所歸。帝以爲兄不訓。第報兄重而減第死。中常侍孫章宜詔。誤兩報重。尚書奏章矯制。當腰斬。帝下躬躬當罰金。曰。法令有故。有誤。章傳命謬。於事爲誤。非實矯也。矯者僞命以行私。帝曰。章與囚同縣。安詎知非故耶。躬曰。周道如砥。其直如矢。君子不逆詐。聖王法天用刑。不可於法外生意。帝曰。善。遷躬廷尉。躬矜恕。乃條律文。重可從輕者。四十一事。奏之。事皆施行。章和元年。赦天下繫囚。在四月丙子前。死罪減一等。勿笞。詣金城實邊。而文不及。亡命未發覺者。躬上封事曰。聖恩所以減死罪。令戍邊者。重人命故也。今死罪



亡命無慮萬人。又自赦以來。捕得甚衆。以詔令不及。皆從重論。天恩蕩宥。死罪已下。並蒙更生。而亡命者獨坐。非所以需無私之澤也。臣以爲死罪於赦前犯。赦後繫者。宜皆勿咎。詣金城以全人命。躬穎川陽翟人。和帝

末。有司以麥秋許案驗薄刑。遂盛夏斷獄。司徒魯恭上疏言。臣伏見詔書。敬若天時。憂念萬民。非罪殊死。勿案驗。所以助天和。崇仁德而利黎民也。舊制至立秋。乃行薄刑。自永元來。改用孟夏。刺史太守。不深惟憂民息事之原。進良退殘。乃以盛夏追集農人。拘對考驗。連滯無已。司隸典司京師。四方是則。而近於春



月行部託言勞來無惻隱之實煩擾郡縣廉考非急逮捕株連上逆時氣下傷農業臣竊惑之請自今決獄考案皆以立秋爲斷追于漢末宦豎貴戚橫恣無簡有司見惡不舉與同殘賊崔實憤憤左以爲德教除殘猶梁肉已疾宜峻深於刑矯一時之枉著政論以激世然非久鉤黨禍起覆用峻法株考海內人譽公忠憂國之臣令死徙廢錮并宗親殘滅也豈不哀哉乃知政失俗敗不原本所自而欲以偏指議刑無適而可也董卓之亂典憲焚薙無所準中郎應邵刪定律令爲漢儀表上之日國之大事莫尚於刑憲刑



憲也者。決嫌疑。明是非。制百姓于刑之衷者也。故膠東相董仲舒爲世大儒。老病致仕。朝廷數有疑事。詔遣廷尉湯造問得失。於是作春秋折獄二百三十二事。具以經對。誠重獄也。邇者逆臣蕩覆前代。刑書靡有孑遺。典獄者不復能深惟古義。動以臆見決事。臣竊不自揆。撰具律本章句。尚書舊事。廷尉板令決事。比司徒都目五曹詔令。蠲其重複。爲之節文。又集駁獄疑議八十二事。其見漢書者二十五。見漢記四。皆刪叙潤色。以全本體。其二十六。博採古今環瑋奇事。文章炳曜德義可觀。其二十七。臣所創造。詩云。雖有



姬姜無棄。憔悴雖有絲麻。無棄菅蒯。以代匱也。今法故殘逸。是敢露其蠢愚。廁于明哲。雖未足紀綱國體。宣治王事。庶幾觀察。增闡仁化。詔頒其書。理官舊章。存焉。是後百姓頑弊。生刑不足以懲惡。自名儒大才。鄭玄陳紀之徒。咸以爲宜復古肉刑。少府孔融議以爲古者淳龐。善否區別。吏端刑清政。無過失。百姓有罪。皆其自取。故肉刑行焉。末世陵遲。風化壞亂。政撓其俗。法害其人。故曰。上失其道。民散久矣。而欲繩之以古刑。投之以殘棄。非所謂與時消息者也。昔紂斲朝涉之脛。謂爲無道。夫九牧之地。千八百君。君各則



一人是下常有千八百紂也。求俗休和不可得已。且被刑之人。慮不念生。志在思死。趨惡之徒。莫復歸正。夙沙亂齊。伊戾禍宋。趙高英布爲世大患。雖行肉刑不能止人。遂爲非也。其勇如鬻拳。信如卞和。智如孫臏。忠如巷伯。才如史遷。達如子政。一罹刀鋸。沒世不復。雖太甲之思庸。穆公之悔過。陳湯之都賴。魏尚之守邊。皆無所復施。故明君遠度深惟。棄短就長。不苟革其政事。得寢具。後魏公操問於中丞陳群曰。先鴻臚以爲肉刑加於仁恩。孤頗以爲然。中丞能申論之乎。群對曰。臣父紀以爲漢除肉刑而增笞。本興仁惻。



而死者更衆。所謂名輕而實重也。名輕則易犯。實重則傷民。且殺人償死。制也。至於傷人或殘毀支體。而裁剪毛髮。非其稱也。若用古刑。使淫者下蠶室。盜者刖足。可求放穿窬之姦。夫三千之屬。雖未可悉復。若斯之類。宜先施行。漢律。殊死之罪。仁所不及。其餘逮死者。易以肉刑。則所刑之與。所生足以相貿。今以笞死之法。易不殺之刑。是重人支體。而輕人軀命也。議者惟鍾繇與群同。餘皆以爲未可復。罷議。黃初中。太傅繇復理前議。以爲歲可生三千人。下廷議。司徒朗以爲。今吳蜀未平。而先議刑辟。恐所減之文。未彰於



百姓而肉刑之間已宣於寇讎。非所以來遠人也可。寬繇所欲輕之死罪。及減死刑髡嫌於輕者。倍其居作之歲。內有以生易死之恩。外無以刑易杖之駭議者。多是卽言事遂寢。初魏李悝著法經六篇。以爲王政莫急於盜賊。故律首盜賊。盜賊囚捕在頃刻。故著囚捕二篇。其輕狡越城博戲假借不廉淫蕩踰制。爲雜律一篇。又具其加減故所著裁六篇而已。商君傳習以爲秦相蕭何定律。除參夷株連之罪。增部主見知益事律。擅興廐戶三篇。合九篇。叔孫通益律所不及傍章十八篇。張湯趙禹增至六十篇。傳以令三百。



篇決事比九百有六卷。馬鄭諸儒章句又十餘家。至是所當用二萬六千餘條。七百七十餘萬言。令繁難遵。尚書衛覬言。刑法者國家之所貴重。而私議之所輕賤。獄吏者百姓之所縣命。而選用者之所卑下。此王政之所以敝也。請置律博士。轉相授教。俾通知制。刑作憲之本。有詔司空群等。刪約漢法制新律十八篇。州郡令四十五篇。尚書官令軍中令百八十餘篇。序畧言舊律所以難知者。以篇少故也。篇少則文荒。文荒則事寡。事寡則罪漏。今集罪畧例。以爲刑名。冠於律首。盜律有劫掠。恐喝和賣。科有特質。皆非盜事。故分以爲劫掠律。賊律有欺誑。許僞。論封矯制。因律有詐僞。生死許自復。免事類猥多。故分以爲詐律。賊律有伐樹木。殺傷人畜產及諸亡命。金布律有毀傷



亡失將官財物故分爲毀亡律、囚律、有告劾傳覆、  
律、有告反逮受科、有登聞道辭故分爲告劾律、囚律、  
有繫囚鞠獄之法、興律、有上獄之事、科、有考事報讞、  
宜別爲篇、故分爲繫訊斷獄律、盜律、有所監臨受財、  
枉法、雜律、有假借不廉、令乙有所呵人受錢、科、有使、  
者驗賂事相類、故分爲請賕律、盜律、又有教辱強賊、  
興律、有擅興律、興律、有出賣呈、科、有擅作修舍事、  
故分爲擅興律、興律、有乏徭稽留、賊律、有儲待不辦、  
廐律、有乏軍興及舊典、有奉詔不謹、不承用詔書、漢、  
氏施行、有小愆、乏及不如令、輒劾腰斬、不宜爲後法、  
故別爲雷律、秦代舊有廐置乘傳副車食厨、漢以費、  
廣稍省、故後漢但設騎置、除廐律、今恥其合科者、以、  
爲郵騎、令其告及速驗、別入告劾律、上言變事、以爲、  
變事、令以警事告急、與興律、烽燧及科、令者、以爲警、  
事律、盜律、有還贓界主、金布律、有罰贖入貴、以呈黃、  
金爲償、科、有平庸坐贓事、以爲償、贓律、律初制、無免、  
坐之文、張湯趙禹始作監臨部主見知故縱之例、其、  
見知而故不舉劾者、與同罪、失不舉劾、各以贖論、後、  
科爲之制、而免坐繁多、宜總爲免例、以省科文、爲、  
免坐律、凡所定增十三篇、就故五篇、合十八篇、於



正律九篇爲增。於旁章科爲省矣。晉初命賈充等更定。就漢九章增十一篇。改舊律爲刑名法例。辨囚律爲告劾繫訊斷獄。分盜律爲請賊詐僞水火毀亡。因事類爲衛官違制。撰周官爲諸侯律。合二十篇。六百三十條。蠲其苛穢。在於益時。其後明法掾張瑨爲律注表上之。具終始往復之變。其言曰。刑者司理之官。理者求情之要。理爲至精。不可以一方行。律爲至變。不可以一體守。或計過以配罪。或化俗以循常。或隨事以盡情。或恥舍以從時。或推重以立防。或引輕以就下。諸公私廢避之宜。除削重輕之變。皆當臨時觀



疊用法平詮采其根芽致之機格故奉憲者其諸操  
刀引繩乎刀妄加則傷物繩妄彈則侵直矣夫梟首  
者惡之長斬刑者罪之大棄市者死之烈髡作者刑  
之威贖罰者誤之誠王者之立五刑所以實君子而  
齊小人也故有勅慎之經擬周易變通之體焉刑而  
上者謂之道刑而下者謂之法化而裁之謂之變推  
而行之謂之通舉而措之民謂之政故刑殺者冬震  
曜之象髡鉗者秋凋落之變其贖失者春陽悔吝之  
疵也此法律之義也其條曰律始於刑名所以定其  
制也終於諸侯所以畢其政也  
自始及終往而不窮不離于法律之中其知而犯之  
謂之故意不以爲然謂之失違忠欺上謂之謾背信



藏巧謂之詐、虧禮廢節謂之不敬、兩怒相挺謂之鬪、  
 兩和相害謂之戲、爲變斬擊謂之賊、不意誤犯謂之  
 過逆、節絕理謂之不道、陵上僭貴謂之惡逆、將害未  
 發謂之戕、唱首先事謂之造意、二人對議謂之謀、制  
 衆建計謂之率、不和謂之強、攻奪謂之畧、三人謂之  
 羣、凡非其物謂之盜、貨財之利謂之賊、凡二十者、律  
 義之較名也、大律者、當慎其變、審其理、若不承用詔  
 書、無故失之刑、當從贖、謀反之同伍、實不知情、當從  
 刑、此故失之變也、卑與尊鬪、皆爲賊、鬪之加兵刃水  
 火中、不得爲戲、戲之重也、向人室廬道逕而射、不得  
 爲過、法之禁也、都城人衆中走馬殺人、當爲賊、賊之  
 似也、過失似賊、戲似鬪、鬪而殺傷傍人、又似誤、盜傷  
 縛守似強盜、呵人取財似受賕、因辭所連似告劾、諸  
 勿聽治似故縱、持質似恐喝、如此之比、爲無常之格  
 也、五刑不簡、正于五罰、五罰不服、正于五過、意善功  
 惡、以金贖之、故律制生罰、不過十四等、死刑不過三  
 徒、加不過六、囚加不過五、累作不過十一歲、累笞不  
 過千二百、刑等不過一歲、金等不過四兩、月贖不計  
 日、日作不拘月、歲數不疑閏、不以加至死、并死不復  
 可累者、故有并數不可并數、乃累其家、以加諸者、但



得其加同者連得其本不在次者不以通論以人得  
罪與人同以法得罪與法同侵生害死不可齊其防  
親疎公私不可常其教禮樂崇於上故降其刑刑開  
於下故全其法是故尊卑敘仁義明九族親玉道平  
也律有事狀相似而罪名相涉者若加威勢下手取  
財爲強盜不自知爲縛守中有惡言爲恐喝不以  
罪名呵爲呵人以罪名呵爲受賕劫召其財爲持質  
此六者以威勢得財而名殊者也卽不求自與爲受  
賕所監求而後取爲受賕輸入呵受爲雷難歛人財  
物積藏於官爲擅賦加毆擊之爲戮辱諸如此類皆  
爲以威勢得財而罪相似者也姦人心愧而面赤內  
怖而色奪論罪者務本其心審其情精其事近取諸  
身遠取諸物然後乃可以正刑仰手似乞俯手似奪  
捧手似謝擬手似訴扶臂似自首攘臂似格鬪矜莊  
似威怡悅似福喜怒憂懼貌在聲色姦貞猛弱候在  
視息出口有言當爲告下手有禁當爲賊喜子殺怒  
子當爲戲怒子殺喜子當爲賊諸如此類自非至精  
不能極其理也律之名例非正文而分明也若八十  
非殺傷人皆勿論卽誣告謀反者反坐十歲不得告  
言人卽奴婢捍主主得喝殺之賊燔人廬舍積聚盜



贓五疋以上棄市。卽燔宮府積聚盜亦當與同。毆人教令者與同罪。教令人毆其父母不可與行者同得重也。若得遺物強取強乞之類無還贓法隨例畀之。法律中諸不敬違儀失式及犯罪爲公爲私賊入身不入身者皆隨事輕重。已尚書郎杜預復爲注表上取法則以例求其名。

之曰法者繩墨之斷例。非窮理盡性之書也。故文約而例直。聽省而禁簡。例直易見。禁簡難犯。易見則人知所避。難犯則期於措刑。刑之本在於簡直。故必審名分。審名分者必悉小理。古之刑書銘之鍾鼎鑄之金石。所以遠塞異端。使無滯巧也。今所注皆綱維法意。格之於名分。使用之者執名例以審趣令。伸繩墨之直。繇析薪之理也。詔頒行。惠帝之代。政自群下議。



獄各以其情輕重。而刑法滋亂。元康四年。風廟闕瓦墮。免太常太祝失火。延燒屋三間。在廟北重墉外。用爲負責。尚書劉頌上書言。法理有窮塞。故大臣釋其滯事。時有權宜。故人主定其斷。大臣釋滯。若公孫弘議郭解之獄是也。人主定斷。若漢高帝正丁公之刑是也。自非斯格。不得絀法。夫人君所與天下共者。法也。已令四海。不可以不信。上古議事以制。不爲刑辟。夏殷及周。書法象。魏所遇之世異也。今敦朴不及中古。而執平者。欲各適其情之所安。則已過矣。請自今定罪。皆當以律正文爲斷。若無正文。依附名例。名例



不及皆勿論。下詔申勅焉。晉元承制。百度剏創。議斷不以法。大理衛展上書條擿。近施行詔。有考子證父死刑。若鞭父母。問亾子所在者。有舉家逃亾。家長坐斬者。皆傷順破教。不可用。令蠲除之。舊制繫囚。不卽承款。加測罰。日一上。起自晡至漏下二鼓。梁定律令。分其刻數。日再上。廷尉以爲過輕。請詳議。都官尚書周弘正曰。凡小大之獄。必依準五聽。驗其虛實。豈可恣令考掠。以判刑罪也。且測罰昉自近代。起晡迄二更。非常人所堪能。故重楚之下。危墮之士。無不誣服。而冤濫始此矣。且人體力既有強弱。而立意亦復兩



途貫高榜笞刺。斃身無完膚。戴就針。薰盆極困。篤不移。豈以測掠長短。而能得情實哉。書曰。與其殺不辜。寧失不經。宜依新著令。朝晡二時爲允。梁武好文。固優惜朝士。有犯者多屈法申之。而寒苦獨峻。其後帝專精佛戒。疎簡刑法。斷死刑。涕泣而宥之。公卿大臣承旨。咸不以鞠獄爲意。於是王侯益橫。都市至白日殺人。法滋枉濫。馴亂以亾。元魏孝文。慎重刑罰。大刑多令覆訊。當奏上。囚繫者積年。群臣頗以爲言。帝曰。滯獄誠非善治。不猶愈於倉猝而濫乎。人情幽憂。則思善。故智者以圜圉爲福堂。朕苦之。欲使改悔。而矜



恕可施耳。時始頒百官俸。而守宰之貪猾者。往往得重譴。他吏民犯法。率從寬疑。罪讞多減。死徙邊。天下大辟。歲不過五六十人。正始初。定柳桠之制。先是法官州縣以令

鞭杖有定式。惟柳無成制。爲重柳。以纆懸四頸。傷肉至骨。至是尚書令高肇請造大柳。長丈三尺。喉下長丈。通頰。木各方五尺。擬大逆外叛。餘以次而輕。大都北朝自聰勒符生。無慮

皆嗜殺。至是而刑始平。其後文宣酷暴。爲大鑊長鋸。

判確之刑。手自屠裂。北齊以亾。周宣屠戮親屬。廣刑

書。更峻其法。作霹靂車。以威婦人。後周以亾。隋文初

興。除前代梟裂剝割。及鞭笞數百之慘。實始第笞桠。

徒流。死爲五刑。衷後代循用。而帝性本猜忍。當盛怒。



立於殿廷刑殺。有四人共盜一棖。三人同竊一瓜。事發立決。施于煬帝。淫刑以逞。行轅裂臍首之刑。天下潰叛。故世之論嚴刑者曰秦隋。以秦隋嗜殺人爲甚也。然身弑國亡。適爲漢唐毆矣。唐祖入關。除苛政。約法十二條。已又頒新格五十三條。惟吏受賕詐冒盜府庫物。罪不原。餘悉蠲去。隋法已又詔裴寂等更撰律令。本前代法。故爲書。一曰名例。二曰禁衛。三曰職制。四曰戶婚。五曰廩庫。六曰擅興。七曰賊盜。八曰鬪訟。九曰詐僞。十曰雜律。十一曰捕亡。十二曰斷獄。一以漢九章爲守。律家以爲集大成焉。其刑五。一曰笞。笞之言耻也。凡



過之小者、捶撻耻之、漢用竹、後世更以楚、書曰、朴作教刑是也、二曰杖、杖者持也、可持以擊、書曰、鞭作官刑是也、三曰徒、徒者奴辱之、四曰流、書曰、流宥五刑、謂不忍刑殺、宥之于遠也、五曰死、古大辟之刑、自隋以前、死刑五、曰磔、絞、斬、梟、裂、而流徒之刑、鞭笞兼用、數皆踰百、隋定笞刑五、自十至于五十、杖刑五、自六十至于百、徒刑五、自一年至于三年、流刑三、自一千里至于二千里、死刑二、絞、斬、唐皆因之、貞觀中、增損舊律、降大辟爲流者九十二、流爲徒者七十一、而條令甲一千五百四十六事以爲令、又刪武德以來勅三千餘條以爲格、又取尚書省、列曹及諸寺監十六衛計帳以爲式、凡京師之囚、刑部月一奏、御史巡行之、決死刑、濫以御史金吾、在外則州上佐、餘皆判官濫之、五品以上罪論死、乘車就刑、大理正濫



之。或賜死于家。凡囚已刑無親屬者。將作給棺。瘞于京城西七里外。有輓銘。上揭以榜。令家人得收葬焉。凡府寺州縣長官。五日一慮囚。夏設漿飲。月一沐浴。咨疾病。給醫藥。重者釋桎梏。家一人入侍。職事散官三品以上。婦女子孫二人入侍。刑部歲以正月遣使巡行覆獄。所至閱獄囚。杻較饋餉。治不如法者。枹較鉗鎖。皆有長短廣狹之制。量刑罪輕重用之。二十日一訊。三訊而止。數不過二百。凡杖長三尺五寸。削去節。訊杖大頭徑三分二釐。小頭二分二釐。常行杖大頭二分七釐。小頭一分七釐。笞杖大頭二分。小頭一分有半。死罪較而加杻。官品勲階第七而上輕罪。及十歲以下。八十以上者。



若廢疾侏儒懷妊者皆頌繫以待斷。居作者著鉗若較京師隸將作女子隸少府縫作旬給假一日。臘寒食二日。流移人在道疾病婦人免乳祖父母父母男女奴婢死皆給假授程糧。非反逆緣坐役六歲縱之。特恩三歲縱之。時太宗尤矜恤刑獄以爲古斷獄。必訊於三槐九棘之下。與三公九卿同其慮。詔天下諸死罪咸中書門下五品以上及尚書平議其疑獄讞大理寺大理寺不能決尚書省集議錄送秘書省凡奏報諸疑獄法官得執異議以爭五品以上犯公罪流私罪徒皆別引奏已詔死刑雖令卽決仍三覆奏。



已謂群臣曰。朕以死刑至重。令三覆奏者。欲服念愼。熟也。近引奏雖三覆。而頃刻已訖。則何暇慮詳哉。自今限二日五覆奏。決日尚食勿進酒肉。教坊太常勿舉樂。諸州死罪三覆奏。日亦如之。其後河內人李好德坐妖言下獄。大理卿張蘊古以爲好德病狂。督法不當坐。治書侍御史權萬紀劾蘊古相州人。好德兄厚德方爲相州。故蘊古爲左右。蘊古死。帝怒。殺蘊古。旣而悔之。故有是令。然自是官以失出爲戒。吏罔稍密矣。帝久而覺之。以問大理卿劉德威。德威對曰。律失入減三等。失出減五等。今失入無罪。而失出爲大。



辜。故吏多深文。帝矍然命失出入。皆如律。先是相玄  
齡等定律令。以爲舊法。兄弟異居。陰不相及。而謀反  
連坐皆死。祖孫有陰。而法止配流。爲未衷。今定律。祖  
孫與兄弟緣坐皆配流。從之。而刑部以爲兄弟沒官。  
輕。請改從死。下公卿議。時議者以漢魏晉法皆坐死。  
欲如舊。給事中崔仁師曰。三代之盛。泣辜解網。父子  
兄弟。罪不相及。陛下酌前王令典。革弊蠲苛。當世爲  
天下法。以廣恩。奈何以亾秦酷法。爲隆周中典。循行  
之乎。且父子天屬。兄弟異形。誅父子。足以累其心。此  
而不顧。於兄弟何有。太子司議郎敬播議曰。兄弟雖



孔懷之重。然比之父子則輕。故生則異室。死則別宗。今高官重爵。蔭唯子孫。不相及也。而連坐則從。無乃已迫乎。於是詔反逆止沒官如新律。它惡言抵罪者。兄弟止配流。方更定律時。議絞刑之屬五十。皆免死。斷右趾。帝謂侍臣曰。肉刑廢久矣。今復之。吾不忍也。尚書珪。瑤。叔達對曰。以死刑而斷之趾。寬之也。死而得生。何憚於斷趾。且所爲斷趾者。欲見者知懼。止不爲惡也。後蜀王府法曹參軍裴弘獻駁律令不便者四十事。詔玄齡等與弘獻重刪。於是議臣言古者五刑。則居其一。今法以笞杖徒流死爲五刑。而加之刖。



足是六刑也。遂除斷趾。爲加役流三千里居作。於是定律五百條。於隋律減大辟入流凡九十三條。減入徒七十一條。而法號益寬矣。帝嘗閱明堂鍼灸圖。見人五臟皆附於背。鍼灸失致死。喟然歎之也。曰。鞭笞者五刑之所輕。而死者人之所甚重也。今法有鞭背。安得犯至輕之刑。而令輕抵死哉。詔罪人毋得鞭背。爲著令。已覽大理所署月囚狀。有情可矜而律重者。吏當如律。帝惻然問少卿胡演曰。斷獄惟案律文。卽情在所矜。而不敢違法。此冤濫所自始也。演對曰。此非臣下之所得專也。問王珪。珪對曰。惟慎選溫良平



怨之吏往卽訊得兇者賞則刑平矣帝曰善時有敕  
資蔭者多詐序聽自首不首者死尋有詐蔭事覺大  
理卿冑當以爲當流帝怒曰朕敕不首者死而斷之  
流是示之以不信冑知敕如是故當之何也冑曰法  
如是而足臣法官獨不敢虧法耳且勅或一時喜怒  
所發法乃明主所以布大信於天下也陛下以一朝  
之忿而輟殺之旣知其不可裁之以法而流此所謂  
忍小忿而存大信也帝遲回者久之曰法有失賴公  
而正竟從冑議故一時斷獄之吏多平良稱職獄少  
寃濫斷死刑歲纔二十有九人有刑措風焉

時青州有謀逆



者州縣迹捕支黨甚衆、獄行皆滿、詔殿中侍御史崔  
仁師按覆之、仁師至、悉去其桎械、與食飲湯沐、從訊  
之、獨坐其渠魁十餘人、餘平遣以聞、命詔使往決、大  
理卿伏伽謂仁師曰、君平反者多、人情願生、見徒侶  
多免、誰肯有讓死者、恐不無失出憂、仁師曰、凡治獄  
當以仁恕爲本、豈可自規免罪、知其冤不爲伸耶、萬  
有一誤、縱得罪、以一身易十囚之死、死所願也、及敕  
使至、青訊諸囚、皆曰、崔公仁恕、無枉濫、請就死、無一  
人異、辭者高宗初、詔律學博士撰律疏、詔大臣增格敕、頗

留意於慎刑、及武后擅國內行不治、多諱惡、疑天下  
圖已、欲大誅殺以震之、開告密之令、用周興來俊臣  
索元禮之流、爲爪牙窮治、撰羅織經數千言、用網羅  
無辜、所構造皆有支節、其訊囚有定百脉、突地吼死  
豬愁、及是實求破家等名、皆淫刑、於是先誅宗室貴



戚數百人次及公卿大臣數百家。其刺史郎將而下不可勝數也。一時讐服而興俊臣諸酷吏亦以次受誅。夷是時惟司刑丞徐有功持平恕守法數以死。悟后意。天元德在焉。語具帝紀。及有功傳中。景雲二年。法官言散騎常侍嚴善思刺汝州時。與譙王重福游。召至京。奏東都有兵氣。而不言重福逆。匿反者當絞。給事中韓思復駁奏曰。善思往在先朝。屬帝氏謀危宗社。善思能先覺。詣相府論聖躬必登宸極。其交重福。凡以謀帝氏也。其謁見不奏聞。事未前知也。勅追善思書至立發。何懷逆節。寧卽奔命。請下刑部集官。



議有司持前議致刑。思復又駁曰。臣聞刑人於市。必衆論僉同。蓋借天下之耳以聽。借天下之目以視。使刑協于中也。列官分職。有賢有親。其議善思。多從末減。令見無禮於君。寧肯雷同不異乎。輿論一乖。非刑惟允。詔免善思死。流靜州。開元初。詔黃門監盧懷慎等更定律令。名開元格。宰相宋璟著後格。李林甫著新格。皆以開元名篇。前廣州督裴伷先坐罪。當決杖。兵侍郎張說曰。臣聞刑不上大夫。爲其近於主也。曩臣巡邊時。聞姜皎於朝堂決杖。皎官三品。又嘗有微勞而杖之。非古者議勲議貴之意。今不可悔已。伷先



罪願幸寬帝從之御史大夫宋璟坐監朝堂杖輕謫官相懷愼方卧疾亟表言璟明時重器所坐者小望上矜錄帝納之時夷州刺史楊濟以贓抵死詔減死決杖流占州侍中裴耀卿曰刺史縣令爲民父母爲風化具瞻今使裸躬受笞迫辱甚矣死本天下所共惡然屈挫牽頓民庶嗤笑是忘免死之恩而有傷心之痛恐非所以崇守長勸風俗之意也又雜犯抵死無杖刑死刑三覆奏乃決今非時不覆而杖之或致非命非所謂寬凡大暑決杖重多死秋冬乃全請自今貸死決杖當盛夏並停全再生之實恩武彊令裴



景僊犯乞取贓積至五千匹。亡命捕得之。帝怒。命棄市。大理卿李朝隱曰。按律枉法贓至十五疋。罪死。乞取贓卽數千疋。罪止流。又景僊曾王父故司空寂。方締構初。實參元勳。革命中家陷羅織。爲酷吏誅夷。略盡獨景僊存。又世嫡也。藉令當死。猶冀弘宥。况無死比乎。幸上裁哀。帝不許。朝隱持之曰。令乞取處斬。後有枉法。何以加之。且近準敕。杖者聽減。流者給程。以明大恩。何於景僊獨過常法。如令寂勳盡棄不錄。則叔向之賢。何稱于世。若赦之。鬼殆其餒。而得減死配流。當是時。玄宗勵精圖治。常自選太守縣令。理民隱。



二十年間獄稱平明每歲斷天下死獄止五十八人  
大理獄相傳鳥不棲止其樹至是有烏鵲巢云其後  
李林甫相起大獄以制異已任吉溫羅希奭爲御史  
主獄煅煉深淺惟林甫願指人謂之羅鉗吉綱所殺  
傷數百十人而天子以太平自詡志窮兵於是巨盜  
起而天下被其毒矣至德中復東京百官受安祿山  
父子僞命者皆素服請罪詔禮部尚書李峴兵部侍  
郎呂諲爲詳理使與御史大夫崔器條按以聞器諲  
言諸陷賊官皆從逆罪當死峴以爲賊陷兩京時上  
南巡守獨人自救死非邪心且此屬多陛下親戚或



勲舊子孫。今槩以叛逆論死。乖仁恕之道。且河北未  
 平。群臣陷賊者衆。今寬之。足開自新之路。若盡誅之。  
 是堅其附賊心也。書曰。殲厥渠魁。脅從罔治。誣器守  
 文。不達大體。惟陛下圖之。於是詔以六等定罪。惟佐  
 逆有顯迹者斬。餘以次配流。時峴以殿中侍御史。李  
 栖筠爲副。持議平恕。故人皆德峴。疾誣器之刻深。將  
 軍王去榮以私怨賊殺其邑令。當死。帝以其善用礪  
 石。欲原之。中書舍人賈至爭之曰。去榮爲逆。漸不可  
 下。下以其一能而免之。諸軍中伎擊絕倫者何限。  
 令人各恃其能而犯上。將何以禁之。若止捨去榮而



誅其餘是法令不一而誘人於罪也。若盡捨之將難  
乎其爲上。扞圜者必衆。必痛誅而後已。是惜一去榮  
之材不殺而殺十數如去榮之材者也。所傷滋多。且  
律殺縣令。罪列十惡。以爲逆也。世未有逆於此而順  
於彼。亂於富平而治於陝郡。悖於縣君而忠於大君  
者。惟法以裁恩。下其議。太子太師常見素等議以爲  
法者。天地之大典。雖在帝王。猶不敢動用非法。况於  
小人得擅殺自恣乎。陛下爲天下主義。無頗愛而寬  
之。將法不行人道屈矣。夫國以法理。軍以威勝。有恩  
無威。慈母不能畜其子。惟裁斷。帝竟貸之。代宗慈多。



不忍而政刑不肅。或問之。憮然曰。艱難時。念無以逮下。而峻急刑法。朕不忍也。故法不勅而中衰。貞元中。勅曰。犯罪罪至於死極矣。猶先決杖。嘻。其甚也。後今罪死者。停決杖。太僕卿趙縱爲奴告。下御史劾治。奴畱內侍省。縱尚父子儀壻也。相鑑言貞觀時有奴告主反者。太宗曰。謀反理不獨成。當有佗人覺發。何藉奴告。乃著令。奴告主者斬。繇是賤不得干貴。下不得凌上。教本修而悖亂不作。頃者長安令李濟以奴得罪萬年。令霍晏坐婢成譴。悖慢成風。遂使輿臺下類。爲主所畏。不可長也。元年五月。詔書奴婢告主。非謀



叛。同自首法。繇是獄訟衰息。今縱事非叛逆。奴畱禁中。縱獨下獄。人情之所大不厭也。且將帥功名。孰大於子儀者。冢土僅乾。兩壻旣坐罪矣。假令縱實犯法。事不緣奴。尚宜錄勲念亡。以從蕩宥。况爲奴所愬耶。陛下方責武臣以討賊人。見元勲如此。恐不無解體之心。於勸忠亦少狹矣。帝納之貶。縱官奴杖死暴尸。憲宗時。相吉甫爲帝言。陛下頃降令。蠲租賑饑。恩厚深而刑典未舉。中外懈怠。宜肅刑罰以明威。相絳折之曰。今天下雖未大治。亦不甚亂。於古爲國用中典之時。豈必肅刑。且自古欲治之君。必先德化。至暴亂



之世。乃專刑罰。吉甫言非是。帝曰善。非久。司空頤亦勸帝峻刑。帝退謂宰司曰。于頤大是邪人。此其意欲朕失天下心耳。吉甫爲愧汗數日。先是武后時。下邳人徐元慶父爽爲縣尉趙師韞所殺。元慶變姓名爲酒家保。志復讎。久之。師韞以御史舍亭下手刃之。而自囚請死。下廷議。左拾遺陳子昂請誅之。而旌其閭。從之。爲著令。其後禮部員外郎柳宗元傷子昂議。爲未允。啓黷刑之路。傷孝子之心。著論駁之曰。禮之大本。以防亂也。若曰。無爲賊虐。凡爲子者。殺無赦。爾之本。亦以防亂也。若曰。無爲賊虐。凡爲治者。殺無赦。



其本則合其用則異旌與誅不得而並焉誅其可旌  
茲謂濫黷刑甚矣旌其可誅茲謂僭壞禮甚矣若師  
韞獨以私怨奮吏氣虐非辜州牧不加罪刑官不知  
問上下蒙冒額號不聞而元慶能處心積慮以衝讎  
人之胸介然自克卽死無憾是守禮而行義也執事  
者宜有慙色將謝之不暇而又何誅焉其或父不免  
於罪師韞之誅不愆於法是非死於吏也死於法也  
法其可讎乎讎天子之法而戕奉法之吏是悖驚而  
凌上也執而誅之所以正邦典而又何旌焉禮之所  
謂復讎者謂冤抑沈痛而號無告也非謂抵罪觸法



陷于大戮而曰彼殺之我乃殺之不議曲直暴寡脅  
弱而已也夫不忘讎孝也不愛死義也元慶能不越  
於禮服孝死義是必達理而聞道也議者反以爲戮  
黷刑壞禮不可以爲典請下臣議附于令有斷斯獄  
者不宜以前議從事時衢州人余常安父叔皆爲里  
人謝全所殺常安八歲謀復讎卒殺全刺史元錫奏  
輕比刑尚書李鄲執不可卒抵死又富平人梁悅父  
爲秦果所殺悅復讎諸縣請罪下尚書省議職方員  
外郎韓愈議曰子復父讎見于春秋于禮記周官見  
于若史不可勝數未有非而罪之者也宜莫詳於律



而律無其文。非闕也。蓋以爲不許復讎。則傷孝子之心。許復讎。則人將倚法顓殺。而無所禁止。夫律雖本於聖人。然執而行之者。有司也。丁寧其義於經。而深沒其文於律。使法吏一斷於法。而經術之士。得引經以議之。周官曰。凡殺人而義者。令勿讎。讎則死。義者宜也。明殺人而不得其宜者。子得復讎也。此百姓之相讎者也。公羊子曰。父不受誅。子復讎可也。不受誅者。罪不當誅也。誅者。上施下之辭。非百姓相讎也。周官凡執仇讎者。書於士。殺之無罪。言將復讎。必先言於官。則無罪也。臣愚以爲復讎之名。雖同。而其事各



異。或百姓相讎。如周官所稱。可議於今者也。或爲官吏所誅。如公羊所稱。不可行於今者也。周官稱將復讎。先告若孤稚羸弱。抱微志而向敵人之便。卽何得自言。未可以爲斷。然則殺之與舍。不可一途取也。宜建其制曰。有復父讎者。事發具其事。下尚書省集議。酌其誅貸。庶經律無失指。有詔悅志在徇節。本無求生。寧失不經。減死流循州。太和六年。興平縣民上官興。醉殺人而逃。聞械其父。乃自歸京兆尹杜棕。御史中丞宇文鼎。以其就刑。免父。請減死。詔兩省議。兩省議以爲殺人者死。百王所同。若許以生。是誘之殺人。



不可聽也。文宗以興免父囚，近於義。杖流靈州。自唐季迄五代，刑峻深，視人命如牲牢，而國祚日促。周世宗周范質議律條猥繁，輕重失衷，詳定之曰刑統行焉。宋祖卽位，與天下更始，尤注意刑辟。哀矜無辜，嘗讀虞書，喟然嘆曰：堯舜之世，四凶之罪止於投竄，何近代法網之密耶？故自開寶來，犯大辟非情理深害者，多得貸死。懲五代牧守皆武人，多率意用法，擅殺生，著令諸州所決大辟，奏當上，咸委刑官詳覆，吏坐深文故入，終屏斥不復。甚者流放，繇是吏皆持平法網，晏寬焉。三年，詔曰：王者禁人爲非，乃設法令。臨下



以簡務在哀矜。竊盜本非巨蠹。而近制特峻。殊乖矜恤之旨。自今竊盜論如律。開寶二年。以盛暑。手詔下兩京諸州。令長吏督獄。椽五日一簡視。洒掃獄戶。洗滌桎械。貧者給飲食。病給醫藥。輕繫卽決遣。毋淹留。自是歲仲夏。申勅官吏。以爲常。待公卿百僚。尤恩無面詆。無扑責。殿廷而賊吏時於法外致刑。乾德中。峽州民以私怨殺一家十二口者。引赦當原。帝曰。豈有殺一家十二口。可以赦論者。令赦之。寃死者何辜。命誅之。開封婦人有殺夫前室子者。吏當徒二年。特命處死。詔自今繼母殺夫前妻子若婦。以凡人論。太宗



在御獄慮讞常躬聽臨決多燭微隱祁寒盛暑雨雪愆候輒親錄繫囚多所原減下詔曰諸州大獄吏不親決胥吏旁緣爲奸逮捕證佐踰年歲未具自今長吏每五日一慮囚情符者立決復制聽獄之限大事四十日中事二十日小事十日其違限者準官文書稽程律論嘗閱諸州所奏囚簿有禁繫至三百人者乃詔州縣囚五日一具禁放數白州州獄別置曆長吏三五日一引問疏理月具奏刑部閱其禁逮多者命官卽訊州官吏論如律開封有女子李擊登聞鼓言無子身癰病恐一旦死無所歸乞裁哀詔京尹爲



措置而李無他親。有司逮其父繫之。李又詣登聞鼓。訴父被繫狀。帝駭曰。此豈當禁繫者。輦轂下事。得登聞者。尚如此。天下至廣。何得無枉濫乎。卽日遣殿中侍御史十四人。分慮諸道囚。又諭宰臣言。每閱大理奏案。節目小未備。必移文覆案。動涉數千里。獄久淹可哀也。其詳酌非人命所繫。卽量罪區分。勿復鞠。又詔刑部置詳覆官五員。專閱天下所上案牘。勿他遣。又慮刑部理官多舞文巧詆。置審刑院於禁中。讞之。御史臺更置推勘官二十員。以京朝官充。諸州有大獄。乘傳往卽訊。每陛辭。賜裝錢。臨遣諭之曰。無留滋蔓。



無留獄。決獄必躬親。母倚吏還。召問所推事。必平允。  
乃已。諸路各置提點刑獄。稱監司。諸州司理親選用。  
秩滿必召問。律令格式。不明習者。予殿考。蓋欽慎如  
此。淳化中。兩京江浙大饑。民相率持挺投券富民家。  
取其粟。坐強盜棄市者甚衆。知蔡州張策推官江嗣  
宗議取爲首者杖脊。餘論杖以請。帝喜曰。彼皆平民。  
迫饑寒。苟取餼糧圖活耳。未減善。惟兇狠難制。爲間  
里患苦者。便宜行下詔褒美焉。真宗覽囚簿。憮然動  
容。謂宰執曰。雜犯死罪。目至多。吏心一不盡者。枉矣。  
故事。死刑獄具三覆奏。關重慎也。命申行。宋初律令



因唐舊而別敕下諸路若州縣者詔類編僅百有六條與新定刑統三卷頒行淳化中倍之咸平中增至萬八千五百五十五條後滋繁多議者言方今斷天下之獄在大理詳天下之刑在審刑二者海內刑獄之準平繩直也今律令具有明文制勅隨復更改故定罪之要言勅則多指故失言罪則皆坐公私配情輕而法重則近侮文按狀重而條輕則爲失實此之審克尤在盡心入私則犯徒奪官爲公則贖金記過稱故則不得末減稱失則例有降差四者定罪輕重之所懸也承前科斷初無著令法官隨時裁處易於



差殊望令刑官定公私故失名罪條奏從之。已仁宗以律令猶繁欲刪定。或問之。以爲先朝詔令不可以輕變也。帝以問宰臣。相曾曰。此儉人惑上之言。令法官得倚法侮法。上下其手耳。咸平中。編敕刪繁密。以一視聽。何爲不可。於是詔中外議勅制得失。凡咸平儀制及異時約束條編之曰附令。視祥符勅損百有餘條。大辟之屬十有七。流之屬三十有四。徒百有六。杖二百五十。笞七十六。配隸之屬六十三。下詔言敕令者。治世之經也。數動搖則衆聽惑。其何以訓。廼天下之官常。其自今一以令格從事。有司毋輒請刪改。



然至慶曆又復刪定。嘉祐又增刪。至熙寧置局修敕。詔迨元豐始成。自名例以下至斷獄十有二門。麗刑名輕重者皆爲敕。自品官以下至斷獄三十五門。約束禁止者皆爲令。有等級高下者皆爲格。有體制模楷者皆爲式。蓋宋世以律不足周事情。凡律所不載。一斷之於敕。而律恒存於敕之外也。刑侍郎燕肅言。竊攷唐貞觀中。斷死罪刑二十九。開元中五十八。今天下生齒不加於唐。而天聖三年。斷死刑至二千四百三十有六。視唐且百倍。誠以秦讞法廢而朝廷用刑。欽恤之意。更有所失也。請定秦讞令。於是下詔言。



朕念生齒日蕃。抵冒于罔者衆。而有司避微文。一致之重辟。豈稱朕好生之意。其令天下死罪。情理可矜。及刑名疑難決者。具案聞貼。奏請讞。而疑事上者。無慮得減死矣。已。又詔曰。先王用法簡約。使人知禁而易從。後代設茶酒鹽稅之禁。奪民利而刑辟滋章。今編敕多出律外。又數改更。卽官吏尙不能周曉。况於百姓。一陷于理。未繇自贖。豈禮樂之化。尚鬱而專任刑罰之弊歟。漢文帝聽天下入粟塞下贖罪。其科條過誤犯禁令者。別聽贖。時天子至篤厚。優游寬容。務弘人惡。許人陰私。下詔言。蓋聞治古君臣同心。上下



輯睦無告訐之俗何德之盛也。朕嘉與公卿大夫同臻斯道而教化未洽。中外群臣上章多暴揚難驗之罪。詆欺闇昧。苟陷善良。朕甚惡焉。又赦令與天下更始。而有司多舉按赦前之事。非信命令。重刑罰。使人洒心自新之意也。自今言官非事關朝政。餘細故勿舉。有告言人赦前事者。反坐之。內供奉楊守珍使陝西督捕盜賊。請擒獲者。付凌遲示警。帝不許。送所司依法處決。仍除轡剛之刑。已又詔強盜不持杖。不得財者。徒二年。得財及傷人者死。餘第減。獲刼盜雖情深害。毋得擅凌遲。刑部嘗薦詳覆官遷官。帝記其姓。



名曰是甞失入人罪何得遷舉者罰金廣州司理參  
軍陳仲約誤入人死罪當贖帝曰死者不可復生朕  
未甞敢詈人以死况濫用重辟乎今獄吏失入雖暫  
廢而它日復叙豈先王重民命之意特命鑄官又詔  
刑部覆大辟有能駁正死罪囚五人以上得歲滿改  
官蓋宋自藝祖至三宗皆性於仁厚皆重慎刑獄間  
聞樂生重犯有請讞平允獄多以不寃蓋實收善人  
爲邦百年之效云嘉祐中諸路災敕京西州軍貧戶  
以年饑盜斛斗非傷王者免死刺徒非首謀者又減  
等決放知諫院司馬光曰周禮荒政十有二散利薄



征緩刑弛力舍禁去幾率皆推寬大之恩獨於賊盜愈急者蓋以饑饉之歲人易爲暴盜賊必多不可長也頃州縣官吏不知治體務爲小仁遇凶年劫奪妄意寬縱以致盜賊公行及不能禁則又廣有收捕重加刑辟或死或流然後定今若明降敕文豫言減等是勸之也百姓乏食惟當輕徭薄賦開倉廩振貸以救其死不當使自相挺刃爲亂梯今府界京東京西水災特甚嚴刑法以除盜賊猶恐春冬之交饑民嘯聚不可禁禦又可勸乎臣恐國家始於寬仁而終以酷暴意在活人而殺人滋多也乃爲寢前令京東素



多盜。法盜作不時獲。以百日爲三限。限滿者抵罪。盜未得而被刑者。滋衆。韓魏公琦知鄆州。令獲他盜者聽比率除過盜。以多獲而捕盜者益稍寬。嘉祐未判刑部李誕言。今歲中死刑二千五百六十人。其弑父母。世父母。若戕兄弟。若夫殺妻。殺妻父母。若妻殺夫。凡百四十。故謀鬪殺。凡千有三百。刼盜。九百七十。姦。亾命。百有十。夫風俗之薄惡。莫甚於骨肉之相殘。而衣食之窮。莫急於盜賊與犯法者之衆。豈刑罰不足以止姦。而教化未能導之於善歟。願詔刑部類次天下所斷大辟。上之朝。以助觀省。從之。神宗卽位。詔曰。



獄者民命之所繫也。比有司簿錄天下歲獄。囚多瘦死。深惟獄吏簡視不親。使吾元元橫罹其凶。書不云乎。與其殺不辜。寧失不經。諸州軍及巡司院。歲具在獄死者之數。上之簡察。以差次行罰。罪人獄死二人。推吏獄卒杖六十。增一人。已詔曰。大理有獄尚矣。今中都官有劾治。加一等。皆寓繫開封。獄囚猥多。難於隔訊。盛夏疾疫。傳染致死。朕甚愍焉。其復大理獄置卿一人。少卿二人。丞四人。主簿訊三司諸寺監吏。輕犯卽決。餘悉送大理獄。時天子留意法令。有司進擬多所是正。嘗謂侍臣曰。法出於道。人能體道。則用法非法也。道也。故防於未



然之謂敕禁於已然之謂令。設於此待彼之謂格。行於此使人效之之謂式。豈亶法哉。蓋德意至深。安石在中書時。以其意論正刑名。置編敕所。相公亮頗以兼庶獄爲非。安石曰。有司用刑不當。則審刑大理論正。審刑大理用刑不當。下廷議。廷議不當。中書不論。奏取決。人主將於何取之。何謂中書不當正刑名乎。是時中書上刑名未安者五事。其一。歲斷死刑。幾二千人。比前代殊多。如強劫盜。並有死法。而情狀輕重絕懸。皆抵死可哀。若情輕之人。別立如前代鈇右趾之比。足以止惡而除害。其禁軍非在邊屯戍而逃者。宜



可更寬首限。其二。徒流折杖之法加密。良民偶一抵冒。致終身之辱。愚頑之徒。一時創痛。而終無愧耻。若使情理輕者。復古居作之法。遇赦第減日月。使善良者。知改過自新。而凶頑者。有所憚避。其三。刺配二百餘條。中情理輕者。可復古徒流移鄉之法。俟再犯。乃後決刺。其配隸並減就本處。惟凶頑自從舊科。其編管人。傳詣他所立役作時限。無髡鉗。其四。令州縣考察士民。有孝悌力田。爲衆頌其知者。給帖付之。偶犯令情輕得議贖。深害者如科。其五。奏請以時刪定科條。詔付編敕所詳議。初韓絳嘗請復肉刑。下廷議。曾



布上議曰先王之制刑罰未嘗不本於仁然而有斷  
肢體刻肌膚以至於殺戮此非其得已也人有罪贖  
刑不足以有懲則以墨劓剕宮大辟斷之其審適輕  
重則又有流宥之法焉至漢文除肉刑定笞筆之令  
後世因之以爲律大辟之次處以流刑代墨劓剕宮不  
惟非先王流宥之意而又失輕重之義斯已謬矣古  
者鄉田同井人安土而重遷流之遠方徒隸困辱至  
終身不復故足懲也近世之民輕去鄉井轉徙四方  
不足爲難而居作一年卽聽附籍比於古益輕况析  
杖之法於古爲鞭扑輕刑不能止惡故犯者日衆其



終必至於殺戮而後已。是欲輕而反重也。今大辟之日。猥多。恥其情可貸者。處以肉刑。則人之獲生者必衆。若軍士。亡去應斬。賊盜。賊滿應絞。則刑其足。示懲姦。良法應死。而情輕。處宮刑。痛之。至於劓墨。則用刺配。降此而後。爲流徒杖笞之罪。則制刑衷而有等矣。議上不果行。先是。祖宗時。群臣犯法。大者下御史臺。小者下開封府。大理寺。未嘗特置獄。卽元惡大憝。未嘗有凌遲刑。熙寧中。知杭州祖無擇逮下秀州獄。光祿卿苗振下越州獄。直史館蘇軾下御史獄。皆臺臣承秉國者意。爲彈射。而詔獄亟用。於是承詔置獄。



日制勘院。繇中書推行。日推勘院。獄竟。乃罷而大獄日繁。餘杭主簿李逢。以謗讟指斥坐謀反。提點刑獄王庭筠。按無反迹。請編配。遣御史臺覆治。中書并劾庭筠。庭筠懼。自經死。逢辭連宗室秀州團練使世居。醫官劉育。河中觀察推官徐革等。數十人。並逮獄。命中丞鄧綰。同知諫院范百祿。與御史徐禧雜治之。獄具。世居賜死。逢育革並凌遲。餘腰斬。有差。時相安石與惠卿交惡。旣去位。惠卿深傾之。有李士寧者。故挾術出入貴人門。嘗謁世居。母康。以仁宗御製詩贈之。百祿以士寧故。與安石善。逢惠卿意。劾士寧熒惑世



居致不軌。宜知謀酷。推問不承。論徒。禧乃奏。士寧所  
贈詩。實仁宗御製。今獄官以爲反。因意深害。臣不敢  
阿徇。詔詳劾。百祿坐落職。雖士寧倖免。而逢獨以口  
語狂悖。麗極法。天下寃之。晚興獄勘。知湖州蘇軾披  
詩案。而慘覈極矣。元祐更改。置訴理所。申熙豐寃濫。  
而中丞劉摯言。元豐編修勅令。猥增條目。離析舊制。  
意苛文晦。宜貶。慶曆嘉祐來。新舊敕芟訂成。一代典。  
詔從之。已紹聖復熙豐之制。元祐法悉燔燬。激射旁  
午。改更紛然。而刑制大紊。惇京下布之倫。憑依播惡。  
置者詳元祐訴理局。置同文館獄。皇城司獄窮極慘。



烈於是謗誣上逮宣仁下及元老廢黜母后囚放正  
士而黨禍大昌崇寧中下詔言比降特旨處分而三  
省引令格爲沮抑是以有司之守格人主之威柄也  
夫擅殺生之謂王能利害之謂王何格令之有焉其  
定受勅官稽滯者罪於是議格手敕一時者杖一百  
一日徒二年二日加一等三日以大不敬論於是假  
天子威靈箝臣工束之法而虐焰益張迨宋南逆檜  
媚岳武穆忠力爲國幹梗和議也構大獄死之又構  
趙鼎子汾與諸忠賢張浚胡寅李光等五十人謀爲  
逆欲種誅獄成會檜疾病不能署奏當乃寢嗚呼詔



獄之流禍至此哉。本所自興，獨繇柄臣籍以威縉紳。鉅士論快一時，私淺鮮耳。而朋黨之禍遂起，毒痛于賢善，殄瘁其邦家，詎不痛哉。高宗性仁柔，用法每從寬厚，擇儒平恕者爲獄官。入對，卽戒以毋慘毒。士曹有能平反重獄者，輒轉官。乾道中，議者言刑莫重於大辟，獄吏鍛鍊周內，何能無冤。令甲審錄時，令主者讀要辭，務於詳徹。令囚得自通重情，以合其款。蓋示之死生之分，決於頃刻，必使其輸服。雖卽死而無所憾也。而獄吏暉於平反，摘畧疾讀，離絕其文，嘈雜其語，造次而畢，呼曰書字。茫然引去，指日聽刑。人命所



繫輕忽如此甚可痛也。請自今廷錄時擇有口無害吏依句宣讀令伏辜者得壹通訴詔從之大理丞石邦哲言令甲決大辟聽市酒食聽親戚辭訣不得窒塞口耳蒙蔽面目及喧呼奔逼而有司置不行臬撫二州所決囚有以姓名畧同而誤抵重辟者儻令不窒塞蒙蔽詎致此極哉乞申嚴前令違者以違制論從之。然是時法令雖具吏一切以例從事法當然而無例事輒尼不行吏往往匿例以邀賂旣得賂乃出其例行之法利甚矣我

聖祖登極初卽置登聞鼓于午門外已設于長安門



令科道官并錦衣衛日守直通下情已爲大明令  
百四十五條頒天下制曰律令者治天下之法也

令教之於先而律齊之於後古法律至簡後滋煩多  
甚至有不能通其義者何以使人知律意而不犯哉  
是啓吏姦而陷民於罪也朕甚愍之今所定令芟就  
簡質使天下易知而難犯以毋麗于律庶幾予期于  
無刑之意復下詔言頃因戡亂以軍律用刑殊乖  
平允自今務從中典重刑頒秋後無非時決傷天和  
已命申書省詳定律法諭之曰凡立法貴簡當  
使人易曉若條緒繁多或一事而兩端可輕可重奸



會吏得因緣爲奸則所爲桀殘暴者反以賊良等也  
卿等宜盡心參究凡刑名條目逐日上朕親酌議焉  
六年律成刑尚書劉惟謙具表言

皇上登大寶而來保乂臣民孳孳弗怠訓迪群工諄復  
千言惟恐有犯慈愛仁厚之意溢於意表是大舜惟  
刑之恤之義也矜閔愚民陷于罪戾法司奏讞惻然  
弗寧多所寬貸是神禹見辜而泣之心也惟會墨吏  
承踵元弊乃不得已假峻法以繩之是以臨御以  
來屢詔大臣更定新律至五六易弗倦茲特勅  
臣等會衆律重修以協厥中近代比例之繁姦吏可



資以出入者咸革。臣以洪武六年冬十有一月受

詔。明年二月書成。篇目一準唐舊。自名例以至斷獄十

九篇。中采用已頒舊律二百八十八條。舊令改律二

十六條。因事制律三十一條。掇唐律補遺百二十

條。合六百有六條。爲三十卷。每一篇成。輒繕寫上

上揭之西廡壁端。親御翰墨。爲之裁定。聖慮淵深。

稽天揆人。成百代之憲。具易書之奧。好生之德。洽于

民心。俾日月所照。霜露所墜。有血氣者。莫不改過遷

善。臻雍熙之治。何其盛哉。詔頒行。已定設六部。復

更定。以吏戶禮兵刑工爲六類。析篇目爲十九約。條



爲四百六十折戶婚爲戶役婚姻分闔訟爲闔毆訴  
訟分廩庫爲廩牧隸兵倉庫隸戶分職制爲公式改  
屬吏受賊隸刑凡刑之名五曰笞曰杖曰徒曰流曰  
死死二等流三等徒杖笞各五等死刑最重者曰凌  
遲徒流重者曰遷徙曰充軍凡慙惡之戮十曰謀反  
曰大逆曰謀叛曰惡逆曰不道曰大不敬曰不孝曰  
不睦曰不義曰內亂凡貪墨之賊六曰監守盜曰常  
人盜曰竊盜曰枉法曰不枉法曰坐贓名雖沿唐而  
因時定制緣情制典自有法律而來未有也十七年  
詔建三法司于太平門鍾山之陰命之曰貫城下



勅言貫索七星如貫珠環而成象名天牢中虛則刑平。  
官無邪私中有星卽刑繁有星而明爲貴人無罪而  
獄。今法天道置法司爾法司官各勵乃心慎乃事法  
天道行之如貫索星之中虛然庶不負朕肇建之意。  
欽哉已。

上念元政弛玩吏民染夷俗者久而反側未盡平必紀  
綱肅而後惠政從可施也頗用重典以肅朋姦又異  
時見貪殘吏殃細民深痛意恨之於種誅尤嚴天下  
凜凜十九年倣周洪大誥治作大誥昭示禍福喻所  
爲震刷刮磨之意於天下令誦習畏法序略言古田



在於官官法井以給田民驗丁以受田農工受田之日驗能準業各知稼穡之艱難四民專務以三而士凡諸農商出於農行賈於農隙此王教之精也故人用鄉德五福嚮應今朕不才能申明我古先帝王之舊思夫愚婦效習夷風彛倫不叙是致壽非壽富非富康寧不自如攸好德鮮矣考終命罕聞本古五刑而不治雖出五刑誅之亦何惡焉今復出是誥大播寰中敢有不遵者以其罪罪之而勅刑曹庶獄論當訖因有大誥者減等無者加等欲人喻戶曉爲福壽之寶已以大誥行良民遵奉欽敬之心如流趨下



申惡之徒欲遷善而未能唯是姦頑輕生易死犯若尋常仍蹈前非不旋踵發覺及禍也復作續誥三編訓切之蓋諄懇至於此晚讀老子書言民不畏死奈何以死懼之惻然感遂霽威從寬焚錦衣衛非法獄具悉以所繫囚送部臺審理而諭刑部論四諸武臣並親審餘引奏詣承天門外命行人持訟理幡出欲自理者聽入訴諸無罪當釋者持平政幡宣德意遣之其在重辟府部院六科通政司詹事府雜聽之審錄其寃狀以聞三十年詔刊布大明律頒天下而條令誥附其中



上親製序言朕有天下倣古爲治明禮以導民定律以繩頑著令久矣而犯者相繼於是出五刑酷法以治之欲民畏而不犯作大誥昭示使知所趨避又有年然法律在有司民不周知特勅六部都察院將大誥內條目撮要刪傳律他禁例盡革刊布中外使臣民知所遵守而祖訓首章言朕有起兵至今三十餘年理天下庶務人善惡情僞靡不備歷中奸頑之徒情犯深重灼無疑者令法外用刑意使人知警而不取易法然此特一時權用非守成之君所宜用常法也今後子孫止守律大誥並不許用黥刺劓刑閹割



之法云何。嗣君生長內宮。人情善惡。未能周知。恐一時施用不當。誤傷良善。臣下敢有奏用此刑者。文武群臣。卽時劾奏。論凌遲處死。申又言。凡聽獄訟。貴明不明。則刑罰不中。久天必怒焉。有大獄當面訊防。構陷鍛鍊之弊。益重愼至矣。先是刑尚書濟言。

聖明治在復古。事務簡要。今諸司刑牘。動千萬言。類泛濫失本實。盍禁之。

上曰。虛詞失實。浮文亂真。自今有以繁文出入人罪者。罪無赦。命刑科會諸司議獄牘式。示中外。已。

上諭濟言。凡論四當原情。毋刻深。蓋人命至重。常存平。



恕之心。猶恐失之。况深文乎。昨民有子犯法。父行賄求免者。有司欲并論。朕以父子至親。子論死而父救之情也。故但論其子而赦父。自今凡論獄。必詳讞覆奏。而後論。毋重傷人。已濟議法巧密。

上曰。刑罰禁民爲非。使之遠罪。非以陷民也。張密罔何爲乎。竭澤而漁。害及鯢鰕。焚林而田。禍及麋鷃。巧密之法。民何以自全。濟慚謝。時兩浙運使龔坐黨獄。

上惻然曰。龔元忠臣。福壽之子。其貸之以勸忠。遷雲南。仍別。勅西平侯英善遇之。寧夏衛千戶何忠。以所部卒缺伍。坐譴詣自訴。



上曰爾非故萬戶何勝孫乎對曰是也。

上曰往爾祖克滁和二州與有勞及渡江爾父亦從朕有功俱陳亾可念也貸忠罪。陞衛指揮世襲賞延世如此。祁陽民郝安童父戍定遼死當補伍以母老無他兄弟且有姑守節老無依陳乞聽終養乃補戍上憐之得復除處麗水民有賣卜于富室者不售詣

闕告大姓陳公望等五十人謀聚衆爲亂。命錦衣

較迹捕知縣倪孟賢召父老詢云無之微服身自往察見其男女織作同平時慨然曰。朝廷命孟賢令

是邑者欲撫輯民使安於田里也今無罪蒙惡逆之



誅而不告。豈爲民父母之意哉。令耆老自詣訊具。疏聞。

上命法司理妄告者罪。召耆老見。賜酒食及道里費。

遣之。掌行。郊壇。皇太子從指道。傍荆楚曰。古用此。

爲扑刑。恥能去風。雖傷不害。蓋德念至於此。永樂靖

難後。一垂意於矜慎。詔法司問囚。一依大明律擬

罪。毋妄引榜文條例爲深文。諭三法司言。天氣向

熱。獄淹囚久。死刑需秋後。餘輕罪卽疏決。其未能決

者。聽出獄。需後審。大理卿薛昂等。奏各布政司具

獄上。罪死者二百餘人。請分遣御史臨決。



上顧謂都御史瑛曰。人命至重。絕不可復續。治獄得情難。鞭扑箠楚之下。罪成於鍛鍊者。比比此二百餘人中。豈必無寃。遣御史宜具以慎刑之意。書諸簡授之。使論決時。核情辨釋。無或枉濫焉。

上嘗御奉天門。錄囚多矜宥。慮尚有枉抑。召錦衣衛

鴻臚寺官諭之曰。囚久於獄。困矣。念雖枉。不求辨。

又初至朕前。或畏威不敢言。爾等宜以朕意開諭。令有寃自白。無諱。每三法司慮囚訖。請處決。命行。

人持節問寃抑者。許自陳。陳寃者。詳慮十日。奏寔。

奪。



昭皇帝卽位卽赦建文中諸死事者族屬若外親聽寧家給故所沒產還之已大理寺論囚

上惻然曰人命至重帝王以愛人爲德卿等職理刑輔德宜贊朕志母俾含冤地下傷天地之和命府部通政司六科同法司於奉天門會審已特召大學士士奇榮幼孜等至揚前論比年法司之濫擬大逆不道往往出羅織也

先帝爲切戒故事死刑五覆奏而法司壹不以措意今審決重囚卿三人同往慮期審克必中閣學士同審錄始於此又謂刑部都察院大臣言朕於刑法未嘗



敢以喜怒爲增損。卿等鞫獄當虛心聽察。如朕一時  
過怒。處法非法。卿等國大臣當執正。毋以忤旨爲  
慮。尋勅吏部。自今刑官擇廉明公正。謹厚之賢。其  
無用儉人得肆枉濫焉。下恤刑詔言。朕惟

皇祖。皇考愛民之仁。祇率不怠。蚤夜以思。人命甚重。  
哀矜庶獄。拳拳于衷。顧執法吏不能皆平。虛飭比附。  
而致之死。朕甚悼之。夫刑以禁暴止邪。導民於善。豈  
務誅殺哉。故律令之制。善善長而惡惡短。罰之輕重。  
惟適厥中。夫五刑之條。莫重於大辟。身首異處。亦足  
懲矣。又加之以凌遲。過也。自今除反逆依律科法外。



即朕一時過於嫉惡。令律外致刑法。司必再三執奏。不允。五六奏。又不允。同三公及大臣執奏。必允。乃已。又定令文武諸司。皆毋得恣暴於法外。用鞭背等刑。人之爲非。有父子不相爲謀者。虞書罰不及嗣。周文罪人不孥。自今惟謀反大逆。依律連坐外。餘犯止其身。毋連坐。古之盛時。博採民言。廣視聽。以資警戒也。今兇險往往。撝拾微文。云爲誹謗。法吏刻深。鍛鍊成之。自今告誹謗者。勿聽治。爾中外文武群臣。端乃志。悉乃心。畏天愛人。崇寬恕。以佐朕父母斯民之治。於是諸重典之用。咸革。刑號稱平矣。



宣宗皇帝嘗夜讀周書立政式敬爾繇獄以長我王國。  
喟然嘆以爲國基命在於此也。勅三法司言朕體

上帝好生之心惟刑是恤。今爾等覆詳天下重獄而犯  
者遠在千萬里外需奏當卽決亦何能無冤抑者

乎。人命至重死不復生其遣廉能官分詣在所同三  
司巡按御史及府州縣官公同詳審若情犯深重無  
冤者聽從處決如情可矜疑及審異不服者具奏

蓋遣官審錄自此始。又諭三法司言古孟夏斷薄

刑出輕繫仲夏挺重囚益其食所以順時令而重民

命也我



祖宗時遇隆寒盛暑。命法司審囚繫卿等皆先朝舊臣。親所聞見。今嚮暑宜量情罪區別。時各省府州縣民有擊登聞鼓獄枉者。

上不欲無庶獄。勅藩臬官言。朕荷天命嗣漢業。

孜孜夙夜。惟保民之爲務。比者田里小民爲官吏及勢豪侵損凌虐。不能自存。訴於郡縣。又不能直。淹禁歲月。冤抑駢死。以致赴闕徑訴。殞身不恤。詞訟之繁。故繇於此。夫理訟之道。必得其情。枉者直之。犯者罪之。所以戢橫暴而安良善也。今無理者肆虐。被害者歸怨。卽設方岳風憲焉。攸用手。今已令都察院榜



諭越訴者。爾等宜去惡衛善。鋤疆扶弱。毋忽毋怠。正  
統初。遣官恤刑。敕曰。邇京師及天下衛所郡縣囚  
矜疑稱冤者。行體勘至。經年不報。蓋所司恐翻異爲  
罪。而慢上令也。其報者。勒里老扶結。憑成案而止。今  
特遣爾等往。卽訊召集里老。愼研閱原問官。毋得預  
果枉抑。辨豁果當罪。監候類奏。天順末。刑部郎陳  
璉失入人罪。部寺審允。

上自鞫辨出之。勅法司痛省。諭三法司曰。春陽肇

序。萬物咸新。在京文武官除贓罪外。諸紀錄悉與湔  
除。令奉公守法焉。錦衣衛按弋陽王敗倫事虛。



上因悟錦衣衛按獄之枉。召輔臣賢。諭之。賢對曰。

誠如

聖諭。因言錦衣衛武人豪。又國瓜牙郎法司明知其枉。內憚之。不敢辨。乞特旨諭法司。許有枉者辦理。毋畏勢避嫌。於是

上召法司臨誠。如賢指。人人悅服。成化中始設西廠刺事。而閹汪直黠起。大獄以鼓勢。明威羅織慘烈。中外大恐。大學士輅時合疏。直十罪。且言近日伺察太繁。政令太急。刑網太密。蓋緣陛下委聽斷於汪直。而直寄耳目于群小故也。帝瑛王瑛同惡相濟。擅威福。



自予官較提拿職官皆出風聞暮夜搜簡無駕帖左  
證人懷疑畏皆不安其官商賈不安於市行旅不安  
於塗庶民不安於業豈太平之世所宜有也臣實懼  
焉乞革罷以安人心御史劉珊等言東廠之設自初  
建都時專以緝訪逆謀若大奸惡事出一時權宜  
因而不革亦已僭矣今又設西廠非制也立廠之後  
事情紛紛於國家安危關係非小

上覽疏恚曰用一內臣焉得便繫國安危命中官

懷恩傳旨詰責輅等復力陳其故會九卿連疏直

及瑛過惡西廠乃革瑛謫戍尋坐事誅巡撫南直隸



都御史王恕言我

太祖高皇帝酌歷代律條定爲大明律凡四百六十條頒示天下而名例律有云律令該載不盡若斷罪無正律比附應加應減擬罪名以上近刊行大明律後有會定見行律百有八條不知從何年會定如兵律多支廩給刑律罵制使及本管長官條皆輕重失倫不可行法官諳刑名者必不依此而流傳四方有誤筮仕入官之士非細故也乞追板焚毀 旨下言會定律紕謬可焚諸依此律出入人罪者以故論

孝宗天性仁恕尤欽恤刑獄二年勅法司言朕惟刑



者民命所關。刑獄清則人心服而天道順。一夫含冤。致傷和氣。災沴不免焉。邇者京城雨水爲災。南京有風雷雨之異。朕甚懼焉。得非刑獄冤濫致然乎。情僞微曖。未易遽察。問刑者各據原辭。審錄者多拘成案。人命或聞毆誤殺。而簡勘者以爲謀故。盜賊或搶奪拒捕。而巡獲者以爲強劫。中間有事出緝紡者。務鍛鍊以成之。此冤濫之所繇也。今特命爾三法司堂官。詳加審錄。凡人命無屍可簡。若屍朽難辨者。盜賊追無贓杖。或有贓非真者。或情法不相當。或情罪可矜疑。或累訴稱冤而不伏。或久換證佐而未獲。具情節



奏讞審問之際。尤須詳察色辭。旁詢知證。毋避嫌疑。毋任好惡。毋視權要。爲輕重。務得實情。以全民命。原問官故入及巡捕人妄拿。宥勿治。爾其悉心殫慮。明其斷。而以恕行之。庶稱朕好生之意。已并敕天下諸司錄重刑。明年下勅言。曩因災異。敕諸司審錄重刑。諸情可矜疑。及有辭者。勿拘成案。平反之。原問官亦原勿究。欲廣仁恩。而全民命也。今數十百人矣。當茲春和。天地大生。朕思與其寬之於終。曷若謹之於始。兩京三法司。及天下大小問刑衙門。務存心仁恕。持法公平。察詞辨色。詳審情罪。大惡當懲者。毋



務姑息以長奸。小過可宥者。毋事苛刻以啓怨。其無憑證驗。情節難明者。尤當加意推究。毋踵訛以失出入。庶不悖古人欽恤之意。復歲以天炎暑。命法司錄輕重囚。毋淹。而是時律令。窳而例繁。刑官以其職言。律條歷代相承。損益無幾。勅令則世自爲格。宋人勅重於律。斷獄用勅。勅中所無。方用律。昔賢病之。

國初。刑用重典。取上裁。榜文紛紛下。洪武末。定大明律。刑官始得據依爲擬議。輕重類一。後又申明大誥。諸有罪減等。累朝遵用。而法外遺奸。

列聖時推移。損益之而有例。例非律所該。而實不大違。



遠於律特用輔律非以破律也而中外巧法吏或借以文飾私怒多引例便已意而律寔格不用於是命部尚書白昂都御史閔珪會九卿查議條陳定奪畫一下餘冗瑣並革昂等條上命覆詳更上已上復摘條例中疑者六條命覆議已乃布行

世宗登極詔諸司問刑一依弘治中欽定條例輔

律行後新增例革不用於是刑尚書喻茂堅以修省疏言自弘治中考定條例而來今五十年世變風移宜思通變以宜民乞令各衙門將歷年題准刑名事例情法適中經久可行者條具咨送臣等會九卿通



再申明會議除簡切易曉引用無差者照舊遵行外其間有例意本明而罪狀未合妄自摘引或事有專指而引用他及妄自牽合或議擬已詳而語意未明該載未盡或處斷已當而事體未盡偏滯難行寧經各衙門申明者各併爲一條以便遵守其有雖經申明而擬議未詳或未經申明而引用易差與一切姦弊條例未悉者亦行斟酌損益因事推廣務求文義簡切情罪適均曉然於易知易行開陳具奏 旨如議行久之書成列上 旨刊布仍申今後問刑官任情妄引故入降黜之令而明興思忠論實之臣



申明律意。各疏議其衷。永樂中翰林待詔朱善議婚姻律曰。臣聞國重世臣。家重世婚。今民間婚姻之訟甚多。非姑舅之子若女。則兩姨之子若女也。蓋緣律皆不得爲婚。以故讐家詆訟。或已聘見絕。或旣婚復離。或成婚有年。兒女成行。而有司逼奪。使夫婦分離。子母永隔。甚可痛也。按舊律尊長卑幼相與爲婚者禁。謂若母之姊妹與已身尊卑有屬。不得以卑幼上匹尊屬也。若其爲姑舅兩姨之子女。無尊卑之嫌。爲子擇婦。爲女擇壻。莫宜於此。古之人用之矣。成周之時。王朝所與婚者。惟齊宋陳杞四國而已。故其稱異。



姓。大國曰伯舅。小國曰叔舅。卽世爲婚姻。可知。至於  
列國齊魯秦晉。各自爲甥舅之國。後世若晉之王謝。  
唐之崔盧。亦何所病於禮。而必以入於刑也。今江浙  
以此致訟。賄賂公行。風俗凋弊。願以臣章下群臣議。  
詳弛禁。庶刑清訟簡。風俗歸厚。成化中大理卿劉王。  
疏申明律意曰。伏覩律款。言同居卑幼。將引他人盜  
已家財物者。卑幼依私擅用財。加二等。罪止杖一百。  
他人減凡盜一等。免刺。若有殺傷者。自以殺傷尊長。  
卑幼本律科罪。他人縱不知情。亦依強盜論。若他人  
殺傷人者。卑幼縱不知情。亦依殺傷尊長。卑幼本律



論謹詳律文曰將引者謂竊盜藏蹤隱迹密切而來故須將引也曰免刺亦依竊盜初再三犯刺臂額而言謂倫理重而財輕故全倫理之恩重而竊盜輕也至其殺傷則固依強盜律坐不貸矣。近或子糾他人而劫其父。或弟糾他人而劫其兄。是曰強盜自有本科乃引同居卑幼將引他人遂欲從末減則刺免之條豈得兼強盜言乎。或疑殺傷者坐強盜以爲無殺傷者不坐不知強盜之爲強盜不在殺傷與不殺傷故強盜本條不言殺傷而竊盜臨時拒捕乃著殺傷之文則律意正指竊盜而言又安得引以斷強盜之



獄也。且各居卑幼。雖曰異財。亦繫親屬。非他人比。況同居卑幼。尚且同財。不尤以倫理爲重乎。倫理之義重。則強劫之情害愈重。故竊盜之罪可減。而強盜之罪不可減。況劫父劫兄。窮兇極惡。較之罵父毆兄者。輕重何如。就令律文未該。亦當權輕重以正法。援比附以上請。况律文彰彰如是。而又何可得縱也。令如前比擬。則是倫理置而不論。盜賊肆而不禁。凡奸徒欲行強奪者。但計誘本家一男一侄其中。俱可得免先矣。子可以犯其父。弟可以犯其兄。人亦何憚而不爲惡哉。弘治中。刑尚書馬文升言。伏覩律款言凡強



盜得財。不分首從。皆斬決。不待時。以強盜挾兵持刃。生殺在其掌握。姦淫。惟其意欲。比叛逆相去爲不遠也。天順中。旨下。言人命至重。自今霜降後。有應決車囚三法。司奏請。會多官審錄。庶不冤枉。蓋專指秋後處決重囚而言。非謂強盜也。乃強盜則既不待時決矣。以強盜不分賊之多寡。情之輕重。而俱至秋後。與衆囚會審。比於其時。十死七八。存者監禁日久。翻易原情。能言者俱作矜疑。柔弱者乃坐無詞。豈有當哉。是此法行。而終無決。不待時之強盜也。是強盜與鬪毆殺人者。無以異也。惟強盜有犯。非時立決。而後



獮戾知警。應辟以止辟之義已。又言近年來。兩京法  
司官員。或繇進士。初除寺正。寺副評事。主事。或繇知  
州行人。就陞刑部員外。卽卽中。而御史。多知縣所  
除律條多不熟讀。律意亦未講明。凡所問囚。移情就  
律。且如強盜窩主。重在造意。若窩藏強盜。而不造意。  
亦難問擬斬罪。又如官吏懷私讐。故勘平人。因而致  
死。重在懷挾私讐。若因事到官。但有笞罪。雖勘致死。  
亦止可問擬因公毆人致死徒罪。又如故殺閭毆殺。  
兩人相爭。互相毆打。毆死一人。則名閭毆殺。一人未  
曾動手。一人於彼致命去處。有意致死。則名故殺。此



等律意人多忽略。有將強盜窩主未曾造意同謀止。是分贓及官吏因公事毆人致死。本無私讐故勘情。繇而具問斬罪者。有本係鬪毆而問擬故殺斬罪者。有本係故殺而却擬鬪毆殺人絞罪者。甚至謀殺故殺無屍簡驗而問擬斬罪者。或本因與人妻妾通姦。其夫別項身死而問擬本婦因姦同謀殺死親夫凌遲處死。奸夫斬罪者。此皆原問官負律學未講律意未明之故也。况府州縣官負多有不曉刑名不知律意者。不能剖決問理而惟聽於主文之人。豈有當哉。乞勅兩京法司堂上官督令所屬官天下都布按



三司督按察司官。并各府推官。及通行天下大小衙門。并兩京部屬官吏。各置大明律一本。朝夕熟讀。用心講解。務曉其意。若有不能講解。不曉律意者。當

奏請降用。仍乞勅吏部移法司。將撥去進士。令與

見任官一同問刑。兩京法司有缺。先儘各衙門問刑

進士除授。是亦前代刑官設科取士之意也。刑尚書

喬新言。伏覩律款言罵祖父母。及妻妾罵夫祖

父母。父母者並絞。註云。瀕親告乃坐。又款言祖父母

父母。誣告子孫。告子孫婦者。各勿論。竊詳律意。蓋謂

父子祖孫天性也。子孫子孫婦悖戾。至於毀罵逆天



性甚矣。故坐絞。然恐他人詆誣成罪。故曰。須親告。乃坐。謂他人雖告不坐也。邇刑官遇祖父母。父母告子孫。及子孫婦罵者。不問虛實。輒坐。是親告卽坐矣。使親告而卽坐。律又何有。誣告子孫之文乎。凡愛憎之偏。人情多有。有因後妻之譖。而憎前妻之子。若婦者。有溺愛幼子。而惡其長子者。有欲奪孫之資產。歸其子者。有憎其子孫。遂及其子孫婦者。使親告卽坐。雖恭順如薛包。孝友如王祥。父母一有言。將不免於死。豈不痛哉。請自今。勅中外官。須鞫實乃坐。其誣告者。自依律擬斷。伏覩計贓科罪律四百六十餘條。



是律也。律正法當一定而不易。以鈔計贓者例也。例輔律當隨時而無常。國初制律時。每銀一兩直鈔一貫。今八十貫矣。是國初常人盜銀八十兩而絞。

今一兩而絞也。初監守盜銀四十兩斬。而今五錢而斬也。非律意矣。請自今估計鈔貫以銀一兩直錢千文。鈔四十貫爲準。庶輕重爲衷。又律官非法決撻人致死者黜爲民。謂肆虐殘忍於虛怯處。橫加拷掠也云耳。鞭作官刑自古有之。若因公決打死而輒黜。非法意。宜貸律威逼人致死。謂諸色人或逼。凡周圍或強索財物。致愚弱卑賤號無告而自盡也云耳。其



愚夫愚婦或忿爭醉譁。或語言抵觸。輕生尤賴而問。擬威逼。非律意。宜寬。各省編伍律名有衛分。近不分。南北多發西北邊。蓋以西北邊近虜。欲伍實也。然罪犯而至斬絞。必皆姦頑梗化。輕生易死之人。往往隨至而逃。仍復爲惡。雖有但逃便殺之條。然逃者接踵。終不知警。況中有原係虜種。諳知邊情。慣習夷語。脫後逃入虜中。啓釁擾邊。如漢衛律。宋張亢可爲永鑑。宜西北人編發兩廣雲貴。江南人編發江北衛分。如律便嘉靖中。霍詹事韶爲

上言。洪武中律有祿人受枉法贓八十貫者絞。嚴爲之



禁欲人之難犯也。文官以其厲已托。欽定例改雜。

犯而許贖。故得贓愈多。贖罪愈易。是教之使貪也。今

撫按以正法治賊吏。則衆其詆之曰。刻引新例容贓。

吏則頌其以厚目之。人情孰不樂忠厚之譽。而憚苛

刻之誚者。是縱之使貪也。故貪吏用肆。催科則經贓。

不一二。而利歸私家八九矣。巡捕則指良爲賊。逼贓

利自予矣。有因而酷用非法。剥民肌骨。致之死者矣。

此細民所以冤抑而無告也。律曰。故禁平民致死者。

絞。故勘平民致死者。斬。謂平民罪本輕。或本無罪而

故禁。故勘之致死。以死刑懲之。所以保民命也。今廢



而不用。故酷吏恣睢無忌。臣見有官爲知府。一醉而  
擣死平民四命者矣。有官僉事。一怒而倒縣十三歲  
童子致之死者矣。有夏月酷暑。淹禁平民百餘命致  
死者矣。古一婦死而三年大旱。今貪酷之吏滿天下。  
冤痛之氣結。豈不能感皇蒼而致災變乎。天下軍衛  
一體也。錦衣一衛。獨稱親軍。重禁近也。天下刑獄付  
之三法司而足矣。錦衣衛復橫撓之。越介冑而刀筆  
是侵。不亦甚乎。光武崇尚名節。名節之士滿東都。以  
扶漢鼎。宋祖敦廉耻。刑罰不加衣冠。忠義之徒爭死  
沒世。夫節義之士。在平世甚無用也。於變故求之不



得則國事遂空。故保養士氣。敦尚節義。治天下者之  
深計遠慮也。士大夫有罪。下刑曹辱矣。有重罪。或廢  
或誅可矣。顧乃使官較衆執之。脫冠裳以就桎梏。屈  
體貌以聽武夫朝列。清班暮幽污獄。不已甚乎。剛心  
正氣。於此折盡矣。及覆覈非罪。則暮脫牢獄。朝立清  
班。一解拘攣。卽披冠帶。使武夫悍卒從而指之曰。某  
也。吾辱之矣。某也。吾係執之矣。小人無所忌憚。君子  
遂昧良心。豪傑所以興山林之思。而變故罕。伏節之  
士也。願自今東廠勿預朝儀。錦衣衛勿典刑獄。士夫  
有罪。宜謫而謫。宜廢而廢。宜誅而誅。宜贖而贖。勿加



啓箚鎖牋以養廉耻。此振人心勵士節之至急者也。  
師上。報聞。丘文莊濬言。

皇祖欽定律條。承用晉唐舊文。文深而旨奧。士大夫乍  
讀。猶不能盡通明。况於吏胥氓隸之人乎。宜命儒  
臣。取疏義等作。從通法意者。相討論。爲之解釋。必使  
人人易曉。不待思索。考究而悉也。則愚民知所守。奸  
吏不得依法而舞文。後陳御史察胡御史。各如指  
成書傳焉。

聞君子曰。自古哲后。惇臣易。嘗不以刑辟爲天典。重  
用之哉。典著欽恤。誥表敬明。記稱意論。慎測必卽于



天倫此其義至精。故咎繇元德。郡聖宗焉。以作士制。百姓于刑之中。用期於無刑。司寇蘇公敬繇獄。周公作立政訓王。諄復紀之。誠重獄也。重獄重天。以也。自教之衰。亶以五刑爲痺惡之具。靡知爲倫。敎當卽也。於是乎哀矜勿喜之意。亡甚且媮快喜之。豈謂天德哉。又何以敬刑。弼德司天民命也。先漢時諸攄忠守法清議之臣。猶能本經術。明常敎以決事。而張廷尉令天下無冤。唐徐司刑身視鴻毛法。視泰山以其死。衛生民之命。卽古今難之。夫鑑往可以知今。比類可以達義。海虞吳中丞。訥本桂氏棠陰決事刪之。凡諸



古奏讞可輔尋教。關重慎者爲編。今博采附之後司

刑者得有覽觀焉。

漢景時廷尉上囚防年繼母陳殺防年父防年因殺陳更依律殺母

以大逆論帝疑之武帝時年十二爲太子在側帝試問之太子曰夫繼母如母明不及母緣父之故比之母今繼母無狀手殺其父則母恩絕矣宜與殺人同不宜以大逆論從之今大明律曰凡繼母殺其父子告不在干名犯義之條。成帝時沛縣有富家翁貲三千萬餘小婦子年數歲頃復失其母父無強近親女不賢翁病困呼族人爲遺書令悉以財屬女但遺一劔云兒年十五以付之後壻不肯與兒劔兒詣郡自言求劔太守何武得其辭因錄女及壻省翁手書顧曰翁智人也念女強梁壻貪鄙畏殘害其兒又計小兒得此財不能全故與女實寄之劔所以決斷限年十五者智力足以自言度此女壻必不復還劔當關縣官縣官或能證察得見申展也悉取財與子日敝女惡壻溫飽十歲亦幸矣論者大服。薛宣爲丞相後母弟循爲臨淄令母常隨循居宣迎養循不遣博士申咸給事中宣里中子毀宣不供養行褻服



薄於骨肉、前以不忠孝免、不宜復列侯在朝省、宣子  
况爲右曹侍郎、數聞其諳、賕客揚明、令遮斫咸宮門  
外、斷鼻唇、身八創、事下有司議、御史中丞等議奏曰、  
况朝臣、父故宰相、封侯、不相敕承教化、咸所言皆宣  
行迹、衆人所共見、况知咸給事中、恐爲司隸舉奏、宣  
而公令明等迫切宮闕、要遮劓戮近臣、於大道人衆  
中、欲以鬲塞聰明、杜絕論議、桀黠無畏忌、不與凡人  
忿怒爭鬪、同、臣聞敬近臣、爲近主也、禮下公門、式路  
馬、春秋之義、意惡功遂、不免於誅、上浸之原、不可長  
也、况功意悞惡乎、大不敬、明當以重論、及况皆棄市  
廷尉直駁議曰、律曰、以刃傷人、完爲城旦、其賊加罪  
一等、與謀者同罪、詔書無以詆欺成罪、傳曰、遇人不  
以義、而見疾者、與疾人之罪鈞、惡不直也、咸厚善循  
而數稱宣過惡、流聞、不可謂直、春秋之義、原心定罪、  
原况以父見謗、忿發怒、無他大惡、雖於掖門外傷咸  
道中、與凡人爭鬪、無異殺人之者、死、傷人之者、刑、古今之  
通道、三代所不易也、聖王不以怒增刑、明當以賊傷  
人不直、况與謀者皆減、完爲城旦、帝以問公卿、丞相  
孔光、大司空師丹、以中丞議是、自將軍以下、至博士  
議郎、皆是廷尉、况竟減死罪一等、徙敦煌、宣坐免爲



廢人歸故鄉。○定陵侯淳于長坐大逆誅死。長小妻  
廼始等六人皆以長事未發覺時棄去。或更嫁。丞相  
方進大司空武議以爲長犯大逆時乃始等見爲長  
妻當坐罪請論。廷尉光議以爲大逆無道父母妻子  
同產少長皆棄市。欲懲後犯法者也。夫婦之道有義  
則合無義則離。長未知當坐大逆而棄去乃始乃始  
更嫁義已絕而欲以爲長妻論殺之名不正不當坐  
有詔光議是。○梁人恥後妻後妻殺夫其子又殺之  
孔季彥返魯過梁梁相口禮繼母如母此當以大逆  
論乎季彥曰昔文姜與殺魯桓春秋去其姜氏傳曰  
絕不爲親禮也手殺重於知情知情猶不得爲親况  
手殺乎宜以非司寇而擅殺當之不爲殺母梁相從  
其言。○建初中有侮辱人父者而其子殺之肅宗貴  
其死降宥之後因以爲比曰輕侮法張敏駁之曰輕  
侮法先帝一切之恩非有成科班之律令也夫春秋  
之義子不報讎非子也而法令不爲減以相殺之路  
不可開也今托義者得減使執憲之吏得設巧詐爲  
輕重非所以遵在醜不爭之義且孔子垂輕典臯陶  
造法律皆欲禁民爲非也輕侮之法將何以禁必不  
能使不相輕侮而更開相殺之路願考尋利害廣合



平議從之。○吳祐爲膠東太守，安丘男子毋丘長與母俱行市道，遇醉客辱其母，長殺之而亡，捕得之，祐呼長謂曰：「若母見辱，人情所耻，然孝子忿必慮難動，不累親，今若背親逞怒，曰『殺殺人』，赦若非義，殺若非忍，將如之何？」長以械自擊，曰：「國家制法，囚身犯之，明府雖加哀矜，恩無所施。」祐問長有妻子乎？對曰：「有妻，未有子也。」卽移安丘逮長妻，妻到，解其桎，借使同宿獄中，妻遂懷孕，至冬盡行刑，長泣謂母曰：「負母應死，當何以報？」吳君乃齧指而吞之，含血言曰：「妻若生子，名之吳生，因投繯而死。」○有烏程男子孫常弟，分父產，各得田十頃，金死，歲饑，常稍稍以米粟給金妻，子後追計直，作券取其田，金兒長大，訟之，掾史議曰：「金兒遭饑，賴常升合長大成人，而更爭訟，非順也。」比部督郵鍾離意獨曰：「常身爲父遺，當撫孤弱，是人道正義，而稍以升合券取其田，懷挾姦路，貪利忘義，請奪常田，畀金妻子從之。」○謝夷吾爲荊州刺史，章帝巡狩幸當陽，有詔勅夷吾入傳錄囚，勿廢舊儀，帝臨西廂南面，夷吾處東廂，分帷其中，有亭長姦部人妻者，縣以和姦論，夷吾呵之曰：「亭長職在禁姦，今自爲惡首，何得言和？」切讓三老孝悌，免縣長吏官，理亭長。



罪帝舍之。○護軍士竇禮近出不還營。軍吏以爲  
奏逐捕沒妻子爲奴婢。妻盈詣州府稱冤。莫省。乃辭  
詣廷尉。廷尉高柔曰。汝何自知夫不亡。盈對曰。夫少  
事。事母甚恭謹。又哀兒女。撫視不離。非輕狡不顧家  
室者也。柔曰。汝夫豈與人有怨乎。對曰。夫平素素於  
人無讎。曰。汝夫豈與人交錢財乎。對曰。嘗出錢與同營  
卒焦子文求不得耳。時子文適坐他事繫獄。柔出子  
文問所坐。言次忽曰。汝頗曾舉人錢不。子文曰。身單  
貧。不敢舉錢物也。柔察其色動。謂曰。汝昔舉竇禮錢  
不歸。何言不耶。子文怪事露。語失次。柔曰。汝以已殺禮  
宜早服。於是叩頭具首殺禮本末。及埋藏處。果得死  
而奏盈白禮寃。復其家。○東漢亡。卒妻白始嫁大家  
未與夫見。大理奏以從坐棄市。冀州主簿盧毓駁之  
曰。女子之情。以接見而恩生。成婦而義重。故禮未廟  
見之婦而死。歸葬女氏之黨。以未成婦也。今白生有  
未見之悲。死有非婦之痛。令肆之大辟。則同牢合卺  
之後。罪何所加。且記曰。附從輕。言附人之罪。以輕者  
爲比也。又書曰。與其殺不辜。寧失不經。忍過重也。奏  
上。丞相操嘉毓議深於經。以爲法。曹令吏。○魏母丘  
儉之誅孫女適劉氏。當從坐。以孕繫廷尉。司隸主簿



程咸上議曰、女子有三從之義、無自專之道、出適他族、降父母之服、所以明外成之節也、今夫黨兒誅、既隨戮、而父母有罪、又追刑、是一人之身、而兼受內外之辟也、且適入產育、則成他家之母、殺之、不足以懲亂、而適足傷孝子之恩、男不遇罪於他族、而女嬰戮於二門、非所以矜女弱、均法制也、臣以爲在室之女、可從父母之刑、既醮之婦、使從夫家之法、爲著令、○劉宋時、鄆陵縣吏陳滿射鳥、箭誤中直帥、雖不傷、吏處法棄市、左丞何承天議曰、獄貴情斷、疑則從輕、昔有驚漢文帝乘輿馬者、張釋之斷以犯蹕罪止罰金、何者、明其無心於驚馬也、故不以乘輿之重而加異制、今滿意在射鳥、非心中人、按律誤過傷人、三歲刑、况不傷乎、從之、○餘杭有爲刼盜而獲者、法碁親譴、戊盜有從弟、服大功、不應譴、吏以爲從弟母存、爲碁親、譴之、承天議曰、律同籍碁親補兵、大功否、禮婦人三從、既嫁從夫、夫死從子、今甲爲刼、若叔父尚存、爲同籍期、補伍可也、從弟本大功親、若以叔母爲期親、而譴之、有乖大功不譴之制、又失婦人從子之道、謂宜見原、從之、○元嘉中、剡人黃初妻趙、殺其子、載妻上、遇赦、王有父母及男稱、吏按避讎法、徙趙二千里、



長史傳隆議曰、禮律之興、本情禮自然、非從天墮地  
出也、父子至親、分形同氣、稱之於載、卽載之於趙、雖  
云三代、合之一體、豈有分哉、稱雖割巨痛深、固無離  
祖之義、古人所謂不以父命亂王父命也、若稱可離  
趙、當何以處載乎、向使石厚之子、日磾之孫、砥鋒挺  
錐、不與二祖同戴天、則不啻耗侯、何得純臣於國、孝  
義於家矣、舊令殺人父母、徙二千里、不施之父子祖  
孫、趙當避王基功千里外爾、又令云、凡流徙者、同籍  
親近欲相隨、聽之、趙旣流移、載爲人子、何得不從、載  
行而稱不行、豈名教所許、趙惟內愧終身、稱惟沈痛  
沒齒、孫祖之義、固不得絕也、○元嘉中、歷陽人有盜  
發冢者、吏議近村符伍罪、與遭劫不赴救、同坐征虜  
參軍沈亮議曰、發冢之情、事止竊盜、徒以侵亾犯死、  
故律之嚴科、然發冢之姦、必卸枚以晦迹、劫掠之黨、  
必譴呼以見威、故起兇赫者、易應、潛深密者、難知也、  
且山原爲無人之鄉、丘隴非常塗所踐、督實効名、埋  
與劫異、至於防救、不得比之村鄉、宜除符伍之坐、而  
結罰之利、域之以地界、相去百步內、赴告不時救者、  
科一歲刑、○應城人張江凌、與妻吳共罵母黃、黃忿  
自縊死、遇赦、吏按律子殺傷若毆父母、梟首、罵詈棄



市婦謀殺夫父母亦棄市遇赦免刑補兵江凌罵母  
母因自裁重於傷毆若同殺科則疑重同毆傷及罵  
制則疑輕准制惟有殺父母遇赦梟首無罵母致死  
遇赦之科比部郎孔淵之議曰夫里名勝母仁者不  
入名且惡之况乃人事故毆傷咒咀法所不原詈之  
致盡理無可宥從輕蓋疑失害非此之謂也江凌雖  
遇赦合梟首婦本以義屬黃之所恨情不在吳原虎  
補兵。梁建康女子任提坐誘口當死于景慈對鞠  
寔證之法官虞僧虬曰子之事親有隱無犯直躬證  
父仲尼非之景慈既無防閑之道陷親極刑傷倫損  
俗宜加罪詔流交州。冀州人費羗皮母亡家貧無  
以葬賣七歲女子與張廻為婢廻轉與梁之母亡家貧無  
言狀吏按律掠人和賣為奴婢者死即中崔鳴言按  
律賣子一歲刑五服內親屬在尊長者死買者明知  
是良決便真賣因此流漂與掠無異太保高陽王雍  
議曰簡廻所買保證甚明處以盜掠實為乖富賊律  
殺人有首從之科盜人賣買無唱和之等律云知人  
掠盜之物而故買者以隨從論此明禁暴掠之源遏  
姦盜之本非謂買之於親尊之手而同之於盜掠也  
羗皮賣子葬親孝可表賞而刑罰科之恐非敦風化



之祖詔曰、羌皮賞女葬母、孝誠可嘉、可特原葬、雖買之父母、不應轉賣、可刑五歲。河東郡人李憐、坐行毒藥論死、其母訴稱身老、無周親、母死、州斷三年、服終行決、主簿李陽駁曰、律諸犯罪若祖父、母年七十以上、無成子孫、旁無周親者、具狀請、流者、鞭官留養、親終則刑、且憐既懷眺毒之心、母在、猶宜闔門投界、况今已死、給假殯葬、足示仁寬、不合更延、可依律處斬、流其妻子、詔從之。北魏蘭陵公主駙馬都尉劉輝、坐與河陰人張智壽妹容妃、陳慶和妹惠猛姦亂、毆主傷胎、遂亡命、門下處奏容妃惠猛各入死刑、智壽慶和、並以知情不防限處流、詔容妃惠猛髡鞭付宮、餘如奏。崔纂執奏曰、伏見旨募獲輝者、職人賞二階、自身入聽、出身進一階、廝役免役、奴婢爲良、按輝無叛逆之罪、未可募同反者、夫王者理天下、不爲喜怒增減、不繇親疎改易、按鬪律、祖父父母忿怒、以兵殺子孫者、五歲刑、毆殺妻及愛憎而故殺者、加一等、雖王姬下降、貴殊常妻、然人婦之孕、不謂非子、又容妃等罪止姦私、律不越刑、何得同奚官之役、按智壽口誹妹適人、已生二女、是他家之母、他人之妻、律許周親相隱、姦罪無相緣之坐、不可借失輝之忿、



加兄弟之刑也。夫刑人於市，與衆棄之，明不私於天下也。右僕射游肇等奏：如纂言宣武怒，奪纂官，尚書奪祿。○唐太尉長孫無忌被召，舍卒入東上閣，失不解所佩刀，監門較尉以無忌戚屬大臣，失莫覺也。尚書劾之，僕射封德彝論：監門較尉不覺察，罪死，當無忌過誤，罰金。大理卿戴胄駁之曰：臣子於尊極，不稱誤。法，御湯劑，飲食舟船，雖誤皆死。陛下若錄無忌功，若議親原之乎？非有司所敢干。若論情，則無忌誤，較尉亦誤。本皆誤罪也。若原無忌而殺較尉，不可謂刑詔復議。僕射執前當。胄曰：不然。無忌本首過，法當重較。尉緣無忌致罪，法當輕。若皆誤，較尉不得獨死。緣是與較尉皆免。○末年民有女幼歸於壻，壻殺之以評人。吏以故殺妻誣賴論。縣令張守之曰：禮婦三月而廟見，未廟見而先，則歸葬於家，示未成婦也。律定婚而夫犯，論同常人。以未成婦也，宜論如常人。○唐雲陽縣有力人張泄，欠羽林官騎康憲錢，徵理之。泄乘醉拉憲，氣將絕。憲男買得，年十四，將救父。以泄善角，觥有力，不敢徒手解，遂持木錘擊之死。律：父爲人毆，子往救，擊其人折傷，減凡鬪三等。至死者，依常律。伏以律令用防兇暴，行貸以開教化。春秋之義，原心。



定罪周書所訓諸罰有權今買得生被皇風幼符至孝哀矜之宥使在聖慈詔減死○京兆府有姑鞭婦致死者奏請償死尚書柳公綽議曰尊毆卑非闔且子在以妻而戮其母非教也減死論○河南有寡婦告子不孝河南尹李傑察其子非不孝者也謂母曰汝寡居惟一子令死於罪得無悔乎婦曰子不順何悔傑曰卽如是可買棺至耶屍耳出使人覘之則迎謂一道士曰事了矣有頃持棺至道士覘之門傑感使悔終不可乃擒道士一問卽承曰與婦有私爲兒所制欲除之快私乃杖殺道士以其棺斂之○維揚有富室子父公事繼母不謹一日上壽復子觴子覆於地地墳乃號于衆曰母以酖殺人母曰天鑒在上何可厚誣訴之州刺史杜亞曰酒何從來曰長婦執爵而致亞曰爾婦執爵毒因婦起何可誣母乃分別鞠之乃子婦計誣母皆伏法○呂元膺鎮岳陽出行見有罌輦駐道左男子五人衰服從元膺曰遠葬則侈近葬則省此姦也令搜其棺中皆兵刃曰欲謀過江掠貨假罌使渡者不疑劾之更同黨數十已期集彼岸併擒付法○宋廣安軍民安崇緒訴繼母馮嘗與父知遠離今來占奪父產欲與已女令親母饑餓



大理定崇緒訟母罪死下臺省集議右僕射李昉等  
議曰據法寺斷非是若以五母皆同卽阿蒲雖賤乃  
安崇緒親母崇緒本以田業爲馮強占親母衣食不  
克所以論訴若法從寺斷則知違負何辜而絕嗣阿  
蒲處何地而託身臣等參詳田業並合歸崇緒馮亦  
合與蒲同居終身供侍不得擅自貨易莊田并本家  
親族亦不得來干崇緒家務如是則男雖庶子有父  
業可安女雖出嫁有本家可歸阿馮終身又不至養  
所有罪犯並堆赦原詔從昉等議○慶曆間寧州童  
子年九歲毆殺人當棄市帝以童孺爭鬪無殺心止  
命罰金入死者家○真宗時戚里有爭分財不均者  
更相訴因入宮自理於上前更十餘斷不服宰相張  
齊賢請自治許之謂訟者曰汝非以彼得分多若獨  
少乎皆曰然卽命各自結實召兩吏趨歸其家令甲  
家入乙舍乙家入甲舍貨財皆按堵如故先分書交  
易之訟者乃止○同州有富民家小女奴亡不知所  
之奴父母訟於州命錄事鞫之錄事嘗貸錢於富民  
不予乃劾富民父子三人殺女奴棄水中亡其屍富  
民不勝痛誣服上州官審覆無異推官錢若水獨疑  
之審其獄錄事詣若水語侵之若水笑謝曰冷數人



當死、豈不可少留、知州亦屢趣之、不能得、若水一旦  
請州屏人言曰、若水所以留其獄者、密使人訪求女  
奴、今得之矣、知州驚曰、安在、若水因密使人送女奴  
於知州所、知州乃引女奴父母問曰、汝今見汝女、識  
之乎、曰、吾女也、安不識、因從簾中推出示之、父母泣  
曰、是也、乃引富民父子悉破械縱之、其人號泣曰、微  
使君某、麤糲矣、知州曰、推官之賜也、知州欲奏論其  
功、若水固辭曰、但求獄事正、人不冤耳、論功非本心  
也、若以此爲若水功、置錄事何地、○西京有僧、暮過  
村民家求寄止、主人不許、僧求寢於門外車廂中、許  
之夜、有盜入其家、自牆上扶一婦人、并囊衣而出、僧  
適不寐、見之、自念不爲主人所納宿、今主人亡其婦  
及財、及明、必執我詣縣官矣、因夜亡去、走荒草中、忽  
墮眚井、則婦人已爲盜所殺、先在其中矣、明日、主人  
搜該得之井中、執以詣縣掠治、僧自誣云、與子婦姦  
誘與俱亡、恐爲人所得、因殺之投井中、暮夜不覺失  
足、亦墜其中、賊在井傍亡失、不知何人所取、獄成、言  
府、府皆不以爲疑、推官向敏中以賊不獲疑之、引僧  
詰問數四、僧服罪、但言前生當負此人死、固問以實  
對、敏中密使吏訪其賊、吏食於村店、店姬問僧獄何



如吏給之曰。昨笞死矣。嫗曰。今獲賊何如。吏曰。已誤決。雖獲賊不問也。嫗太息曰。此村少年某甲所殺也。吏就掩捕獲之。案問其服。并得其贓。一府咸以爲諫。○張詠守蜀時。有僧行止不明。有司執以自詠。判其牒曰。勘殺人賊。既按問。果賊也。與僧行於道中。殺僧。取祠部戒牒。及僧衣。因自披剃。僚屬問。何以知之。公曰。額上猶有繫巾痕。知非僧耳。○杭州有富民病將死。子方三歲。命壻主其貲。而與壻遺書曰。他日欲分財。卽以十之三與子。亡與壻。子長立來訟。壻持其書詣府。請如約。張公適守杭。以酒酌地曰。而婦翁智人也。時以子幼。故以此屬汝。不然。子死汝手矣。乃命以其財。三與壻。亡與子。皆泣謝而去。○晏元獻殊知洋州。有大較李申。以財豪於鄉。誣其兄之子。謂爲他姓。賂里嫗之貌類者。使認爲己子。又醉其嫂而嫁之。奪其套。嫂姪訴于州。及提轉。申賂獄。嫂姪被笞掠。誣伏受杖。去積十餘年。又出訴。殊取其前後案牘視之。未嘗引乳醫。密尋致之。一日盡召其黨立庭下。出乳醫示之。衆皆伏罪。子母復歸如初。○包孝肅知天長縣。有訴牛爲盜。割其舌去者。無主名。孝肅曰。誰爲知而牛舌者。若第歸殺而鬻之。何告爲。旣而有告其人私



宰殺者極笑曰柰何割牛舌令斃又告之耶益大驚服罪本極遣殺鬻者時私宰禁重計鬻者割牛舌逞忿必且復告之也人稱神明○鄂縣民有借兄之宅居者發地藏錢兄之子訴曰父所藏也令難其證程純公時爲縣簿曰此易辨耳問兄子曰爾父所藏錢幾年矣曰四十年矣彼借宅居幾何時曰二十年矣卽遣吏取錢十千視之謂借宅者曰今官所鑄錢不五六年間卽徧天下此錢皆爾未借居時所鑄何也其人遂服○閬州太姓雍子良殺人買里民使出就吏獄具知州朱壽昌得其情引囚訊之囚服如初乃告之曰吾聞子良遺汝錢千萬納汝女爲子婦許以汝女爲婢指十萬爲顧直而嫁汝女也汝柰何因泣下以實告收子良付法○宣州囚有殺人者將抵死判官胡宿訊疑之囚垂簷憚筆楚不敢言辟左右問之終不言更問之曰田夫也旦將之田縣吏縛赴官情莫知其繇宿大駭亟取獄要繙閱探本辭知婦人與吏私殺其夫而執平民以告也一訊而伏○潁州民劉甲者暴迫弟柳鞠其婦旣投杖夫婦相持泣而甲怒愈急逼再鞭抵死守當夫極法推官張洞持之



口律以教令者爲首。柳夫婦相泣至痛也。獨不能格其兄使至此。不當死。當原讞其議得免死。○壽州有殺妻之父母兄弟數口。州司當妻子緣坐。刑曹駁曰。毆妻之父母。卽爲義絕。况謀殺乎。妻不當復坐。○有妻爲人殺而失其首。妻族以爲其壻殺之也。告之。嚴訊誣服。從事疑之。請緩獄。乃徧召封內。仵作畢之。官詰之。一人曰。近某豪家言死一婢子。召瘞之。五更時於牆頭過棺。棺輕似無物。瘞某處發之。但獲一女人。首示其夫。夫曰。非妻也。收豪家鞫之。則故與是人妻通。稔乃殺婢而取其首以葬。而以屍爲其屍。擣焉。豪民棄市。○國朝許州獲盜。獲二人。訊之。盜甲曰。逸者尚十三人。中二人曰。李洪。李贊兄弟也。居襄城之次溝。餘皆有名。居越數日。襄城械二人至官。召甲視之。曰。是也。弗承。是日次溝人百餘。羣言無辜。邵文莊公竇爲州守。將考績。却篆事。聞之。乃輿而之學宮。群遮道訴。返群訴如前。令緩訊待案。乃募邏卒。密遣訊之。野曰。得情。賞書符畀之。越月餘。卒以二人至。曰。此洪也。此贊也。審諸甲。甲又曰。是日。前誣三人。何也。曰。四人者。皆居次溝。前二人。家次溝之北。土著而著。後二人。家溝之南。僑居而微。盜者實後二人。逸而傭於園城。



有司以名若逮前二人耳。謂甲曰：「若何兩是之？」甲曰：「前二人故有怨，且名居同，且虞反覆之誅，釋前二人，賞募卒如符。」○碭山縣學教諭丘純，因責膳夫祝磨兒，其父令磨兒遁去，乃告純。篋死棄屍，他御史問鞠，誣伏尋屍，偶於黃河傍得一支解者，認爲磨兒屍，遂坐極刑。韓御史雍疑之，遣人蹤跡，得磨兒而白。○趙甲飲陳乙酒肆，歸而溺諸河。甲之子訟乙毆死，誣服何文肅公喬新時爲按察使，讞之曰：「肆民居櫛比，毆必有聞，去河遠，負亦必有見，驗果十甲沙泥，實溺也。乙得辯。」○東昌有武官子懷金與所厚生飲肆中，是夜武官子被殺，無主名，有司疑生殺之，逮訊。生不勝楚，誣服。許襄惠公進時爲按察使，以尸首不得疑之，私計必酒人所爲，酒人得錢必易物，乃托他事，遍取商曆入閱之，至布商曆，酒人果以金易布十數匹，則武官子死之明日也。一訊而伏，納首空桑中。○廬陵有儒生，夜過其里人胡甲所，被殺在其門。官執胡訊，胡誣服。按察僉事陳琦疑之曰：「豈有身殺人而自置諸門者？」訊之，則儒生有宿仇，瞰生夜適胡也而殺之。胡得釋。○弘治間，谷州有兄弟二人，兄行宦，託其資於弟，令置產，契券俱第掌。兄卒，官嫂扶視歸，弟以無



券籍也。執不還。被誣於州。訊不服。聞知眉州郭祥刑。有明威往訪之。郭隱其事。取獄中賊指板。其第竊盜。移文合州。械致之。詰曰。汝與某人爲盜。致富第泣曰。吾兄仕宦所得。未嘗盜也。固詰之。詞甚詳。一一錄記。乃速其嫂證之。第慚服。盡還其產。○典化囚坐毆殺。論死。自訴傷無驗。知府吳惺疑之。命燔水母納鹽。自臨濯視。乃得傷。且失左三肋。語囚曰。毆者右手。固左傷。宜肋之失也。隱傷失肋。非驗而何。有自殺妻誣其離者。云耕田爭水。被毆死。惺訊之曰。妻死時。月日大霖雨。爭水何爲。竟坐告者殺妻罪。誣不行。○嘉靖中。燕民崔鑑。父祐爲小賈。性嗜酒。悅善歌者。娼嬖之。每被酒。輒楚辱其妻。王以悅娼。一日祐出市。王訴娼娼怒。擊王。敗其面。王撫牀泣。欲自經。鑑時年十有三歲矣。自學舍歸。見之。撫之泣。與訣。鑑悲慟。不自勝。以好語慰藉。卽潛挾自入娼所。刺殺之。以及匿牖下。欲去。已自念。吾殺娼。父不知。必且謂吾母禍母矣。吾走。毋無以自明。還自歸。會王方被逮。鑑大呼曰。殺人者我也。我當死。衆以其年幼。不信。欲舍之。鑑曰。若不信。信殺。殺人刀尚在。是從牖下出之。於是母得釋。而有司閱鑑志。以事聞。下法司議。於是法司言。母子之




情根於天性、鑑雖冒重罪獨  
志在全受情、可矜、詔特原鑑、

函史下編卷十七終











































DS  
735  
A2  
T4  
v.75  
函史下編卷之十八

明旰罷鄧元錫著

兵制考

大史公有言。兵者。聖人所以計彊暴。平亂世。夷險阻。以救危殆者也。天生五材。民並用之。誰能去兵。自含血戴角之獸。見犯則較。而況於人。懷好惡喜怒之氣。喜則愛心生。怒則毒螫加。情性之理也。昔黃帝有涿鹿之戰。以定火災。顓頊有其工之陳。以平水害。唐虞之際。致治之極。而蠻夷猾夏。寇賊姦宄。書用爲儆。三苗逆命。而徂征。殷周以兵定天下。天下旣定。載戢干



戈載韜弓矢。擾之以文德。而猶立司馬之官。因井田以制軍。周禮夏官以萬有二千五百人爲軍。王國六軍。大國三軍。次國二軍。小國一軍。軍皆命卿。二千有五百人爲師。師帥皆中大夫。五百人爲旅。旅帥皆下大夫。百人爲卒。卒長皆上士。二十五人爲兩。兩司馬皆中士。五人爲伍。伍各有長。其令賦則以其地與民而制之。司徒會萬民之卒伍而致之。

崑山王應電曰。五人爲伍。長居

其旁各二人。一統四而名也。五伍爲兩。五伍二十五人。將車一兩。曰兩。以一車兩輪而名也。百人爲卒。百人乘車。大車各一乘。其乘車甲十三人。步卒七十五人。其大車將之者二十五人。兩司馬隊長卒正副統之。而兵法成曰卒也。五百人爲旅。旅衆也。中四兩爲中軍。四正。正二兩爲正軍。四隅。隅一兩爲奇軍。從四



兩往來爲遊軍。曰旅也。五旅爲師。師大衆也。法車二千五百乘爲大偏。偏二千五百人。五師爲軍。法萬二千五百人。兵車百二十有五乘。大車亦如之。合二車之倅爲車五百乘。可自環爲營。故字以包車爲文。其在六鄉。五家爲比。五比爲閭。四閭爲族。五族爲黨。五黨爲州。五州爲鄉。族師以時屬民而較登其夫家之衆寡。及其六畜車輦。五家爲比。十家爲聯。五人爲伍。十人爲聯。若作民而師。田行役。則合其卒伍。簡其兵器。以鼓鐸旗物帥而至。掌其治令。其在六遂亦如之。遂人掌邦野。造縣鄙形體之法。五家爲鄰。五鄰爲里。四里爲鄣。五鄣爲鄙。五鄙爲縣。五縣爲遂。皆有地域。溝封之。以歲時稽其人民。簡其兵器。而教之稼穡。以



彊予任之。有發。以下劑致之。其大帥田。前期。鄉師出。  
法于州里。簡其鼓鐸旗物兵器。修其卒伍。及期。以司  
徒之大旗。致衆庶而陳之。以旗物辯鄉邑。而治其政。  
令刑禁。巡其前後之屯。而戮其犯命者。遂師亦各帥  
其所治之民。而以遂大旗致之。不用命者誅之。此先  
王因農而定賦。因賦以制軍。不出比閭族黨鄰里。鄩  
鄙州鄉縣。遂之民。而伍兩卒旅之軍師畜焉。使其恩  
足相恤。義足相救。靜足相保。動足相死之道也。盱江李觀

日。六遂亦爲六軍。注疏謂天子六鄉六  
遂。合十有二軍。以迭用。故止言六軍。

乃車徒異賦。

均起。灋於田。方里而井。四井爲邑。四邑爲丘。丘十六



井也。有戎馬一匹。牛三頭。四丘爲甸。甸六十四井也。有戎馬四匹。兵車一乘。牛十二頭。甲士三人。卒七十二人。干戈備具。是謂乘馬之法。一同百里。提封萬井。除山林斥澤。城池邑居園囿術路。爲三千六百井。定出賦者六千四百井。戎馬四百匹。兵車百乘。此卿大夫采地之大者也。是謂百乘之家。一封三百一十六里。提封十萬井。定出賦六萬四千井。戎馬四千匹。兵車千乘。此諸侯之大者也。是謂千乘之國。天子畿方千里。提封百萬井。定出賦六十四萬井。戎馬四萬匹。兵車萬乘。是謂萬乘之國。而車右掌軍車之政令。凡



軍旅會同。合其車之卒伍。而比其乘。屬其右。國勇力之士屬焉。蓋徒起法於人。車起法於田。徒合於鄉師。車合於司右。而縣師受法於司馬。會車徒之卒伍而用之。而六師此乎成也。大都環千里。鄉遂近郊。遠郊之地。爲田六十四同。爲阡百六十餘萬家。以丘甸出車之灋計之。當爲五十餘軍。約之鄉二十有五軍。遂亦如之。大司馬則通王畿千里家可用也者。十而調其一。以爲六軍。此先生之制軍。徵發不勤。行役不勞。居足以守而無虞。出足以戰而無敵。田足以耕而老幼廢疾有養。無失所也。師用乎毒天下而從。不用。則



歛而藏之。反一無迹也。是天下之大順也。可謂盡制

矣。崑山王應龍曰：兵不外乎民，將不出乎吏，成周之法之善固矣。然信其言，是以爲王國六軍取足於六鄉而止也。如王國六軍取足於六鄉而止，則六鄉之民比卽爲伍，人人盡用，歲無更休，遂都縣鄙，千里之民居然無事，何其勞逸之不均也。況王國惟六軍如天子巡守于方岳，夷狄奸宄交侵，竊發誰與居守？遠近征討，何以迭用耶？不知比閭族黨州鄉，主於教訓服役守禦，故皆在邑之民，伍兩卒旅軍師主於師田，實通千里之地，雖皆以五起數，所以起數者固不可比而同之也。故鄉約二十五軍，猶後世之京軍，主居守王畿爲國本者也。遂亦有井邑丘甸出車之賦，亦二十五軍猶後世之畿輔軍各守衛其國都而拱護王畿者也。至大司馬所握之六軍，通王畿千里之內，更休而迭調之，故大事致民用之，軍旅田役大故致餘子，繇鄉遂至於都鄙，定法皆然，觀四時教閱之法，旗物號名，兼州里野家都鄙而並陳之，可見矣。此皆公卿大夫各帥其鄉遂都鄙采地之民而用之，猶後世郡國調遣更番上直之兵也。故天子出必有六



軍。君行師從。卿行旅從。其五等之國。三軍二軍一軍。皆通于四疆。可顯推矣。乃其講武之

法。中春教振旅。明兵入。專於農。司馬以旗致民。平列陳。如戰之陳。辯鼓鐸鐃鈜之用。以教坐作進退疾徐。疏數之節。遂以蒐。中夏教芟舍。習軍野宿。撰車徒爲營衛。其列陳。如振旅之陳。辯縣鄙家鄉野。若帥之號名。以辯軍之夜事。他皆如振旅。遂以苗。中秋教治兵。秋始肅。教師始出也。平列陳。辯旗物之用。王載太常。諸侯載旂。軍吏載旗。師都載旛。鄉遂載物。郊野載旐。百官載旟。他皆如振旅。遂以獮。中冬教大閱。前期羣吏戒衆庶修戰法。虞人萊所田之野。爲表。百步一表。



爲三表。又五十步爲一表。田之日。司馬建旗于後表之中。群吏以旗物鼓鐸。鐸。各帥其民而至。質明。弊旗誅後至者。乃陳車徒如戰之陳。皆坐聽誓。於是司馬斬牲以左右狗陳。曰。不用命者斬之。中軍以輦令鼓。鼓人皆三鼓。鼓作。司馬振鐸。羣吏作旗。車徒皆作。乃鼓行。鳴鐸。車徒皆行。及表而止。三鼓。擺鐸。羣吏旗。車徒皆坐。又三鼓。振鐸作旗。車徒皆作。乃鼓進。鳴鐸。車驟。徒趨。及表乃止。坐作如初。乃鼓戒。車馳。徒走。及表乃止。鼓三闕。車三發。徒三刺。乃鼓退。鳴鐸。且卻。及表乃止。坐作如初。遂以旌爲左右和之門。群吏各



帥其車徒。以叙出和左右陳。而有司平之。旗居卒間。

以分地。

所謂陳間容陳隊間容隊

前後爲屯百步。有司巡之。險野

人爲主。易野車爲主。旣陳。乃設驅逆之車。中軍以鼙

令鼓。鼓作鼓行。徒銜枚而進。及所弊。鼓皆駢。車徒皆

譟。徒乃弊致禽焉。故大閱教戰也。記有之。天下雖安。

忘戰必危。天下雖平。好戰必亡。教戰不忘戰也。不忘

戰。終不以無事而教戰。以社以禘以享以方。於農隙

講事焉。而終之以禮。此天下之大教也。乃五服綦布。

則五國以爲屬。屬有長。十國以爲連。連有帥。三十國

以爲卒。卒有正。二百一十國以爲州。州有牧。連帥比



年簡車卒正。三年簡徒羣牧。五載大間車徒。此先王  
爲國經武。方行天下。克詰張皇之大畧也。而王宮宿  
衛。於軍制爲特嚴。宮正主王宮。官府次舍。衣寡之版。  
夕擊柝而比之。宮伯主公卿大夫士之庶子。爲環衛  
者。蓋八次八舍。周回王內。晝夜宿守如此。乎其設也。  
王出入太僕自左馭而前驅。視朝在路門之左。虎賁  
氏掌帥虎士先後王而趨。舍則守王闕。視朝在路門  
之右。旅賁氏以戈盾夾王車而趨。車止則持輪。司隸  
掌率夷隸執兵器兵服衛王門。蓋居守行衛。靡時不  
警。內外相維。有條不紊。而諸防微漸。張武德如此乎。



致嚴也。宮正、宮伯、大宰之屬。而虎賁、虎士。則司馬屬也。司隸五隸。司寇屬也。六官各以其屬屬於天子。爲警衛。而又糾德行。稽功緒。以勸之善。掌戒令。糾禁。幾出入。嚴誅賞。以防其過。蓋體統森嚴。樞機周密。而執劉鉞上戎刃者。皆冠冕佩玉之士大夫也。乃司兵。司五兵五盾。各辨其物。與其等。以待事。及授兵。此司馬之灋。而頒之。受兵輸亦如之。及用兵亦如之。司戈盾。掌物戈盾而頒之。司弓矢。掌六弓四弩八矢之灋。而射人以射灋治射儀。服不氏。主養猛獸而教擾之。射鳥氏。主射妖鳥以狎異類。狙恐怖。而專之於射。羅氏



掌羅司燿行火。蓋備弓矢。鍛戈矛。鍔甲冑。敵千礪刃。而凡爲攻爲守。爲火射。爲近射。爲車戰。爲野戰者。又不戒而素習也。乃較人。臧僕。講馭夫之灋。大具而十二閑六種之馬。阜佚教習。畢可物而頒也。司右掌摯右之政令。合車之卒伍。而比其乘。屬其右。而國中勇力之士。能用五兵者。畢可得而屬也。乃職方氏。以中大夫掌天下之圖。辨九州之國。以周知天下。山澤川藪。戶口阨塞之數。眡天下於指掌。掌固。掌城郭溝池。樹渠以爲固。司險阻。掌山林川澤之要害。遮列之以爲險。頒士庶子及衆庶。任其萬民。用其材器以爲守。



卽有暴客。無所伺之。則又其因天地之險。明守國之務。伏至險於大順。兵設不用。而諸侯自爲正之道也。國有故。則藩塞阻路。止行者。以其屬守之。王親征。司右屬右。大僕贊鼓。傳王命于軍中。戎僕掌馭。較人頒馬。環人致師。察軍慝。訟敵國。揚軍旅。降圖邑。巡諜賊。而搏之。而挈壺氏。掌挈壺以令軍井。挈轡以令舍。挈畚以令糴。凡軍事。縣壺以序聚櫟。其備豫至於此。卽倉卒豈足憂哉。師有功。則司勳氏。掌六鄉賞地之灋。以等功。有功者。銘書于太常。祭于太烝。此成周本道灋天。因地。訓人。任形勢以待事。而歸其用於全國也。



制于未亂而足以御亂。保於未危而足以維危。爲不可勝。而幾神變化。畢伏於無形。足制勝也。此夏官卿治軍之道也。王降而霸。齊桓用管仲。倣先王之制。作內政以寄軍令。三分其國爲二十一鄉。五家爲軌。軌有長。十軌爲里。里有有司。四里爲連。連有長。十連爲鄉。鄉有良人。以爲軍令。則五人爲伍。軌長帥之。十連爲里。里五十人爲小戎。里有有司帥之。四里爲連。連二百人爲卒。連長帥之。十連爲鄉。鄉二千人爲旅。鄉良人帥之。五鄉一帥。合之萬人爲一軍。五鄉之帥帥之。公將其一。國子將五鄉焉。高子將五鄉焉。而軍令以



行故高國退而修鄉。鄉退而修連。連退而修里。里退而修軌。軌退而修伍。伍退而修家。蓋寓政於令。猶之乎寓軍於農。得自然之勢焉。以能守固戰強。九合諸侯。而天下用匡。晉文公繼起。蒐于被廬。以作三軍。使卻穀將中軍。卻溱佐之。使狐偃將上軍。讓於狐毛而佐之。命趙衰將下軍。讓於欒枝先軫而佐之。蓋至於城濮之戰。車七百乘。少長有禮。而文公知其可用也。以能修扞王艱。主諸侯會盟者數世。當是時。楚以荆蠻而莊王能以其國霸。其師之戎。分爲兩廣。廣有二卒。卒偏之兩。右廣初駕。數及日中。左則受之。以至于



皆內官序當其夜。其軍行左轅右追。蓐前茅慮無。中  
權後勁。百官象物而備軍政。不戒而具。以能卒乘輯  
睦。平陳軼晉。抗衡于中原。當是時。魯成公作丘甲。使  
丘出甸賦。哀公用田賦。又計田而賦之。皆重賦民以  
足兵。蓋師旅亟動。兵不足。而疲百姓以事之。國不競  
無惑矣。春秋書之。傷民力自此而竭也。至於戰國。齊  
有技擊。魏有武卒。秦有銳士。世方爭於功利。馳說因  
時輔勢。作爲權詐。以相傾軋。而亟疾於兵。孟軻氏傷  
之曰。今之事君者曰。我能爲君結與國。戰必克。今之  
所謂良臣。古之所謂民賊也。爭地以戰。殺人盈野。爭



城以戰。殺人盈城。此所謂率土地而食人肉。罪不容  
於死。蓋痛之也。孫卿子論之曰。齊人隆技擊。得一首。  
受賜緡金。八兩日緡。無本賞矣。事小敵毳。則偷可用也。事  
大敵堅。則渙然離耳。是亡國之兵也。其去貨市傭而  
戰之幾矣。魏之武卒。以度取之。衣三屬之甲。操十二  
石之弩。負矢五十个。置戈其上。冠胄帶劒。羸三日之  
糧。日中而趨百里。中是者。復其戶。利其田宅。然氣力  
數年而衰。而復利未可奪也。更造不易周也。故地雖  
廣。其稅必寡。民雖衆。其力必竭。是危國之兵也。秦其  
生民也。陘隘其使民也。酷烈。怛之以慶賞。鰓之以刑。



罰以功賞相長。五甲首而隸五家。使民所以要利於上者。非戰無繇也。是聃爲有數。然皆干賞蹈利之兵。非有安制綦節之理也。故齊之技擊。不可以當魏之武卒。魏之武卒。不可以直秦之銳士。秦之銳士。不可以當桓文之節制。桓文之節制。不可以敵湯武之仁義。故曰善師者不陳。善陳者不戰。善戰者不敗。善敗者不亡。故兵無他道。亦有仁義而已矣。文之所加者深。則武之所服者遠。德之所施者博。則威之所制者廣。三代之盛。所以至刑錯兵寢而不用者。其本未有序。其施行有統也。秦乘四世之威。據河山之阻。窮兵



力以毒天下。既滅六國。分天下爲三十六郡。郡置材  
官。聚天下兵器於咸陽。銷之。示黔首弗復用。而北築  
長城以拒胡。置戍焉。又南戍五嶺。秦民見行。如往棄  
市。因謫發之。先謫發吏有皐。及贅壻賈人。後以甞有  
市籍者。又後以太父母父母甞有市籍者。後入閭取  
其左。民莫聊其生。於是卒隸之徒。焱起雲合。還爲敵  
讐。以覆祀滅宗。而白起王翦蒙恬章邯之倫。亦皆以  
隕其身夷其世也。天道惡殺。應以顛至。詎不信哉。漢  
興踵秦法。於郡國置材官。而京師有南北軍之屯。南  
軍衛尉主之。掌宮城門內之兵。北軍中尉主之。掌京



城門內之兵。當是時。兵農未分。南北兩軍。獨調諸農。則猶古之遺焉。民年二十三而征。一歲爲衛士。二歲爲材官騎士。習射御騎馳戰陣。六十五而免。郡國去京師遠。民情無慮顧。守深堅。卒有急可恃。故以爲宮城衛。謂之南軍。三輔距京師近。民情有閭里墳墓族屬之愛。利害不相捐。故以爲京城衛。謂之北軍。南軍以郡國民始傳者充。新故番上。常二萬人。天子以季秋及歲正月。行幸曲臺。臨饗衛士。勸勞之以農桑。乃遣北軍番上與南軍等。而調之左右京輔。左右京輔者。左扶風。右馮翊。中京兆也。三輔吏。威重於郡國。守。



而不得專兵。獨發騎士詣北軍。以聽於中尉。而郡國兵。選能引關蹶張。材力武猛者。爲輕車騎士。材官樓船。常以秋後講肄課試。各有員。平地用車騎。山林險阻。用材官。川澤用樓船。巴蜀三河潁川諸郡國。惟獨有材官。上郡北地隴西諸郡國。有車騎。而廬江潯陽會稽諸郡國。有樓船。郡太守若都尉典郡國兵。王國相比郡太守。中尉比都尉。侯國相比令長。歲郡守尉教兵。侯國相與焉。而更有三品。有卒更。有踐更。有過更。其正卒人番休迭上。月一更。曰卒更。卒貧願顧更得錢。聽次直者。出錢顧之。月二千。曰踐更法。天下人



人各直戍邊三日。所謂繇戍也。雖丞相子不輕復。然勢不能皆人人行爲三日之戍。行者自戍三日亦不可便往還。因往一歲而更。諸不行者輸三日錢入官給戍者。曰過更。其謫發則有七科。惡少亡命弛刑選募。則有勇敢犇命伉健之屬。而漢軍制盡於此。高祖時制南北軍爲諸夏根本。衛尉中尉之任不輕授。擇熊羆不貳心之臣以充。呂后之世。欲尊諸呂自擅。分屬之祿產。而長樂衛尉屬之呂更始專聚兵。以威大臣。且崩時。戒祿產曰。我死必據兵衛宮。謹無送喪。及丞相平大尉勃旣交驩。謀誅諸呂。乃令酈生子寄給。



說祿解將印以兵授太尉。而紀通持節矯納太尉于北軍。太尉既得北軍。然尚有南軍。衛尉居中實主之。乃令平陽侯告衛尉。毋內產殿門。蓋產入宮。卽親衛。本所屬。勢足以制外。然南軍存。而太尉得以其令傳告中衛尉。而朱虛入清宮。實請北軍卒千人以行。則又太尉得主軍之效也。蓋兩軍表裏相維攝。以已難固如此。而郡國兵。郡守尉得專制焉。其後武帝盛兵以威四夷。於是增置期門羽林屬南軍。爲宮掖衛。增置八校尉隸北軍。而更名中尉爲執金吾。衛京師。進中尉屬中壘校尉。掌北軍壘門內。及外西域兵屯騎。



較尉掌騎士。步兵較尉掌上林屯兵。越騎較尉掌越騎。知越事者。胡騎較尉掌胡騎。習胡事者。與水長射聲虎賁。三較尉而八。外又有城門較尉。掌京城門屯兵。屯各有司馬。有十二城門候。則募兵始此。而期門羽林之士。皆家世爲之。則長從如此。蓋自是有養兵之費。而京師之兵制寢壞矣。元狩後。兵革數動。發謫吏謫民謫戍。次及七科。若異時。隸都尉者充兵。而郡國之軍制又壞。後往往發民從軍。而舊制蕩然。光武卽位。意銷兵。詔罷郡國都尉。罷天下輕車騎士材官樓船。及軍假吏還民。罷太守都試法。惟京師兵頗如



前漢時國有征伐。調京師衛兵。四出以定難。意欲以  
彊榦弱枝。而專其重於中都也。永初中。募民入穀。爲  
虎賁羽林衛士。無慮皆市傭。而營衛之選又壞。延熹  
間。詔減羽林虎賁不任事者半俸。而京師之兵盡殫  
弱弊矣。其後盜大起。往往募召增兵。創立名號。爲陷  
陳義從。積射之類。冗濫不可較。而國力褊然。黃巾乘  
之。天下大潰。已乃召邊兵。除宦豎。而漢遂以亡。則原  
漢盛衰。皆兵之繇也。漢兵志不具上事。具宋儒馬端  
臨所爲兵考中。魏武擅國。置武衛營於相府。置領軍  
主之。文帝增置中壘營。於是有武衛中壘二營。有中



左右前後五軍。軍各一帥。置中護軍。中領軍。護軍。將軍之官。而州置都督。典州郡兵。尋加四征四鎮將軍之號。然是時。大將軍實都督中外諸軍事。司馬氏世柄之。曹魏以亡。吳多舟師。而兵有解煩敢死兩部。及車下虎士。其州郡兵。有丹陽青巾。交州義士。及健兒。武射之名。其調民已亟。大率強者爲兵。羸者補戶。後五子分將。而吳亡。蜀初置五軍。畧倣漢制。而所糾合。四方精銳之士。有突將。無前賓。叟青羌。散騎。武騎之號。然國小壤迫。弊於兵。又兵數動。以讐國而亡。晉旣混一。其制因魏。而悉去州郡兵。大郡置武吏百人。小



郡五十人。交州牧陶璜言。交廣東西數千里。不賓屬者六萬餘戶。其服從官役者。裁五千餘家。二州荒服。惟兵是鎮。又寧州諸夷。據境上流。未宜約損州兵。以示單虛。僕射山濤亦言。武備不可盡弛。不聽。而永康以後。盜賊群起。州郡不能禽制。天下大亂。元帝南渡。以揚州爲京畿。荊州江州爲重鎮。而三州戶口實居江南之半。於是復刺史典兵。而州鎮特重。故忠則陶侃。溫嶠。以入衛定國難。逾則王敦。蘇峻。以啓釁爲國憂。蓋其勢也。其後南軍脆柔。風不競。而終并於北。五胡虐用。虜使其民。司冀青徐并雍七州之間。民五丁



用二。或四丁用一。而軍自齎資餉調。不辨者斬。蓋破家以殉其身。而猶莫之能給也。則慘烈至矣。宇文太祖用蘇綽言。實始倣周典。置六軍。籍州郡魁健材力之士。以充盡蠲。租調。而刺史以農隙教武事。合爲百府。府一卽將主之。分屬二十四軍。一開府領之。置大將軍十有二人。二開府。一大將軍統之。二大將軍一柱國統之。而屬於都督。持節旄臨焉。六柱國所統。隋母過五萬人。因之爲十衛。唐初置軍府。領以驃騎車騎兩將軍。析關中爲十二道。置軍府十有二。萬年道曰參旗軍。長安道曰鼓旗軍。富平道曰玄戈軍。醴泉道曰井鉞軍。



同州道曰羽林軍。華州道曰騎官軍。寧州道曰折威軍。岐州道曰平道軍。幽州道曰招搖軍。西麟道曰苑游軍。涇州道曰天紀軍。宜州道曰天節軍。多放天象而名。置將副各一人。督耕戰。以車騎府統之。尋廢。而復改驃騎曰統軍。車騎曰別將。已軍置將軍一人。坊主一人。以簡察戶口。督課農桑。蓋兵取諸農。貞觀中。分天下爲十道。置府六百三十四。皆有號名。其在關中者。二百六十一。以居重而馭輕。府三等。兵千二百人爲上。千人爲中。八百人爲下。府置折衝都尉一人。左右果毅都尉各一人。長兵曹別將各一人。府以三



百人爲團。團有較尉五十人爲隊。隊有正十人爲火。火有長。征行裝自具。介冑戎器藏於庫。而時給。番上宿衛者。給弓矢橫刀。民年二十爲兵。六十而免。能騎而射者。爲越騎。餘爲步兵。歲季冬。折衝都尉率五較兵之在府者。肄武事焉。而皆隸於十六衛。左右衛領府六十。諸衛領府五十。或四十。餘隸東宮六帥。凡發府兵。下符契于州刺史。刺史與合符乃發。闔府盡發。則折衝都尉以下皆行。次則果毅行。小發則別將行。當是時。府兵平日皆安居田畝。折衝獨以田隙教戰陣。國大師。則以符契發兵。至所期地而集。所命將按。



閱其教習不精者罪折衝甚者及刺史率以行事竣將解兵歸朝而士卒賜勲加賞遂罷歸便道者徑歸行者近不踰時遠不經歲而將不專兵兵無常將將無握重兵不制之患乃天子則自有禁軍禁軍者北衛兵也高祖既定天下罷從軍者歸田命願畱宿衛者聽願畱者三萬人以渭水白渠旁民所棄腴田分給之號元從禁軍後元從軍老不任軍以子弟代號父子軍而諸衛府兵爲南衛軍貞觀中太宗擇善射者百人於北門番上曰百騎已選材力驍壯爲七營月一營番上曰北衙七營已置左右屯營於玄武門



領於諸衛。號飛騎。上游幸以從。爲翊衛。高宗時。取府兵。越騎步射。置左右羽林軍。大朝會。夾陛。桓。行幸。夾馳道而馳。武后時。改北軍百騎爲千騎。睿宗改萬騎。玄宗用萬騎。平常亂。改左右龍武軍。用元功功臣子弟以充。良家子避征戍者。或稍得納貲隸焉。分日更上如羽林。皆謂禁軍。時府兵浸墮。番上者。衛將佐以假人爲傭奴。京師人耻之。至以相詬病。於是有熨蒸手足以避役者。自劉仁軌將以鎮洮河。實始有久戍之役。牛僊客以積財媚上。得宰相。邊將慕效之。山東戍卒。齎繒帛自隨。輒誘之置府庫。晝苦役。夜繫地牢。



利其死而沒其財。故自天寶後。山東戍卒生還者。十  
二三。殘虐如此。然未嘗有外叛內訌。殺將帥自擅者。  
以府衛法密。顧田園妻子。恐終累家族故也。久衛伍  
益耗散。至不能給宿衛。宰相張說請一切募士宿衛。  
號長從宿衛。已更號彊騎。而折衝將皆積歲不遷。士  
人耻爲之。至天寶末。而折衝諸府。至無兵可交。李林  
甫爲相。遂奏停上下魚書。六軍衛皆募市人。富者販  
繒綵。食梁肉。壯者爲角觚。跋河翹木。扛鼎之戲。以嬉。  
不習兵。又人不土著。無家族。不自重愛。當是時。天子  
方外討奚契丹。天下勁兵。悉萃西北邊。而長征兵無



還期。敕分五番。歲番遣還家洗沐。洗沐五歲。酬勲五轉。慰其心。而天下頓弊。及安祿山以范陽節度使得幸。專制置官。左僕射。爵東平郡王。貴寵震天下。聽於上谷鑄錢。聽以藩將代漢將。竟驕極而反。唐初兵戍邊屯防大者曰軍。曰城。曰鎮。小曰守捉。而認之於諸道。軍城鎮守捉皆有使。而道有大將一人。曰大總管。已更命曰大都督。行軍征討。亦曰大總管。永徽後。都督帶使持節者。謂之節度使。開元中。置十節度。經畧使以備邊而士馬精悍者。皆在邊矣。犯京師。京師曠騎至不能受甲。於是兩都繼陷。大盜滅。而武夫叛卒起行陣。若從賊自歸者。無慮除節鎮。爲使相。列侯王矣。大者連州十餘。小兼三四郡。兵強則逐帥。帥強則叛主。每節帥病且死。輒



立子爲後。不則士卒共推擇所與私將。號留後。以微命於天子。天子不能制。順而撫之。以苟幸無事。而方鎮之禍。遂與唐相始終矣。當祿山反時。諸禁衛從上西者僅千人。肅宗赴靈武。衛士不滿百人。專倚朔方軍爲根本。既卽位。以禁旅單弱。稍復調補北軍。置左右神武軍。以元扈從官子弟充之。曰北衙六軍。中擇諸善騎射者置御前。曰供奉射生。官分左右廂。曰左右英武軍。乾元初。李輔國用事。欲擅兵。請得將羽林騎士五百人時徽巡。相李揆曰。漢以南北軍相制。故周勃得以北軍安劉氏。朝廷制南北衙。欲文武區別。



以相司。今用羽林代金吾警非制也。脫內有非常。當  
何用制之乎。事得寢。初哥舒翰破吐蕃於洮西。置神  
策軍。立軍使。祿山反。神策較尉衛伯玉將兵千人入  
赴難。而神策故地沒於吐蕃。不得歸。卽詔伯玉爲神  
策軍節度使。將所部屯陝。而命中使魚朝恩爲觀軍  
容使。監其軍。已代宗幸陝。朝恩舉以其軍從事平。遂  
以軍歸禁中。自將之。然尚未敢顯然與北軍竝也。已  
吐蕃復犯京師。朝恩又以神策軍屯苑中。自是寢盛。  
分左右廂。勢欲居北軍右。因遂爲天子禁軍。而朝恩  
以知神策軍使。請以京兆之好時。鳳翔之麟遊普潤。



皆隸神策軍。明年復請以興平武功扶風天興諸衛  
畢隸之。而朝恩以放橫誅死。當是時神策軍雖處內  
隸宦官而數以裨將主兵。出征伐輒克。及李希烈反  
盜四起。神策武力士多闔死。詔神策使白志貞蒐補  
以充。志貞因爲利。東征士死亡者不以聞。市井豪緣  
爲幸。入賂則補之。名著籍。受給賜。而身市廛爲販鬻。  
於是健卒盡。而隸伍籍無慮皆市人。段秀實以爲禁  
旅單弱。不足備非常。上疏言古天子萬乘。諸侯千乘。  
大夫百乘。蓋以大制小。以十制一。凡以尊君卑臣。強  
幹而弱支也。今外有不廷不虞之虜。內有阻兵方命。



之臣而禁衛不備不精。旣削且弱。後猝有變。國何以待之。夫猛虎所以爲百獸畏者。以有爪牙也。爪牙廢則狐豚特犬。皆能爲之敵。惟陛下留意。疏上不省。尋涇卒作亂。召禁兵捍賊。空無人。而天子幸奉天。已志貞流殛死。而神策都虞候李晟自飛狐道以其軍赴難。遂爲神策行營節度使。有社稷功。而神策士益寵。而殿前左右射生軍亦改號神威軍。於是北軍它所增置號名皆廢。置不二。惟翰林龍武神策神威爲最盛。總號曰左右十軍。德宗至自梁州。以神策軍在左。功賜號興元。元從奉天定難功臣。罪免死。而中書御



史府兵部不能歲比其數。三輔人庇焉。一牒輒十數人。長安姦人。占籍兩軍者。率身不宿衛。輸錢中人代番。上名曰納課。而外憑藉。肆爲暴。京尹赤令爲歛屈。已內侍益崇寵。特置左右神策護軍。中護軍。護軍中尉官之。已又置統軍。當是時。邊兵衣糧多不贍。而親衛卒出屯防者。諸頒給特厚。於是諸邊將詭自請願。遙隸神策軍。得自竭。旣得請。卽稟賜。遂贏舊三倍。繇是諸邊卒往往稱神策行營。而邊軍皆內統於中人矣。蓋是時。藩鎮外擅禁衛。內恣而中實單弊。卽一有緩急。曾不能少有禁禦也。亡兆見矣。貞元中。天子與



常侍李泌議復府兵。泌爲上叙府兵興壞之端甚具。因爲上言。今歲關東卒戍京西者十七萬。計歲食二百四十萬斛。今粟斗直錢百五十。爲三百六萬緡。國家比遭饑亂。經費不充。就令有錢。亦無粟可糴。恐未暇議府兵也。帝默然。大憂之。曰。減戍卒。亟歸也。則何如。泌曰。陛下誠聽用臣策。可不減戍卒。不擾百姓。麥賤糧食足。而府兵亦成。帝曰。審如是。何爲不行。泌對曰。誠行之。必亟爲之。後旬日無及矣。吐蕃往居原蘭間。以牛運糧。今糧盡牛無所用。請發左藏惡繒。染爲綵纈。因黨項爲市。每頭不過二二三疋。計十萬疋。可得



牛六萬餘頭。又命諸冶鑄農器。糴麥種。分賜沿邊軍鎮。募戍卒耕荒田而種之。約麥熟。倍償其種。餘准時價。官五分增一。爲之糴。來春種穀亦如之。關中土沃饒而久荒。所收必厚。戍者厚獲。勸耕者必多。邊地居人少。而軍月糴足自食。粟麥無所售。糴必賤。名爲增價。實比今歲減且倍矣。帝曰。善。命立行。因問卿言府兵亦成如何。泌曰。戍卒因墾田饒穀粟。必懷土無歸心。舊制三年而更。及將更。下令有願畱者。以所墾田爲永業。願以其家來者。給長牒。續食遣之。卽願從者。必衆。如此數更。將戍卒皆土著。乃悉以府兵之法理。



之。是變關中之疲幣爲富強也。帝大喜。而戍卒應募願耕屯者什五六。後事尼不行。當是時。澤潞以山東多變爲兵衝。軍伍彫剝。節度使李抱真大憂之。乃籍戶三丁擇一。蠲其徭。給弓矢。令閒月將曹偶習射。歲終大蒐。親按閱。第能否賞責。比三年。人皆爲精兵。舉所部得成卒二萬。皆不稟于官。而府庫充實。而昭義步兵。因遂雄山東。爲列鎮諸軍冠。則屯營田之於軍制。其本務也哉。唐史有言。唐有天下三百年。兵大勢凡三變。始盛時。有府兵。府兵廢而爲彍騎。彍騎變而方鎮之形成。強將悍卒徧于天下。於是天子自置兵。



於京師曰。禁軍迄不振以亡。故兵以止亂。其弊也適以爲亂。又其甚。則困天下以養亂也。安危之勢。可不慎哉。梁祖起盜賊篡唐。制峻法嚴。軍將較有戰沒者。所部軍盡。斬曰拔隊。於是士亡命不敢歸。則令將較文其面爲識。每出亡輒獲。獲立旆。士不忍荼毒而梁亡。唐莊宗結髮善戰。愛士卒。賞賚無度。剥疲民以奉軍。民殫弊而軍驕不可使。唐亦以亡。其後晉漢周。率以士擁立有國。姑息軍益甚。至不敢蒐閱。士羸不任戰。而循習驕蹇不用命。周世宗敗北漢于高平。始太息謂侍臣曰。凡兵務精不務多。今以農夫百。養甲士



一。奈何浚民膏血。養無用之物乎。乃大閱。登精銳爲上軍。汰羸老爲剩員。稟稱之。而兵精。又募天下壯士。驍勇者。咸詣闕。選隸殿前諸班。收藩鎮之權。而兵愈益精。宋興平定天下實籍焉。其制軍之法四。一曰禁兵。二曰廂兵。三曰鄉兵。四曰蕃兵。禁兵者。天子宿衛軍也。收天下勁兵。列營京畿。分隸于殿前侍衛。二總管司爲宿衛籍藏於樞府。諸召募廩給訓練屯戍揀選之政。皆樞密院掌之。其親近日扈從者。曰班直。其分營州郡。便廩食於外。聽以其家往。曰就糧。皆謂禁兵。諸邊防要郡。有征討屯守。畢自京師遣。使往來道。



路習勤苦。與諸鎮兵互戍更。意以重禁衛而尊京師。  
州鎮兵者。諸州鎮兵也。州鎮兵壯者。既揀隸禁衛。餘畱  
本州鎮。總於侍衛司。隸宣徽院。以分給漕輓畜牧繕  
修之役。雖無踐更。亦罕教閱。唯邊蠻夷者。間更戍。與  
禁兵參屯。意削方鎮權。奪其兵。鄉兵者。民兵也。視鄉  
小大爲之數。選土著以充。有部伍。無營壁。所在團結  
訓練。以爲防。爲追胥。然不得擅調。役兵者。百有司隸  
兵也。若牧置。若漕輓。若管庫。若工技業。其事則專其  
處。而無更有額名。有營。有常廩。有橫賜。然不以卽戎  
其西北邊諸塞下。內屬夷羗。各有部落。團結保塞。爲



藩籬者。曰蕃兵。不在是。方宋之初。卽詔禁衛各閱所部兵。諸州長吏各選所部兵。揀驍勇者。升上軍。他諸出於召募。團諸鄉井。或於營伍錄子弟。或於凶歲募饑民。或以有罪摘配隸。所繇無常。而天子失職。獷悍之民。皆收之爲良民衛。而統於禁衛。兵無常帥。帥無常卒。有發則畀將以兵。已於事而峻。則入奉朝請備指蹤。而外內相維。上下相制。等級明而賞罰必。雖有暴戾恣睢。無所用之。又其時。天子以英武定海內。其選練皆臨軒簡閱。有功勤。卽爵賞。無所吝。一犯法立誅。而諸邊將官。不過巡簡使。所將卒不過三五千。



故兵約而能精。又京師水陸四達。歲漕江淮粟六百萬石廩贍之。天下山澤縑帛泉貨齒革百物之稅。畢入於縣官。克賞給。沛然而有餘。以能略定海內。成混一之業。亦制之以其道也。太宗嘗閱禁兵。有挽強弩至一石五斗。連二十發不衰者。歎以爲弧矢之妙。近代罕有也。咸平中。詔三邊廂兵升禁軍。曰保捷。曰振武。法益完密。而耗蠹萌起。凡召募兵。所在設旗給賞。長吏都監專視之。途闕下至則軍頭司覆驗等第。引對隸諸軍。其下軍升上軍。自上軍升班直者。皆臨軒親閱。每遣戍。皆本司整比。軍須所司引對。便殿給裝錢。代還亦入見。犒之時。揀拔精銳。升補。而退其疲老者。凡大祀。有賞給。歲寒。食端午。冬至。有特支。戍邊。每季。又加給銀鞋。環慶。緣邊。艱饑。給者。有薪水錢。役兵勞苦者。季給錢。自川廣代



還者別給裝錢川廣通簡卒或給  
時服錢屨軍外出皆率有二糧景德中契丹通好

無事邊乃擇河北強壯歸鎮定兩部署而省鎮防兵  
十之五緣邊兵三之一其後趙元昊反世久安兵圯  
大募兵充禁旅以御敵而所募兵遠被川峽荆湘嶺  
表雖壯狡中格然不能其水土而摧陷復非所長陝  
西河北京東西竝邊土著卽揀選不及等而驍勇狎  
戰乃增保捷振武壯勇京輔郡增龍騎廣勇廣捷虎  
翼步闔諸軍名就糧禁軍以益之於是中外禁廂軍  
多至一百二十有五萬蓋軍冗甚矣西師罷龐穎公  
籍自延州入爲樞副首言關中苦餽餉請徙沿邊卒



就食內地。而天下兵罷老者猥多。不可以不汰。議者以虜初臣服。情僞難測。未宜遽弛備。而兵方募隨汰。恐變生。雖帝意亦難之。而籍在西事久習邊度。元昊困。必不遽敗盟。而兵不汰。將國力日屈。以百口保西事。無他。因爭之。於是兵汰者八萬人。嘉祐中。韓魏公琦在政府。上議言。祖宗以兵定天下。有征伐。則量敵募練。事已隨併。故兵日精。而國不費。今二虜號通好。而西北邊屯防之兵不解。常若敵之將至。故竭天下之力而不能給也。於此時。不爲之先慮。而速救之。一旦邊陲竊發。水旱相繼。乃駭而爲之圖。則旣晚矣。又



三路就糧之兵。雖勇勁服習。然邊粟貴踊。常苦其難  
贍。而邊卒數多。復且有尾大不掉之虞。祖宗時。內屯  
兵京師。歲漕東南粟以贍之。地廣而易供。雖其數多。  
乃適得強幹弱枝之術。故其時就糧之兵少。邊有事。  
輟京師兵以赴之。固爲慮深而爲費鮮也。願詔樞密  
院同三司。量河北陝西河東賦稅。及三司筦權之數。  
約可贍京師。及三路兵馬幾何。制爲軍額。額足罷募。  
闕乃增補。額盡而營數畸零者。併省之。庶國力可無  
屈也。且開寶至道之兵。太祖太宗之所剗制定。天下  
者也。天禧景德之兵。真宗之所守成。爲備豫者也。慶



曆之兵。西師後增置之數也。請下密院。具實祖宗所  
養之兵。視今數多少熟愈。則精冗判。而裁汰可無疑  
矣。於是詔兩府詳議具數聞。置額兵如章。開寶籍總三十七萬

八千。禁軍馬步十九萬三千。至道籍總六十六萬六  
千。禁軍馬步三十五萬八千。天禧籍總九十一萬二  
千。禁軍馬步四十三萬二千。慶曆籍總一百二十五  
萬九千。禁軍馬步八十二萬六千。自是稍加裁制。治  
平籍一百十六萬二千。禁軍馬步六十六萬三千。熙  
寧籍禁軍五十六萬八千。元豐籍六十一萬二千人。

當是時。天下無尺土一城。不名禁兵爲防守。故不耕  
而聚食者百十萬。世方晏然無事。而稅歛之厚。至不  
可復加。三司用日不給。而禁廂所募者兵。皆坊市無  
賴。安泰養勢。不能不惰驕。衛士入直。不自持襆被饌。



糧又法不隸於有司。有司不能制。暫用之名。借倩已  
罄。訾而不肯應。三歲而郊。國大賚費。八九十萬。而安  
爲固然。有不稱。顧稱多。絜少。比好嫌惡。以徵於上。甚  
且操白挺而群呼。蓋名雖爲兵。而實則驕惰。不可使  
之人也。學士蘇軾言。昔漢之制兵。未嘗聚於京師。唐  
雖聚兵。猶力耕積穀。佐國費。初未嘗無事而食也。今  
則有漢唐之患。而無其利。擇其偏兼用之。故兼受其  
弊。而至此廩廩也。皇祐中。富鄭公弼撫京東。河北民  
以水災故。流入境者三十餘萬。召募爲廂兵。拔其豪  
得九指揮。教練之。稱威邊。壯武威勇。分諸州服征役。



已行其法於諸路。就糧。禁軍缺。因用選補。先是民兵。  
在河北河東。曰神銳。忠勇強壯。忠順。在陝西。曰義勇。  
麟州曰義軍。在川陝。曰土丁。在廣南東西。曰捨手。在  
荆湖南北。曰弩手。西師作。籍陝西民爲弓手。已刺爲  
保捷。師罷放遣。治平中。韓魏公琦當國。爲上言。河北  
河東義勇。皆土著。皆勇悍純實。出天性。而物力資產。  
足內繫其心。稍加簡練。於府兵何異。陝西保捷。皆揀  
放。所存無幾。宜僉義勇。涅手。皆爲土兵。一時不無小  
擾。而終成長利。詔允行。知諫院司馬光持以爲不可。  
疏五六上。畧言。方刺陝西義勇時。臣丁憂還陝。備見



其事民生長太平。不識金革。一旦調發而爲兵。追呼  
逃避。人皇悸如死。哭號遍野。及刺面後。教師利其  
財。賄誅剥百端。爲煩擾特甚。始敕榜云。但守護鄉里。  
已復屯戍。千里供億勞費無已。况其平生所習。惟田  
畝力作。雖日教閱。獨旗號鮮明。鉦鼓備具。可美觀而  
止。一遇寇敵。卽瓦解星散。而大陣隨之。殊無益有害  
也。自後官知其然。放汰還農。則惰游已久。不復肯服  
稼力穡。如異時矣。又田產空盡。流落無歸。強者爲盜。  
弱者轉死。長老至今於悒長歎。此可爲永戒。而不可  
復也。况今旣賦歛民之粟帛以贍軍。又復籍農民之



身以爲軍。是一身而兼軍民之任也。民之財力得不  
垂屈。且旣籍之後。州縣義勇具有常額。後卽逃亡病  
死。必隨籍而隨補之。是使陝西之民。世世常三分之

一爲兵也。

光又請政府力言之。韓公琦曰。兵貴先聲。諒祚方桀驁。使驟聞益兵二十萬。殆不無

補也。光曰。兵之貴先聲者。爲無實也。然獨可欺之於呼吸頃刻間耳。今吾兵雖益實不可用。彼不過十日

具知之。於聲何有。琦曰。君但見慶曆間。刺鄉兵爲保捷。憂今復然。已降敕與民約。永不充軍。戍邊矣。光曰。方募刺保捷時。亦豈不云然。而卒充戍。今安可得保也。琦曰。吾在此。君無憂。光曰。公長在此可也。異日他人當國。因公所著籍。驅之行戍邊。如反掌耳。琦語塞。

爭甚力。而事不爲止。蓋韓

公雖心知募兵不可罷。而以爲冗食無當。終不若兵  
寓於民。爲自然之勢也。熙寧初。天子患兵冗。議銷併。



乃親制選練之法。敕所司揀不任禁兵者。降廂兵。不任廂兵者。免爲民。諸年五十以上。願爲民者。聽。而冗兵大省。已王荆公安石旣柄國。爲上言。太祖懲藩鎮之弊。立更戍法。遣禁旅戍邊。不置將。雖無復難制之患。而更戍旁午。議者頗以爲將不知兵。兵不知將。卽緩急不可恃。請部各置將。將兵平居專於訓練。無番戍之勞。有事而遣。使兵將相知。而緩急可爲使。便於。是詔京畿東西及河北路置將三十有七。鄜延環慶涇原秦鳳熙河置將四十有二。已團結東南諸路軍。如京畿置將十有三。總天下凡九十二將。將各置副。



凡將副皆選內殿崇班以上。嘗歷戰陳親民者以克。又各以所將兵多寡。置部將隊將押隊使訓練等官。實始變禁軍之制。又以為方河北為方鎮割據時。內抗中國。外禦四鄰。亦有邊奚契丹者。乃兵不外求而足。今河北戶口至蕃息。又竭天下之芻粟以奉邊。曾不足以當一面之戎狄。此其故可知也。臣以為儻不能治軍。使稍復古制。則中國無富強之理。請立法以十家為保。保有長。五十家為大保。有大保長。十大保為都。有都保正副主。客戶民三丁以上。選一人為保丁。附保兩丁以上。有餘丁壯勇者亦附之。內家資優。



厚材勇過人者充保長。授之弓弩。教之戰陳。每一大保。夜輪五人警盜。凡告捕所獲。以賞格從事。予官。同保犯強盜殺人。強姦畧人。傳習妖教。造蓄蠱毒。知而不告。依律保伍法隨坐。餘非敕律所聽糾。毋得告。卽知情不坐。其居停強盜三人。經三日。鄰保雖不知情。科失覺。其逃移死絕。若同保不及五家者。他保自外來徙居者。收爲保戶。滿十家。別爲保。置牌書其戶數。姓名以稽。始行之畿甸。後推之五路。以遍于天下。蓋實始變民兵爲保甲。法始行。民憂無錢買弓矢。兼後且戍邊有截指斷腕以避丁者。帝聞之。以謂安石安。



石曰。人言固未必信。卽有之。愚民難與慮始。亦無足異也。爲天下者。如止任民情而縱之。亦何謂政乎。保甲非但除盜。又可使習兵。且省財。令募兵不得肆。惟陛下果斷。時陳畱縣督民置弓箭鼓鐸。民苦擾以聞。帝又謂安石。安石曰。有之。庸何傷。自生民來。通兵農爲一事。男子生而桑弧蓬矢射四方。壯而服田力穡。有事而服戎。故耒耜以養生。弓矢以免死。皆民所自具。未聞國家造耒耜給百姓也。則雖使民置弓矢。豈足過哉。第陛下憂恤百姓。故立法禁優之耳。且府界素多盜。歲不下百十發。民皆出錢給捕賞。不爲怨。今



制保甲以禦盜。令少出錢置器械。非有損也。卽怨何恤乎。帝曰。捕賞錢。民習爲固然。自備弓弩。民創見。宜不能無怨。譬之河決壞民田宅。民不怨。令決河以壞民產。怨之矣。而安石持不罷。元祐初。司馬公光疏其害。言兵出於民。雖云古法。然古丘甸。八百家纔出甲士三人。步卒七十三人。蓋閒民甚多。三時務農。一時講武。不妨稼穡。自兩司馬而上。皆選賢士大夫爲之。無侵漁。故能卒乘輯睦。動則有功。今籍民二丁。取一爲保甲。授以弓矢。教之戰陳。是使農民半爲兵也。三四年來。又令河北河東陝西置教塲。五日一閱。無間。



時置使者比監司。專切提舉。州縣不得與一丁教閱。一丁供送。雖云五日。而保正長以泥棚除草爲名。日聚之場中。必得賂乃縱。是三路耕作之業幾盡廢也。自唐開元來。民兵法壞。戍守戰禦。盡募長征。不習兵久矣。國家承平百餘年。四夷順服。戴白之老。不識兵革。一旦畎畝之人。忽皆戎服執兵而馳者。舊歎息以爲不祥。又巡簡指使。按行鄉村。往來如織。保正保長倚爲權利。坐索供給。多責賂遺。小不副意。妄加鞭撻。蠶食行伍。不知紀極。中下之民。不堪供億。流移四方。裸負盈路。又朝廷特遣使者。徧行按閱。所至犒賞糜



費萬計不取諸民。將於何取之？農民之困，既如彼，國家之費又如此，是終何所用哉？使捕盜賊，衛鄉井，則無爲貴多。令戍邊境，事征伐，則鳴鏑交而奔北潰敗可必也。臣愚以爲宜悉罷保甲，使歸農，量州縣戶口，每五十戶置弓手一人，畧依沿邊弓箭手法。許蔭本戶田二頃，免雜繇，惟多盜地分嚴程科罰。隨功小大，遷補職級。聽縣令尉卽保甲中簡武力高强者以充。如此卽不必教閱，而武藝自精。一縣之中，壯狡者旣爲弓手，其羸弱雖使爲盜，亦且憚之，則弭盜之一法也。於是諸府路保甲官竝罷。

時監察御史王巖叟言方耕方耜，農務方急，而



保長號召。隨後羈縻其教閱也。保長得筭之。正又筭之。巡簡之。指使與巡簡。又筭之。提舉司之。指使若幹。當又互鞭筭之。提舉官長又筭之。一有逃避。縣官又筭之。此鞭筭之苦也。創製巾袍弓箭弦包鞍轡涼棚畫象隊牌。僦椅卓典紙墨看定人雇直之類。其名百出。都副保正之間。遺要求不在是。一不如意。卽以筭不如法。摧辱之。此誅求之所甚苦也。官吏倚法以削無毫髮愛百姓之心。故保丁不忍。屢構大獄。禍亂萌伏。願慮大體。又以比歲災傷。盜賊並作。禁旅盡屬。將以圖安靜。

官與州郡爭衡。不爲使。而卒旅不更戍。成於惰縱。又設官重複。虛破廩祿。請盡罷其禁軍。獨委州長吏與總管鈐轄統之。便。於是詔諸路禁兵復互戍。而頗省鈐轄都監等員名。以將官兼充。當是時。知定州蘇軾言祖宗來。沿邊要地更屯禁旅。止以壯國威而消敵。



謀爲之虛聲。而實無所用。蓋禁軍驕惰日久。膽力憊  
劣。近戍短使。輒與妻孥泣別。被甲持兵數十里而趨。  
卽喘慙汗流。設令進取深入。鋒交陣薄。彼豈能任哉。  
故鼂錯與漢文畫備邊之策。不過二事。徙遠方以實  
空虛。制邊縣以備守禦而已。寶元慶曆中。趙元昊反。  
屯兵四十餘萬。刺宣毅二十萬。皆不得其用。惟范仲  
淹。劉滄。种世衡等。專務輯畚。漢熟戶。弓箭手。封殖砥  
礪。藩維固。而元昊來臣。今河朔西路被邊州軍百姓。  
自團結爲弓箭社。不論家業高下。戶出一人。又自相  
推擇家貲武藝所衆服者。爲社頭。社副。錄事等。日出



入山坂。飲食長技與北虜同。私立賞罰。嚴於官府。分  
番巡邏。舖遞相望。遇有警惡。一鼓而集者。頃刻千人。  
蓋親戚墳墓所在。人自爲戰之道也。虜甚畏之。先朝  
名臣帥定者。如韓琦。龐籍。皆加意捐循。而籍又增損  
其約束賞罰。請旨行。西北邊賴之。後兼克保甲。覆有  
召集追呼之擾。勞費失業。欲乞朝廷少賜優異。明賞  
罰以示勸懲。則知韓魏公刺義勇之舉。固身親西事。  
熟民兵之利而然。其謂民兵祇爲煩擾。實無益於勝  
敗之數。非通論也。獨內郡當承平熙恬時。戎服執兵。  
雖日選練。非身親戰陳。獨可爲聲容。兵終已不精。又



別立管轄名目。卽狼貪蠶食勢所必有。又不領於守令。如漢北軍之法。而遣使者提舉之。始改無根故事。以不行。大都宋初禁廂軍召募。內則三司。外則漕臺。歲賦廩給畢。有經未害。至康定憂邊。而召募日廣。於是乎天下有百萬坐食之兵。國家又以金繒賂戎虜。投之宴安。以銷靡其氣。曾不得其一日之用。元豐憤之。行保甲而募兵日衰。元祐以降。保甲罷行無常。而民兵亦又衰。蔡京用事。國費侈而兵廢蒐補。階級既壞。紀律又亡。至以閹豎握重兵。張勝諱敗。士卒耗亡。輒爲住招闕額。以其封樁爲上供之用。

宋制諸軍闕額未招填則



拘其廩餼。別作樁封之。備上供。北難作而逃亡。配隸操瓢行丐之人。

畢募以充伍。而猶病其單寡也。幹離不挾兵萬餘長。驅而南。內顧枵然。始倉皇召天下兵以勤王。陝右諸路。古勁兵所出。種師道將以入援。僅二萬五千人。不能軍。於是京師不守。勤王之卒。潰爲盜賊。而寇盜遍天下矣。嗚呼。養兵以自困。多兵以自禍。不用兵以自敗。未有甚於汴宋者也。南渡初。高宗開元帥府。諸列鎮將咸屬已。即位招降盜。郡縣兵。置御營司。總之以宰相兼御營使。因所部爲御前五軍。已改神武軍。已隸殿前司。於是兵柄始一。御營使張慤言三河民怨。



敵入骨髓。恨不盡殲其顙。以報國。請倣唐人澤潞步  
兵。若雄邊子弟。兵遺意募民聯什伍。而寓兵於農。使  
合力抗敵。於都社各署長正副。復其繇。能結五百人  
以上者。借補官。具爲書。以上詔頒行。無何。諸大將宗  
澤韓世忠岳飛之倫。各以其忠力。訓練倡率。遂能以  
沒世不復之卒。爲國精銳。抗百勝方張之勅虜。而奪  
之氣。令憚懾議和也。豈非軍因時制變。因勢震刷。不  
中御於朝廷。卽易爲雄強。不擇將而徒以法制縻之。  
歸於圯廢而已乎。無何。逆檜以諸將握兵難制。召入  
覲。分三大帥。副較使各將其兵。覆爲虜內間。鋤芟廢



罷翦爪牙而以其國予敵也悖矣悖矣。

國家於京師設都督府五親軍衛十有二五府所屬衛三十二於四方設都指揮使司二十一留守司二衛百九十一守禦屯田群牧千戶所二百十有一於夷服設宣慰安撫長官司九十五番夷都司衛所百有七各統其軍及部落聽巡捕軍器漕運京操守備征調朝貢保塞之政令大都五千六百人為衛千一百二十人為所百十有二人為百戶所所設總旗二名小旗十名大小聯比以成軍國大師則詔文大臣總督提督參贊軍而總兵官佩將印領之既旋上



所佩印於朝將歸第軍回衛所聽調而武官不得輒下符行軍。

高皇帝未登極時立管領民兵萬戶府。諭中書省言。古寓兵於農。居閒則耕。有發則戰。暇則講武。今天下兵爭所定郡縣。念豈無武勇之材。宜精簡編輯爲伍。立民兵萬戶府領之事。平有功與官軍一體陞擢。無功還農。庶幾寓兵於農之意。而當定府州縣時。張赤白旗二。立之郊下。令曰。願爲吾兵者立赤旗下。願爲吾民者立白旗下。因著籍。而律嚴人戶以籍爲定之條。蓋軍民遂分。而於時取兵非一途。有從征。有歸附。



有謫發著籍從征者。諸將所素將之兵。平定其地。因留戍者也。歸附者。勝國及諸僭僞者所部兵。舉部歸義者也。後乃謫發諸罪隸爲兵。而制衛所兵所在有閑曠田。分軍立屯堡。令且耕且守。約以十分爲率。七分守城。三分屯耕。有警則朝發夕至。視古屯營法爲近。法每軍約受田三十六畝。歲收子粒十有八石。入月糧。歲十有二石。閏加一石。餘二石上倉。餘丁所受納。以差次降。其番上宿衛給繇役。其口糧於倉內給支。其牛具農器總於屯曹。細糧子粒登於戶部。已設風憲官提督之。當是時屯重兵京師而



上加意於留屯。嘗太息曰：吾京師養兵百萬，要令不費百姓一粒米。於是以遠田三畝，易城外民田一畝爲屯田。不足則移數衛於江浦，六合諸屯以就田。而

上親勅五軍都督府言：古養兵而不病於農者，莫如屯。今海宇寧謐，邊境無虞，使屯兵坐而食於農，農安受其弊，非長術也。其令天下衛所督兵屯種，庶兵農兼務，以舒國力。古良將若趙克國、晉羊祐、唐李抱真，皆以是策勲。當時垂名後世，爾藩鎮諸將其務程督，使盡力於耕作，以足軍。蓋數年間倉廩苦蓋畢完備，而儲饒豐盈已。



上諭武臣言。爲將者。當知卒伍之艱難。爲優恤。支分有  
疾病。營視其醫藥。關支冬夏布匹。毋尅侵。諸不知來  
歷人。毋留伍。士耕種暇。卽所習五兵演練之。無廢事。  
當屯種時。令及時耘鋤。無惰農。比將冬。令士伍整晷  
舖煖炕。畜薪炭以禦冬。命取古往武士義烈可鑒  
觀者。作武士訓戒錄。頒之。已以軍衛官貪財賄科歛  
苦小軍不顧念也。作大誥武臣錄。其質言軍伍勞苦  
萬狀。朕身親更之。汝將領身家衣食所自出。令將心  
比心。發仁慈心。隱恤軍。其深念如此。求樂中。

上勅武臣言。國家盛衰存亡。繫武備之張弛。依在古而



來爾等世祿爵與國家同休戚宜嚴飭武備爲國爪  
牙。而比來紀律廢弛。士逃伍不問。甚且賣放。回軍有  
程限而縱之。或五六年。或十年。故軍伍益虛。猝有緩  
急。當何以應調。是皆爾等下不恤軍。上不憂國之所  
致也。自今宜修職。務撫士卒。實軍伍。繕器械。使兵政  
振舉。朝廷有磐石之安。爾等亦永保其富貴矣。如仍  
前失罪。無赦。已。謂侍臣言。朕在藩。因出獵過田家。見  
所食粗糲。心惻然傷之。軍士屯種甚苦。管屯官不務  
勸率。不時加勞問。將士孰勸。非所以恩士卒也。其敕  
諭將士勸農田。寧夏總兵何福。請更定屯田賞罰。令



爲經久計。降勅諭獎之。御史張翥言山西行都司所屬府衛地迫沙漠。軍衛實則虜不敢犯。虛則虜易陵軼。比軍人犯徒流罪。悉徙戍興州。興州稍遠。然於胡患顧疎。恐邊衛軍士多故犯。求遷徙。將伍日減。不足以捍邊。乞勅邊衛所軍犯徒流罪者。止從法科斷。毋徙衛從之。時有言兵衛伍缺。而建文中江西所梁集民兵可調也。大學士榮曰不可。

皇上命民復業。且二十年。今復調非信。動衆非仁。料兵非勇。事得寢。洪熙初。詔各都司衛所屯田官。各屯務依原定分地以田。按察司歲終比較屯軍有艱難。



辦子粒不敷者除自用穀外餘糧體放免之

上諭戶尚書原吉曰古寓兵於農無轉輸之苦故久安  
先帝立屯種法甚善而所司數以征徭擾之使失時荒  
農致儲蓄不充未免於轉運此國之大患也其令天  
下衛所凡屯軍自今毋擅差妨其農時違者比軍乏  
興論邊將上屯田子粒數多者賞之時陝西官軍調  
京師操河南山西軍調陝西甘肅備禦道交遠勞苦  
上聞之謂兵尚書慶曰王道在順人情若令陝西官軍  
就彼備禦河南山西軍備京操不兩便乎非徒省  
費抑且安民其速行毋以道路縻軍宣德中



敕天下衛所軍。離鄉并在伍。給裝難。其免原籍戶一丁。  
繇令專一供軍。家在營者。一體行。勅巡按御史按  
察司。言軍政。國家重務。

祖宗於撫恤軍士。整飭武備之法甚具。近都司衛所官。  
貪賄差放。有徵辦需索加倍。或包納月錢。縱放買賣。  
或以答應上司爲名。勒除月糧。或指差操刻。減布花。  
致軍士坐窘於衣食。逃亡比比。其邇年勾軍。往往違  
限。風憲官督察。莫有獲解。此軍伍所以空也。爾等巡  
歷。務嚴詢察。有貪虐害軍。及勾軍違限官。具執奏。如  
仍前縱惡長奸。事發一體處罪。已罷邊衛士歲辦柴。



炭之令。令得專備邊而嚴邊將受賂放軍脫伍不差  
操之誅。正統初。大學士士奇言御史清軍。有以陝西  
山東山西河南北直隸人。往南極邊補伍者。有以江  
浙閩廣川湖人。往北極邊補伍者。各不能其水土。北  
人死於瘴癘。南士死於寒凍。且其衛所相去遠者萬  
里。近乃七八千里。路艱費劇。逃亡者多。長解負累。有  
死於溝壑而莫之知者。良可痛也。況今西北二邊。急  
於防守。而所在壯勇之人。調戍南方。顧以南方脆弱  
不能寒苦之人。謫當之。大不便。伏觀永樂中。令北京  
人有於各處充軍者。毋勾補。於河間立一衛衛京



師原衛別謫發克伍宣德中。勅雲貴川廣勾逃軍。

除本軍正身及丁已解發者外。餘畱附近衛所帶管  
收操。諸緣邊海地分。聽留著伍。後屢申令。則知洪武  
罪犯恩宥免死。不分南北。發邊遠克軍者。

太祖皇帝之仁。所以懲有罪也。其後有罪者已死。其補  
役者非其罪者也。則憫其遠戍。畱附近衛收操。

太宗 宣宗皇帝之仁。所以恤民隱也。

陛下仰體

祖宗之仁。申明前令。而部官執稱舊伍難以改換。念獨  
避文案繁勞。而不思兵衛之無實。不念下人之艱苦。



也。豈體國憂民之道哉。請自今從南北所宜發。使人宜水土。而兵政備豫便。國盛時。君相於軍

民幽隱。注德意深至矣。正統己巳秋。虜患亟。募四方

丁壯。隸勇敢營。衛京師。久多逋逃。主者請治罪。編

尺籍。御史鍊縮言。方召募時。本激以忠義。許事定遣

歸。故勇夫健卒雲集爭自效。今久不解。而恩賚未及。

饑寒切身。則逃固其所也。且近詔抵大辟者。尚原

死隸尺籍。獨奈何使應募之士。與此輩伍乎。搜求太

急。必且生他虞。兼邊務尚殷。急於用武。非所以勸士

得人也。詔勿問。聽歸復業者數千人。自是屯政壞



而弊端萌起。成化中。大學士商輅爲上言。徃口外田極廣。先年在京功臣官將。於附近城堡膏腴田。占作莊田。他諸空閑田。鎮守總兵叅將等官。又占榮之。以致士無近便地可田。夫且耕且守。在古有已行之效。在今爲守邊之要。舍屯種而欲充實邊。雖傾府庫之財。竭生民之力。不能濟也。乞申屯法。禁侵占。省養兵之費。於是命兵部移所司。選老成軍官督屯田。風憲官以時巡察課之。而清田之侵沒者。薊鎮右都督盧宗言。今薊州關堡軍。舊額二萬九千餘人。今亡額踰三千無可補。乞行法司。擬謫發囚徒以充。雲南



兩廣逃軍潛住境內者。乞招集收用。且邊關通寇路甚夥。軍防守法疎。欲選所屬軍衛舍餘。若民壯編什伍。以時練蒐。遇冬。協守。春深。放免。下部議。部覆言。謫戍囚徒。行司就近收附。遠方逃伍軍。例禁止不得收。收之。將軍勸於逃。而巡撫都御史閻本立。嘗奏四方軍民願投軍自效者。聽宜舉行。其舍餘民壯。候邊急酌選用。詔允行。巡撫延綏都御史盧祥言。今營堡兵少。而延安慶陽府邊縣民多驍勇。與胡虜狎。敢戰。若練爲土兵。護家室。必奮勇自効。不待驅而從事。下兵部。部請勅御史會官點選。編什伍。名土兵。得兵



五千餘人。人免租六石。戶三丁。委官練聽調。而延兵盛強。戶尚書言景泰末。宣府總督都御史李秉。甞上言。邊地多曠。不耕。守城軍餘。類偷曠。無所用。請量支宣府官銀。買牛給耕種。而官收餘糧。給貧軍買馬騎操。便。詔支銀一萬兩。買牛給軍耕。天順初。有言是勞軍非便者。下都督楊能等會議。能等言。且耕且守。經國遠圖。大同自惟兵以來。人畜蕩盡。幸朝廷發帑銀。買牛給軍耕。稍得安其生。今宣府巡撫葉盛復申奏。先年原買官牛多老死。又以給糧續買。令耕種。官不煩督責。士不致賠償。此官田牛之明効也。立法非



難守法爲難。乞申勅邊臣恪守。俾永不廢。庶濟邊。詔申敕如章。御史姜昂言宣德中。民犯罪克軍者。止終身毋勾丁補。今行勾。殊失罰弗及嗣之義。并違制。詔申禁如章。弘治中。兵尚書大夏以天旱引咎自陳。請避位。且陳兵政弊事十端。以上京軍苦出錢供用。一。營軍著工役。二。江南軍苦漕難。三。江北軍困。京操遠。四。竭軍民部運而濫食者衆。五。竭國力買馬而私雇者多。六。各太監出鎮者橫放。七。各守備內臣占軍役數多。九。禁衛苞苴公行干勢要陞賞十也。



上嘉納准行。嘉靖初。

肅皇帝悼軍政壞圯。至正德末而極。屢詔條下。言兩

京各衛所。有無賴冒籍投克軍。并新添設旗軍較尉  
勇士等目。并內府各監局招收軍匠。不下八九萬人。  
歲支糧百萬餘石。甚冗耗。聽各回原籍隨住。敢有捏  
奏影射存留爲冒濫者。謫極邊衛克軍。一各鎮遊奇  
兵。調用防守。經年不得掣。比正兵尤苦。鎮巡官其議  
處。有警照舊。無警掣回。或與正兵輪撥均勞逸焉。一  
國朝設立衛所。置屯田。令軍士耕種。納餘糧以克  
歲餉。近法人人玩姦豪官舍軍餘等。霸占多有。各該



巡撫督率管屯官查某衛某所屯田若干頃分屯軍若干名其係年久故軍之田聽官舍軍餘領種如軍存無田力作者查令退還其領種故軍之田以人戶爲限。人一分戶二分餘退還以給新附無業之軍內有田園廬舍修種有成願賣者聽平價售價管屯具查覈上其要於部以聽會。一內外軍逃亡丁盡戶絕有經原籍官司回報五六十次若二三十次者該部槩發冊清勾此特資吏書里老勾攝時弊端而已以旣絕莫繼之軍擾平居無故之民於軍無益於民有害甚痛繼自今兵部查原籍行勾經廻答戶絕十次以上毋



濫開擾民。一各邊軍視腹裏勞苦甚。鎮守總兵官。類不肯撫恤。覆尅令納月錢。取其財。役給作。苦其力。而內外衛軍。月稟該管官旗名公用。扣除尅之。其沿邊收糧官攢具。爲勢要親屬所包攬。上輸時。雜土沙糝糠食之。甚痛。所司風憲官訪究嚴治。諸洞弊源如燭。而兵尚書世寧疏閱軍實。言今天下衛所額軍逃絕者。多達年丁盡若埋沒者。歲歲清查。茫無根影。其近日病故若逃亡者。年年勾解。隨復逃回。在衛軍士備操者。或金鼓不聞。武藝不習。而教場爲虛設。或名掛行伍。身不在營。而得財以賣放。故今養兵雖多。能戰



無幾在邊遇敵。則嬰城固守。而坐視鄉民之被掠。在內有警。則奏聞後遣。而先累民壯之被傷。至役占之弊。尤不忍言。如漕運。京糧。民間之費。約米二石而致一石。軍士之勞苦不計焉。其邊儲又不止是。今軍月支米一石。又加之以馬匹草料。而投跟勢要。止納月錢銀三二錢而止。此爲以民間三四石米之費。而但爲勢要三二錢之需。天下若何而不窮也。且在昔充軍之戶。或繇聚集。或繇歸附。未必皆有罪也。何今貧絕而不免清勾。在今充軍之人。必皆姦豪。必皆巨惡。未必皆可矜也。何不數年而節蒙赦宥。况東南脆



薄之人充軍西北西北近邊之人充軍東南皆速其  
逃而兩不得其用乞會議分查衛籍額軍若干故絕  
若干其丁盡戶絕累經清報者免清勾以除民擾其  
不肯着役者其緩急難倚之人也悉改編原籍衛分  
以通之有缺伍則另選合餘及犯罪者補充而五十  
以上許家人子孫代充其在逃二三次者依律科斷  
其情犯深重例謫邊衛者責賣家產全房遷發使絕  
後念其或一時難賣則令里甲鄉鄰認佃課租除歲  
賦外納官司類解爲軍裝庶在衛皆土著畏法而逃  
亡益鮮至衛所管軍官望併省而嚴執要役占之誅



幸甚。霍詹事誦屢疏言我

太祖之建設軍職也。初額二萬八千有奇。亦夥矣。成化中增八萬一千有奇。繇二萬而視八萬增四倍矣。成化迄今又不知幾倍矣。以錦衣一衛言之。初額官二百有五員。今千七百員矣。繇二百視千七百員增八倍矣。洪武初軍官襲職比試。令曰軍官子弟年二十歲襲職者比試。年未及二十歲者待年。及試初試不中聽襲職署事。食半俸。二年再試。中者食全俸。仍不中降充軍。此其法至嚴故。材勇者擢庸劣者黜。職不冗而俸糧易足給也。自永樂來新官免比試矣。舊官



卽比試。獨賂權貴。卽乳臭子無不中者矣。此軍職所以日濫而忠力鮮少也。永樂中交趾平。

太宗皇帝問本兵曰。陞與賞孰便。夏元吉對曰。賞費於一時有限。陞費于日後無窮。故多陞不如重賞。

上曰善。陞元功。餘班賚有差。夫克平交趾。闢土服遠。於國至大功也。而恩猶止賞賚。邇年奏捷。獲馘者陞矣。奏帶者。緝獲妖言者。捕獲盜竊者。又陞矣。巧立名目。以冒陞遷。此軍職所以益冗而去。祖宗之制益遠也。願陛下命大臣集議。循清黃例。盡查內外武職員數。第其功等。考其祖宗相承。或叔姪兄弟繼及。或



洪武永樂年間功或宣德而後功或內臣弟姪恩蔭或勲戚駙馬子孫或武舉取中各分數等而默窩汰省之法其中或許世襲或許終身或許兄弟叔姪相繼或不許繼具籍冊揭示以昭激勸而軍職冗濫之弊可清於是命給事中夏言御史鄭本公查冒濫而言等疏言正德間各處軍功之弊濫有三奏帶之數太多紀驗之次失實而武選之法盡壞也法鎮守官奏帶例止五名今領兵奏帶至三四百名矣是三數百人者非實嘗備行伍親戰陳也往往安居京師寄名邊籍故一人而數處奏帶者有之一時而數處



獲功者有之。他復巧立名色。不曰運送神鎗。則曰齎  
執旗牌。不曰衝鋒破敵。則曰三次當先。軍前効勞。紀  
驗不加審覈。銓選又無駁勘。其改正重陞。併功加授  
之類。巧弊百出。其卑瑣者。既冗濫如此矣。

高皇帝開天啓運。一時元臣。翊戴建功。然其時封公者  
六人。侯者二十有八人。靖難封拜。亦不滿十餘人。

列聖相承。益加慎重。未有中官弟姪封拜之濫。爵賞之  
極。如先朝者也。寅鐸背逆。實逆瑾憤結所致。仇鉞一  
舉。平定。張永攘爲已功。旣而太監谷大用。馬永成。陸  
闇。魏彬等。並受褒賞。於是封伯者八人。加陞都督都



指揮者不下數十人。他正德年間立別名目陞授職級者。凡三千一百九十九員名。乞盡行革退。以昭降下神武之斷。幸甚。下部覆如議。而宿蠹頓清。

國初設翼元帥府。已析翼府中軍。及左右哨。左右掖爲五軍。曰五軍。永樂初。旣增七十二衛之制。而以龍旗下三千。司寶。肅令旗。立三千營。後征交趾。得神鎗火箭之法。令演習。立神機營。曰三大營。營各設管操官。曰提督。各哨有分管官。曰坐營。曰坐司。而一統以文武大臣。平居番上宿衛。衛皇城四門。領銅符分信地。以爲守。宵夜鑿鑿。禁衛兵卒。日給食。家無



丁中有父母。若單夫隻妻者。諸存恤優厚。而嚴上直。拆伍領替之律。國大師。中大營居中。外分駐五軍。步內騎外。又外爲神機營。外有長圍。周二十里。而樵採其內。置教塲于京師。時操練。而調河南山東大寧甲都四都司官軍輪操于京師。其錦衣衛主禁廷鹵簿儀仗之事。旗手司主旗纛金鼓之令。諸衛皆統軍卒。而錦衣衛獨領較尉力士。蓋周之虎賁旅賁也。諸軍皆正卒。而府軍獨僉幼軍。卽漢之六郡良家子也。凡上大朝賀宴群臣。指揮使而下。得刃介侍左右。廷京師衛四十八。獨錦衣金吾龍驤虎賁等八



衛毋隸大都督府稱親軍諸衛官皆世獨錦衣不世

以使能時兼刑獄而以嚴禁衛爲專官

皇城門禁約凡朝參午門

先放直日都督將軍及應直帶刀指揮千戶鎮撫散騎舍人然後文武官以次入不許攙越其上直官日一易於朝退辰時交代凡內官內使火者出門須比對銅符若本無銅符及有不比對輒放行者罪守門官軍仍密搜簡有公差帶金銀段疋出者憑勘合照驗亦須明白附寫往某處公幹及訛所帶衣服顏色件數回日點對有不同者卽奏聞其工匠人等出人各門依例搜簡有誤帶鈔物者許附寄各門如出門夾帶鈔物者許執奏凡官軍民人等入不許阻遏及問其事情違者坐罪

大都

京師

約宿軍三十餘萬畿內約二十餘萬盡諸邊之兵不過此而括諸省之兵不能當此也故戰則國威烽虜庭守則國固居重馭輕之制凜如也已天下承平武



備弛中官振專軍而土木之變作。景泰初。侍講劉定之言。國家養兵之費亟矣。乃今軍受粟公門。納錢私室。名之曰月錢。故手不習攻殺。擊刺之法。足不習坐作進退之方。目不識旌旗耳。不聞金鼓。或負販而爲商。或匠作而爲工。其工商之所得。又纔足以支月錢之費。是民之膏血。民之氣力。皆變而爲金銀。以惠姦宄也。一旦率以臨敵。如驅羊御狼。豈有振哉。宜痛革月錢之幣。作新操練之政。以制軍而御史魏瀚言。邇虜寇長驅。動以萬數。而兵部以召募之兵應之。可爲寒心。今京軍不下三十餘萬。或占役於私家。或借



工於公府或買閑而輸月錢或隨從而備役使其聽操練者大率其老弱不勝甲冑者也。且馬多羸瘠。器非犀利。以欲折衝禦侮也。實難。伏望責總兵等官。將營軍整蒐訓練。而命給事中御史非時按視之。有賣放占役諸弊。聽叅究。仍乞節財省費。一之於功。賞以振軍。當是時。少保兵尚書譟爲

天子倚重。實柄兵議以爲京師軍馬。分隸五軍神機三千營者。雖各有總兵等御之。然不相統。一有發調。獨挑選。湊撥以克。兵將不相知。以效功實難。今於見操諸營軍。精選得勝兵十五萬。分十大團營。團操營



二萬人各設都督統焉。隊五十人。有營隊。二隊百人。有領隊官。積二十隊千人。立都指揮御焉。而隸于都督。其管隊把總大小總兵官。各量其才器謀勇以克使互相統轄。遇團操時。臣等時出不意。調一二隊點閱。第呼其把總隊長姓名。卽各領本隊卒以來。驗其識認與否。比較其武藝精熟與否。使將軍者。知士之彊弱。爲軍者。熟將之號令。有警。量賊勢多少以行。敵多則合營俱動。少則調一二營。或萬人。或數千人。皆原管領官統以行。如此。則體統相維。兵將相知。士伍熟習。易於閱會。號令歸一。易於使令。比之平日混操。



奏撥強弱不辯號令不習者有萬不侔也其團營外  
仍次第其精壯備緩急之調以時助國威制曰

可於是定分十大營而團營之法始於此

時兵科給事中鄭林

主操練具疏言臣通考古今陳法則莫如軒轅矣其  
破蚩尤卽今之北虜也其法按井田立陳犬軍居中  
專旗鼓八節旋繞聽指揮若正北受敵則東北西北  
二陳爲奇兵張左右翼赴之若正南受敵則東南西南  
南張左右翼援之其正東正西及四隅之受敵也亦  
然故比之率然率然者常山之蛇也擊首則尾應擊  
尾則首應擊中則首尾俱應古名將知此法者惟太  
公望孫武子韓信李靖諸人而已其命之曰天地風  
雲龍虎鳥蛇八陳則諸葛孔明也大陳爲八陳而八  
陳之中又各有小八陳大陳法八卦小陳法八八六  
十四卦所謂陳間容陳隊間容隊者也若夫造遁甲  
名九星開八門用三奇又黃帝使風后爲之所謂以  
神道設教神其術使人莫知其所以然耳犬將居玄  
武之位而北嶽爲常山之蛇故以名今京營陳法無



制每出征人馬雜沓多至躡  
堯請一以陣法從事制曰可

英宗復位罷團營復三大營八年復置成化初復罷尋

復置弘治中兵部言自景泰初設十團營而來僅踰

二紀稽其籍已減軍七萬五千七百有奇而支糧如

故則總兵等官賣放冒支之弊無紀極也不嚴究將

糧餉徒費而兵政日弛命究理如章於是選京

衛勝兵八萬外衛八萬其外衛分兩班班四萬與

京衛番上共十有二萬定分爲十二團營奮武耀武  
練武顯武

敢勇果勇效勇鼓勇  
立威伸威揚威振威營各有坐營把總等官專團操

有征調挨撥以行它役差毋遣其老弱不堪戰陣者



曰老家住營備作使不服戎而

天子仁聖慮制軍欲於畿輔地各團操以爲京師披  
問本兵兵尚書大夏對曰甚善今京西保定府獨設  
都司統五衛本祖宗意蓋如此遂發保定京操  
軍回衛操勅都指揮往蒞之乃有造飛語帖宮  
門誣大夏受私賄爲卒言還衛操自便者

上見之微哂曰宮門豈外人可入獨此曹忿不得役  
此軍爲此言耳於是十二團營外北直隸山東河南  
江北各都司衛所兵團操番上而禁旅益強時大夏  
柄兵愛養士力諸占役頓減而修乾清宮軍夫亦



奏減十之五督工者以不恤大工爲言激

上怒下閣臣調

旨詰責閣學士健對曰愛惜軍夫此

司馬職也司馬議固當日大夏每以老辭位沐溫

旨勉留尚乞骸不自休若切責旨下彼以不職堅

固辭誰復有憂國奉公如大夏可代居此位者

上欣然開納省所用軍夫具如大夏言騰驤四衛舊稱

禁軍正德中隸中官詭冒依附爲奸欺不可詰嘉靖

初兵尚書承勛言宮府一體請考選論覈隸本部如

旗手等衛許之而內臣言四衛禁軍隸兵部不便往

歲如彰義門破虜如東市勦曹賊皆四衛功以直內



故號召易集也。儻外隸卒有急難號召非便。承勛言  
往歲之事。正以兵權歸閹人。致亂彰義門之戰。繇太  
監王振東市之賊。卽太監曹吉祥也。國家軍政有  
統。豈當秉之內臣。云易驅集哉。詔如議行。大學士  
一清疏京營之弊。言自團十二營而來。因陋就弊。垂  
四十年。而戎政則日耗矣。士卒殷實者。出錢包班。  
而其名徒存。貧難者。饑寒零丁。而其形徒在。衣裳藍  
縷。氣息奄奄。平居且不能以自存。一旦有急。又安能  
以羸餓之身。爲國家捍百戰未挫之虜哉。比緣有  
警。選一二萬兵以行。崇已通各營挑選而具。再欲撥



一二萬。則團營與老家無異。不可得復克矣。夫軍以衛民。民以養軍。今各營軍月支米八萬一千五百餘石。歲支米九十七萬八千餘石。是皆百姓膏血所從出也。及選用勝兵。課二三萬人而不足。其統兵將官。皆臨期選用。將不知兵。兵不知將。延稽日月。苟以趣裝爲解。將至關口。而士卒尚留。京師都人至相傳以爲笑。是養兵不堪用。而芻糧爲徒費也。正德中。山東北直隸群盜縱橫。乃調宣大陝西遼東邊兵征之。踰年而後定。則是豈強幹弱支之意哉。幸其時三邊無警。故徼以集事。假令猝有夷狄邊竟之禍。軍不得



動掣則內盜將置之不問乎。臣謂邊人輕中原之心。必自此啓矣。失今不爲。後益難治。伏乞 勅提督官。申教練之法。溥優恤之恩。禁侵削之害。嚴役占之條。痛革宿弊。使耳目一新。精彩立變。以壯 國元氣。而衛民命。提督營務都御史王廷相條弊事。言今團營號十有二萬。而京衛民追胥捕盜者。已五千人。外衛撥赴工拽木。則數萬人矣。雖云暫借。終年伍虛。其見操者。又老羸罷弱。不能兵者甚衆。夫軍欲其戰勝攻取。須養其銳氣。使專於武藝。不以雜役而荒奪其心。今困苦以勞其身。畚鍤以亂其習。而欲其張皇威武。



以敵國所懷亦何可得矣。且也軍士類多貧下。而吏胥無賄不行。富者畏憚營操。則略稱揀退。而終歲優閒。貧者無力經營。則拘之團操。無時休息。此軍之所以不精也。乞按營軍真正丁口。選其精壯。摘牌替役。務足十六萬之數。而嚴團管軍士毋別差之令。已天子更兵制。合十二營兵。三分之。如舊制。爲三大營。而設戎政府。文武大臣爲總理佐理官。於是佐戎政侍郎王邦瑞上奏言。今國家之所患者。唯虜。所最甚患者。唯士卒弗振。臣以爲斯二患者。非深患也。所謂深患者。唯在中貴人典兵。夫今之團營。卽漢之北軍。



唐之府兵。宋之禁旅。所以衛京都。備不虞。至重矣。其令勲臣掌之者。謂其明武畧。令文臣共之者。謂其督怠弛。令中貴人監之者。謂其防壅蔽也。總之以厲兵振威焉。乃者胡馬來。臣調團營兵。令出城擊胡。而十二營半空。見卒又罷弱。曾不任旗鼓。夫卒至罷弱。罪屬之文武二臣。不得解矣。至空無人者。則乃中貴人爲之。外語藉藉。咸以爲有輸錢脫更之弊。是本用監軍。反用蠹軍矣。可痛。陛下卽若不赫然立罷之。則歲月旣積。消耗益甚。假令虜踵前智。復射一矢于闕下。誰與驅逐。此可爲寒心者也。夫刑餘之人。典在傳



公車之命。供掃除之役已耳。令其參列壇場。固已虧體。而況于作蠹耶。臣聞久服之裘必弊。常用之器必缺。請罷中貴人。勿使更濫戎機。亦其保軀善後之圖也。中貴人既罷。則什伍充實。卽於什中選伍。於伍中選一。豐其饋餼。時其練習。卽可得精卒。以精卒當戎虜。虜雖強何患哉。臣故曰。二患非患。中貴人典兵。所深患也。臣又觀在營諸將。徒善爲容。難以效實。臣欲調諸邊名將。久處行間。諳穰苴之畧者。營各置數人。而罷其善爲容者。則李廣在軍。而舞車之徒出。王翦開壁。而超距之卒奮。所以懾外夷。安中國。滌舊耻。伸



新威計無急於此者。臣誠憤胡驕志在效忠。故纓縷如此。夫撩蠱之尾。必中之螫。臣豈不恤。顧令戎事坐而益壞矣。願降咫尺之詔。定萬世之規。臣不勝大願。隆慶初。

上用輔臣言。躬大閱六師。意振宿蠹。而總兵鎮遠侯袁以老疾辭任。給事中張鹵言於兵尚書冀曰。

皇上茲舉。正欲分別將領功罪。明賞罰也。袁而整營務有功乎。則賞當首。袁任何可辭。卽廢營政。則袁亦首罪。奈何得自解免也。且袁於無事時。優游安坐。饗大將軍之奉。十有五年。迨於大閱。又奈何得脫然遠去。



使他人任難也。宜留以待事。而條營伍消頽。教演虛設。及聯將領。明分數。信賞罰。五事以聞。軍自正德來。承平久而悍驕。有司豢養若驕子。以爲固當。稍不稱。輒以月糧不繼爲口實。群詬噪稱亂。禍始於福建。延平。福州。而效尤於邊鎮。於是陝甘肅直隸保定浙溫州。若遼東雲南。往往群譟焚掠。至賊殺官吏。莫能難。嘉靖初。巡大同都御史張欽。以團操失士心。衆大譴呼散。欽惶恐告病去。慙之。乃宣言大同軍必且反。總制都御史孟鳳。捕斬二十餘人。非必當辜。而釁孽益滋。已巡撫都御史張文錦。築水口五堡。不募附近民。



願徙者。乃欲徙城中卒居之。又私有縱舍而築堡軍。不時給行糧。衆怨憤。會參將賈鑑督工築嚴。衆弗忍。戕鑑。文錦懼。急遣官招之。至卽有捕逮。遂驚譟殺文錦。詔戶侍郎胡瓚領兵勘處。而瓚私人說瓚多殺。以爲功。分守參議韓邦奇勸班師不聽。代儀賓張養浩與大同仕者十數人請班師。又不聽。欲竟誅而大同復亂。竟赦撫而定。後十年。總兵李瑾遣裨將將戍卒築邊牆。以請餉得歸。暮矣。卒醵錢沽酒。乍聚飲。而瑾傳令勒復往。衆憤憤思亂。於是宿怨瑾者並起。戕殺瑾。支解之。巡撫都御史潘倣聞亂。匍匐踰垣走。次



日上變告。且援往事。請赦撫以已難。總制侍郎劉源清。都督郤永。以爲非大創不懲也。欲致誅。疏請勦。閣學士孚敬。固欲尊國體。明主威。又前違衆主勦潞州盜陳卿。捕誅卿。因愈益自信。力主之。吏尚書鉉與一二當路咸傳會。言當勦。禮侍郎黃綰獨以爲雲中乃國家北門。宗室百官與百萬生靈咸在。今此之變。直士卒謀殺主帥。罪在百十人而止。非實闔城盡爲逆也。乃欲盡草薶而禽獮之。不可。異時國北門於何修復。虜跳梁於何捍禦。是自撤其藩籬也。且事窮則慮易。其所居。又堅城勁兵處。我環而攻之。是驅



圍城之人助賊勢而益亂。今寒洹甚。師久暴無功。將且自潰。且地近胡。或引虜來入寇。將爲患益深。紹故與孚敬善。又並以議禮得進。具爲孚敬言。而孚敬以爲侵切已。乃大恚已。源清攻圍大同城。不解者三月。引陽白河水灌之。不能下。而叛卒果引虜大入塞。抵西坡。殺官軍數千人。永失措。築長圍守之。

上手札諭輔臣言。朕病中。未嘗不以大同事爲懷也。大同軍因殺李瑾。此謀殺主將。法不赦。然亦非舉城之爲。又非敢逆。朝廷永源清貪功嗜殺。輒有洗城之傳。訛嚇城中。致使抗拒。卽又專攻城之計。引水灌城。



將玉石亦何自得分也。朕惟宣大爲京師北門要地。不可壞。人而無臂。何以衛頭目乎。况此地此民。皆祖宗所遺。必欲城破人誅。果忠乎。否也。前日將二人調去。命將以專討渠魁。豈有今日。縱源清永幸成事。不知此地。何以興復也。今祇可罪去二臣。掣諸路人馬。另遣文武大臣。識事機國體者。使專意備虜。而密令多方計擒逆盜魁。庶免老師傷財。源清既能了事。何又添官。豈非官多事擾乎。諸德意諄復。適與綰意合。於是禮尚書言顯。言雲中亂。不安之。不靖。請鎮撫。上悅。勅侍郎綰行往撫。綰輕車赴鎮。首出。



上諭內閣劄宣

上閔念蒸黎顧重鎮之意播告諄切

而密緝屢年軍渠魁倡亂者數十人畢誅之而定其  
後南戶書以留都儲頗裕奏改折而米驟騰踊戶侍  
郎黃懋官主軍糧不能以時給士群譟起殺懋官暴  
其屍擁誠意伯劉世延欲爲亂兵侍郎李遂與世延  
起諭之密摘誅其首亂者數十人而士猶洶洶會

上命遂爲南本兵參機務於是什伍其軍以肅政下營  
規言南京軍世蒙優養際昇平之代旣無征戍之苦  
又免班操之勞邇者脫巾之變雖事緣有激然荷蒙  
朝廷軫念本根薄示懲劄誠謂至恩令有人心能無悔



悟但中間自懷疑懼轉相煽誘乃致立百桀之會毆辱本管投匿名書以恐上爾試思惟此豈久長之計哉。朝廷洞悉汝等罪狀特勅本部會同內外守

備便宜區處念汝等前事原非敢有背畔之情所爲於白晝大都屢干犯上之罪者獨怕有衆爲護呼而倉卒之際難從根究也卽有事後之懲又出訪報之日使無辜者濫及而首事者幸免將爾等罪犯日積過惡愈彰曠蕩之恩豈可再得古人治衆如寡在明分數各營雖有什伍然久爲虛文宜申飭以肅營規中軍坐營官督同衛把總覈審軍士行止身家分別



等第立爲隊甲。令卒伍之長。自相勉勸。自相鈐束。其有作奸犯科。卽時覺察舉首。聽該營坐營官量情法處斷。事干重大。呈部以軍法處治。庶上下之間。兩無猜防。爲善者蹤跡自明。而爲惡者不得倖縱矣。蓋軍有律而事定。始洪武中。開平衛卒馬名廣上書陳時務。言請收蕃衛兵。徙都下重京師。而下衛兵老死。家無丁者。除其籍。無勾補。

上頗以爲然。擢爲泰和丞。洪熙初。詔各處勾補軍。有丁盡戶絕者。取原籍有司執結達衛所。衛所上府部開豁。毋展勾。禍無辜。亦不許將有丁之家放免。空軍



伍違者罪之。宣德中。軍額業已漸乾沒。軍黠者率用賂規脫。而詭傳平民於籍逮之。被枉者衆。於是

天子下璽書。分命給事中御史十人分道清理。而御史銳意得軍以爲功。不念民常州府同知張宗璉持不可爭之曰。璽書獨清軍。民實非軍。奈何違璽書毒民乎。御史怒。侵辱之。憤恨死。然常之人賴以免於枉。十七八。蘇佐郡者。力助御史虐得軍。而枉民以千計。嗟怨盈路。彌年不解。

上聞之。召本兵論曰。近民有訴妄解充伍者。此有司之過。謂朝廷所重在軍也。不知民國家根本。朝



廷於軍民。譬水舟陸車。豈可偏哉。其勅有司審實。毋枉民縱奸。於是詔軍戶有重役三處五處者。果人丁消耗。併一處勾補。餘悉開豁。其丁盡戶絕。若同名同姓人。爲妄報被勾擾者。有司務從實體勘豁除之。毋殃民。正統初。詔申勅御史言。衛所勾補軍。有全家死亡。無幼丁可紀錄者。卽與開豁。類兵部除銷免勾擾。其挨捕逃軍中。有委病死。及水溺事故死者。聽開報除豁。其家本軍籍。同名姓。以被里老挾讐妄報。有司朦朧冒解者。御史勘除之。已解赴衛稱冤者。兵部豁除之。毋冤抑平民。而是時。南直隸清軍御史



郭觀苟以充伍爲功崑山民誣首戍伍。至連逮二十  
四人。賴巡撫都御史崔恭平反而定。江西清軍御史  
尤酷烈。勒里甲引平民。按察僉事陳琦爭之不能得。  
乃行巡所分道。令民自首爲御史苦掠誣服者二百  
家。悉縱遣歸農。會御史以譴去。民手瓦石伺道旁狙  
擊之。而德琦不衰。初制中外衛所伍缺。得徑勾。已更  
制各衛所。歲查節年逃伍之下。當勾軍。分別司府州  
縣攢造清勾冊二。上兵部。部存其一。以待考。以其一  
轉發在所。照名籍拘勾。各司府州縣。將所發冊亦攢  
造。已勾解名數。若實有事故難解發。若當豁除者。具



爲冊送部以待質而省府州縣清軍設專官

省分巡僉事分

守參議府同知縣縣丞

後患伍空遣監察御史重風憲予專覈

之權患數代後必三年代令專久得竟軍本末令蠹弊無芽滋其正軍戶下本有丁捏無本非癯老篤疾捏老疾軍謫邊遠保結里鄰發附近充軍軍逃窩藏與同罪而御史受代還以清勾補伍名數多寡爲毀最故清軍使者賢卽法嚴令具而止否者以束濕繩下以鉗網讐民以苛峻爲風力安祿而保資而各清軍官恐勾補不及數爲已罪望風酷訊如在重辟必責之妄指捏報而後已有將不缺伍及在營有軍例



不該勾人數作冊外清出者。有戶絕後。責里甲認頂。及妄指無干發解者。於民禍汰烈矣。方始清勾時。衛所官攢造清勾冊。有厚費而勾到軍纔百之一。戶絕軍有勾數十次。徒多費無爲也。而法必歲勾。則任意謄寫。苟塞責。而奸弊橫出。有見伍作缺者。有有丁作無者。有故逃待勾。勾至自首者。有移名換籍。希解到作無。憑收伍者。計獨爲利窩。而攢造次數愈多。卽差訛愈益甚。其州縣官清勾。又獨按衛所名籍。不分遠近年逃亡。不分有籍與否。槩里遞而呼集。猾胥奸吏。不分有勾單與否。槩里遞而科索。其有軍籍者。不分



戶已絕未絕。縣里逋而嚴併。官愈貪刻。民被禍愈酷深。夫逃絕久者。遠年丁盡。旣茫無根影。其近年病故若逃者。雖有起解。隨復逃亡。軍政條例所載。諸當豁免者。魯莫一省顧也。正軍以賂而倖免。貧民無罪而干連。有一軍缺而致死數人之命。一戶絕而破蕩數家之產者。此清勾之弊也。國初軍槩集者。異遠近而謫戍者。必邊衛固矣。後以徙民實空虛之地。若商宦流寓他方者。所在多有之。今必勒遠原伍。遠者萬里。近者數千里。身被拘攣。心懸桑梓。長號卽路。終天永訣。人非木石。誰能堪之。其戶弱丁單。則必沿門乞



衰搏頰求助而後至若族丁稍衆者卽不以正戶應役或脇委孱弱或購推黠壯孱弱之人往往傳未達戍所而身已斃於道路幸其能達衣食鮮繼水土未服不窘而鰥則老而獨亦焉攸用哉此克伍之苦也獨其壯黠者則藉戶死命詐索親隣坐享行裝坐食解伴應解軍丁例經題准旣許於本戶照丁糧多寡道里遠近爲資遣矣卽戶貧丁少者亦抑勒里甲令押解爲之造冊爲具齎資爲置買妻小其說以爲遇之厚庶得其心無逃亡也而亡命曾不爲衰止其戶絕捏報名清出者里遞豪猾旣以賂免其愚懦畏



法者。則買行丐人以克。他置軍妻給資齎。不在是夫。  
是押解一名。若二名者。非有腴田上訾。應出踐更也。  
一非身犯罪。譴應流徙也。必使之廢廬產鬻子女。觸  
冒寒暑。凌歷瘴險。以與軍共一旦之命。故管解而至  
於千里之外。則下產半廢。二千里之外。則下產盡廢。  
三千里之外。則中產亦廢矣。此抵衛所衛所官滋留  
難覆與軍爲市。問管解者家殷實與否。爲賂厚薄。必  
得當而後遣。少違期限。有司者又得以其法而繩之。  
例舊管解逃軍。一年  
以上無批回充軍。解者質衣并日。空橐囊。厘得報  
而反而所解者。或管稱齎冊。或委託取裝。衛官受其



賄囑利彼月糧押解歸未及門所解已旋踵而至而  
逃還者不在是其所買爲軍妻者恩旣不屬視如唾  
核及軍旣逃終流落乞丐而凍餒以死也此管解之  
苦也他諸丁雙不報復以同姓同里妄指誣陷至殫  
丁竭產莫之勝說而里書黥者將遠于軍繇抽匿洗  
改歲久事恬詭秘之迹寔微寔滅簿書緣絕無從詰  
究有司者終莫能覺發也蓋清勾之弊極此矣軍伍之弊  
其孔實繁諸有司黃冊衛所軍冊橫造舛錯戶口紛  
紜或一軍戶而分爲三五戶者或一軍來歷而彼此  
互異者或軍冊有名而黃冊不載者或黃冊備詳而  
軍冊簡畧者甚至軍初姓名傳寫訛謬以黃爲王以  
曾爲魯以黎爲李又或戶本絕也而更歷百十年猶  
載老丁或戶本未絕而規圖影射輒隳丁盡斯其來



又嘉靖中。兵尚書憲用主事王學益畫請停衛所每年造冊之令。製軍單。令將逃故軍士用堅白厚紙。署名籍印。鈐爲單。隸部者送部。隸都司者。類送部轉勾。造底冊送部存照。其後每年將新逃故軍士填單造冊。上部類填勘合催勾。而造總冊。以衛統所。所各一冊。百戶將各軍。照充發年月。順序挨造。開軍祖姓名貫址。下具充調接補頂替來歷。若先管百戶總小旗姓名。將原額軍役填滿外。上之部。一存衛。一類送各司府州縣。後每年止。將新收編發軍繇。及解補軍數。開造送部。部及清軍官。各行照填註原冊內便查。各



司府州縣亦不必歲將逃故軍士造冊登答。及不許將未奉單勾者妄勾。止照部發去軍單。逐一清審。內有丁者。卽解送着伍。例赦免及無勾者。卽與開豁。開造小冊。送部銷照。府州縣將有勾到軍丁。到日爲始。三年以上不解一名者。府州縣清軍官參問。丁盡戶絕。若原係山後人氏。族無者。經勘五次以上。送清軍御史審實。類繳部司。司各立冊住勾。其孤有幼不堪解者。經勘三次以上。造小冊。案候出幼。解補。其老疾故絕。逃移跟捉者。三年不獲。編記。又三年不獲。比族無例行銷。各清軍官。但以完銷軍單。明曰無弊。及不



在平民爲賢否。不主於得軍。而各衛所扣軍糧造冊。不訾之費。頗省。又總冊一立。百年不改。勾單之發。無爲煩復。而衛所訛寫妄勾之弊。盡絕。武庫得按籍而稽。御史得按法而糾。軍衛該勾者。有丁在所必勾。無丁在所必豁。有司雖欲虛文應。故不可得。欲刻薄取功。亦不可得矣。後孫御史慎奉命清江浙福建軍。鄒文莊守益。謂之曰。天下利害。其大較可籌也。利於國。弗利於民。憂國者爲之。利於民。弗利於國。憂民者亦爲之。今軍政之弊。極矣。軍無餘胤。吏有額需。怵威者。妄承挾怨者。妄指。下吏招賂者。乘人所苦。誣無爲。



有橫縱以幾利。卽庸謹者。畏譙讓。承風旨。傳致疑似。以求當。長解荼毒。家破身殞。而新軍入伍。未黔突而逃也。蓋萬姓受其害。而朝廷曾一無所利也。國與民交病。奈何弗爲一釐正之乎。廟堂成規。非可猝議。但戶絕挨無。逾清查者五。則

列聖旣久。省之矣。而奸胥蟠糾。神出鬼沒。里遞歲輸。一不滿所欲。輒誣而剥之。是利不在官。不在民。而獨在於貪黠之群胥也。宜廣奏罷挨無軍。以宣上德。又爲書於政府言之。於是御史舉挨無名籍軍戶絕。若例免勾者。備覈實上兵部。請罷勾。而移各衛所擅勾。



者以違制罪久之

天子爲下停差清軍御史之令。寬管解逃軍。若軍赴衛  
違限之科。恩厚深。而二司清軍官。日玩愒自處於  
閒官逸吏。以致文卷糜滅。冊籍差訛。雖勾軍重務。惟  
付胥吏。任其謄造。於是議者請申飭。無論御史差否。  
歲及期。守巡巡行。將勘合勾單清審填註。有丁解者。  
當年繳逃。移跟捉者。三年繳。挨無名籍。及丁盡戶絕  
者。五年繳。而部通以五年查催完銷。蓋法精令具。而  
無補於伍虛。於是議者言。國初之爲兵也。取之亦  
多途矣。取之多途。則人無定貫。人無定貫。則伍常實



而不虛。今籍有定貫矣。籍有定貫。積二百年而欲伍  
無耗。不可得矣。雖然。一夫一婦異世而爲族。積百九  
十年。而謂丁無餘不足。更籍而爲軍。亦豈可哉。故莫  
如抽丁。夫莫非王臣。天下之大分也。人戶以籍爲定。  
國家之永制也。始而一軍。繼而餘。繼而屯。又繼而復  
餘。理勢之必有也。始而一軍。繼而絕。繼乃不絕。又籍  
而復絕。而遂絕。亦理勢之必有者也。絕者。以理勢之  
必有。則罷其伍餘者。以理勢所有。抽其丁而籍之以  
爲兵。亦豈非乘除之道。必至之理乎。今取兵於民。曰  
籍定矣。民不可爲兵矣。取之兵之餘。而復以賈怨。守



常已之。是亦幸絕者之不十一也。卽不幸而絕者十  
二三焉。十四五焉。將不披堅而荷戈乎。戶丁單弱者。  
其血食如線。是天民之無告者也。今執縛之。拘係之。  
以補伍。其期功林立。族大且茂者。以賈怨。守常而不  
及。亦烏在其爲絜矩也。此其說。欲更籍軍戶之丁多  
者。別爲軍以充伍。然民不可枉而爲軍。以軍凶戰危。  
不可以槩責之民也。今旣占軍籍矣。充一軍不足。又  
更籍而二三之。豈人情也哉。於是撫鄖陽都御史王  
世貞議。從近改補者四便。言應勾之戶。樂於近。不圖  
規匿。爲吏胥利。一應補伍者。便水土。不至困絕。二近。



則不逃。逃亦易跡。三解戶不至破家。四有是四便。而二百年莫以請者。有三疑焉。曰。閹兵制也。曰。罪人之後也。曰。邊衛缺伍也。今中外衛軍。犯私罪則調衛。不必拘原衛也。遇故絕則銷。不必足原數也。則調衛於制。非有閹也。

高皇帝時。軍惟槩充。及從征二端已耳。所謂罪謫者。或糧賦違限也。或工作誤式也。甚或奏請小不合。僚屬偶不和也。又甚而死事之群從若親友也。縱其身合罪。而今應補者日已遠。又况未必真爲之後也。至於邊衛之缺伍。固所當慮。第不知二百年以來。與虜戰



而得一階半勲者。豈嘗有一清勾之卒否乎。楊粵之民。性不耐寒。秦民見行。如往棄市。中土之不堪邊戍。蓋自古記之矣。乞勅兵部行各清軍御史。各查衛所旗軍缺伍。有逋遠應勾解者。於百里內外改補。行原衛所註銷。惟近年罪犯法。應發邊遠煙瘴地面充軍者。不在是。而解遠戶役。責有司量僉殷實。寬議津貼。毋使比閭受困。而嚴逃伍之誅。至東莞陳建議。以爲今天下有衛。猶無衛。有兵。猶無兵矣。浚民膏血。以養兵。而又令代爲之死矣。每年解軍。破里甲數十戶。棄軍妻數千人矣。甚者如大同。如南都。脫巾而訴。大



譁而首亂。馬端臨有言。宋兵之弊。劣弱而不可用。唐兵之弊。驕悍而不爲用。今兼之矣。嗚呼。清軍無益。勾解軍無益。謫罪犯充軍無益。憂伍籍不充。嚴清軍官督課之。又愈甚無益。愚以爲不若罷軍勿清。停清軍官勿差。而從事於選取民壯之制。以寓兵自

國初分軍民籍而來。民力農養兵。兵守戍衛民。天下从平。衛所軍口耗而變劇。正統末。令府州縣招募民壯。所在官率顧操練。有警調發。而民復有兵。其後弘治中。尺籍大虛。又制州縣七八百里。里僉民壯二名。五百里。里四名。百里里五名。春夏秋月操二次。至冬操



三歇三。有調發。官給行糧爲軍費。

或名快手。名每兵會手。名打手。

二十五人。設總甲二人。小甲二人。而名額以增。正德中。計丁糧編機兵銀。人歲工食。至七兩有奇。大縣至累千金。於衛兵外。復取民財。購民而爲兵。其後天下益多故。財耗兵脆。衛軍僅名額。而機快徒虛文。力不能。有捍禦。每幅裏盜發。輒請調土漢狼達兵。以已難。土漢狼達者。故韃靼歸附兵。若川廣雲貴羈縻州司兵也。道里遠。往返動歲計。調且至。盜輒鼠伏。去復橫放。而所調者。兵性狼戾多暴。又羈旅怨曠。所過騷動。欲奪。有司不敢詰。將領莫能制。故諺有盜來放火。軍



來殺我之謠而糜費不貲。故召外兵以除內寇。寇未  
平而民已大受其禍矣。於是王文成守仁提督南贛。  
轄江西湖廣廣東三省軍。命兵備官於所屬州縣機  
快中。選膂力膽智驍勇者。大縣十餘人。小縣八九人。  
爲精兵。每省率各五六百人。優廩餼。署將領。而汰其  
老弱不堪者。取其工食爲給募費。因用以平盜。而令  
在所團其民。十家爲甲。家各置一牌。備寫門戶籍貫。  
丁口多寡。生產藝業。若往來寓宿姓名其中。夕各輪  
一家臨門按牌。爲稽察。奸盜無所匿。已又令在所各  
推衆信者一人爲保長。於要地創樓設鼓。有警輒擊。



之保長號各甲。并力掩捕。而嚴官吏科罰騷擾之坊。  
自是撫督官守爲成法。日有申嚴。已復立黨正黨副。  
街長村長鄰長等。自相維轄。而要害地。諸選兵結寨。  
立墩臺。備器械。其追脅一專之於民。其又後國有事。  
總兵者懼器師難諱而見短。其將顧又憚失伍當坐。  
而受誅。且營伍空久不任調。於是諸大盜起。額軍不  
復遣。獨遣州郡所僉民壯兵以行。卽卒積死得不報  
也。其最後國儲殫乏。適有故。則名增兵餉兵銀。取諸  
民。急練募以已難。事稍靖。則又名革兵減兵銀。藉之  
以上供。而費出於民者。一增而不復減也。嗚呼。國



家養兵二百年。此其費安出。出於民也。曰養兵以衛民。曾不得一旅一卒之用。又益之以機快民壯。機快民壯者。朋戶醵金而克之者也。不足又益之以保甲。於是乎盡民而爲兵。既盡民爲兵矣。乃其初。畝徵稅以養衛兵。戶醵金以克民兵者。如故。曾壹不少貸也。是衛所官軍。既已養之。又從而驕之。爲民者。既讐歛之。又驅使爲兵。又驅而代之死也。豈不泰甚。泰甚也哉。則知古寓兵於農。因地爲守。固自然之符。地水之象。終百世不與易也。時平。內地專之於農。靖以寬簡。以時暇而訓練。事亟地邊。一之於兵。優其犒撫。及農



時而營田。內地有他變。則勤訓練習之兵。適三月而精矣。豈必額設哉。且夫兵未有不以多故狎戰事。而能精者也。善乎崔文敏銑之論師田曰。

國家有漢之全盛。無其強。無宋之苟安。類其弱。皆繇士業草率。登仕太易。鮮治經世之學。官多牽制。遷代太數。不弔專斷之權。弛而亡支。莫甚於兵。往者薊賊劉七。穿窬小醜耳。蔓延萬人。朝廷命官遣將費二省之財。調兩鎮之師。僅尾之行。莫能設伏出奇。一鼓取績。至狼山爲風所覆。而後靖。然且獻俘勒銘。上下胥謹慶也。舊制縣僉民壯。倣古土兵。而類以傭奴充宜。



制爲之法。練拔悍勁。習武事。登其材武者。守城緝盜。休者力田樹桑。鄉立保伍。平居譏察逋逋。有警團結以守。夫民貧爲小盜。應倡以聚。然後大鄉嚴則縣靖。縣嚴則府靖。推之天下皆然。嘉靖癸未。盜王堂起山東。轉掠河南。予守侍讀在朝。大司馬彭公咨於銑曰。非調邊兵不除矣。銑問賊中有邊人乎。曰無有。銑曰。賊恃一刀。能驅民從盜。朝廷賞罰明重。顧不如賊之劫乎。前中原及蜀盜起。咸用邊軍。彼知內之弱而致輕。今又藉之萬一恃功恣睢。後難控御矣。士兵未歷戰。氣恒怯。然調保定。舍在前。士兵從後。而總之。



以一將。古云習貫如自然。既可平賊。我兵亦練。彭公如銑策奏行。不數月。王堂平。明年甲申秋。大同變。

○成周以夏官制軍。而以大司馬命官。其屬有軍司馬。與司馬行司馬。其下有公司馬。兩司馬。其外有都司馬。家司馬。皆以馬命官。而井田以戎馬定賦。則知馬政之關於六軍至重。周之盛時。國馬以行軍。而公馬以稱賦。周禮鄉師以時辨其馬牛之物。縣師辨六畜車輦之稽。遂師遂人。以時登其六畜車輦。國有我政。則司馬法。甸出長轂一乘。牛三頭。馬四疋。此國馬之政也。其在王馬。天子十有二閑。而較人掌其政。辨



六馬之屬種馬一物以駕玉路。種馬謂上善似毋者戎馬一物

以駕戎路。齊馬一物以駕金路。道馬一物以駕象路。

田馬一物以駕田路。駑馬一物以給王宮之百役。蓋

五良一駑。具辨其德力物色而區分之。凡馬八尺以

上為龍。七尺以上為騂。六尺以上為馬。乃其頒良馬

而養乘之也。一寄之於人。謂五路馬之善者乘馬一師四圉

養馬曰圉。四圉四疋也。三乘為皂。十二疋皂一趣馬。下二皂為繫。

三十疋繫一馭夫。中六繫為廐。二百一十六疋廐一僕夫。十六

廐成較。較有左右。通十二廐為三千四百五十六疋蓋馬不乘習。將

驕憤而不可用。不養則屈。不備知馬性而閑其物力。



欲養乘無繇也。自乘至廐。積之爲馬二百一十有六匹。爲車五十乘。是爲卒。於易乾爲馬二百一十有六。應乾之策也。至六廐成較。爲千二百九十六匹。車三百二十乘有奇。分左右較主之。則六馬各一廐。而王馬小備。通左右較良馬一種得四百三十二匹。五種得二千一百六十匹。駑馬三之得千二百九十六匹。通六馬計之。凡三千四百五十六匹。而王馬大備。蓋周卽民爲兵。故軍馬出於民。而較人所掌。獨給公家之用。爲公馬。備十有二閑之制。此井田軍賦相表裏之明驗也。天子十有二閑。馬六種。邦國六閑。馬四種。



無種戎。卿大夫家四閑馬止田駑。辨降殺爲國防。而凡馬特居四之一。一牡足御三牝。息馬之道也。春祭天。駟曰馬祖。祈蕃息。孟春焚牧。中春通滛。而執駒。爲駒弱。血氣未壯。恐乘匹傷之。夏祭先牧。祭先代始爲牧者。祈充肥。而攻特。爲牡通滛後。蹄齧不可用。攻之。秋祭廋神。曰馬社。簡臧僕。冬祭馬步。爲田禱。祈康吉。而講馭夫。簡僕馭夫者。重人之道也。凡軍事物馬而頒之。其趣馬。則贊較人。差擇良馬。而齊其飲食。簡其進退。行止。馳驟之六節。掌駕脫之頒。其四時之居治。二月後。在牧而有庠。八月後。在廋而有閑。趣馬辨之。



圉師春釁廐。卻溫疫。夏治序而蔭之。冬馬肥獻焉。於是  
有巫馬以養其疾病。相而醫藥之。牧師掌牧地。爲  
之厲禁而頒之。庾人掌十有二閑之政教。時秣飼以  
皐馬。節駕脫以佚馬。三歲教使服御。曰教駢馬。二歲  
攻使無蹄齧。曰攻駒馬。其執駒以竹括押其耳。串習  
之。其惡馬。綱之繫維。狎其性而用之。及行。則以任輕  
重。齊其力而行之。禁原蠶。原蠶者。再蠶也。蠶與龍馬  
同氣。物莫能兩大。故禁之。成周之重馬。重養馬如此  
乎其詳也。其王馬時不足於用。買之民。有餘賣之。馬  
質平之。凡受馬于有司者。書其齒毛與其賈。馬死。則



旬之內更爲當受時。馬旣病。非其罪也。旬之外入馬耳。辨毛燥甚與否。以其物更。其外不更。爲馬不於廐病於旣受病也。諸周至如此。周穆王時有造父者。以善御得幸。王封之趙城。其後有非子者。居畎丘。好馬。善養息之。周孝王召使主馬于汧渭之間。馬大蕃息。孝王喜。命爲附庸。邑之秦。宣王中興。內脩外攘。復文武之竟土。脩車馬。備器械。以田車攻馬。同賦焉。迨周旣東。秦襄公以王命兼有岐雍之地。而車鄰鐵駟。小戎之詩作。竝矜其白顛四牡。騏驎騶驪之盛。以能勇公戰。而力并兼。秦用盛強。春秋時。衛爲狄滅。文公躬



儉勤造邦。務財訓農。馬用蕃息。詩人美之曰。匪直也。  
人。秉心塞淵。騋牝三千。魯僖遵伯禽之法。愛民務農。  
牧于坰野。馬以駟駟。蓋有騊。有皇。有驪。有黃。有騅。有  
騂。有驪。駟維有駟。駟維有駟。而車以彭彭。仉仉。釋  
繹祛祛也。史克頌之曰。思無邪。思馬斯臧。夫心塞淵。  
思無邪。本上心幾微。而騋牝從焉。馬臧焉。才焉作焉。  
徂焉。可繹思也。夫晉惠公及秦戰于韓。乘小駟。小駟  
鄭產也。慶鄭曰。古大事必乘其產。生其水土。知人心。  
而服習其教。唯所納之。無不如志。今乘異產以從我。  
及懼而變。將與人易。亂氣狡憤。陰血周作。張脉墳興。



外強中乾。進退不可。周旋不能。君必悔之。不聽。及戰。晉戎馬還潭而止。秦獲晉侯。戰國之際。魏吳起以言兵干武侯。武侯問畜卒騎之法。起對曰。夫馬必安其處所。適其水草。節其飽饑。冬則溫廄。夏則涼廡。刻剔毛鬣。謹落四下。戢其耳目。無令驚駭。習其馳逐。閑其進止。然後馬於人親而可使也。車騎之具。鞍勒銜轡。必完整。凡馬不傷於末。必傷於始。不傷於饑。必傷於飽。日暮道遠。必數上下。寧勞於人。慎無勞馬。令力常有餘。以備敵覆。故馬軍制慎之。漢初。自天子不能具鈞駟。令民出筭賦以備車馬。而太僕以掌輿馬爲官。



其屬有大廐未央家馬三令。有車府路軫騎馬駿馬  
四令丞。有龍馬閑駒橐泉駒駉承華五監長丞。馬廐  
皆萬匹。而馬養於官。又制內郡民養馬。有車騎馬一  
匹者。復卒三人之筭。以爲北軍騎士。至邊塞。則縱民  
於畜牧。而官不禁。烏氏居塞。馬數千群。置諸苑三十

橋桃居塞。致馬千匹。

六所。置牧師分布北邊。以郎爲監官。奴婢三萬人。養  
馬三十萬匹。於是衆庶街巷有馬。阡陌之間成群。塞  
上馬布野而無牧。而文帝又詔太僕見馬遺財足。餘  
皆給傳置。以休養之。蓋漢馬極盛。其後天子數遣將  
出擊胡。漢軍士馬死者十數萬。馬大耗乏。乃行一切



之令。自封君而下。至三百石吏。以差次出馬。天下有亭。亭畜字馬。歲課息。已又令民畜牧邊者。得從官假馬。毋而歸其息十一。會匈奴渾邪王來降。天子發車二萬乘逆之。縣官從民貰馬。民或匿馬。馬不具。帝怒。欲斬長安令。右內史黯大憤之。曰。令無罪。獨斬臣黯。民乃肯出馬。且匈奴畔其主而降漢。漢徐以縣次傳之。何至令天下騷動。罷中國。甘心夷狄之人乎。帝默然罷。而峻匿馬者罪。有以列侯匿馬坐腰斬者。當是時。內郡馬不足。籍民馬以補車騎。邊邦不足。發酒泉騾駝。負載玉門關。至輪臺之詔。始修馬復令。令無乏。



武備而郡國二千石各上畜馬方畧補邊狀與計對。

吁其晚矣。

後漢省約諸苑太僕屬獨未與廐令一人後置左駿令廐別主乘輿馬而伏波將軍

援好騎射受相馬法於成駝楊子阿具表言行天莫如龍行地莫如馬馬甲兵之本國之大用也安寧以別尊卑之序有變以濟遠近之難臣嘗受相馬骨法考之事輒效欲形之於生馬則骨法難備具文不可以傳後武帝時善相馬者東門京鑄銅馬獻之詔立之宮門因名金馬門臣謹依儀氏韉中泉氏口齒喻氏唇髦丁氏身中備數家骨相以其法鑄之爲馬儀式詔置之宣德殿下爲名馬式焉其法曰水火欲分明水火在鼻孔兩間也唇欲急而方口中欲紅而有光此馬千里額下欲深下唇欲緩牙欲前向牙欲去齒一寸則四百里牙齧鋒則千里目欲滿而澤腹欲充膝欲小季肋欲長垂薄欲厚而緩垂薄股也腹下欲平滿汗溝欲深長而腓本欲起肘腋欲開膝欲方蹄欲厚三寸堅如石其精物理也如是。

唐興

當周隋之亂種馬乏得突厥馬二千鳩括殘騎於赤



岸澤得隋馬三千徙之隴右。命太僕卿張萬歲領之。其屬有牧監副監。歲列職課功。而監牧之制始此。又尚乘掌天子之御。左右六閑。曰飛黃。曰吉良。曰龍媒。曰騊駼。曰馱騏。曰天苑。總十有二閑。爲二廄。曰祥麟。曰鳳苑。繫飼之。其後又置飛龍廄於禁中。而萬歲能其職。自貞觀至麟德四十年間。馬大息。至七十餘萬。置八坊於岐幽涇寧間。地廣千里。爲田千二百三十頃。募民耕以給芻秣。後頗分爲四十八監。地猶狹。不能容。片析布河西廣饒之野牧焉。凡監牧馬五千爲上。三千爲中。不及者爲下。監皆有左右。皆因地爲之。



名方是時天下以一縷易一馬爲唐馬極盛而萬歲

掌馬久恩信行於隴右後又立四使統諸坊

涇川亭川闕水

赤城東使統之清泉溫泉西使統之烏氏北使統之木峽萬福東使統之設八監於鹽州

三監於嵐州凡大師發牧馬先強壯不足取其次錄

物色膚第印記主名送軍會其數上之省其後萬歲

廢而馬衰至開元初益耗命王毛仲顧內外閑廐專

其事詔州縣言曩以馬定里遞軍旅之復役百姓畏

苦自今諸州驛郵征行定戶等無以馬爲費民乃稍

畜馬毛仲亦能於職其始官時馬僅萬匹至十三年

乃四十三萬匹帝東封毛仲以馬從辨物色爲群望



之如雲錦。天子大喜。加毛仲開府儀同三司。又突厥  
款塞。玄宗厚撫之。歲許於朔方互市。以金帛市馬。於  
河東朔方左右牧之。馬雜胡種。乃益壯。其後諸軍戰  
馬動萬計。而五侯將相外戚牛駝羊馬布牧諸道者。  
百倍於縣官。別將較亦各以其私備馬。而馬又盛。天  
子因之以弱西北蕃。又後安祿山。以內外閑廐都使  
兼知樓煩監。選其良聚之范陽。故兵力雄天下。而遂  
反。自是邊無重兵。吐蕃陷隴右。而苑監所畜馬皆沒。  
歲市吐蕃馬。皆瘠脊薄蹄不可用。代宗欲親擊虜。用  
魚朝恩畫。至大括城中百官士庶馬以共。憲宗伐蔡。



命中使以絹萬匹市馬於河曲蓋其衰也宋初立左右飛龍二院各置使分掌之而諸州監牧並廢馬不孳息於是始置養馬務爲牧圉之地分遣中使詣邊州歲市馬而閑廐馬始備及平太原得汾晉燕薊馬四萬二千匹而國馬乃益多始擇諸州曠莽善水草地分置牧龍坊收養之景德中改爲監立牧監賞罰令其牧市戎馬戎馬至總數十百匹爲一券馬給錢千給芻粟續食至京師有司售之分隸於諸監日券馬其邊州置場市蕃漢馬團綱送赴闕或就配諸軍日省馬後言者謂戎人得錢銷爲兵乃以布帛茶及



他物易之。國初歲市馬僅五千餘匹。天聖中蕃部省馬至三萬餘匹。原渭德順秦亦稱是。國子博士李覺言。冀北燕代馬之所生。胡戎之所恃也。議者以制敵之道。兵騎爲急。欲啗戎以利。使重譯而致馬。然市馬之費歲益。而廢牧之數不加多者。則失其生息之理。故也。且戎人畜牧。逐水草而轉徙。騰駒遊牝。順其物性。故馬以蕃滋。其市之中國。則繫之維之。以枯橐飼之。離折牝牡。失其生性。馬甫至而玄黃虺隤。久益減耗。固其理也。古用賦出馬。漢唐之盛。馬阡陌成群。皆取諸中國而用之。不聞取之戎也。今軍伍中。牝馬其



多而孳息鮮者。給芻秣之費不充。而養馬之卒有害無利。駒子生。驅令覲灰而死。故也。今計度國家所市戎馬之直。匹不下二十千。往來資給賜予。乃在其外。是貴市之外夷。而賤棄之中國。非計之得也。國家縱未暇別擇牝馬以分畜牧。宜且減市馬之半直爲畜。駒將卒之月。給候納馬而止。則貨不闌出於國。而馬庶有滋。帝曰善。非久以費廣而罷。迨元昊發難。國馬不足。乃大括京畿京西淮南陝西馬以充邊。匿者罪。淳化景德間。牧地自畿甸及近郡。內外坊監總六萬八千頃。諸軍班又三萬九百頃。至和中。歐陽文忠公



修爲群牧使。言今馬政皆因唐。而馬息耗與唐異者。其利病甚懸。難可殫舉也。唐牧地於馬性相宜。西起隴右金城平涼天水。外薄河曲之野。內則岐幽涿寧。東接銀夏。又東至于樓煩。此唐牧監地也。今或陷夷狄。或爲民田。皆不可復得。惟河東路石嵐之間多山。汾河之側廣水草。以往迹推之。則樓煩元池天池三監之地。宜尚可得復也。臣往奉使河東。嘗行威勝以東。及遼州平定軍。見其不耕之地。往往而是。其山川深繆。地高寒。宜馬。及京西唐汝之間。地頗荒曠。可牧。請下河東京西轉運司。博訪地饒水草。可興置監牧。



者以聞而不宜馬諸牧監。宜可罷。天子下其奏。行相  
度。至治平中。天下應在馬。凡十五萬三千六百有奇。  
熙寧新法。散國馬於編戶。開封府及五路保甲。中戶  
養馬一匹。其貲力高。願養二匹者。聽。皆給以監牧見  
馬。或官與直。令自市府界馬。馬毋過三千匹。五路無  
過五千匹。追胥外。乘越三百里者。罰。在府界者。免體  
量草二百五十束。加給錢布。五路歲免其折變緣納  
錢。三等以上。十戶爲保。四等以下。十戶爲社。保戶馬  
斃。馬戶獨償之。社戶馬斃。社戶半償之。歲閤其肥瘠。  
而監苑地。咸賦之於民。文潞公彥博言。漢唐之盛。苑



監實繁。祖宗修舉甚盛。十百年蒐補。取用源源不絕也。今不深究本末。欲賦地與農。歛其租課。散國馬於編戶。責其孳息。卽不知所賦之地。肥瘠皆可耕乎。所歛租賦。豐凶皆可得乎。復不知戶配一馬。繫之維之。馬可得蕃乎。馬不蕃息。後將何繼乎。請下中書樞密院。較利害。博議上。持不聽。竟廢監牧。而廣增淤田之課。嚴侵冒之科。利入稍繁。而馬始闕矣。未幾用提舉蔡確言。增開封府界戶馬數。而罷給錢布。歲止免輸橐百五十束。而民滋病。又廢監初。愚民利一時。得請地而不虞其後。爭立高課。計租爲錢。已又皆不酬逋。



欠而群牧督運司者日峻嚴卽水旱不蠲民愈益病。迨邊隙開而馬遂大乏。靖康初左丞李綱始追悼祖宗監牧之廢民間雜養僅以充役官吏便文苟以塞責宜申復舊制而權行括馬之令以禦虜而汴宋亡矣。國初設太僕寺於滁州後定都于北又設太僕寺於京師凡兩淮及江南馬政屬南太僕寺順天等府暨山東河南馬政北太僕寺主之其後用言官言府州縣添設佐貳官專民馬之政在外則設行太僕寺三苑馬寺三於山西陝西遼東各轄六監二十四苑惟遼東一監二苑苑咸置卿貳焉凡馬政曰民



牧。曰衛牧。曰京府寄牧。凡牧地。曰草場。曰荒地。曰熟地。嚴其禁令而封表之。凡牧人。曰恩軍。曰隊軍。曰改編軍。曰克發軍。曰召募。曰抽選軍。皆籍而食之。凡民牧人。視其丁產而授馬。種馬牡十二。牝十八。牡牝五歲而徵駒。曰備用馬。齊其馬力以給邊。邊馬足。寄牧於畿府。而府甸土不宜馬。及人民耗者。征馬金。凡馬駒十八年而免。定頭駒重駒而籍之。報駒有常期。凡馬肥瘠登耗。籍其毛齒而時省之。三歲。寺卿偕御史一人印烙。選其良汰其羸劣。凡草場歲徵其租金地。畝十七。椿朋十。災侵出之。佐牧人市馬。凡租金有恩。



蠲及災蠲馬金有災蠲無恩蠲卽蠲必轉移相抵不得虧軍興行僕卿職掌。於僕卿不異。而邊衛營堡。府州縣軍民。壯騎操馬。皆主印烙。課孳牧。而時督察之。其衛牧錦衣旗手等衛。五軍三千神機等營。各設有草場於畿甸放牧。歲春末夏初。各營馬除存留聽用外。餘命坐營官一人。領下場牧。九月終回營。而時遣科道官點閱。視馬倒死。軍逃亡者。指實奏其種馬。上苑萬匹。中苑七千匹。下苑四千匹。不及則出帑金及茶。與諸番易馬。而洮州河州西寧。各置茶馬司主之法。上馬茶百斤。中馬七十斤。下馬五十斤。而番族納



差發馬萬四千餘匹以爲常。洪武初。江南人以十戶養一馬。江北鳳陽廬滁和。乃戶養一馬。

上念其不均。命江北民增五戶養一馬。戶仍給鈔三百貫優之。命太僕江南北各存游牝萬匹。爲孳生種馬。餘悉發草地放牧。其飛熊廣武英武三衛牧馬。亦如之。會言者謂大寧會州山海三衛所屬驛馬皆屯軍牧養。軍貧者衣食且不給。何有於馬。以故歲捐瘠者多。宜令官覈貧者歸營屯。而各選軍士有丁產者以充便。從之。永樂中。太僕卿楊砥言。近馬蕃息。而牧養乏人。請令民十五丁養種馬一匹。立群頭一人。五



十匹。立群長一人。養馬之家。歲免其糧草之半。凡種馬倒死。孳生不及數。責之償。蓋倣宋熙寧保馬法意行之。遂世爲北方患。

上諭兵部言朔方故多馬。本土宜亦其人習畜牧而然。今韃官居閒者多。可廉選其忠謹者。令教民畜牧孳息焉。居永平薊州通州者。就留本處。居真定定州者。更番赴順天府教牧。會六師歲

出擊胡。責歲納駒。急軍民至鬻子女妻。莫能存。

仁宗聞大痛之。命官爲贖還。且寬責駒之令。兵部尚書李慶言。今民馬益蕃。散衛伍操用。然且餘千郡。今遠近方面。朝覲官咸集。請員給馬一匹。令太僕歲徵駒。



如民間稍寬民下廷議。報可。大學士士奇入力陳其不可。曰。朝廷以禮徵賢者。授方面郡守。次者百執事。今役之牧馬。云蘇民困。是何其貴民而賤官也。且馬豈官所宜牧。又賤官貴馬。

上曰慶畿誤朕。少選批罷矣。居兩日。批不下。士奇復請曰。日。陛下許臣罷給馬之令。今中輟何也。此令行。將天下懷才抱德者。望望然去矣。且馬死責償。將人皆破家。爲子孫憂。无所散馬。僅三千頭。而令朝廷負此名於天下。此其失非小。幸立斷。

上曰偶忘之行。批矣。無何。



上御思善門召士奇曰。內批豈誠忘之。昨卿言未脫口。  
慶等已嘖有忿言。朕念卿孤立。故持之。今有名矣。因  
出陝西按察使陳智章示之。智疏言。按察司所以肅  
庶官。貞百度。而太僕寺得臨之。歲徵駒。與下民等。將  
憲綱掃地。於是止散馬之令。士奇感泣頓首曰。昔人  
言

陛下知臣臣不孤矣。宣德中。太僕寺請遣官覈馬。  
上召諭之曰。馬畜於民。必寬民力。而後可責之馬。國  
家法有定科。然屢下令。孳生不及數者。免償。念不欲  
以馬故傷民。夫農終歲勤勞。營衣食不給。而必責償。



馬何痛而不德也。爾等其謹率舊典從事。而恤貧難民。宜從寬。成化中。河南兩直隸旱。詔免今歲比較孳生馬。嘉靖中。詔本兵言順天府屬故論地養馬。近年牧地外歸豪右。而馬疲庖責養馬者償。應天府屬故論丁養馬。近駒馬止解馬直。而種馬倒失。復令民買補。民困甚。其議措處以聞。蓋

列聖恩厚下如此。丘文莊濬著論北人苦民馬之害曰。漢人馬牧於民而用於官。唐人馬牧於官而給於民。至宋始畜之官。復畜之民。又其後市之戎。我朝修和兼用之。兩京畿河南山東散之民。卽宋人戶馬之



令也。山陝遼東牧之官。卽唐人監牧之制也。而川陝茶馬之設。抑又市於夷。然監牧之法。宋人行之內地。而今則用之邊。其蕃育生息。旣徒名無實。業不能如往古之盛矣。然惟馬乏用而止。害固未及於民也。今內地編戶養馬之弊。殆甚於熙寧。宋養馬自願者聽。且免其體量草束。及折變納錢。今則計丁養馬。及數者與之。不及者取足諸他戶。不問其願與否也。他糧輸戶繇身役。一切如故。於是有質妻易子。以償馬逋直者矣。且也馬散之民。戶丁分日而飼之。分次而牧之。委之以老稚。食之以蕪穢。而處之于穢污。馬安得



蕃安得而不斃。一馬斃已。他馬益又斃。孳生俵已。嗣  
歲又復俵。生者歲俵而供之者愈難。死者日繼而償  
之者無已。民安得而不窮且盜也。兄徐淮而南。馬薄  
脊而脆蹄。卽其上乘。曾不當冀方之中乘。而道途芻  
秣轉輸之費未論也。於是歛民馬之直以賈之北。又  
計其道里時日芻茭之費而將之。蓋有賦南馬三而  
僅輸北馬之一不啻也。故民苦戶馬最甚。夫使百姓  
竭力破產以供馬。而官得其用。猶可言也。今所養馬  
率羸劣之下乘。使馳逐數十里。然且頓億。况望其出  
塞禦虜乎。以下劣之乘而禦虜。是遺之禽。固不如不



乘之愈也是官民兩失之也。成化中。詔覈霸州草

場。太僕卿儲璫言。陛下興修馬政。從群議。雖

仁壽宮皇莊。及壽王府莊。亦宛轉上白。退還團營放牧。

誠顧念遠大。而不以微利故傷國計也。臣前往霸

州丈量時。見工部遣官踏勘。曩草場廢弛時。渾河橫

流散漫淤漲。葦箔族生。放牧不到。其時言利之臣因

其土之所產而稅之。亦一時之權利而可矣。今既漂

廢。又復查理。是重稅之也。夫葦箔等用較之放牧孰

急。况草場設自永樂初。葦箔等課自近年始耳。其地

卽草場之地也。又况渾河改徙。不生葦箔。寧復有可



征之稅哉。幸 上除豁其牧地。乞在所出榜。開寫頃

畝。有侵占者。聽舉首以杜弊源。仍申奏討之禁。弘治  
中。兵尚書馬文升言 國初中外衛所各有放牧草

場。而在 京師不下數千餘頃。夏秋收放郊垌。冬春

支料喂飼。而後馬壯可用也。今無慮爲 親藩勢要

所占。間爲軍民冒耕。馬無所芻牧。入場未一二月。那

往西山中四散。趁牧而調用騎操。輒無馬。乞清查以

便軍。於是命給事中御史并戶兵二部官。清查草場

未墾處。仍舊收放已墾成田者。計畝收銀。發太僕寺

寄庫。候買馬爲著令。當是時。陝西牧馬草場。止存六



萬六千頃有奇。養馬軍止七百名有奇。牧養兒騾驘馬止二千八百匹有奇。而馬政大壞。都御史楊一清講故典興復之。奏黜卿寺之不職者。而簡布按二司參政副使。薦補卿少卿。絃轍大更。於是六苑地清復草場十二萬八千頃有奇。清勾撥補召募改編養馬軍二千三百名有奇。銀買茶易孳生馬并駒。凡萬有千八百匹有奇。脩馬營城堡十有九處。創復衙門倉廩馬廄室宇四千一百餘所。其西寧洮河三衛茶馬法久弛。自弘治十年至十五年止。茶易騾驘馬五千四十三匹。而邊馬大乏。軍買馬大困。一清奏復金牌



舊制。禁私販。積官茶。四年間。共易兒驢騾馬萬九千七十餘匹。而茶尚積有四十五萬餘斤。靈州大小鹽池。增課引五萬九千有奇。引納銀二錢五分。及卧引銀一錢。計爲銀二萬七百六十兩有奇。時慶陽固原庫給買馬。於是定開城苑。原額恩隊軍四百四名。安定苑。恩隊軍二百六十五名。俱草場寬闊。水泉便利。宜畜牧爲上苑。廣寧苑。原額恩隊軍多。而添設固原州草場。在所多占修城郭。及撥屯萬安苑。原額恩隊軍少。而草場頗寬。但堪中苑。黑水苑。係甘肅苑馬寺選撥恩軍一百六名。而草場過窄。清平苑。額軍一百



三十三名。土狹人瘠。無生業。俱小苑。大都通六苑。除歲給軍騎操外。可常牧馬三萬二千五百匹。足支陝西三邊之用。茶易番馬給軍。固濟邊。而風土異宜。孳牧難遂。養馬軍患之。請收買內地馬。不虧其直。而馬串習水土。宜可使息蕃。當是時。草場地復。牧軍數增。城堡相望。苑廐羅列。稽考孳生之法。甚設。邊馬歲俵給甚夥。而邊以大紓。一清懼後無專官。復圯也。正德初。具疏言。陝西延綏甘肅。皆防胡重鎮。軍務所急。莫先於馬。頃自胡塵弗靖。戰馬告乏。荷蒙

孝宗皇帝。采納廷議。專設風憲重臣。督理馬政。臣以庸



劣。猥當任使。隨命兼理茶法。顧廢墜既久。事難更新。盡臣之心。不敢有遺慮。竭臣之才。不敢有遺力。粗皆就緒。則責任專而事易集也。自兼巡撫以來。顧此失彼。已不如前。復蒙加任總制。經理邊方。責任重大。於監牧茶馬之政。勢不能復及矣。切惟先年兩寺馬政。巡撫兼管。而巡茶御史實主茶馬。巡撫政事繁多。以致茶司所易良駑莫究。操騎所給登耗莫聞。本末始終。茫不相攝。亦勢使然也。夫茶司之所易。卽監苑之所牧。監苑之所牧。卽官軍之所給。本爲一事。伏乞仍設巡茶御史。務選年深老練。實心幹事之人。以克仍



勅兼理馬政。行太僕苑馬等官。專聽提調約束。各衙門毋與。便於是巡茶御史兼馬政。始於此。遼陽苑馬卿凌相言。永樂間。本寺撥領牧養馬匹。給有草場額。軍養馬二匹。軍餘一匹。所轄昇平等十二苑。自遼陽至復州皆屬。正統來。裁十苑。上留清深二苑。隸蓋復二衛。而當時馬尚及萬數。自後倭給既多而弊作。馬一倒失。及虧欠駒子。往往買補兒馬。備其數。監苑官吏。位輕志下。潛與通賄。而孳生虧耗極矣。今各軍餘有全養馬者。有止養兒馬二三匹者。又有養騾馬一二匹。復帶駒者。其全不養者。其貧難甚。不思買補。苟



覬恩貸。不則狡猾納賂。主者盡俵他軍。倖輕便者也。其止養兒馬者。多家殷實。懼訐告。不敢不養。又畏徵駒。借此影射者也。其養騾馬帶駒者。其柔弱之人。不善夤緣。而監苑官吏。假公責併。俵給不及其人。徵駒歲倍其數。展轉無已者也。亦不均甚矣。今莫若通計二苑馬。查堪孳牧者。盡畱兒馬。及餘老弱。與收買騾馬。通計均派。令軍顧養。後生騾駒。可離種母。卽撥無馬苑軍養之。十一二歲。卽聽變賣。仍五年一清。則種馬均給。而人無所規避矣。但軍餘所養馬。率有名無實。臣愚以爲宜少寬課責之虛名。以收有用之實效。



每軍止領養騾馬一匹。餘丁四名。比照有司四戶事例。但領一匹。每二歲徵駒一匹。蓋軍有糧賞。餘丁無之。故哀多益寡。俾無陂重焉耳。至若國初欽給草場。近兵部奏差清勘。給帖分領。止以丁給。不以馬計。故其時報丁多者。得領田多。而養馬或少。報丁少者。卽領田少。而養馬殊多。至有全無馬匹。得冒田數頃者。於爲孳牧。給田初意大戾。宜清查還官。而更以馬定畝。給帖放牧。便嘉靖中。給事中謝汝儀條京衛下場之害。言京衛軍歲春夏於畿甸下場放牧。歲一舉行。而草場地土爲勢要奏討。姦人投獻者殆盡。獨低



窪處。又積爲湖淀。漫生萑葦。人馬皆不可近。又無廬  
次。可以棲止。無廄庠。可以蔽蓋。馬買草而喂。人裹糧  
以從。軍士逃亡。馬匹倒斃。雖有下場之名。殊無收放  
之實。蓋法弊極矣。近襄城伯李全禮。奉 敕。領下場  
馬二千餘匹。收放。隨又以聽征馬六千益之。馬以萬  
計。芻牧無所。矧今大雨時行。暑氣方溽。泥潦遍野。鬱  
蒸中人。群處則有疫癘之虞。露宿則有蝨蝨之苦。人  
困馬病。是徒徇節省之名。而坐受虧損之害也。萬一  
畿甸有桴鼓之警。邊關有烽火之報。將胡以待之。乞  
勅兵部會同坐營官。熟計其便。將聽征馬。責軍人就



近便收放。月給半料。無下場巡撫。蘇松等處都御史翁大立條江南養種馬之害言我

太祖定鼎金陵。以郊圻之內不可缺馬。而大江之南。不便養馬。設僕寺於滁陽。領牧而應天等府。每十一戶止養馬一匹。又給牧地。免差徭寬之。永樂中始計丁養馬。成化中又官收地租。弘治中以江北水荒。馬寄養江南府屬甚夥。而民困漸極。國初論丁養馬。丁不編徭。邇來人戶逃亡。槩派丁田出辦。單丁下戶不免馬害一。馬頭中另編群長。歲歛貼戶銀三十兩。群長外。又編獸醫。歲歛藥餌銀十三兩。害二。官徵地租。



畝無隙地。末收與芻而不得。又歲派草料銀四五六  
 兩。害三。江南地卑。而馬性惡濕。歲倒損什二三。問罪  
 陪償。又不下二十兩。每季印烙。官有常例。吏胥里老。  
 有紙劄供應。害五。寺備用馬匹。匹費銀三十兩。赴南  
 部者。匹五十兩。解赴京者。倍之。害六。况草旱頻仍。海  
 防愈急。民有菜色。而望雲錦之成群。人齧草根。而欲  
 芻秣之常給。何可得也。今若革之。民間歲省群長貼  
 戶銀。省獸醫工食銀。八千餘兩。省草料點烙罪贖陪  
 償銀。十有二萬餘兩。歲省管馬通判主簿俸錢薪馬  
 費數百兩。種馬一匹。倣通州例。徵銀二十兩。官可得



銀一十九萬九千餘兩。而借用馬匹牧地子粒銀。勅  
不以革種馬少損也。爲利已不訾矣。臣見沿海護塘  
之外皆鐵板沙塗。馬可馳驟。今選種馬堪戰者千餘  
匹。分給總兵參遊把總等領之。則倭奴之犀槍利刃  
不足當。國之輕騎。跣足裸形。不足當。國之勁鏃。  
有舟師截之海。又有騎士拒之邊。地形旣得。長技在  
我。併以蘇糧長所辦馬。給之有餘。以供走遞。於爲利  
豈有量哉。夫天下之事。利害相乘。利多害少。不可爲  
也。利官害民。不願爲也。今革馬之利如此。畜馬之害  
如彼。惟裁擇都御史王廷相條馬政三事。言團營馬



匹存操者。自四月至九月。有料而無草。其下場者。料草皆不支。惟十月入操後至三月止。皆全給料。而給草者。僅三月餘。折銀月一錢二分。通一年計之。存操之馬。有料而無草者。凡九月。是料備而草不足。下場之馬。僅得半年之料。而草與料俱不足也。夫馬給於官。固非已物。而自備草料。則切身之苦也。雖家稍殷實。然且難之。况實貧難。自給不暇。而暇及公家之畜哉。在營之馬。日饑而死。此其故非難知也。而部猶以舊例格之。

祖宗來。諸司之例變者亦多矣。卽如下場之馬。弘治前。



尚隨場放牧。今草場半爲田而納租銀矣。營馬隨便  
牧放。不於郊矣。獨牧馬之資。猶執下場寄牧之例。何  
名實之相背也。官以非事例而不肯給軍。軍以非已  
物而不肯飼馬。則日俟其斃而已矣。且一馬之價。小  
民解俵。無慮費三四十金。乃吝此數月之草料而必  
致之死。是所惜者小。而所失者數十百倍之多也。蓋  
掌馬者計不及財。掌財者慮不在馬。誠令如一家之  
事而圖之。則草場馬匹。事皆切心。豈有惜纖微之費。  
而傷數十金之馬者哉。乞存操下場馬通融放給。而  
舉草場租銀。補營馬草料不敷之用。便且也。馬之給



顧。非必軍之殷實者也。軍殷實者。通賄自免。而領馬  
養者。顛責之貧軍。夫此貧軍。賃房而居。待糧而食。賃  
房則馬必無棲。露地以居。雨雪不蔽。而馬苦矣。待糧  
則食必無餘。闕支折色。僅給口實。而馬饑矣。馬苦且  
饑。而啖之酒糟。氣烈味惡。不作臚而損力。雖強壯之  
馬。數月之後。必且羸病。無所用之。乞將團營軍。審實  
其力。以領馬。而擇其馬無臚者。會厠驗視。又大便。夫  
國家於馬政。日孳牧。日解俵。日給兌補負。勤注矣。  
而馬日不足者。飼秣之實未盡。耗失之科不明。地產  
之宜不辨。生養之源不開也。一兵受馬。舉家乘之。至



有以載薪芻者矣。一將主兵衆裨役之。至有以供迎送者矣。當事者又以芻菽之不備。而分之金。金受之商人曰。兵自易也。金入兵手。孰不妄用。有領囊橐。易芻菽食馬者乎。商賈利析秋毫。兵見小利。有不以他貨相貿質者乎。何慮及馬。此芻秣之實不盡也。家市之馬失者。不深罪。官市之馬失者。不深罪。關允之馬失者。又不深罪。是不明馬所從來也。從戰六七歲失者。不深罪。卽三四歲。或一二歲失者。又不深罪。是不明馬所爲役也。瘟疫斃者。駟厄。汗喘斃者。馳疾。癰疥斃者。櫪穢。而羸瘠斃者。失秣也。皆冥其故而莫省。奸



人戕馬以避戰。有稱半道而馬斃者矣。懦將棄馬以  
餌敵。有稱馬斃歸伍而全身者矣。是不明馬所從蹄  
也。此耗失之科不明也。夫古司馬灋。甸出長轂。鄉師  
縣師。惟辨其物。登其數。時稽之而已。其養於民者。官  
無所與也。至較人牧圉之所養。敎乘攻執差擇。以至  
于閑房牧地。皆官自計度。一未嘗關諸民。國家苑  
馬之設。固養於官之遺意。而於兩直隸河南山東。編  
民戶以養馬。月給錢而畀之。終已而不得其用。官益  
多事而民乃甚病。此則弊之所自生耳。夫天下非小  
弱也。古往所宜馬之地。盡撫而有也。隴右金城岐幽



涿寧諸唐人監牧之地故在也。而冀代最產馬。爲  
帝畿。中原平曠。一望萑蒿。夫孰非牧地者。春秋魯衛。  
漢唐全盛時。嘗用之矣。誠令責卿監通知焉。政者。勘  
實牧地。諸西北宜馬之鄉。山林原隰。民棄不耕者。並  
置苑馬而廣畜之。此字順其時。騰放調養。盡其道。而  
以司官月令之法。悉心理之。有唐牧監之盛。固可坐  
而致也。當是時。議者往往言寺苑官不收才望。故資  
格淹而權輕。雖帶卿佐銜。無異司屬。峻崇之階。絕望。  
苟且之念。自萌。今誠將見任老懦者黜退。推方面之  
賢而任之。得準內寺體統。不受制於撫按。不降志於



兩司而於兩司官內選委才幹之臣以佐其經畫府衛衙門事干馬政者悉從節制而後馬政可舉實留意於簡官胡莊肅松條邊事疏其廣孳畜言我

祖宗遠監前代兩京設兩太僕寺遼東山西陝西并肅諸大鎮則各設行太僕寺與苑馬寺此其內外相資遠近相望所以強兵資國攘夷康夏其規慮於馬至閎遠也法久弊滋事遠人玩官之所養既有名而無實其養於民者又無益而有損昔唐郭子儀與代宗語吐蕃之強退上書言朔方十馬比天寶中不當十之一臣所將卒不當賊四之一馬不當百之二慨懷



至流涕也。臣竊讀而悲之。今虜酋小王子與古囊俺答阿不孩等各不下十餘部。部精兵萬餘。馬數倍其兵。老弱稱是。臣親於太原城上見其一人騎而馳者一馬。繫而牽者又數馬。今又益以忻代陽曲二十餘處所掠馬。彼其日夜長養而步作之。此其銳何可當也。故欲禦虜。則養馬不可以不豫。今議者或以是非旦夕可幾而後之。臣竊以爲不然。夫人主心也。內外百司百骸也。紀綱脉理也。故主心有定。則脈弗壅底。而四支百骸各得其理。今代忻之間。固冀北之壤也。所謂樂羊山魚兒川滴水崖與馬跑泉等處。水泉繁



茂宜畜牧。誠及是時。敕吏部選於衆。求如古所謂張  
萬歲王毛仲其人。使爲卿主馬。而以代州行太僕寺  
改苑馬寺。增置監署。取山東北直隸河南諸處種馬。  
分布廐閑。攢槽飼秣。悉徵諸處養馬丁田之直。召募  
恒代居民。若諸隘泥人。爲牧圉養之。而朝廷詳爲條  
畫。第其蕃耗爲之賞罰。期數年不易。有成績。許不次  
遷拜。或授以侍郎都御史寵任之。若其庸庸充位。績  
用弗成。亦顯加寬廕。爲怠事之戒。至於遼陝甘肅寧  
夏諸處。一體申勅。期毋闕馬。如此則猶七年之病。求  
三年之艾。亟畜之而猶可及得也。善居室者。求木於



十年之後而用之惟陛下留神。其自著論言夫兩京太僕寺與遼陝肅代諸行太僕寺若苑馬寺此產馬之處也。源也。九邊列鎮與紫荆居庸山海鴈門偏頭寧武諸關諸兩京營塲此用馬之處也。流也。源深流遠。世覽鏡之矣。故法數馬科駒之外。則有若朋椿之協相。有若皮椿之罰懲。有若巡清歲季之督課。至私雇賃載負。必實之法。所以節其流而濬其源也。今陵遲盡矣。緣邊牧地乾沒于風沙。占沒于豪右。虜入無時。卽盛夏且嚴烽燧。法四月下塲。十月給芻。皆不可行。兼騎卒貧窘。率縮芻菽之直以自食。其甚者往



往利馬之死。避調戍。否亦終歲道路。踣斃相望。矧乎  
西北東南之殊風。水土藁稭之異致。皆弗暇論也。本  
兵用人。固亦分邊腹遠近。曾否習貫也。至馬顧可漫  
然已哉。嗟夫。今士大夫爭言括財。不暇言理財。言理  
財。不暇言生財。至如馬云。馬云。固財之大且亟者也。  
又非旬月晦朔之所能攻。閑壯長也。原之弗濬。流之  
無節。斯何異竭溝涂。滄川之漚。以供尾閭之泄耶。矧  
民慮官府抑配。與其俵輸。率無敢私畜牧者。是并其  
原之傍出者。又從而湮塞之矣。夫雲錦之盛。匪降自  
天。淵塞之心。奚獨在古。故夫重罔寺之權。慎牧卿之



選復川陝馬政都憲之舊。久其任而綜覈其成。殿最之要。誠在所急哉。在所急哉。

函史下編卷十八 終




要茹海河急茹海河急茹

以海河刺温如海河之書入其丑而翁選其水選最





































DS  
735  
.A2  
T4  
v. 76  
山史下編卷之十九

明旰郡鄧元錫著

邊防書

書禹貢辨五服之等。甸爲王畿。侯比土中。綏列外蕃。而要荒爲戎狄。於內外辨深。其綏服二等。曰三百里。綏文教。二百里。奮武衛。蓋其慎哉。周人九服之制。因之。而要荒曰夷。曰蠻。曰鎮。曰藩。故書戒通道。詩謹薄伐。而春秋謹嚴於夷夏。防乎防焉。則知夷蠻鎮藩。固邊所自設也。昔周之盛也。天保以上治內。采薇以下治外。故天子有道。守在四夷。天子卑。守在諸侯。諸侯



有道守在四鄰。諸侯卑守。在四境。旨哉言乎。乃周官  
固封疆。備邊竟。完要塞。謹關梁。塞蹊徑。扼走集。終不  
廢險固之爲用。掌固脩城郭。溝池樹渠之固。頒士庶  
子及衆庶之守。設其飭器。分其財用。均其稍食。任其  
萬民。用其材器。凡守者受灋焉。國有故。則移甲移役。  
移財用。通守政。與國有司帥之以贊其不足者。晝三  
巡。夜三鑿。以號戒。司險掌周知九州山林川澤之阻。  
設涂溝。樹林木。爲阻固。皆有守禁。而達其道路。國有  
故。則藩塞阻路。止行者。以其屬守之。唯有節者達之。  
易坎之彖曰。天險不可升也。地險山川丘陵也。王公



設險以守其國。則險用之大亦焉可得廢哉。戰國下  
衰冠帶之國。爭驚於戰攻。而燕趙秦以與胡界。邊皆  
各築長城以拒胡。趙自代竝陰山下至高關爲塞。置  
雲中鴈門代郡。燕自造陽至于襄平。置上谷漁陽右  
北平遼東西郡。秦初築隴西上郡。其後使蒙恬攘匈  
奴。悉收河南之地。因河爲塞。築四十餘縣。城臨河。徙  
謫戍以充之。邊山巖塹谿谷。可剗造者。剗造。可繕治  
者。繕治之。起臨洮至遼東餘萬里。又使恬渡河取高  
闕陶山北假。地名中築亭障以逐戎。蓋侯衛廢而邊防  
益重。天子自爲守始於此。漢都關中。擁殽函之固。資



建瓴之勢。以御天下。然自高皇帝以勁兵十萬。困白登。建燕代國。以御胡制邊。而不能以一日爲安。已乃議和親。文皇帝德澤被四海。而匈奴入朝。那蕭關。殺北地都尉。遂至于彭陽。使騎兵入燒回中宮。候騎至雍。止泉。當是之時。匈奴左方王將居東方者。直上谷。接穢貉朝鮮。右方王將居西方者。直上郡以西。接月氏氏羌。其單于之庭。直代雲中。而中國各因所直之地。嚴防屯以爲邊。而隴西屯備羌。蜀以南備西南夷。會稽備東甌南越。各爲邊。列郡屯屬郡太守。國屬王相國。急則中郎將將軍止畱屯。

高祖時陳豨以趙代相監趙代邊兵。侍寬



張蒼皆以代相國將屯。武帝時李廣程不識皆以邊郡太守。文帝時遣三將軍屯飛狐北地。句注宣帝時遣三將軍屯飛狐北地。句注宣帝時趙充國以中郎將屯上谷是也。事已則罷而邊郡增置長史異內地。都尉將兵者賜武庫兵異他郡。都尉司馬不治民異他郡司馬。又別置障塞尉司巡徼望而屯田殖穀置農都尉主之。除邊吏五府舉人以充邊有事下廷臣集議上不日輒畫一報進止下以急邊大司農調軍興費浩穰不給則出少府錢或令民入粟以佐邊。郡太守歲將萬騎出行邊兵庫置令官分布爲防守有亡失遣廷尉史按驗亭障圯不治者誅之民徙邊屯田予犁牛有能止胡人所驅者以



其半予之制天下中丁人戍邊三日。雖丞相子壹不得輕復。勢不能人人行。行者不可往。便返合行者歲一更。諸不行者出錢爲更費。而北邊騎士輜車不筭。邊民被虜入塞掠。饑寒相失。則天下共更之。河西六郡民習戰備。上氣力。名六郡良家子。補羽林期門。以示優。蓋豫邊如此。而孝文時。太子家令鼂錯上書言。臣聞漢興以來。胡虜數入邊地。小入則小利。大入則大利。高后時。再入隴西。攻城屠邑。毆畧畜產。其後復入隴西。殺吏卒。大寇盜。竊聞戰勝之威。民氣百倍。敗其之卒。沒世不復。自高后以來。隴西三困於匈奴矣。



民氣破傷亡有勝意。今茲隴西之吏賴社稷之神靈奉陛下之明詔和輯士卒底厲其節起破傷之民以當乘勝之匈奴用少擊衆殺一王敗其衆而大利非隴西之民有勇怯迺將吏之制巧拙異也。故兵法曰有必勝之將無必勝之民。繇此觀之安邊境立功名在於良將不可不擇也。臣又聞用兵臨戰合刃之急者三一曰得地形二曰卒服習三曰器用利。兵法曰丈五之溝漸車之水山林積石經川丘阜草木所在此步兵之地也車騎二不當一土山丘陵曼衍相屬平原廣野此車騎之地也步兵十不當一平陵相遠



川谷居間。仰高臨下。此弓弩之地也。短兵百不當一。  
兩陣相近。平地淺草。可前可後。此長戟之地也。劍楯  
三不當一。藿蕭竹蕭。少木蒙籠。交葉茂接。此矛鉞之  
地也。長戟二不當一。曲道相伏。險阨相薄。此劍楯之  
地也。弓弩三不當一。士不選練。卒不服習。起居不精。  
動靜不集。趨利弗及。避難不畢。前擊後解。與金鼓之  
音相失。此不習勒卒之過也。百不當一。兵不完利。與  
空手同。甲不堅密。與袒裼同。弩不可以及遠。與短兵  
同。射不能中。與亡矢同。中不能入。與亡鏃同。此將不  
省兵之禍也。五不當一。故兵法曰。器械不利。以其卒



予敵也。卒不可用。以其將予敵也。將不知兵。以其主予敵也。君不擇將。以其國予敵也。四者兵之至要也。臣又聞小大異形。疆弱異執。險易異備。夫卑身以事疆小國之形也。合小以攻大。敵國之形也。以蠻夷攻蠻夷。中國之形也。今匈奴地形技藝。與中國異。上下山阪。出入溪澗。中國之馬弗與也。險道傾仄。且馳且射。中國之騎弗與也。風雨罷勞。飢渴不困。中國之人弗與也。此匈奴之長技也。若夫平原易地。輕車突騎。則匈奴之衆。易撓亂也。勁弩長戟。射疏及遠。則匈奴之弓。弗能格也。堅甲利刃。長短相雜。遊弩往來。什伍



俱前。則匈奴之兵弗能當也。材官騶發矢道同的。則匈奴之革筰木薦弗能支也。下馬地鬪。劒戟相接。去就相薄。則匈奴之足弗能給也。此中國之長技也。以此觀之。匈奴之長技三。中國之長技五。陛下又興數十萬之衆。以誅數萬之匈奴。衆寡之計。以一擊十之術也。雖然。兵凶器。戰危事也。以大爲小。以彊爲弱。在俛仰之間耳。夫以人之死爭勝。跌而不振。則悔之亡及也。帝王之道。出於萬全。今降胡義渠蠻夷之屬。來歸誼者。其衆數千。飲食長技。與匈奴同。可賜之堅甲絮衣。勁弓利矢。益以邊郡之良騎。令明將能知其習。



俗和輯其心者。以陛下之明約將之。卽有險阻。以此當之。平易通道。則以輕車材官制之。兩軍相爲表裏。各用其長技。而衡加之以衆。此萬全之術也。傳曰。狂夫之言。明主擇焉。臣錯愚陋昧死上狂言。惟陛下財擇。帝賜璽書寵答焉。錯復言守邊備塞事曰。臣聞秦時北攻胡貉。築塞河上。南攻揚粵。置戍卒焉。其起兵而攻胡粵者。非以衛邊地而救民死也。貪戾而欲廣大也。故功未立而天下亂。且夫起兵而不知其執戰。則爲人禽。屯則卒積死。夫胡貉之地。積陰之處也。木皮三寸。冰厚六尺。食肉而飲酪。其人密理。鳥獸毳毛。



其性能寒。揚粵之地。少陰多陽。其人疏理。鳥獸希毛。其性能暑。秦之戍卒。不能其水土。戍者死於邊。輸者償於道。秦民見行。如往棄市。因以謫發之名曰謫戍。先發更有適。及贅壻賈人。後以嘗有市籍者。又後以大父母父母嘗有市籍者。後入閭取其左。發之不順行者。深恐有背畔之心。凡民守戰至死而不降北者。以計爲之也。故戰勝守固。則有拜爵之賞。攻城屠邑。則得其財。鹵以富家室。故能使其衆蒙矢石。赴湯火。視死如生。今秦之發卒也。有萬死之害。而亡銖兩之報。死事之後。不得一筭之復。天下明知禍之及已。



陳勝行戍至於大澤。爲天下先倡。天下從之如流水。  
秦以威劫而行之之敝也。胡人衣食之業不著於地。  
其勢易以擾亂邊境。何以明之。胡人食肉飲酪。衣皮  
毛。非有城郭田宅之歸居。如飛鳥走獸於廣漠美草  
耳。水則止。草盡水竭則移。以是觀之。往來轉徙。時至  
時去。此胡人之生業。而中國之所以離南晦也。今使  
胡人數處轉牧。行獵於塞下。或當燕代。或當上郡。北  
地隴西。以候備塞之卒。卒少則入。陛下不救。則邊民  
絕望。而有降敵之心。救之少發。則不足。多發遠縣。纔  
至。則胡又已去。聚而不罷。爲費甚大。罷之則復入。如



此連年則中國貧苦而民不安矣。陛下幸憂邊境遣

將吏發卒以治塞。甚大惠也。然令遠方之卒守塞一

歲而更不知胡人之能。不如選常居者室家田作。且

以備之。以便爲之高城深塹。具藺石。城上布渠答。鐵

也復爲一城其內。城間百五十步。要害之處。通川之

道。調立城邑。毋下千家。爲中周虎落。竹篾相連遮也先爲室

屋。具田器。廼募臯人及免徒。復作令居之。不足募以

丁。奴婢贖臯及輸奴婢。欲以拜爵者。不足。乃募民之

欲往者。皆賜高爵。復其家。予冬夏衣廩食。能自給而

止郡縣之民。得買其爵。以自增至卿。其亡夫若妻者。



縣官買予之人情非有匹敵。不能久安其處。塞下之民。祿利不厚。不可使久居危難之地。胡人入驅而能止其所驅者。以其半予之。縣官爲贖其民。如是則邑里相救助。赴胡不避死。非以德上也。欲全親戚而利其財也。此與東方之戍卒。不習地勢而心畏胡者。功相萬也。以陛下之時。徙民實邊。使遠方亡屯戍之事。塞下之民。父子相保。亡係虜之患。利施後世。名稱聖明。其與秦之行。怨民相去遠矣。天子從其言。募民徙塞下。錯復言。陛下幸募民相徙。以實塞下。使屯戍之事益省。輸將之費益寡。甚大惠也。下吏誠能稱厚意。



奉明法。卹所徙之老弱。善遇其壯士。和輯其心。而勿  
侵刻。使先至者安樂。而不思故鄉。則貧民相慕而勸  
往矣。臣聞古之徙遠方。以實廣虛也。相其陰陽之和。  
嘗其水泉之味。審其土地之宜。觀其草木之饒。然後  
營邑立城。製里割宅。通田作之道。正阡陌之界。先爲  
築室。家有一堂二內。門戶之閉。置器物焉。民至有所  
居。作有所用。此民所以輕去故鄉而勸之新邑也。爲  
置醫巫。以救疾病。以脩祭祀。男女有昏。生死相卹。墳  
墓相從。種樹畜長。室屋完安。此所以使民樂其處。而  
有長居之心也。臣又聞古之制邊縣。以備敵也。使五



家爲伍伍有長十長一里里有假士四里一連連有假五百十連一邑邑有假候皆擇邑之賢材有護習地形知民心者居則習民於射法出則教民於應敵故卒伍成於內則軍正定於外服習以成勿令遷徙幼則同遊長則共事夜戰聲相知則足以相救晝戰目相見則足以相識驩愛之心足以相死如此而勸以厚賞威以重罰則前死不還踵矣所徙之民非壯有材力但費衣糧不可用也雖有材力不得良吏猶亡功也陛下絕匈奴不與和親臣竊意其冬來南也壹大治則終身創矣欲立威者始於折膠來而不能



困使得氣去。後未易服也。愚臣亡識。唯陛下財察。帝從其計。而後世備邊之畧盡於此。漢武憑屢世之憤。藉文景之資力。選將深入。歲輒克獲。已大發卒治諸邊。元朔中。大將軍取匈奴河南地。會渾邪將其衆降。漢隴西北地。河西益少寇。主父偃行邊。爲帝言河南地肥饒。外阻河。蒙恬城之以逐匈奴。省轉輸。廣中國。滅胡之本也。於是築城繕塞。因河爲固。徙關東貧民處所。奪河南新秦中。曰朔方郡。以爲邊。卽鹽洪宥銀夏石靈會及南威之地。今河套是也。自山東咸被其勞費。而歲所遣戍隴西卒。亦無慮減半矣。是後匈奴遠遁。而幕南無王庭。漢



度河而北。自朔方以西至今。居住往往通渠置田。官吏  
卒稍蠶食其地。東拔穰谿。朝鮮以爲郡。西置酒泉武  
威。分置敦煌張掖郡。絕胡與羌通之路。又西通月氏  
大夏。又遣光祿徐自爲築五原塞外列城。近者數百  
里。遠者千里。至盧朐爲塞邊。益廣斥。當是時。匈奴創  
甚。又以其間興兵事兩粵。通西南夷。置列郡以填邊。  
雖中國甚耗殊憊。要固其乘席富疆。爲邊境征討。將  
武師力可以戰而後足以守也。故邊益綿邈。烽火堠  
望益精明。而虜寇益衰。其後有司請復田輪臺捷枝  
渠犂地以備胡。天子下詔陳往悔甚痛。而天下用靖。



則知守國上務。固不大於邊也。宣元時。匈奴五單于  
爭立而國亂。呼韓邪再來朝求和親。且上書願保上  
谷以西至敦煌。請罷邊備塞吏卒。休天子人民。下有  
司議。議者皆或以爲可許。郎中侯應上議曰。周秦以  
來。匈奴暴桀。侵邊境。漢興尤被其害。臣聞北邊塞至  
遼東外。有陰山。東西千餘里。草木茂盛。多禽獸。本冒  
頓單于依阻其中。治作弓矢。來出爲寇。此其苑囿也。  
至孝武之世。出師征伐。斥奪此地。攘之幕徼。起亭隧。  
築外城。設屯戍以守之。然後邊境得用少安。幕北地  
平。少草木。多大沙。匈奴來寇。少所蔽隱。從塞以南。經



深山谷。往來差難。邊長老言。匈奴失陰山之後。過之未嘗不哭也。如罷備塞戍卒。示夷狄之大利。不可一也。今聖德廣被。天覆匈奴。匈奴得蒙全活之恩。稽首來臣。夫夷狄之情。困則卑順。彊則驕逆。天性然也。前已罷外城省亭隧。今裁足以候望通燧火而已。古者安不忘危。不可復罷。二也。中國有禮義之教。刑罰之誅。愚民猶且犯禁。又况單于能必其衆不犯約哉。不可三也。自中國建關梁以制諸侯。所以絕臣下覬欲也。設塞徼。置屯戍。非獨爲匈奴而已。亦爲諸屬國降民。本故匈奴之人。恐其思舊逃亡。四也。近西羌保塞。



與漢人交通。吏人貪利。侵盜其畜產妻子。以此怨恨。起而背畔。世世不絕。今罷乘塞。則生嫚易分爭之漸。五也。往者從軍。多沒不還者。子孫貧困。一旦亡出。從其親戚。六也。又邊人奴婢愁苦。欲亡者多。日聞匈奴中寬樂。無奈候望急何。然時有亡出塞者。令一縱之。闌出不忌。七也。盜賊桀黠。群輩犯法。如其窘急。亡走北出。則不可制。八也。起塞以來。百有餘年。非皆以土垣也。或因山巖石。木柴僵落。谿谷水門。稍稍平之。卒徒築治。功費久遠。不可勝計。臣恐議者不深慮其終始。欲以一切省繇戍。十年之外。百歲之內。卒有他變。



障塞破壞。亭隧滅絕。當更發屯繕治。累世之功。不可卒復。九也。如罷戍卒。省候望。單于自以保塞守禦。必深德漢。請求亡已。小失其意。則不可測。開夷狄之隙。虧中國之固。非所以永持至安。威制百蠻之長策也。對奏。天子乃詔宣諭單于。邊不可罷。非獨備外。亦防內姦。慰薦其意焉。建武初。天子閉玉門。闕謝西域。而詔徙幽并邊人。於常山居庸以東。增緣邊兵。獨保塞備胡。已遣將軍霸。將弛刑徒六千餘人。與杜茂治飛狐道。堆石布土。起亭障。自代至平城。三百餘里。而代北以平。時廷臣議金城破。羗西苦縣遠難守。棄之便。



將軍援上議言金城完。阻河爲固。其土田肥美。灌溉流通。而棄之。則羗在湟中。長害不休。不可爲也。於是詔武威太守。勿聽徙。置長吏。繕城郭。起塢。設堠。開通水田。勸耕。收郡中樂業。武都氏羗歸附者。援奏復其侯王君長號名。而隴右以寧。和帝時。大將軍騭議欲棄涼州。并力北邊。會公卿集議。各往往以爲涼州可棄也。譬之衣破敗。損其一以相補。猶有所完。不然。將兩無所用。中郎將虞詡時辟太尉府。言於太尉脩曰。不可。昔先帝開其涼拓土。勞費劇而後定。今憚小費。壹舉而棄之。非計也。涼州棄。卽以三輔爲邊。以三輔



爲邊則圍陵單外此甚不可且自古武臣烈士多出  
京州士馬勁於天下今羌胡所以不敢遂窺三輔爲  
心腹害者以京州之議其後也京州士民所以摧鋒  
執銳父死子戰無反顧之心者爲臣屬於漢故也今  
割而棄之民庶安土重遷必引領而怨以爲中國棄  
我於夷狄如因天下之敝釋怒洩憤席卷而東圍陵  
舊京可爲寒心議者喻以補衣猶有所完詔恐其疽  
食浸淫而無所限極也宜網羅西土雄傑引其牧守  
子弟於朝外以勸厲答其功勤內以拘致防其邪計  
便脩上其言於是詔辟西川豪傑爲三府掾屬拜牧



守長吏子弟爲郎。慰安之。安帝時。金城隴西漢陽諸降羌反。數大征。不克。二千石令長多內郡人。爭上言。宜徙安定北地。上郡郡縣。以避羌。詔時爲尚書僕射。上疏曰。臣聞子孫以奉祖爲孝。君上以安民爲明。此商高宗周宣王所以配湯武也。禹貢雍州之域。厥田上上沃野千里。穀稼殷積。又有龜茲鹽池。以爲利。水草豐美。宜產牧。北阻山河。乘阨據險。因渠以溉。引水爲春。用河爲漕。用力省而軍食足。先皇帝築朔方。開西河。置上郡。凡以爲雍州也。比遭元元無妄之災。衆羌內潰。郡縣兵荒二十餘年。宜勞來安集而徙之。



夫棄沃壤之饒。虧自然之勢。不可謂利。離河山之阻。守無險之處。難以爲固。今三郡未復。園陵單外。而公卿選。懷容頭過身。張解設難。但計所費。不圖其安。非至計也。書奏。詔謁者郭璜。復所徙民。繕城郭。置驛。埃而激河。浚渠爲屯田。諸郡儲粟。周數年。省內郡費。歲億計焉。方建武初。罷都試。罷郡國材官。而天下無兵。又罷沿邊屯兵。後羌胡有變。置度遼將軍。募郡國中。都官死罪繫囚減等。營屯朔方。敦煌。五原。邊聽妻子。自隨。占邊縣著籍。父母同產。欲相代者聽。逃亡者罪贖。各有科。徙者賜弓弩衣糧。後南蠻變。則置上林兵。



羌犯三輔。則置長安雍二尉。鮮卑入寇。置漁陽營。後盜起邊海。各稍增屯防兵。而扶風漢陽魏郡常山各置屯。列塢。然皆自京師遣連年暴露。而禁旅益虛。其後三國分裂。其爭地乃在荆襄。以荆襄東連吳會。西控巴蜀。北向宛洛。以是爲用武之國也。而南北相距。畫江以守。要在保淮。則合肥濡須爲巨鎮。東晉偏安之日久。都建康。憑長江爲天塹。而武昌江州壽春各宿兵列鎮。以爲防。迨殷浩北伐。舉非其任。右軍將軍王羲之與會稽王昱。牋請令廣陵許昌譙城彭城諸軍退保淮。爲不可勝之基。及浩喪師。則與之書。以爲



軍敗於外糧竭於內保淮之志非復所及莫若保江  
是知守國無定形亦無定勢而審時量力度所及爲  
險固蓋其恒也其在北圻分壤裂設鎮戍而國自爲  
邊元魏全有中原患在北狄中書監高潛表以爲北  
狄悍暴同於禽獸所長者野戰所短者攻城若以所  
短奪其所長則雖衆無所用之夫狄散居野澤逐水  
草戰則與家業並至奔則以畜牧具逃不齎資糧而  
飲食自足此其所長而六鎮勢分衆寡不敵虜來攻  
圖迫而難制亦其勢也請依秦漢故事竝六鎮築長  
城以防遏之其要害之地則開門造小城於其側爲



兵屯狄來有城。勢足捍禦。攻城不克。野掠無獲。將草  
盡而走。懲艾必矣。計六鎮東西不過千里。一夫一日  
之功。可城三步。三百人三里。三萬人三百里。而千里  
之內。疆弱相兼。計不過用十萬人。一月之力。而就不  
足爲難。暫勞永逸。計之得者也。凡長城有五利。罷遊  
防之苦。一。比部放牧無鈔掠之患。二。登城覘敵以逸  
待勞。三。息境外無時之備。四。歲時得閒。運芻糧入克  
其中。軍不匱興五也。奏可行。唐初突厥盛強。天子用  
廷臣議于五原。靈武爲長塹。塹邊召江南工師。大發  
卒治戰艦於河。以備邊。置屯于并。太原以實邊。置



十二軍時練蒐以嚴邊會太宗神武北擒頡利東制  
高句驪西平高昌定胡越爲一家外薄于四海於是  
鎮西節度使統龜茲焉耆于闐疎勒治安西北庭節  
度使防突騎施堅昆斬啜管海東建康寧寇王門  
墨離豆盧新泉張掖治北庭朔方節度使捍北狄統  
經略豐安定遠西城治靈武安北都護府制東域振  
武治榆林河東節度使掎角朔方統雲中大同橫野  
定襄鴈門樓煩岢嵐治太原范陽節度使制奚契丹  
統威武清夷靜塞恒陽北平高陽唐興橫海治幽州  
平盧節度使鎮室韋靺鞨統平盧盧龍渝關治柳城



安東都護府。備西戎。統臨洮。河源。白水。安人。振威。威  
戎。綏和。寧塞。積石。鎮西。治西平。劔南。節度使。扼吐蕃。  
撫蠻。僚。統臨翼。通化。維州。蓬山。江源。昆明。寧遠。治蜀。  
郡嶺南五府。置經畧使。若桂。管容。管邕。管各置經畧。  
使。治廣州。其長樂。經畧。福州。領之。東萊。經畧。萊州。領  
之。東牟。守捉。登州。領之。而綱維藩翰之形成。蓋大曰  
軍。次曰城。曰鎮。小曰守捉。軍城鎮守捉。皆有使。而皆  
隸於節鎮。武德初。突厥爲邊患。并州長史竇靜表請  
於太原置屯田省餽運。僕射寂等領以爲煩擾。抑之。  
靜論執不已。徵入朝。與公卿相詰難。寂等不能屈。乃



從靜議歲收穀數千斛。秦王復請增置屯田於并州之境。貞觀初，朔州刺史張儉廣營田，歲致穀十萬斛。督代州亦如之。歲大熟，表請和糧。廣儲蓄而邊饒。永隆初，吐蕃寇河源，將軍里齒常之擊却之。念河源爲西戎要衝，欲加戍而轉輸險遠，乃廣烽戍七十餘所，間屯田五千餘頃。歲收穀五百萬石而邊安。中宗時，默啜西擊突駝，施戰未決。節度使張仁愿請乘虛取漠南地，於河北築城，絕虜南寇路。表留歲備兵以自助，報可。下於是仁愿大興卒入漠南，築城卒亡者二百人，斬以徇。士股慄用命。六旬而三城就，以拂雲爲



中城直朔方。西城直靈武。東城直榆林。名三受降城。  
三城相距各數百里。其北乃大磧。平曠易瞭望。又於  
牛頭朝那山北。置烽堠千八百所。自是突厥不敢踰  
山而牧馬。朔方愈益無寇。歲省費億計。而天寶中。攻  
吐蕃哥舒翰。收九曲故地。請列置州縣。於是置神策  
軍於臨洮西。澆河郡於積石。宛秀軍於河曲。與隴右  
河西安西北庭並列。爲巨鎮。歲發山東丁壯戍之。賜  
繒帛而遣。開屯田。設監牧。軍城戍邏。萬里相望。於開  
遠門。揭亭署表曰。西極道。九十九百里。示戍人無萬  
里行也。爲唐邊極盛。其後天子志邊功。府衛法壞。士



馬精悍者畢在邊而安祿山以范陽節度使得幸。官左僕射。爵東平郡王。貴寵震天下。聽於上。谷鑄錢。聽以蕃將代漢將。竟驕極而反。安使破滅。舉河北諸州。畀賊三降將。魏博德。滄瀛。畀田承嗣。爲天雄軍。恒定。易。趙。深。冀。畀李寶臣。名成德軍。李懷仙。函。朝。義。首降。卽授以幽州。爲盧龍軍。此所謂河北三鎮者也。於是諸鎮各專土地。甲兵以自予。雖名列藩。實不異戎狄。而國無北邊矣。方祿山反時。哥舒翰悉河隴兵東守關。而敕神策。澆河。宛。秀諸將。各以所鎮兵討難。所謂行營兵也。而邊圉益虛。吐蕃得以其隙入。爲暴。至德。



初。取隴州及威武諸鎮。入石堡。明年。取廓伯岷等州。及河源。帝務姑息。以紓患。詔宰相與洎盟爲好。而虜陷臨洮。秦成渭等州。明年。遣使聘。而吐蕃留不遣。又明年。入大震關。取蘭河鄯洮等州。於是隴右地盡亡。而國西又無邊。虜遂入破涇邠。入奉天。代宗爲幸陝。虜入京師。連雲堡者。涇州要地也。三垂峭絕。北據高峴。虜所進退。逢堠易通。虜得之。而二州不宿麥。初。吐蕃盜塞。畏春夏疫。常以秋。及是。得唐俘。給貲產厚之。質其孥。使之。而盛夏入邠寧。已陷北廷都護府。絕安西道。破鹽州。則塞防無障。追而靈武單露。鄜坊益侵。



迫矣。憲宗時方鎮徧疆而京師及邊軍弱甚。相李絳欲爲上規足兵食之畫。乃奏言振武天德左右良田萬頃。請擇能吏開營田以省費足食。於是命度支使盧坦理其事。四年間開田四千八百頃。收穀四千餘萬斛。歲省度支錢二十餘萬緡。已爲帝言始京西北置神策軍以備禦吐蕃。誠欲令與節度使掎角爲相應也。今無事則鮮衣美食坐耗國儲。寇至則取中尉處分左右前却莫肯用命。此大弊也。請據所在地分隸各鎮。一號令以振威。帝曰善。宜亟行。絳又言邊兵徒有其數而無實。將帥獨緣私役使利其財以結權。



倖未有訓練。往受降。其籍四百。及天德交軍。纔五十人。閱器械。直一弓。帝大驚曰。邊實虛。壹至是耶。命按閱。始蜀自常皐招來。南詔復。鶴州傾資與爲歡。示以戰陳文法。杜元穎代將。不閑軍而貪。南詔復叛。成都南失姚協。西亡維松。繇清溪下沫水而左。盡爲蠻布。文宗時。節度使李德裕至。大患之。於是作籌邊樓。按劍南道山川險要。與蠻相入者。圖之左。按劍西道山川。與蕃相入者。圖之右。諸部落衆寡。饋餉遠邇。道里曲折。咸具。召諸老將。習邊者。與指畫商計。凡虜情。諸向背。微隱畢知之。於是料舊僚與州兵之任戰者。豐



其餉而廢其獯耄。召甲人於安定。弓人於河中。弩人於浙西。日夜蒐簡。而蜀之器械皆犀利。率戶二百。取一人。使習戰。復其繇。謂之雄邊子弟。築仗義城。以制大度清溪關之阻。作禦侮城。以控榮任。作柔遠城。以扼西山。復邛崃關。徙雋州治臺登。以奪蠻險。於是蜀軍大實。而相牛僧孺與交怨。數從中沮其事。命脩清溪關。斷南詔入寇之路。召諸道兵歸。勿畱屯。以難之。蜀人沟沟。德裕上疏言。蜀通蠻細路至多。不可塞。惟重兵防守。庶可無虞。蜀兵本脆弱。又新爲蠻所破困。所謂沒世不復者也。今復令北兵盡撤。與先失事時。



何異。今朝臣言罷兵者。蓋繇禍不在已。委難於臣。臣  
望人責一狀入堂。畱案他日敗事。不可令臣獨當其  
咎。帝得疏。以謂然。兵得無罷。而德裕乃練士葺堡障。  
而蜀安。唐自中葉來。京師無藩垣。二虜時助師。時犯  
順。往來入郊甸。如織。無畱行。天子幸蜀。幸陝。幸梁州。  
奉天。以避兵。國如郵置。而猶嗣守社稷者百十年。則  
都關中。地阻固。而江淮楚蜀爲內蔽。自給足也。後穆  
敬之世。河北再復。宣宗之世。河湟盡歸。而無補於唐。  
之既衰。則知邊防設險。國之藩蔽。資以爲衛。非以爲  
命。於廟筭之盛衰。失得。詎盡是哉。張批。帶入不漏。

宋成一片精論



興太祖念汴爲四戰地。無阻固不可都。欲西都長安。  
據山河之勝。去冗兵。循周漢以安天下。議中格。天下  
畧定。惟北漢燕未下。置內藏曰封樁庫。荆湖川廣諸  
所籍金帛。若歲會國用之餘皆入焉。謂侍臣曰。石晉  
割幽燕以賂契丹。使山前後諸州淪爲異域。朕甚念  
之。俟封樁滿三五百萬。卽遣使往贖。使還爲中國民。  
不然。當散諸儲積。爲將士功賞。冀必得之。終不令吾  
赤子陷左衽也。末年於延慶環厚靈武。各置帥。以備  
西夏。關南瀛常易棣。各置帥。以拒北敵。普陽昭義西  
山各置帥。以禦太原。帥官不過巡簡使。無慮易制。而



體勢崇重。人莫得危短。每入朝。必命坐。賜宴。洽款語。甚寵。西北邊軍市。祖悉舉。畀之。令得回易。免所過征稅。他賜賚不在是。又事不從中覆聽。便宜制軍。當是時。所置帥皆天下勇悍忠實之材。委任專而防守固。何繼筠屯棣州二十餘年。董遵誨屯通遠四十年。它如李漢超。郭進。姚內斌之倫。率不下十餘年。吏士尊畏。得盡其死力。養士少而蓄力多。操術簡而形勢壯。虜用挫屈。叩關吏通書幣之使。於是勅沿邊諸州。禁民毋得出塞侵盜。敦信保境。而中外懷安。邊自劉守

充僭竊。與中國構兵。契丹以其間據營。今昌黎平今永等縣。



平二州而地險始失。後石晉割幽今順天薊今薊州瀛今瀛河

間莫今任丘縣涿今涿州檀今密雲順今順義縣新今保定縣薊今隆慶州儒

寧縣武今朔州雲今大同應今應州寰今馬邑縣朔今朔州蔚今蔚州

十六州以畀虜。藩籬撤焉。周世宗時實始復瀛莫二

州。詔王彥超韓通築李晏口城。立縣十有二。又築東

廠增鼓城葺祁州數年。又自浮陽至朝寧補壞防闕

游諸口三十六以通瀛莫宋興葺鎮州西山堡障。自

王全斌築保州威武靜戎平塞諸城寨。自劉遇太宗

平晉。毀其城。遷榆次。又遷三交。奪故軍之險而守之。

爲胡虜咽喉。自潘美各因形制爲邊。而邊卒遣戍皆



本司整比其伍致闕下。召見便殿。給裝錢代還。入見燕犒。亦如之。歲時賞給外。視它卒又加給銀鞋。緣邊艱爨汲者。又給薪水錢。或時服錢。凡出征。計日給行糧。而塞下內屬羌團結。曰蕃兵。保塞者曰熟戶。餘曰生戶。命予官給俸有差。

張批前段畧說邊地而詳說馭邊將之法此段詳說邊地

而併詳取邊卒之法端拱中。北虜侵盜邊。諫大夫張洎上書言。

中國禦戎必依險阻。今飛狐以東皆契丹所有。地險盡失。而河朔列壁城守。具苦於無兵。則兵分之過也。請於中山太原河間建三大鎮。各統十萬之衆。鼎峙而守。視緩急爲策應。仍命親王出臨魏博。控其衝。此



因形制勝之道。而河北三鎮始於此。滄州將何承矩  
上疏言。臣幼從先臣征關南。熟知北邊川原險塞之  
處。今誠於易河蒲口導水東。使注滄海。順安高安間  
東西三百餘里。南北五七十里。並築堤瀦水。外可遏  
敵騎之奔軼。而內關南諸泊悉壅闕。可播爲稻田。卽  
緣邊州軍臨塘水者。可獨留軍爲城守。無煩廣戍。而  
益收地利以實邊。惟順安抵西山百里許。無水田。乞  
簡精銳戍之。去其冗濫。此禦邊之要也。天子嘉納。以  
承矩爲制置河北邊屯使。而滄海以饒。至道元年。契  
丹以精騎夜薄城。承矩整兵不出。比明馳擊。大破之。



斬其酋。所謂鐵林相公者。契丹遁去。已。契丹旣輸平。  
知雄州李允則治城壘益設。契丹以爲言。詔詰之。允  
則曰。通好初。不卽繕完。恐異時頽圯。不復得脩。將邊  
備弛矣。弛邊備。患不可測也。帝曰。善。於是允則標里  
開。置廂市邸舍。水磴爲深廣。城增累甃爲高。環以溝  
塹。蒔桑麻。植榆柳爲阻固。脩屯田。益樹穀。架石橋。構  
亭列隄。通道于安肅。廣信諸軍。邊益闢而壯。初州北  
多設陷馬坑。城外起樓爲斥堠。望十里。罷兵後。人莫  
敢登。允則曰。南北通好矣。安用是。命撤樓夷坑。令諸  
軍圍其中。因浚井。畫溝洫。列畦隴。築短垣縱橫。而地



益阻固。因治坊巷。徙浮圖北原上。民旦夕得登望。望三十里。下令安撫司治境有隙地。悉樹榆。久之榆滿塞下。顧謂僚佐曰。此步兵之地。不利騎。虜不得決驟。不獨異時爲材木資也。諸措注經遠如此。允則嘗宴庫火。允則張樂飲不輒。副使請救火。不答。湏臾火熄。命瘞所焚物。而潛以茗龍致甲仗於瀛。不浹旬而克。人無知者。樞密院請劾不救火狀。詔即訊。允則對曰。兵械所藏。爲火敵甚嚴。而焚又方宴。必姦人所爲。舍宴而救。事或不測。故不救也。帝曰。善。城北舊有甕城。允則欲合之。與大城爲一。乃先建東嶽祠。出黃金百兩爲供器。以鼓吹導至祠。居人謹爭獻金銀爲祠供。居無何。宣言盜發北州。遂移文北界名捕盜。而興版築。宣言以護祠。於是就闢城浚壕。起月隄。而甕城人得悉納城中。一日契丹民毆邊民傷而遁。允則不詰也。與傷者錢二千罷之。衆以爲怯。逾月幽州以其事來詰。答以無有。蓋其謀也。欲以毆傷人爲驗。比得報。



以爲妄。乃殺議雲翼卒亡入契丹。名捕之。報莫能仁。得免。則日在某所。契丹駭不敢隱。歸之。斬以徇。宗時。夏元昊反。詔西帥具攻守和備四議上。經畧使范仲淹上議言。延慶間。有虜界百餘里。侵入漢地。宜可攻。軍行宜先布令。生降者賞。殺降者斬。捕虜得精壯者賞。害老穉婦女者斬。拒敵者殺。逃北者釋勿追。安居者勿擾。得地則興築城寨。畱土兵爲守。以高佑招商中粟。而營田以克之。而計久守莫利於土兵。蓋土兵諳於山川險易。狎於戎虜。徃於戰鬪。比之東兵。事半功倍。何則。東兵上邈。非特苦星霜之感。兼且傷骨肉之恩。征夫不保。嫠婦焚恤。久則怨起。宜於要害。



城寨廣招募以實邊。其東兵願改隸邊者。津遣其家室。於緣邊營屯。更免別戍。其邊地所招弓箭手。亦令聚居。阨塞之處。則父母妻子樂於團聚。戰則相收守。則相安。寇小至則禦。大至則以次邊軍。可旬呼而集也。敵重兵至。必循大川而行。我駐堅城。明斥候。持重以待之。野無所掠。不數日而困憊可必。散兵四掠。輕寡執弱。我伏精銳於谷中。時而取之。彼散無所鹵聚。不得戰。深入乎。我出奇以躡其後。情歸乎。我出兵以徼其弊。此守邊之要也。夫計陝西四路之兵。不下三十萬。則兵非不多也。以備多而力分。在所城守。兵不



過二萬餘人。坐食芻糧。壁藏而不敢戰。賊界則不然。種落散居。衣食自給。卒有點集。動十餘萬。以我分散之。形當虜專一之執。宜衆寡之滋不敵也。且彼客當勞而顧處其逸。我主當逸而顧處其勞。誠反而用之。於鄜延環慶涇原之間。各選兵二萬。騎兵三千爲一屯。而各掄將二五人以制之。頒新定陣法。練齊以待敵。待其精勇。乘敵間輒入。如鄜延軍先出。敵大師來應。則退守阻不戰。以乖之。伺困弊。則環慶涇原之師。又迭出以乘釁。彼奔命不暇。部落携怨。三五年間。而橫山之界可盡取也。當是時。仲淹大興營田。聽民互



市以克邊。又脩永平等砦。招流亡以固邊。而鄜  
延經畧使龐籍以橋子谷爲西寇所走集。築招安砦  
填焉。又築龍安等十二城以抗邊。其大者韓魏公琦  
畫欲隳橫山以規平夏。攫興靈於穴中。語具西夏志。  
慶州西北馬鋪砦。當橋川口。爲虜腹。仲淹欲城之。度  
賊在必爭。密遣其子純佑與蕃將趙明潛走據其地。  
日晨起。忽引大兵赴之。吏士皆不知所如往。至柔遠。  
始傳令告其處。旣至。而畚鍤跋築之用畢具。迨賊覺。  
以騎三萬來爭。仲淹戒諸將脫賊戰而走。追必毋過  
河。第乘城已而賊果走。追者不渡河。乘城而河外果



有伏虜失計去而城成。所謂大順城也。大順城而白  
豹金湯。皆不敢犯。環慶矣。判鄜州。種世衡言延安東  
北二百里有廢壘。故寬州地也。險可城。詔世衡董其  
事。世衡自將逼戎落而軍。且戰且城。暴露者數月。乃  
得城。所謂青澗城也。世衡計以爲處險無水泉。不可  
守。乃鑿地百有五十尺。得石。衆恒懼不泉。又屑石而  
出之。過數重。泉乃沛發。又建營田二千頃。歲收糴其  
贏。通商畜財。或先貸之本。使速流轉。歲時息十倍。於  
是芻糧錢幣軍需城守之具不外給。而青澗完。安。青  
澗完而左可致河東六聚。右可固延安。北可規銀夏。



矣。而諸內屬羗。仲淹以詔書犒撫。結以恩信。諸羗皆  
子縱出入自便。羗酋至府。引入屏人。撤衛語無間。羗  
人親愛。始爲中國使。而屯兵徙就食內地。飛輓大省  
矣。時元昊圍河州。繇間道襲府州。縱遊騎鈔麟州。自  
是二州恐敵不時至。皆閉壁自固。糧乏絕而勢孤。朝  
議欲棄之。會張亢以并代都鈐轄守麟州。單騎叩城  
下。出所授勅示城上曰。我城主也。門啟而入。於是縱  
民出薪芻谷汲。曰。吾有以待敵。無恐。民乃稍甦。亢以  
州東焦山有石炭可穴也。爲築東勝堡。城旁有畦可  
蔬也。爲築金城堡。州北沙阮有水泉。爲築安定堡。各



置兵守之。出獲者置衛。時禁兵廩餼優厚。然實驕懦。不可使乃役。兵有健鬪獻級者。立脫錦袍。賜之禁兵。始慚奮。會諜報羌炙羊髀。占吉凶。驚曰。明當有急兵。盍避諸。皆笑曰。漢兒皆藏頭膝間。何敢然。亢諜知其無備。卽夜部禁兵出。襲擊琉璃堡。破之。夏人棄堡去。乃築宣威砦于步駝。扼寇所從入。築清塞百勝中候。建寧鎮川五堡。而麟府之路始通。已上口請增廣上砦。得益田牧以壯邊。宣撫使仲淹奏請卽任亢就其事。奏可。而經畧使明鎬以爲不可就。數牒止之。亢得牒。輒廢閣曰。受詔置堡砦。豈顧以經畧府牒得止耶。



坐違節度死。所甘心。且是邊所恃以爲固也。程復愈急事竣。乃發封自劾。詔勿問。自是蕃漢歸者數千戶。歲減戍萬人。而河外爲并汾屏蔽矣。穆寧氏西南去秦川三百里。中有城曰水洛。川土平沃。爲氏所轄。聚環川而居者數萬帳。漢逋民皆歸之。曹瑋在秦州。嘗經畧其地而不得。閤門祇候劉滬時守邊。以爲此戎夏所走集。不可失也。進城章川。收田穀以益屯。涇原帥尹洙以爲不便。令罷役。且召之。不聽。而趣功。洙怒械下獄。氏大駭爲變。朝遣使卽訊。氏請還滬。而以牛羊及丁壯助成城。詔復滬權水洛城。然猶以違節制



奪一官卒。水洛人遮道泣請留葬祠祀之。自是西邊

益嚴。

張批此段中分九節自仲淹具疏下爲一節皆議論自仲淹大興營田以下爲八節皆事實此

先虛而後實也八節中仲淹之興田修砦麗籍之築砦築城韓琦之取橫山取興靈此三節皆規畫之大方仲淹之城大順種世衡之城青澗仲淹之結諸羌張亢之守麟州劉滬之權水洛此五節皆扼塞之急務此先緩而後急也鋪叙之有條不紊如此

其後二虜既交好仁宗崩夏

使來弔祭館伴高宜傲侮其使者使者訴於朝知諫

院司馬亢呂誨請加宜罪塞其意不從而西戎犯邊

契丹民有捕魚界河伐柳白溝南者朝議以知雄州

李中祐爲不材敕選將代之亢又言國家當戎狄順

附時好與之較計末節及其桀驁又從而姑息之近



西戎之禍。生於高宣。而北狄之隙。中祐得譴。則來者  
必將以宜爲法。以中祐爲戒。將人以生事爲能。而邊  
自此多事矣。宜勅邊吏諸疆場細故。獨當以文檄徐  
徃反。毋輒以矢刃相加遺。安戎狄心。奏可。神宗時。滕  
元發知太原。以河東豪意。規邊有警爲利也。下令曰。  
謹斥堠。無開邊隙。有寇而失備。與無寇而生事者。皆  
斬。自軍司馬而下。皆勅以軍法。河東十二將。故事以  
其四備北。八備西。更休番上。會西人獵境上。邊郡請  
八將皆防西。元發曰。賊若并兵犯我。雖八將不敵。若  
其不來。四將足矣。將吏扣閣爭不聽。卒以無事。省芻



粟十五萬。西夏請故地。詔割四寨。而葭蘆隸河東。元  
發曰。取城易。棄城難。昔棄囉兀。而西人得襲我。不備。  
所亡失不貲。命部將以兵護遷。令嚴伍肅。寇不敢近。  
民以完。已。西人得地。則請以綏德城爲比。畫城外二  
十里爲界。元發曰。吳堡去葭蘆百二十里。今許之。矢  
百里矣。其家進退。以尺寸爲強弱。今一舉而失百里。  
不可力爭之。不得。而西事遂興。自是宋衰不振。靖康  
中。金虜入。而棄河北。再入。而棄河東。已。遂棄汴。而天  
子都臨安。視建康益褊。復防淮。防江。防荆。襄。爲偏安  
計。如異時。東晉六代爲矣。



明興汎掃寰宇際天極地復帝王自一之中國而

成祖郎故奠藩地爲今都揭古冀北垂于天日之上

三代漢唐宋未有也展山負海固擬於殽函本太行

與鴈門諸山塞垣連絡險繇天造居庸東折玉帶神

嶺諸山若抱若拱八陵在焉故居庸爲京師北

門

宣德中從御史王聰言徙黑峪巡簡司於紅門口正當關北天壽山後爲巖隘

隸薊州鎮

薊舊鎮大寧今兀良哈朵顏大寧福餘三衛其地也

爲藩衛甚設循居庸左轉爲漁陽盧龍當山海之際

古所謂渝關也控遏遼東爲遼陽鎮又東薄于海石

轉循大行西南包平原沃野帶絡數十城爲古燕趙



之郊。而宣府大同。宿重兵鎮焉。宣府大同。漢上谷雲中也。而大同平川曠野。黃沙白草。故虜患特鍾。居庸西。舊松林數百里。中獨有間道。騎行可一人。卽元扎八兒導胡兵南牧處也。紫荆倒馬二關扼焉。而重兵鎮保定。扈京師。又右轉爲鴈門寧武偏頭三關。隸山西。起代郡。外接大同。內經太原北境。西盡雍河。而鴈門稱絕險。自偏頭踰河稍南爲陝右。陝有三邊四鎮。榆林舊治綏德。守在東勝。東勝者。唐所謂三受降城也。在河北。後內遷失險。而延綏因徙榆林。榆林險。將勇士力。人呼爲橐駝城。塹自黃甫川。西至定邊營。



亘千二百餘里。連墩勾堡。橫截套口。稱雄鎮。西絡寧夏固原二鎮。寧夏西北倚賀蘭。而南東阻河。守在花馬池。包固原其中。自虜旣得套。固原改開城州。地益重。與寧夏爲唇齒。爲虜衝。又自賀蘭山直西至鎮番。衛又西極甘肅。皆古朔方。甘肅漢所謂河西四郡。武帝置之。斷匈奴右臂者也。國初置甘州五衛於張掖。肅州衛於酒泉。涼州衛於武威。西寧衛於湟中。又置山丹永昌鎮。番莊浪四衛。列鎮河外。外薄于沙磧。而肅州西七十里。爲嘉峪關。後虜入莊浪涼州。而靖虜永昌爲內邊。左番右達。肅州尤孤。此皆自京師



右轉而循西以爲徽者也。自蘭州南抵岷洮階文界  
西番。與四川接壤。同其患苦。又西南出爲雲南。古稱  
滇南。南轉爲貴州。又南東轉爲嶺表。中包湘楚。跨百  
粵三江。而諸夷獠蠻獫狁獠苗狼黎。輦之屬。各窟宅  
其中。大者據連城。細者保恃深箐。然稍奉要束。聽  
羈縻。而統于藩省撫巡。示威宣德。而鄖陽蒼梧南贛  
爲重鎮。自京師東薄大海。泛登萊。包淮揚。南際于  
閩廣。潯洋萬里。通四瀆。八表爲一瀦。慮獨在備倭。此  
國家幅員邊圉。設險守國之大畧也。

張批漢唐宋與  
國朝邊防各有統

論因勢得情而機軸  
變化無端倪可執初



高皇帝既定天下。卽元都設北平都司。卽古會州大寧地。設北平行都司。立興營諸屯衛。建寧藩其中。與遼東宣府東西相羅絡爲外邊。已遣魏國公達率列侯北巡邊。自古北口至山海關。增關脩隘爲內邊。故薊州西接居庸。東負海。盡渙陽盧龍。稱雄鎮。設衛開平。置八驛。東接大寧。西聯獨石。而開平與和萬全爲要地。遼陽旣下。不郡縣。獨置衛所填之。權衛事良佐言。本衛地遼遠。僻處海隅。肘腋間皆敵境。乞畱朝廷所遣斷事吳立撫軍民。且益之兵。於是置都衛以馬雲葉旺爲都指揮使。總轄遼東軍填焉。而遼陽開原



有安樂自在二州處保塞降夷。於是大學士宋訥上  
策言。今海內旣安。蠻夷奉貢。惟沙漠未遵聲教。棄弗  
討。則歲久滋患。討之。則士馬疲耗。餽餉艱費。非所以  
靖天下也。陛下誠計安萬世。則莫若固邊而固邊在  
足食。足食在屯田。漢本始中。匈奴帥十餘萬騎入寇。  
後將軍克國將四萬騎。分屯緣邊九郡禦之。單于爲  
引遁。以四萬騎而分屯九郡。碁布星列。而克國於其  
中統制之。當時分畫。槩可想見。今諸將中。豈無智謀  
勇畧如克國其人者哉。誠選其良。出屯邊。東西約五  
百里。隨遠近。難易爲屯。屯各有分地。各率所領衛其



耕作其中而時訓練之。彼此相望。首尾相應。敵至則戰。敵去則耕。此久長之策也。

上大善之。命諸將屯練以備邊。於是勅後軍都督言。曩胡虜近塞。兵衛未設。故設兵守關。今已置大寧都司及廣寧諸衛。足爲守禦。又虜遠遁。而山海關猶以戍守廢屯。田養馬。非計也。自今一片石等關。止存戍卒。足瞭望。譏逋逃而止。餘悉令屯田。當是時。

上以天下甫定。垂意邊。遼東。海南。臨洮。大同。西河。西涼。寧夏。至古北口。西番諸指揮使。各手勅勞諭。令固疆圉。諭遼東帥曰。滄海之東。遼爲首疆。中夏旣寧。



斯必戍守。乃有蓋州諸將共意來庭。固守其地。以待  
朕命。北夷罔知天命。屢害生民。舊冬十有二月。寇我  
金州。爾指揮雲等忠義于天。苦同士卒。以寡敵衆。遼  
蓋諸將。深謀扼險。渠魁以獲。朕甚嘉之。勞海南衛指  
揮。勅曰。南溟浩瀚。中有甸藩。方數千里。地多炎熱。  
時忽癘雲卿等率壯士連歲戍此。朕甚念之。勞西涼  
指揮。勅曰。朕惟涼州之域。北控胡沙。西南制戎羌。  
爲鳥鼠同穴之地。天時早寒。今暑退。金風生。爾禦邊  
勞甚。朕甚閔之。茲特遣勞爾。爾宜外張威武。內懷多  
仁。以服戎羌。勞寧夏帥曰。寧夏之邑。背山面河。胡人



介之以爲旅拒。趙元昊用之矣。大將軍掃清河漠。今命爾守此關內之北門。胡人之前戶。卿其晨昏深謀無怠。下至昌國守禦千戶。亦御劄存問而勅大帥武定侯英言。遼東邊軍與苦甚。毋營繕盡其力。今役作軍。皆勇力善戰之士。柰何乎勞之近高麗表奏言多不實。聞彼自國中至于鴨綠江。皆儲軍糧。驛各數萬石。且招東寧女直人入境。此其意欲有爲也。朕觀高麗自古恒與中國構兵。今遼東糧乏。士困。儻不卽發沙嶺倉賑。必且啟招誘逋逃之心。非完計也。其止他營造。立營屋以居士。十年後繕作未晚。古人有



言人勞乃易亂之源。深可念也。又勅遼東守將潘敬葉旺曰。高麗龍州民自言。邊願帥衆降。未審將軍嘗識其計否。人情孰不安土重遷。豈有舍桑梓而歸異國者。此其詐也。況中國始寧。當養民息兵。慎毋妄生事。開邊隙。令外夷藉口。傳曰。毋納逋逃。符至。其開諭出境。會士卒饋遼左。有溺舟。

上諭羣臣言。昔遼左地。於元時至富饒。朕往立行省。統焉。以其地早寒。土曠。不欲以建置煩民。罷之。立衛戍守。歲輸餼。非獲已。中每以爲憂。今聞舟沉溺。衆爲終夕不寐。其議屯田圖長利焉。諸紆意如此。當是時。制



邊之策。惟屯田練兵。無他營。故力專而功成。而山海夷。遠情阻險。時竊發爲暴。

上遣將往訊。輒勅之曰。必無深入窮巢穴。無逐利輕動。但令自屏。遠喙息。無爲州縣擾可也。而

祖訓申戒。言四方諸夷。皆限山阻海。僻處一隅。得其地。不足以供給。得其民。不足使也。使不自量而擾邊。則不祥。彼作。宜捕逐。彼既不爲中國患。而我輕用兵。肆伐。亦不祥甚哉。吾恐後世子孫。倚中國富強。貪一時利便。興兵傷民。切記其不可。惟胡戎密邇西北邊。世爲患。必選將練兵。時謹備焉。嗚呼。至哉。訓乎。卓其



爲萬世式矣。

張批含畜慨嘆下文窮兵練其處更不說破有味外之味始寧王王

薊時大寧朶

頌福寧三衛夷故續悍力戰而戌卒皆

中州遷徙之衆苦北地寒日夜謀思歸會

朝廷削

王三護衛而靖難師起遂太師兼程趨大寧擁王與

偕南招諸胡及思歸戌卒以從以入寧地許三衛戌

使助戰戰疾力天下大定乃遂從北平行都司於保

定爲大寧都司而散興營諸衛於京甸於是盡故大

寧白雲紅螺地畀三衛夷俾世爲外藩已封元裔克

帖木兒爲忠順王分其衆居苦谿城而關外設七衛

曰哈密曰安定曰川端曰赤斤蒙古曰曲先曰罕東



曰罕東左衛皆本西北夷爲號名。設衛填焉。而時遣親臣大學士榮行巡邊。已守臣言元孽老的罕逃居赤斤蒙古。數患邊。

上命榮馳至陝會豐城侯彬計之。榮還言。赤斤出嘉峪關且千里。地苦險乏水草而餉艱。又天沍寒。士疲馬瘠。不可輒用兵。且小醜當自歸。不足患也。

上從之。而老的罕果自歸。時

天子歲伐胡。往往道開平興和萬全間。嘗太息曰。吾滅此殘虜。吾惟守開平興和大寧遼東甘肅寧夏。吾高枕可無事西北邊矣。已大寧旣界三衛夷遼東西與



宣府聲援不易通。興和亦隨廢。而開平失固。然是時。  
上英武軼百代。數伐胡。犁其庭。虜益遠遁。又死者降者。  
相繼。虜僵尸脅息。百蠻諸戎。重譯奉琛。固無爲議邊。  
矣。先是虜寇遼東。都指揮永禦之。戰不力。會入朝。  
又匿不以聞。

上怒立誅之。榜諭天下都司衛所。言諸有盜賊及虜。  
聲息不時聞者。鎮守官而下。罪視此。蓋嚴邊臣蔽欺。  
之誅如此。江陰侯吳高言山西行都司所屬衛以屯。  
種妨團操。請令團操便。

上諭部侍郎曰。團操急固當然。食不足將誰與守。宜視



地險夷制多寡之數。陽和留什之四。天城朔方留十之三。蔚州留十之二。餘悉令屯種。且耕且守。爲著令。重營屯如此。又勅寧夏邊將言。寧夏屯所多。虜猝至。各屯孤必且先受掠苦。可四五屯內。擇一屯有水草者。浚壕廣丈有五尺。深如廣之半。築土城高二丈。城開八門。諸旁近屯。駐輜重糧草其中。無警則居本屯。事耕牧。毋惰。有警則驅馬牛羊入城固守以待援。卽寇至無所掠而邊完。此特屯守事。朕過計如此。諸戰守畫將軍其熟思。蓋周防至於此。車里宣慰司土夷與威遠土知州隙。攻執之。嗣西平侯晟請討。



上謂本兵曰。兵易動難安。一舉而易。傷人必多。且小夷固可以文告下也。乃勅晟責諭夷。夷悔罪而解。

宣宗皇帝自爲太孫時。從北伐。習兵。元年。平漢。二年。巡邊。破兀良哈之衆。虜益驚。而

上勅諸邊將言。古人制戎狄。惟在備邊。若城堡堅固。士練糧足。瞭望嚴。豈患虜哉。顧獨苦玩慢。自曠邊耳。當是時。邊氓有陷虜中得亡歸者。

上念其脫萬死自歸。可憫。優官祿。復家爲著令。正統初。天子幼冲。

皇太后倚輔臣經太政。朝廷清明。都御史羅亨信巡



邊遇虜安與

名地

都督蔣貴用都指揮安敬議留不進

享信直馳抵其營責之曰。汝受國恩厚。今臨陣退縮。安用汝握重兵爲乎。且汝獨畏死耳。死三尺法孰與死敵。貴等色動。而以芻糧不繼爲解。享信卽露章劾貴。老師玩寇。敬怯懦不忠。乞誅以振法。於是命兵尚書王驥出行邊。驥馳至甘肅。閱邊滿濶甚。莊浪永昌山丹諸路。守兵少。烽堠不備。軍無律而命亂。慨然歎曰。邊防如此。而欲虜無侵軼。難矣。翼日大集衆轅門。問曰。先年大軍遇虜于魚海。先退者爲誰。衆咸叩首曰。都指揮安敬。命引出。斬以徇。曰。自今遇敵畏縮前



却者視此。一軍股慄。因謹斥堠。整部伍。申訓練。利器械。軍容肅然。會虜酋寇莊浪。遣都指揮衛榮擊敗之。選甘州卒五萬留屯而定。爲更代番上法。省輸運。已乃還。明年虜復入。驥復出行邊。遣都督貴將選卒二千行戒之。曰。兵精氣銳。遇賊不能勦。無爲復相見矣。貴父子感奮往。則遣參將安帥兵繇東涼逾白鴉孤口。抵鐵門關爲之援。遇虜於石城兒泉。戰疾力破之。而驥與太監魯安都督任禮親帥馬步出鎮夷。與貴期狼心山。襲虜巢夾擊大破之。酋以走死。時侍郎柴車總陝西。嚴都指揮能以其人冒功。車奏罷所陞官。



能訪之

上上許復而車持不可。曰。詐冒如能者非一。臣方有按覈以肅法。今宥能如餘人何。詔鑄能秩而賜車金綺。從二品祿。時叅將石亨請料大同民三丁取一以戍邊。勅軍餘盡撥屯種。量畝起科。都御史亨信言虜方驕悍。邊地鹵薄。民疲困。復驅使實伍。勒令起科。是絕其衣食之路。而迫使逃亡也。揆今事勢。宜布恩信以結人心。人心得則邊圉固矣。事得寢。其後王振擅而雲南麓川夷思任發叛。頗擾邊。緬甸蠻自詭必得其要領。請致師。閼振欲示威遠夷。於是命定西伯蔣



貴總兵。太監吉祥監軍。兵尚書王驥督大師討之。而  
閩浙盜起。翰林侍讀劉球言。帝王馭夷狄。不窮兵於  
小夷。以傷生靈。推防患於大寇。以安中國。麓川連歲  
用兵。士卒死者十七八。軍資爵賞。不可勝計。借令緬  
甸言果信。具得其首寇。不過獻俘。大廷磔諸市。梟  
諸道而已。而緬甸蠻。必且挾以爲功。將與木邦求麓  
川地。以爲分。不與則致怨。與之則兩酋坐大。是喊一  
麓川。生二麓川也。何益。脫有蹉跌。又兵爭方始。  
皇上慎重死囚。多所矜貸。於天地好生之心。合而欲生  
得一失地。遠竄之首。驅十餘萬無罪之人。就死地。以



從之豈非過哉。今北虜脫歡也。先父子併吞諸部。歲增貢使。以覘俯仰。包藏禍心。未易可察。而思任發。依阻山谷。悔過乞降。議者乃釋豺狼而攻犬豕。舍門庭之近。圖荒徼之遠。非計之得也。臣愚以爲宜敕尚書驥。令思機發。削四面之地。分新附之衆。而宥其罪。罷川廣貴州之師。以息民。其西北諸邊。時遣給事中御史行巡。謹烽燧。脩墩堡。選將練卒。廣屯田。豐糧餉。爲意外之防。書上。逢振怒死。制獄中。麓川本僻遠夷。不當中國一郡。發兵十五萬。轉餉半天下。當盛暑行師。而黔國公晟戰不利。道病卒。都督方政戰死。蓋大



師三動。連兵十年。士傷死無筭。僅以破克。而中國益耗病。振顧益驕。都御史亨信言。虜也先驕。屢生事。爲釁端。此其發不遠。宜預於直北要害。增城堡爲備。不聽。已也先寇大同。振主親征。因遂有土木之變。嗚呼。闔之無良。乃禍抵此哉。當是時。天下幾挫。賴廟謨而定。諸具狄志中。方

上皇北狩時。虜奉駕至紫荆。至大同。已長驅至京。師西北關。於是召宣府遼東兵入衛。虜破固安。總兵郭登又破之。大同虜北出塞。都御史羅通襲破之。坳羊山。時邊城覆陷。而大臣有奏請留邊將守。都城



者諸邊孤危虜警日夕至民大駭相訐棄城走都御  
史羅亨信督宣府手劒坐城門令曰敢出城者手刃  
之而督將士爲死守衆始定會兵科給事中葉盛言  
今日之事邊關爲急往者獨石馬營不棄六師何以  
陷土木紫荆白羊不破虜騎何以薄都城故邊關  
不固卽京師完亦僅僅九門完耳如陵寢何如  
郊廟社稷壇壝何如田野生民荼毒何宜急遣居庸  
宣府兵還鎮奏可而邊人大安當是時侍講劉定之  
疏十事畧言昨紫荆居庸等關旣不能禦虜之入又  
不能遏虜之出雖名關塞實則坦途蓋士伍單敝亭



障缺敗。蹊隧縱橫而然。非朝夕之積也。宜增兵慎防。  
繕亭障塞蹊隧。如古者畫境分守之制。因其陸地。則  
縱橫握塹爲地網。因其水泉。則隨處停瀦爲水櫃。或  
多樹榆柳以制奔突。或多招土軍以助官軍。往降胡  
多留居京甸。授官給俸。非我族類。其心必異。故昨  
或衝關塞。奔歸故里。或乘機便。肆爲寇掠。今宜乘大  
兵方集。遷徙其衆。遠居南土。禁其種落。毋爲婚姻。變  
其衣服。被以華俗。或以爲兵。使與吾中國之兵。部伍  
相雜。或以爲民。使與吾中國之民。里甲相錯。庶可省  
俸給而無後憂。當是時。兵尚書謙以忠力爲



天子所倚信柄國昌平侯洪奏請遣都御史通出鴈門  
護輿通意不欲行。疏言謙洪本建此畫獨委難於臣。  
乞令與臣俱。謙卽疏言。今國家多事。非臣子辭難  
之日。臣謙諳山西事。固當往。請得行。

上不許。仍命通謙奏城昌平以衛山陵。城臨清以襟  
喉漕河。而獨石馬營等八城殘未復。衆議欲棄之。謙  
持不可。曰。獨石棄則宣府懷來不可守。宣府懷來不  
可守則京師孤矣。命都督安往鎮。遷給事中盛以  
叅政贊軍。於是安宿師龍門關。且戰且守。而盛列上  
利害可興革者八條。次第行。乃設暖舖便行旅。均蔬



圖給將士。贍死扶傷。興學練士。請官給買牛種。摘戍卒不任戰者。驅之耕。課歲糧。佐興邊。大懽洽而完。當是時。大寧地既以委三衛夷。諸夷裂險阻。闖門庭。時殘我吏民。而要官賞自若。喜峯密雲白羊諸屯。僅縮縮自保。在宣府。譬左臂。瘵而執孤。在盧龍。譬後背。偃偻而前。難任。在遼海。爲扼吭。於八陵。爲左腹。迫切憂。土木之變。三衛夷寔鄉導以行。及也。先弑其主。脫脫不花而自立。遣使貢。少保謙言也。先惡不可悔。其名朝貢。或以憊我。不可狃也。獨議邊大同爲京北巨鎮。爲山西鴈門。倒馬等關。一帶藩籬。而遼東宣府。



延綏寧夏甘肅竝稱要害。一處稍挫。互相動搖。不可不備。近都御史鄒來學議。自永平山海至豬圈頭。凡千三百餘里。新營堡三十四。墩塞百一十七。營委指揮一員管束。每二三營。或四五營。選把總一員提督之。諸營堡內。簡其銳。分四屯駐操。無事時不守關。獨專訓練。有警。照平日所分信地策應。而輕捷耐走。知地里。便藏伏者。聚一營爲緩急使。諸關重置。置闌馬石。墻布渠落。使峻陡狹隘。旁積木石。而分將較塹防之。墩臺連絡。烽火相望。寇小至。營各駐操。毋動。獨本所定策應營赴之。寇大至。始通調赴敵。所至左右營。倚



前捕後爲截勦計。如此則我兵乘險伺便。物力不屈。彼衆雖暴。譬蛇豕投穿中。亦安所得肆哉。其密雲東。自河口。至墓田峪。路經八百餘里。關七十。墩塞百五十六。營堡八。其沿邊平漫地。皆脩削偏坡。其關口培薄。增卑。深壕塹守焉。其分地。內官博。御史斌。鎮守古北口。古北口。遶東。都指揮玖。主之。古北口。遶西。都指揮興。主之。其潮河川。龍王峪。五寨。地平漫。難隄防。平居畫地而守。然且不給。卽有警。何措。今照石匣驛。於東西地里適均。饒水草。可屯營處。建駐操營。其中取海運官軍。及近京衛備京操官軍。摘屯營團操。便而



議復爲上言大同府四州七縣民生長邊安便其俗  
習性勇悍慣戰而迤南譎戍衛所軍苦逃亡卽清勾  
徒擾况清軍不足因靠愚民而大同府州縣他戍卒  
詣臣言地方艱難得就近衛補伍願自備鞍馬詭殺  
賊自效不敢妄支糧賞臣愚以爲國政有經權而邊  
情有緩急今大同急矣如因人情所欲而權之令大  
同等府僉附近軍實衛多則另立衛所分轄仍豁除  
其原隸衛所籍名毋清勾則士卒免離背鄉井之苦  
家室田作撫卹而教練之一旦有警祖宗墳墓宗族  
產業之故縈其中心將樂戰効死其與調山西河南



卒。主客堅脆。功相萬也。皆報可行。當是時。諸籌邊固  
圉之畫。井井中要會。故邊鄙不聳。民忘大創焉。時大  
同一老卒。訟定襄伯登承。勅命掛印總兵。而副都  
御史年富。倚風憲。竝坐專號令。爲越職不法。下尚書。  
少保謙糾言。昔楚田穰苴。以布衣監貴臣莊賈軍。賈  
違法。穰苴立斬賈。而破秦晉之師。唐裴度以御史中  
丞督淮西軍。所督者皆名王上公。爲使相者也。用平  
淮蔡。

朝廷酌古今之宜。用之職。大臣克提督。自總戎而下。咸  
聽節制。號令賞罰。得守便宜行。都御史爲朝廷風



紀之司於侯伯無屬坐總兵官左。固當且卒安得言而妄言撓軍當誅。詔誅卒。蓋是時大同卒業橫放。不制如此矣。微廟畫將法制主用俱失。豈復有軍哉。時都御史秉督邊儲。賦牛種給貧者。督之耕塞屯。日起邊儲克足。會瓦刺入貢。秉疏言迤北使臣三千人馬駝畜四萬餘匹。入貢外。令存養宣府。支草料。臣按宣府草不過二十萬束。料不過二萬石。給我士馬。然且不足。其何以供虜。往永樂宣德時。虜使進馬官。驗不堪者。令退牧虜地。毋入境。住劄得窺伺。正統間。許牧大同。故虜得調知地險。數犯邊。今虜畜多。恐其



計不止爲國費。蓋慎防如此。已瓦刺以前所掠男婦詣邊請易米。朝報許大口一石。小口五斗。報下。虜

不易。秉口與之粟石。軍吏以違制爭。秉曰。何忍使

吾赤子爲夷人俘耶。專之而得罪。不敢辭也。事聞。

上賞歎。已劾總兵紀廣。旨下。言邊圉孔亟。毋得以微

文掎大將。下御史覆報。召秉還。言官交章言以邊將

故還總督。後無以明威。秉得留。天順中。虜寇其涼。大

學士賢請起前都御史竑督軍。明年。叅政尹旻以虜

退河開。請罷師。議者懼有後警。難之。賢曰。兵在外。可

暫不可久。暫爲壯。久則老。且虜安可常。若虞其復來。



宿大兵不解。是無終已時也。今陝民疲困已極。不及河開時罷軍。寬其供億。民必逃。民逃則軍乏興。雖欲久縮師無繇也。且今歲邊民不得耕。邊愈益匱。當如邊何。莫若勅陝西軍屯耕境上。嚴爲防。諸調卒盡撤可也。師得罷。固原土達滿四者。國初歸附羌也。處平涼固原間。令闢荒穢以居。以畜牧射獵爲生。號蒲家營。成化初。爲官司所名捕。索之賄而反。據石城。不數月。有衆二萬。石城山四面皆峭壁。高數十仞。頂平廣。可容數千人。詔合寧夏延綏兵討之。失利。賊益負固。詔都督劉玉。總兵都御史項忠督師。與巡撫



都御史馬文升合勦賊。賊走壁。阻深巖。不出。伏羌伯毛忠怙勇前仰攻。中矢石死。軍驟退。提督忠親卽陳斬千戶以徇。陳乃定。會彗星出西方。廷議洶洶欲濟師。忠上書言賊前四出攻剽。多傷害。難嚮邇矣。今入山自保。譬虎已投筭。卽咆哮無所用之。我師憑仗皇威。氣直以壯。今圍守甚固。破壞可必。無爲濟師。且京軍脆怯。卽至無所用。兵志曰。禁祥去疑。昔李晟討朱泚。熒惑守歲。卒以成功。今彗西出。殆其類也。於是閣學士時毅然任以爲觀。項䟽曲折。知賊不足平也。已我師移據水草以困賊。賊益困。相持者百日而定。賊愛



將提虎狸者夜遠汲被擒忠懼之乞宥死自效乃假  
辭色諭逆順慰勞之虎狸請旦日誘使出戰設伏當  
可擒忠大喜示賞格遣去明日整師進方事急時中  
滿四果出戰伏發施擒斬虜七千人  
議者扇訛言難自持而賊氣驕日率驍將出劫營冒  
陳小大百餘戰忠披甲冒矢石親督師不少退文升  
頗勸其自愛忠曰奉命討賊久無成功死所甘心何  
謂自愛平凱還具奏言固原延袤千里水草豐茂畜  
牧蕃爲賊巢穴爲北虜所出沒此要地當守而惟一  
千戶所厝其間軍少勢孤此劇盜之所以陸梁也州  
北西安廢城距固原三百餘里爲虜衝宜添設衛所  
以填之便奏可而事平河套者黃河北折入虜中已



復南。所謂千里而一曲者也。周漢朔方。秦所取匈奴河南地。夏赫連勃勃之統萬城。唐張仁愿所爲築受降城者也。宋趙元昊據寧夏。因以爲國固。套三面阻河。土沃饒畜產。可耕種。南切近榆林。東至山西偏頭關。西抵寧夏。幾二千里。南至邊。北至河。遠者八九百里。近二三百里。國初卽受降故地。營東勝。跨河北以衛套中。我人登東勝城。一憑望。則平沙漠漠無林阻。見百十里而遙。虜匹馬一人不能隱。望城輒慟哭引去。而套爲內地。虜居沙漠。河限之。伺冰凍乃入。冰欲解輒去。而邊人惟獨防秋冬。春夏得以其餘力田。



套中脩城堡設防。虜往來盜邊。或窺遼東。或犯宣大。或走寧夏。莊浪。甘肅。伺間入。非久輒去。而延慶爲內地。迨東勝內徙。棄故險不守。而虜始渡河。景泰初。虜始徇延慶。猶不敢深入。天順間。阿羅出始。瞞知河套地肥美。時出入圍獵。尚不敢久居。成化初。毛里孩寶始劫中國人爲作使。因入套。遂駐牧其中。大同總兵楊信疏請勦。閣學士賢主其議。下兵部。會官議搜套。務盡絕其本根。且言秋方熟。虜必入掠。鄜延環慶間。宜推擇將帥。統步騎大舉疾入。得盪平。部請召信還。受成筭。會毛里孩侵大同。陽求貢而罷。於是自孤山。



至花馬池千五百里。自花馬池至高橋。不下五百餘里。退無所據。進不可入。分兵而備。則勢分。載糧而行。則不繼。遂棄寧夏外險。莫之守。守南河矣。又明年。給事中程萬里言。兵志有言。先發制人。後發制於人。毛里孩以土達嘯聚。日夜伺欲犯邊。臣伏計河套距邊僅二三百里。彼客我主。以客就主。以主制客。此可敗者一。虜自恃衆強。併吞諸部。志滿氣盈。馳驅不息。士馬億頓。此可敗者二。比聞散逐水草。兵力四分。此可敗者三。誠選京師宣大勁兵數萬人。擇驍將統之。嚴賞罰。先謀知所忤。出不意。徑潛擣其巢。破之必矣。昔



李靖以騎兵三千破突厥其事也。今及虜未發，宜早圖而欲守，則飭兵毋徒以文移故誤邊。下廷議，命吏侍郎盛往行視，議方畧上。盛還言：套地沙深水淺，難駐牧。春遲霜早，亦不可田耕。故搜河套復東勝，皆事勢所難。惟增兵守險爲長便。宜令守臣剗削邊牆，增築城堡，收新軍以實邊，而選士兵助之。事復寢。後五年，兵尚書白圭復白發其議。總都都御史王越欲懈虜，且自以爲功。議延緩士卒衣裝壞馬死者過半。請暫休，得而奏。越旣召而虜擁衆驟渡河，詔武靖侯輔及越刻日行會。侯輔病，越獨將。諜知虜出，它掠。



遺老弱于廬。可擊。乃選精騎萬餘。自塞齋七日。糧盡。伏夜行。每二舍輒伏兵數百人。使休以待事。行四日。天未明。至虜帳。縱火焚其帳。而萬騎齊蹂之。且擊且射。斬首三百級。奪牛羊器械無算。虜巢穴諸畜產畢盡。虜聞。自外疾走還。則廬帳皆燼。則相向慟哭。而悉力追我師。越結陣徐行。殿者陽與戰。引而南。至伏中。伏前後發。掩擊大破之。虜患猶未憚。再闔再遇伏。乃大慟度河。遜自是邊無虜患者二十年。而言官糾以爲幸。勝濫功。

上曰。濫功固罪。虜遠遁不無功。詔勿問。明年始加宮。



保增奉掌院事。越抗言將士功大賞輕。乞移已官償之。不報。後以從大闡直出大同。襲破威寧海。顧得封威寧伯。崔太史銑歎以爲威寧出奇取捷。慮成而後發。發必中。於邊功固甚偉也。夫忌功媚才。心慘於戈戟。諒矣。先是延綏紀功兵郎中楊琚言。延綏慶陽二境東接偏頭關。西至寧夏花馬池。相去二千餘里。營堡踈兵少。而套虜數爲患。臣訪有百戶朱長者。年七十餘。自幼行游河套。熟其地。謂臣言套內地廣腴。有鹽池海子之饒。葭州民多種食其孺地。正統間。寧夏副總兵黃鑑奏欲於偏頭東勝河西岸起一顆樹。至



榆溝紅鹽池。至寧夏黑山背等處。立城堡十三墩堡。七十三。東西七百餘里。雖隔一河。而氣勢直與偏頭寧夏接。爲扼虜而衝其腹心。時議者以地平漫難據。已之。誠將延綏一路營堡。移置直道中。雖不免暫勞。實永世之利也。詔會官議。延安知府王鑑言。神木府谷等縣堡。安邊定邊等營寨。相去闊疏。撫按分巡官罕有至者。士卒爲官旗侵漁虐使。至衣食不給。戰馬不飼。器械不脩。虜猝至誰禦。乞行撫按分巡官戢邊。詔兵尚書王復行飭邊。復疏言。臣奉命東自黃河府谷堡。西至定邊營。抵寧夏花馬池。東西縈紆行。



二千餘里。平漫多沙。無隘險。止藉墩臺城堡爲守備。舊城堡二十五處。地錯互不均。遠或百餘里。近或五六里。兵馬屯操。反居其內。人民耕牧。顧在其外。遇虜警。傳報倉卒。卽調兵無及。虛聲應援而已。其西南抵慶陽等處。遠至五六百里。烽火不接。其邊比一帶。墩臺稀濶。難瞭望。臣與鎮巡總督等官會計。府谷等十九堡。俱極邊要地。必增築移置。庶幾可守。及今聲息稍寧。先撥軍餘採木。俟春暖併工。府谷堡移芑州舊城。東村堡移高漢嶺。饗水堡移黑河山。土門堡移十頃坪。大兕鵠堡移響鈴塔。白洛城堡移甄營兒。塞門



堡移務柳莊。不惟東西相直。道里徑捷。而各依水草。以便駐屯。其高家堡至雙山安邊定邊等營。相去懸隔者。合於該交界地。柳樹澗瓦剎梁等處。各添哨堡。於隣近營。擴官軍哨守。其起安邊營接慶陽起定邊營接環縣。隨形勢爲墩臺。共三十四坐。溝塹高深。足以防阻。城堡寬大。足積芻粟。容容兵。臺墩稠密。聲執聯絡。而緩急足策應也。詔允行。當是時。國初健將士馬旣盡。虜入套。盤結居內。我塞垣覆在其外。議者爭言脩營堡墩臺爲內防計矣。

金溪曾漢曰。按蔡元定言。長安龍脉

發於崑崙經回黑水綿絡至西橫山。始起祖宗轉紫瀦澤自西而東。盡雍州之境。今平涼西靜寧州之北



連山綿亘八百餘里其冢面橫平可以立營衛其西  
條爲西戎之祖其東條爲長安之祖四面有建瓴之  
勢西可以制西戎北可以制北狄東可以衛長安周  
秦漢之都關中者以山河四塞而以西面東制諸侯  
也唐末而諸戎據有之宋范文正公王招納叛羌爲  
漸復橫山之謀以斷賊臂故軍中有破膽之謠以議  
和而廢宋遂不振國朝亦舍橫山之阻而關中不可謂完矣其後都御史余子俊  
撫延綏行視邊相度邊形勢往往徒步盡數十里咸  
得其要領乃畫便宜上報可下於是東起清水之紫  
城西至寧夏花馬池築邊牆延袤二千里每二三里  
爲敵臺墩砦相連比不絕中空處築短牆橫一斜二  
如新月狀得自蔽及依高山折崖隨地畫便刻削累  
築挑塹延引爲邊牆凡爲堡十二崖砦八百餘墩九



十餘。再閱月而訖工。先是正統中。都督王禎實始城  
榆林。未設衛。至是子俊益廣其城。增三十六營堡。置  
榆林鎮。屯重兵。請盡釐陝人有伍籍詭落者。若罪謫  
南戍。子孫不能南風土者。徙實之。擇其才子弟。爲建  
學。立官師教之。俗不習藝圃。多棄地。則教以樹藝。自  
是蔬果於內地等。開界石外地。興屯田。歲得糧數萬  
石。事皆創始。而經畫煥然。自是榆林壯實爲雄鎮。已  
改尚書督宣大軍。子俊具疏。言臣熟觀大同地方。於  
宣府等。而山川平曠。惟車戰爲便。夫自古命將出師。  
誅暴禦亂。得見可而進。知難而退者。車戰佐之也。大



率以萬人爲一軍。車五百輛。十步卒駕之。行則縱以爲陣。止則橫以爲營。而以鹿角又補其缺。器械饌糒。不勞而具。合衆對壘。威用自倍。用以持久。伺敵形便。或首挫其驕銳。或尾擊其情歸。猶之運有足之城。策不飼之馬。此億萬年守邊簡易之法也。復具圖本五上。報可下。於是議邊者言戰車。當是時。撫寧夏都御史徐廷璋。亦脩築寧夏邊。邊固完。而馬端肅文升時。巡撫陝西。人頌稱關中三巡撫云。按子俊稱名臣久矣。近武進薛應旂嘗兵備延緩。著論言。自子俊脩築邊牆之說起。先後相踵。費財何止巨百萬。而浮沙易傾。邊牆實未嘗有。唯剗削設險之法。庶幾可行。其爲戰車。費不貲。亦重遲窒礙。不可用。成化中。都御史李賓嘗請製偏箱車。



兵部尚書項忠言陝西諸邊收蓄兵車數千輛及京營亦當因定襄伯登之言製小車二千五百輛日又無用俱廢然以車爲不可用稽之於古如柔然侵魏而太武以之造大漠突厥寇唐而太宗以之見大捷如以車爲可用唐房琯有陳濤斜之敗宋神宗時契丹入寇取兩河民車爲備沈括以爲車行日不過三千里若被雨雪跬步難進今不習車戰又矣恐一旦拂其所素習乞如賓言遣御史及工部官督工如式先造車十輛鹿角叉十具送教塲仍令賓會同內外官驗視如虜輕騎剽掠何以分追阨險邀遮何以乘禦開闔奇正之妙推挽進退之法俱講明以聞車成會驗覆奏言所造車若對壘安營可以禦矢石防衝突若追奔逐北登高致遠恐難行

上曰旣登高涉險不便其已之而近余總兵大猷制兵車以獨木爲輪人推挽可上下塹指揮如意輔以強弩神銃擊堅及遠翼以簞笊龍盾虜弓矢弗及蓋以馬陵之戰車兼李陵之步卒而參以衛青之縱騎最爲備篳車成以車百兩步騎三千挫虜十萬於安銀

堡弘治中

朝廷清明中外大臣皆協心體國爲經



遠計而馬端蕭文升劉忠宣大夏相繼爲本兵文升具疏薊宣府大同三鎮既有鎮守太監而各路復有分守守備監鎗等內臣三鎮關塞城堡遠者相距不過一二百里內臣至數十員每員役占軍士竝數千人大半多納月錢絕其操練防邊鎮巡不能禁革因以掣肘乞取回以靖邊已陞平涼廣開城爲故原州設鎮置總督其中而都御史許進督大同數條邊事上文升知進材輒覆允戎務脩飭虜酋小王子憚進名數貢馬爲好進善撫之故河曲無虜患而內地稍寧然東勝終已不復法久復玩邊牆日頽薄不治而



虜酋乂加斯蘭每歲八月自西河入套中圍獵春河  
開出剽宣大以爲常而承平益久兵益脆不任戰七  
年火篩寇固原入花馬池詔起都御史楊一清總  
制三邊於是始復申搜套復東勝之議條三策上一  
議守守虜所必入一議戰戰虜所必敗一議攻攻虜  
所必救疏畧言善戰者必知分合善守者必審常變  
今此諸邊所患在兵多而權分各據利便自分彼此  
一機可乘而不乘兵當合而不合其輕率寡謀者則又  
知常而不知變往往墮賊計中將今沿邊至腹裏分  
爲四路以定邊興武營花馬池靈州一帶爲藩籬以



石溝鹽池。常州萌城山城一帶爲門戶。以固原黑水口鎮戎所。西安州海刺都一帶爲庭除。以安定會寧隆德平涼一帶爲堂室。行令總兵叅遊分地駐劄。聲勢連絡。併力防禦。分布既定。謹斥堠。據要害。守水頭。以待會寇。始至。謹勿與之爭鋒。入城堡以避。待其深入。左右鎮襲踪而躡其後。據險以扼其衝。張疑以分其勢。虜所欲當。則堅壁清野以老之。使不得逞。待其情歸。然後以重兵衝其腹心。出其後。背晝則追鋒以絕其路。夜則斷枚以劫其營。以我四路應敵之兵。當彼千里趨利之賊。必且挫衄。豈能善其歸哉。又言虜



自延綏大同官軍失利之後。志驕氣溢。橫肆無忌。有  
年所矣。今冬河凍。必深入套。自非撲搗巢穴。陝西之  
患。未有已也。臣非不知來去戰守。乃禦戎之常。犁庭  
掃穴。非聖王之得已。然商高宗有鬼方之伐。唐太宗  
有頡利之擒。沉河套。本我內地。而彼據以爲巢。此田  
中之禽。利用搏執。固非稱兵於陰山之窟。濺血於不  
毛之地。喜功好大者之所爲也。臣愚以爲今宜調宣  
大二鎮遊騎官兵。於延綏中東二路。任劄聽張安節  
制。虜若止在套。駐牧。未嘗擁衆內侵。則嚴兵自守。決  
不輕敵。如仍前深入。原擬中路邀截之。兵固壘不動。



行令東路叅遊部爲奇正。列車爲家。擇形便爲營務。使聲勢連絡。前後相望。以進搗之。旣近賊壘。奮勇疾前。衝其腹心。捨其羸老而戮其壯狡。奪其鎧馬。而縱其牛羊。大兵仍堅整嚴備。不許輕動。待我兵還而虜獘突。然後或爲聲援。或爲羽翼。或爲殿而霆擊之。則我雖退而兵漸增。彼旣遠而勢自屈。前軍勞而退。則先行使無繫累。後軍逸而進。則殿後使有餘勇。振中國之威。洩生民之憤。孰快於此。但兵貴神速。機防先露。進退之際。間不容髮。乞勅兵部詳議亟行。已又言臣聞防邊之計。莫危於戰。莫安於守。陝西各邊。延



綏城堡據險。寧夏耳肅。河山阻隔。賊雖侵犯。爲患猶淺。惟花馬池至靈州一帶。地里漫衍。城堡稀疏。兵力單弱。一或失守。虜衆圻牆而入。犯我環慶。寇我固原。深入我平鳳臨鞏。其間土漢雜處。儻兵連禍結。內變因之。根本動搖。誠非細故。此所謂膏肓之疾。腹心之害也。成化中。巡撫都史徐廷璋。余子俊等。脩築邊牆。虜不爲患。邇自花馬池圻牆而入。戕破內地。始蔑我邊牆爲不足畏。寧夏鎮巡屢乞築濬。提督都御史史琳又乞於花馬池。肅州。設立營衛。總制尚書秦紘。僅添脩四五小堡。虜復自花馬池。清水營深入。殘破。魯



不能少有禁禦。臣始至鎮。以坐談不如親見。躬親閱視。廣集衆思。兼收羣策。其急務約之四端。脩濬牆塹。以固邊防。增設衛所。以壯邊兵。經理靈夏。以安內附。整飭肅州。以遏外侵。當務之急。莫先於此。夫受降據三面之險。當千里之蔽。張仁愿之所以距突厥也。舍受降而東勝。已失一面之險矣。又輟東勝而延綏。則以一面之地。遮千餘里之衝。遂使套中沃壤。爲虜巢穴。深山大沙。勢顧在彼。而寧夏外險。反備南河。此陝西虜患所以相尋。而莫之能解也。誠復守東勝。因河爲固。東接大同。西接寧夏。使河套方千里之地。歸我。



耕牧得屯田數百萬。用省內運。固其上矣。卽不然。及  
今將延綏寧夏一帶邊防。設法整飭。雖非上計。猶愈  
無策。醜虜聞之。未敢輕犯。而我得休養生息。以爲後  
圖。則東勝又豈終不可復也哉。故臣竊以城延綏至  
急也。自延綏定邊營迤東石澇池起。至寧夏橫城止。  
共三百里。沿途舊墩臺七十一座。間多填塞。獨興武  
庸水屯卜刺紅山四堡。切近邊牆。易於防護。其餘城  
堡俱各絕遠。聲勢隔越。且垣低堡淺。墩臺稀疎。節被  
達賊窺伺。中無大兵阻遏。賊衆填溝而進。開它邊牆  
一日可二三十處。墩軍往往逃竄。烽火不接。縱使微



召客兵。而牆外平漫。黃沙白草。彌望無際。賊衆動稱  
數萬。我軍無險可據。難以遏其初至之鋒。長驅一日  
夜。則已至固原矣。爲今之計。必於舊牆內外。幫築高  
厚牆。外每里添築墩臺三座。每座相去百二十步。傍  
堡於空濶要害。有水草處。增添小堡。高厚丈尺。畧與  
邊牆等。他所空闕。仍添築墩臺。挑濬壕塹。設治鈴柝。  
廣張旗幟。令連絡相應。分委守邊。叅遊協同守備。各  
照所轄定舖分防護。其定邊安邊營迤西一帶。責成  
巡撫都御史。依所計度。應築牆者築牆。應剗削者剗  
削。一體脩治。務使邊有備。而腹裏無虞。萬全之謀也。



至若寧夏一鎮。西有河山之險。東無溝塹之阻。顧西  
設寧夏一衛。東止新設花馬池守禦千戶一所。虜賊  
大舉。必從東入。不惟無險可恃。抑且兵力單寡。豈添  
設衛所屯耕防守。則執不偏重。而邊牆可久。兵皆土  
著。而人情可安。惟是靈州。北臨廣套。西控大河。誠寧  
夏之襟喉。中原之門戶。達賊出沒之重地也。靈州不  
守。則寧夏隔爲外境。而環慶勢孤。無環慶。則無陝西  
矣。臣頃巡視城池壕塹。悉皆廢弛。夫以寧夏之地上  
有無備之形。下有可畏之執。失今不圖。將來內變。不  
止虜情當慮而已。洪武間。有土達土民六百餘戶。自



歸設守禦所綏輯給之田地草場使得耕牧徑屬陝西都司一遇有警土達輒自備鞍馬報效累有克獲後奏革本所遙隸寧夏土民亦隸寧山衛經歷司所司不知存恤草場爲有力者豪奪馬匹站死不復追陪人畜彫耗死徙居半又於所屬路阻黃河虜賊外侵科差內擾控訴無所自非靈州改設守禦所如故而土民聽本所吏目帶管欲撫綏無繇其環慶兵備副使止轄慶陽事務簡甚况兼理靈州鹽池距慶陽特遠實難遙制乞將環慶兵備改駐靈州練軍理訟撫安土達兼理鹽課聽陝西寧夏巡撫節制則軍民



免十羊九牧之擾。土民有趨利避害之望。又常州地廣實虜要衝。今城池坍塌。守既不嚴。戰乃無兵。况密邇螺山。慶府墳塋在焉。先年恭王墳。爲虜掘發。自非添設常備之兵。貽患未已。而慶府中護衛。若儀衛司。旗較舍餘。別無差用。比之秦肅二府。千里備邊。勞逸懸殊。今若摘於常州。操守保障。最爲長便。且以慶府擁衛之人。保其先王體魄之地。體國之忠。奉先之孝。大義兩繫。自難他辭。又考按圖冊。兼廣詢訪。寧夏黃城北。黃河東岸。舊有邊牆。俱棄不守。乃於河西別築墩臺。繇是套賊多寡。遠近緩急。無自覺知。又因黑山



營被虜攻圍。遂移平虜。繇是平虜遂爲極邊要害。居民往往不得耕牧。殊不知撲捉墩軍。窺伺城堡。乃虜寇常事。顧吾所以待之何如耳。吾能往。彼亦能往。我退。彼進。自然之勢也。今河東墩臺。旣不可守。使賊乘凍渡河。則西岸墩堡。獨不可盜窺之乎。虜窺黑山。可棄不守。使賊近窺平虜。亦將併棄之乎。然則河東邊牆墩塹。誠宜幫築。與河西煙火相接。而河西黑山營。挑選精銳。屯宿按伏。爲平虜聲援。則封守慎固之道也。但陝西財匱民勞。脩邊之役。人多異議。然利害有輕重。關係有大小。大事可成。則小費不足計。遠效可



圖則近怨不足恤。自古之舉大事者。未有一勞而後以永逸者也。世之論邊者。主於戰以爲功。臣亦非敢忘戰者。方將蒐選三軍。策勵將士。脩車馬。備器械。儲糧饌。明斥堠。以待虜之近塞。當督率諸將。共行天罰。雖成功在天。所不敢必。而臣不敢避也。乃今顧以邊牆爲言者。受恩深重。自當爲國遠圖。今套中無賊。腹裏有秋。人民稍安。正可有爲之日。欲及時經理。毋貽後憂焉耳。奏可。而一清銳意經綜。凡糴餉費銀十餘萬兩。起役費戶曹銀十六萬。及諸犒賞藥餌轉運木石。皆精神窮注。計慮周悉。會



